


LIBERTI FROMONDI  
IN ACADEMIA LOVANIENSI  
S. TH. DOCT. ET PROF. ORD.

LABYRINTHVS  
SIVE  
DE COMPOSITIONE  
CONTINVI  
LIBER VNVS.

Philosophis, Mathematicis, Theologis  
vtilis ac iucundus.

6  
34 D  
6



*edit. Jean Lemaire, 1560.*



ANTVERPIÆ,  
EX OFFICINA PLANTINIANA  
BALTHASARIS MORETI.  
M. DC. XXXI.

3-5

3



VENERANDO DOMINO  
DECANO  
CETERISQ. VENERABILIBVS  
ET  
ERVEDITISSIMIS DOMINIS  
CONCILII  
FACVLTATIS ARTIVM  
STVDII GENERALIS  
ACADEMIÆ LOVANIENSIS.



LIBER iste non iuit, sed cucur-  
rit ad Vos materiâ ducente,  
VENERANDI ET ERV-  
DITISSIMI VIRI.

Philosophus enim est, li-  
temque super perplexissimâ  
disciplinæ eius parte instruxit, quæ non ad  
aliud quàm vestrum, id est, summorum Phi-  
losophorum tribunal debuit deferri. Si enim  
ingeniorum vestrorum selectissima acumina,  
si Scholasticas exercitationes, si incredibilem  
discendi docendiq; diligentiam aspicio; nihil  
simile

simile aut suppar (audacter dicam) habuere  
 veteres illæ, tam publico Orbis plausu cele-  
 bratæ olim Athenæ. Si paucissimos etenim  
 ibi eximios faciam, reliqua tenebrionum, &  
 in ipso nature meridie caligantium turba fuit,  
 quibus hypochondria atrabile paullò largiùs,  
 quàm verà Philosophiæ luce mens perfusa  
 erat. Ita dico: minùs altè in intima illa Philo-  
 sophiæ adyta penetrauerunt, etsi totam vitam  
 per labyrinthos eius circumagerent, & diu-  
 tiùs in vnâ aliquâ eius particulâ, quàm Vos in  
 vniuersâ, insisterent. Ecce enim diuinus ille  
 (ita magnificè appellant) Academia Princeps  
 quinquenniû impendi vni Dialecticæ voluit,  
 & quidem *μηδὲν ἄλλο πράττειν, ἀλλ' ἀντιστάσεις γυμ-*  
*ναζομένη τοῖς περὶ τὸ σῶμα γυμνασίοις, ἢ nihil aliud*  
*agente, nisi ut certis temporum vicibus, corporis*  
*cura & exercitationibus vacaret.* Adolescenti-  
 bus deinde & iuuenibus omnibus ciuitatis  
 suæ Scholas Dialecticæ claudit, solisque viris  
*τριάκοντάτεσι, triginta annos natis* iubet aperiri.

Plat. l. 7.  
 de Rep.

Vos minore, & biennij diligentia adole-  
 scentes & pænè pueros, non Dialecticis tan-  
 tùm illis spinis, sed omni Philosophiâ sic vn-  
 dique instruitis, vt eruditionis miraculo, mul-  
 ti viri



iviri docti sæpè mecum olim obstupuerint,  
uì fieri posset , vt adolescentia antè rudis  
et ignara , intra breuissimi temporis fugam,  
antum animi cultum , totque rerum abditis-  
imarum cognitionem raperet . Sed vestra  
edulitas & ars hæc est , qui titubantibus, fir-  
no gressu ; allucinantibus , clarissimâ ingenij  
uce viam tam solerter & sollicitè præitis.

Hunc deinde tam celerem & currentem  
loctrinæ profectum plurimum incitat arcta  
illa & compressa quatuor Pædagogiorum di-  
ciplina, quâ iuuenilem lasciuiam intra studij  
ui stadium & scamma biennio attentissimè  
& castigatissimè coërcetis. Monarchica de-  
nique illa in Promotione ad Licentiam ratio,  
quâ omnes omnium Pædagogiorum discipu-  
os in vnum agmen confunditis, vt vnus uni-  
uersorum Princeps sit , non acuit , sed vrit, &  
admirabiles discipulorum ac Magistrorum  
liligentix faces subdit.

Hæc & alia id genus sunt, quæ Philosophiæ  
vestræ famam latissimè sparserunt, & extule-  
unt quousque nulla in totâ Europâ Acade-  
mia ( si peregrinis, nec adulantibus credere  
volumus ) aspirare possit . Ceteræ enim ferè

Naziāz.  
Oratio-  
ne 20.

è longinquo celebres & magnæ, vbi acceſſe-  
ris, reuileſcunt, aut infra nomen deprehen-  
duntur. Nam etiam ecce, D. Baſilius Athenas  
ipſas olim veniens, ἐζήτει τὸ ἐλπιῶν, καὶνὴν μακα-  
ρίαν τὰς Ἀθηναίων ὀνομάζων, *quærebat quod ſpe ſibi ef-  
finxerat, inanem felicitatem Athenas appellans,*  
inquit dilectus ille condiscipulus. Non ita de  
Academiâ Louaniensî: quam quicumque non  
limis oculis aſpicit, famâ ſuâ maiorem è pro-  
pinquo dicit.

Cic. l. i.  
de Finib.

Hæc etiam ab vno iam ampliùs ſæculo laus  
fuit Philoſophiæ Louaniensîs: munditiem  
quamdam orationis amauiffe, & deterſâ paul-  
liſper ceterarum Academicarum barbarie, ve-  
terum Athenarum exemplum dilexiſſe, in  
quibus vnicus Epicurus fuit, qui *orationis or-  
namenta neglexit*, inquit M. Tullius. Malè.  
nam, vt mentem decet eſſe mundiffimam, ait  
quidam; ita orationem, quæ mentis eſt imago,  
ſimillimam oportet effingere. Sed Epicurus  
ſpurcâ mente, talem etiam dictionem amauit  
(aut certè, quia aliter non potuit, *neque litteras*

Epist. ad  
Magnū.

Lib. i.  
Macro.

*didicerat*, vt D. Hieronymo placet) ἐν χαμαι-  
τυπείων, & ἀπὸ μέσης τῆς προσδουχῆς, *ex proſtitulis &  
mendicabulis* collectâ, ſi Cleomedem audimus.

Vobis

Vobis potiùs mundi & elegantis Aristore-  
is vestri similitudo placuit : de quo alicubi  
Quintilianus: *Quid Aristotelem* (in eloquen-  
tiae laudibus) *commemorem, quem dubito, scien-* Lib. 10.  
*tiam rerum, an scriptorum copiâ, an eloquendi sua-* cap. 1.  
*ritate, an inuentionum acumine, an varietate*  
*verum clariorem putem?* Omnia quippe ex æ-  
uo ferè admiranda, & meritò à Vobis pari  
nitatione coniuncta, quæ malè aliorum olim  
firmitas diuisit.

Mathematicis etiam vbique Aristoteles  
interspersus, id est, calce & plumbaturâ, quâ  
alcherrimi ædificij partes alligantur, & sine  
quâ Philosophiam vestram dislutam aut malè  
erentem omnes intelligitis, ideoque gluten-  
tud, quantum necesse, sedulò inculcatis.

Reiecit tamen hoc olim, vt omnia pulchra  
honestâ, Epicurus, & Philosophiam ἀμαθ-  
νη, id est, ἀμαθον ἀνδρῶν τὸ βέβη, *arenam sine*  
*lce*, nobis condidit. Fusca enim illa mens  
æclarissimarum disciplinarum lucem non  
piebat, respuebatque quæ non intelligen-  
t. Res quidem ipsa loquitur; dicet tamen  
iam D. Augustinus, si magnum testem au-  
te mauultis. *Quis, inquit, Geometricas litte-* Lib. de  
Vtilitate  
credendi  
cap. 6.  
*ras*

*\* Euclidæ tamē, opinor, dicere voluit: nam Archimedes Epicuro aliquantō posterior fuit.* *ras\* Archimedis legere, magistro Epicuro, aut discere voluit, contra quas ille multum pertinaciter, nihil earum, quantum arbitror, intelligens, disputabat? Nemo sanè, Magne Augustine, nemo Mathematicas, ne Philosophiam quidem, quæ sine istis mutila & trunca est, ab illo magistro discet, si sapit. Vos certè, VIRI ERUDITISSIMI, non facitis, quicumque publicâ & certiore Peripateticorum viâ ad veritatem, & arcanorum Theologiæ intelligentiam, Iuuentutem Academicam deducitis. quâ porrò incedere, omnes Theologorum Scholæ Vos adhortantur, ego voueo, & exile hoc xeniolum, non plenâ manu, ad VENERANDAS DD. VESTRAS, vnde nuper exiui, memoris & grati animi testimonium adfero.*

VENERAND. ET ERUDITISS. DD. VV.  
 deuotissimus

LIB. FROMONDVS.

*Louanij Kal. Septembr.*  
*an. MDCCXXXI.*

AD

# AD LECTOREM.



**P**AVCIS te in limine isto appellabo, Lector. Magnorum hic in Theologia virorum, nec diffiteor, mea etiam indignatio fecit hunc Libellum. Illi, inquam, mihi auctores, resumendi paulisper in manum Philosophici huius stili, quem nuper abieceram. Mirantur & irascuntur, tantam iam Luuanijs passim, deserto Aristotele, Platone, Zenone, id est, magnis illis illustrioris fama & eruditionis Scholis, ad Epicurum, in re quadam naturali (COMPOSITIO CONTINVI hac est) fugam fieri; quam, si non sisti (nec enim ita mihi placeo, ut sperare id ausim,) certe tamen refrigerari posse crediderunt, si penitus intelligeretur, quam sententia hic Epicuri non sit similis sua fronti, quamq; in ultimo suo recessu perplexa sit, etiam si primore aspectu aliter, & expeditissima videatur.

Id Libello isto ostendere conatus sum, & Lycæi, Academia, Stoa, quam Epicuri istâ pralatione proculeant, auctoritatem defendere.

Sic enim Theologia nostra expedit, qua ubique diffusis & reiectis Epicuri atomis, in continuo Aristotelicam partium infinitudinē supponit. Id apud D. Thomam, Scotum, Ochamum, ceterosq; Scholasticos, imò

\*\*\*

D. Au-

*D. Augustinum, & SS. Patres, ubi rei huius incidit occasio, cernere palam licet: quos intelligere soli illi possunt, qui ad eorum lectionem, Peripatetica & Academica sententia scientiam attulerint.*

*Quia verò sprete Aristotelis precipua causa, tenebrae sunt, quas partium infinitudo offundit humana menti; eas paulisper dispellere admissus fui, & sublustrem saltem aliquam lucem immittere, quâ, caliganti quidem acie, veritatem cernamus tamen. Nisi autem imaginationem suam in cōceptu infiniti exerceant, & quid, ac quale istud sit, utcumque apprehendere discant Epicurēi, numquam ad veritatem proficient. Eius enim exercitiij neglectu, ubique in istâ materiâ allucinantur, & (animadvertē, mecum dices) in omni disputatione, in aliquot punctorum suorum, quâ assueti numerare, decades cogitatione relabuntur, καὶ αὐτὰρ τὸ*

Arist. l.  
8. c. 13.  
Topic.

*petuntque quod oporteret probare.*

*Mathematicis etiam iucundum erit, Euclidem suum, & omnium Mathematicarum fundamenta, quæ in Aristotelem recumbunt, sustineri; utile omnibus humani ingenij, in re naturæ, caliginem agnoscere; ac discere in tenebris Fidei, humanæ rationis lucem aliquam pertinaciter non requirere.*

*Non omnia etiam, quæ in Epicurum poterant, argumenta strinxi; delectu usus sum, & raro fulmine, quàm*

quàm densâ grandine pugnare malui. Hinc ista, & id genus leuiuscula subterhabui : Si magnitudo ex punctis coalescat, non super qualibet lineâ (non enim eâ, qua duorum tantum punctorum) poterit triangulus erigi. Item : Non quælibet linea (non enim qua constat numero punctorum impari) poterit in duas partes æquales diuidi. Hac enim Postulata tantum Euclidis sunt, qua negationis pertinacia facilè possit eludere.

Ceterum materia perplexitas & inextricabilis error Libello Labyrinthi nomen fecit : et si utcumque <sup>Ancid.</sup> nos extricasse existimemus, & quantum mihi equidem <sup>6.</sup> satis, ut conquiescam in istâ, quàm undique circumfusam video, ingenij mei nocte.

Neque extra eam Epicuræi sunt, quidquid ipsi sibi de luce suâ placeant ; imò in medio adhuc Labyrintho allucinantes oberrant, licet exsilijsse se credant, cum ex Lycéo in Epicuri haram, velut ex calcariâ in carbonariam, ut dici olim solet, transfugerunt.

Sic olim Lycæi desertor, & Epicureorum additus gregi Polyanius, præter cetera Aristotelis, etiam perplexam istam continui compositionem irridere solitus, ipse dignissimus maiore risu, quoniam ἀφέντας τὴν αἰσθησιν, τὸ λόγῳ μόνῳ δαλῶειν, ἀτόπον τε καὶ μάταιον, <sup>Lib. πηλ. ἁτίμων γραμ. c. 5.</sup> sensum deferere, & vni rationi indulgere, absurdum est & ridiculum, ait vetustus interpret Aristotelis.

*Reuerà enim Epicurèa compositio, utut quodam rationis fuco primà fronte blandiatur; aliè tamen introspecta, sensum communem satis apertè ferire videtur. Aut, si non credunt, arripiat aliquis, amabo, stylum (quod miror à nemine hoc tempore factum) & rationes quas texuimus dissoluat. in magno id sanè beneficio, non in iniurià ponam: & hac forsitan concertatione plenior veritati lux oborietur, quam unicè, & sine improbo Aristotelis amore (quid enim mihi Belga cum Macedone illo Stagirità?) quarere me profiteor.*

Pacuu.      Hoc volebam, nescius ne esses. Vale.



**LIBER-**



# LIBERTI FROMONDI LABYRINTHVS SIVE DE COMPOSITIONE CONTINVI.

## CAPVT PRIMVM.

*Leucippus auctor partium indiuisibilium continui. Celebrauit  
deinde eas multis libris editis Epicurus.*



ELEBRE olim & nunc in Philosophorum  
scholis, de continui partibus dissidium fuit.  
aliis sine fine diuisibiles eas existimantibus, ce-  
teri in atomis quibusdam & indiuiduis parti-  
culis, seu micis, vt Seneca appellat, omnem di-  
uisionem tandem finiebant.

Falluntur autem qui partium sine fine diui-  
duarum Aristotelem primum auctorem faciunt: vetustior quippe  
ipso fuit, & cum ipsa Mathesi nata hæc opinio. Nam Laërtius  
Leucippum, qui Anaxagoræ par, & Democrito paulò maior fuit,  
atomorum inuentorem facit: *Ἀδύνατον ὁ ἀτομὸς ἀρχὴς  
ὑπερῆσθαι.* *Leucippus*, inquit, *primus atomos principia subiecit.* Et In Leucip.  
Lactantius: *Vbi sunt, ait, aut unde ista corpuscula? cur illa nemo* Lib. 3; In-  
*præter unum Leucippum somnauit? à quo Democritus eruditus, he-* sit.  
*reditatem stultitia reliquit Epicuro.*

Multi tamen intra aut circa eam ætatem præter istos, Leucip- Lib. 1. c. 8.  
pum secuti; & Aristoteles disertè sectam atomorum imponit Em. Generat. &  
pedocli, iungitque eum Plutarchus illis, *οἱ μὲν συναθροιστὸν ὅλον* alibi.  
*λεπτομερῶν σωματίων κομποῦσι,* qui per acernationem tenuium cor- Lib. 1. c. 24.  
pusculorum mundum coaluisse credunt. Placit.

Laërt. in  
Anaxagor.

Nec alia fortasse Anaxagoræ mens, qui aiebat, κατὰ μέρος ἐκ τῶν ἡγμάτων λεγομένων τοῖς χυρσὶν συντίθεται, ὅπως ἐκ τῶν ὁμοιομερῶν μικρῶν σωμάτων τὸ πᾶν συγκατείδεχ, quemadmodum ex minutissimis, ut vocantur, ramentis aurum constat, ita ex parvis similium partium corpusculis uniuersum hoc esse compositum.

Lib. 4. c. 19.  
Benefic.

Maximè tamen omnium hanc sententiam celebravit, & editis libris latissimè sparsit Epicurus: vnde factum ut ceterarum sectarum posterum, veluti atomorum auctorem, exagitent. Seneca ad Epicurum: *Te atomi, & ista mica tua foris ac temerè conglobauerunt.*

Deinde, licet ante eum Leucippus & Democritus omnia nobis è micis illis etiam pinserint, isti tamen fortassis, ut Cap. III. disse-  
rimus, infinitas in quamlibet magnitudinem compegerunt, quas primus finivit, & in numeros certos redegit Epicurus, nisi ei etiam præiuerit Empedocles, ut ibi ostendemus. Tam verò audire atomorum auctor cupiebat Epicurus, ut glorians solitus sit iactare matris suæ felicitatem, ait Plutarchus, quòd fontem fudisset, vnde in mundum effusa multitudo illa imensa atomorum. Sic etiam D. Augustinus, D. Hieronymus, D. Basilus, & omnes sacri, profani Scriptores sæpè Epicuri atomos loquuntur, & incessunt.

## CAPVT II.

*Pythagoras, Plato, Zeno Cittiens, falsò Epicurèis in compositione continui ex atomis, adiuncti. Macrobius etiam, & Psellus iis abstracti. De Plutarcho res dubia.*

Lib. 6. c. 2.  
q. 2. Physic.  
Lib. 3. c. 1.  
Cæli.

In Pythagoram.

**S**ed Pythagoras etiam & Zeno, inquiunt Conimbricèses, in hac Atomorum secta fuerunt, imò etiam Philosophorum olim deus, Plato, quem eà re exagitat & refellit, ut solet, discipulus Aristoteles. Et de Pythagorà quidem Laërtius ait censuisse, ἐκ τῆς μονάδος καὶ ἀρίθμου διὰ τὰς ἀριθμοὺς, ἐκ δὲ τῶν ἀριθμῶν τὰ σημεῖα, ἐκ δὲ τούτων τὰ σχήματα, ἔξ δὲ τὰ ὅλκιμα χήματα, ἐκ δὲ τούτων τὰ σώματα, ex unitate & indefinità dualitate gigni numeros, ex numeris puncta, ex punctis lineas, ex lineis superficies, ex his verò corpora solida.

Gemella planè istis diffusè disserit Platonis Timæus, qui è Pythagoræ scholà fuit, docetque corpora elementaria composita esse ex superficiebus triangularibus: vnde Aristoteles argutatur, omnia igitur

igitur corpora vltimò tandem in atomos & puncta esse resoluen-  
da, quandoquidem nulla maior causa subfit, cur corpora consent  
superficiebus, quàm superficies lineis, & lineæ tandem punctis;  
*ὅτι τὰ αὐτὰ λόγῳ ἐστὶ, ὅτι μὴ ἐξ ἐπιπέδων συνεχῶς, ἐπιπέδα δὲ ἐκ* Lib. 3 c. 1.  
*γραμμῶν, ταύτας δὲ ἐκ σημείων, quia eiusdem rationis est, solida ex su-* Cali.  
*perficiebus componi, superficies ex lineis, has verò ex punctis.*

Verùm, cui statim, quæso, non subolet aliquod mysterium in  
doctrinâ illâ Pythagoræ, quæ eodem modo affirmat puncta ori-  
ri ex numeris, quo lineas ex punctis? Qui enim illi numeri, & par-  
ticulæ, in quas puncti simplicitas resolui possit? Et de Pythagorâ  
vis verbo dicam? Euclides Mathematicorum pater, atomorum  
hostis capitalissimus, sectâ Pythagoricus fuit. *Constas enim per se,*  
*sum ex Proclo interprete,* ait alicubi Io. Keplerus, *totam Euclidis* Astron opt.  
*Geometriam Pythagoricam esse.* C. 10.  
Itaque compertissimum est, neque  
Pythagoram, neque Platonem composuisse magnitudinem ex ato-  
mis. Liquet id etiam ex Mathematicis, quæ apud Platonem aut  
alios sparsim supersunt; nec vllus veterum hoc vquam (de Ari-  
stotele statim dicam) iis impegit. Omnes enim Leucippum, Py-  
thagorâ posteriorem, patrem atomorum appellant; nec ea doctri-  
na ad Platonem, sed à Leucippo per Democritum ad Epicurum  
peruenit. Plato enim à Democrito & philosophiâ eius tam palam  
auerfus, vt, nisi Amyclas & Clinias Pythagorici eum tenuissent,  
scripta Democriti Vulcano fuerit traditurus, neque in tot Dialo-  
gorum libris vel tenui eum memoriâ & appellatione sit dignatus.

Quid? nonne Aristoteles, inquires (iam enim antè audiebamus)  
compositionem corporum ex superficiebus Platoni tribuit? Facit  
quidem, sed *φιλομαθέστερ ἢ φιλοσοφώτερ τὸ τοῦ, magis id proternè,*  
*quàm philosophicè, vt omnes viri boni iudicant,* ait Plutarchus in Lib. contra  
simili de ideis Platonicis, quas menti diuinæ à Platone non rebus Color.  
singularibus creatis infixas, vt videri vult Aristoteles, tam sæpè  
*ἡμῶν* iste discipulus perperam exagitat.

Socratem enim, quem vbique ferè Dialogorum loqui iubet, Pla-  
to imitatus, doctrinam suam non apertè, sed cortice aliquo ceta-  
tam tradit, quem arripit vbique Aristoteles, qui *matulam, matulam*  
*dicere amabat, ne rationem illam, Platonis perinuolucra verbo-*  
*rum docendi satis ferebat.* Neque id à me vltro confectum est,  
quod pluribus exemplis ostendi potest. *Cùm magistri sui Socratis*  
*(ait D. Augustinus de Platone) quem facit in suis voluminibus dis-* Lib. 8. c. 4.  
*putantem, notissimum morem dissimulanda scientia vel opinionis* Cuius.  
*sua*

*sua seruare affectet, quia & ipsi ille mos placuit, factum est, ut etiam Platonis de rebus magnis sententia non facile percipi possint. Alium testem, & nobilem Aristotelis interpretem Philoponum laudemus.*

Lib. 4. c. 2.  
Phytic.

Aristoteles alicubi in Platonem, in Timæo dicentem, *materiam locum esse formarum*, acriter inuehitur; etiamsi, ut Aristoteles ipse non dissimulat, *ἐν ἀρχαῖς δόγμασι*, in dogmatibus non scriptis & priuatim secus, & apertius sine metaphora doceret. *Aristoteles tamen*, ait Philoponus, *ut consuevit, ea quæ apparent, confutat.*

Itaque cum Aristoteles in eodem Timæo Platonis, corpora elementorum è triangulis composita reperisset, exclamauit statim, præceptorem manifestè in principia omnia Matheseos impegisse: nam si corpora in superficies proximè resoluantur, superficies eadem ratione in lineas, & lineas postremò in puncta ac atomos Leucippi & Democriti dissoluendas, cunctaque tandem ex atomis coaceruanda fore.

Sed consequentiam è falso antecedentis intellectu natam, sine dubio negauisset Plato. Nam (quod impressè animaduertendum est) non docet ibi Platonis Timæus, materiam, aut quantitatem corporum superficiebus triangularibus constare, sed Deus, inquit, materiam mundi informè, *ἀεὶ ὅτι διὰ τὴν ἀσυνέτην αἰσθητὴν, ἀεὶ ἔχοντα, πρῶτον μορμὴν & ἀριθμὸν* conformauit: deinde formas illas, figuras planas triangulares rectilineas fuisse edisserit. Vnde formæ illæ, non materiæ antè genitæ partes, sed compartes, & formæ ipsæ substantiales elementorū sunt, quas triangulos, more Pythagorico vocat: quia veluti triangulus omnium figurarum rectilinearum prima est; ita inter formas elementorum, ceterarum, quæ accidentales sunt, fundamentum & basis est forma substantialis. Cur enim, quæso, aliàs triangularibus potius, quàm quadrangularibus, aut aliis figuræ superficiebus, vnumquodque corpus componi oporteret? Erras igitur, sed ab Aristotele seductus, Iuli Scaliger, cum ais, *ex non quanto fieri quantum, Platoniorum esse somnia*. Non sunt. Plotinum enim, Ficinum, Serranum, aut quem voles alium Platonis interpretem lege, omnium hoc quod iam diximus, aut vicinum interpretamentum est, nec quisquam in suspensionem compositionis continui ex atomis & indiuisibilibus venit. *Illud studiose inculcandum*, ait Serranus, *Platonem res naturales minimè transformatasse in geometricas figuras, sed ex geometricarum figurarum imaginibus res naturales illustrare voluisse.*

Exercit. 55.

In Timæo.

Deni-

Denique ipse Aristoteles alibi Pythagoricos & Platonem posuisse quoddam *ἀπειρον ἐν τοῖς αἰσθητοῖς*, *infinitum in rebus sensibilibus*, id est, partes continui sensibiles, sine fine diuiduas, diserte asserit. Lib. 3. c. 4. Physic.

Huius etiam sententiae in utroque non obscurum signum est, quod dixerint, *μὴ ἐν κενῷ ἐστὶ τὰ φύσει εἶναι*, *nilhil vacui in rerum natura esse*, ut docet Pythagoricus Platonis Timaeus. nam vniuersi atomorum farninatos vacuum induxerunt, sine quo corporum condensationem putabant non posse expediri. Plato in Timaeo.

Zenonem verò, illum seueræ Stoæ Principem, haberi à Conimbricenses in ridiculâ Democriti & Epicuri classe, non refello tantum, sed irascor: nulla enim secta istis infestior, quàm Stoicorum fuit; & duo nobilissimi Zenonis discipuli, Cleanthes & Sphaerus Bosphoranus, totis libris acerrimè Democriti atomos oppugnaverunt. Ac, ne tardum Cleanthis ingenium (qui idcirco *ὁ Σωκράτης*, *asinus Zenonis*, & *ὁ δαίμων ἀπολλύς*, *pistillus hebes*, à condiscipulis dictus) mihi obiiciatis, ecce vobis Chrysippum, huius auditorem, & Stoæ post Zenonem, Principem (quem *ingeniosissimum* & *in omni genere acutissimum* appellat Laërtius) atomis & Epicuro tam inimicum, quàm nobis Plutarchus & Laërtius descriperunt. Apud istum etiam Chrysippus expressè ait, *τῆς ὅλης τομῆς εἰς ἀπειρον εἶναι*, *materia sectionem in infinitum abire*. Et consentiunt *Philosophi ac Geometrae*, ait noster Liptius; *excipio Epicurèos, quibus corpuscula quadam sunt indiuidua, idè ἀτομοὶ dicta*. Ita vir iste, veterum omnium sectarum scientissimus, à consensu Philosophorum & Geometrarum solos Epicurèos excipuos facit, & ceteris Stoicos accessisse aduersus Epicuri gregem, è Senecâ suo ostendit. Laërt. in Zenone. Lib. 2. diff. 2. Physiol.

Plutarchus etiam Chrysippo & Stoicis obiicit, ex illâ suâ partium infinitudine consecutancum esse, ut gutta vini, mare Aegæum incidens, per totum ipsum, & Mediterraneum, ac Atlanticum possit diffundi: similibusque aliquot exemplis idet (ut hodie Epicurèi Peripateticos solent) non deridiculos, & melioribus obganit. Lib. 1. c. 2. Keis. in-rotat.

Nihil igitur compertius est, quàm Zenonem & Stoam hinc in communi Academix & Lycæi consensione fuisse.

Sed scio iam quid Conimbricenses fefellerit; legerant nempe apud Aristotelem, sublatum à Zenone fuisse localem motum; quia existimaret, partes spatij infinitas nullo tempore finito posse pertranfiri: Unde putauerunt hoc argumentum in sententiam Aristotelis à Zenone fuisse contortum, & sic oportere formari:

Si partes in continuo sunt infinitæ, nullo finito tempore poterit vel minima particula (spatij) localis pertransiri: atqui hoc manifestè falsum est, & contra communem sensum; igitur finitæ sunt, non infinitæ, in quolibet finito continuo partes.

Atamen non fuit istud Zenonis ratiocinium, sed hic paralogismus: Infinitæ sunt (id enim tamquam publico Philosophorum ac Geometrarum consensu exploratum supponebat) in quovis continuo partes; igitur nullus potest esse localis motus, quo partes istæ intra tempus finitum valeant pertransiri. Hoc enim est illud famosum Zenonis paradoxum, *ὅτι ἐν χρόνῳ, non datur motus*: quod ex sententiâ communi & suâ per consequentiam mendosam intulit, ut ex Aristotele, Themistio, & veteribus Interpretibus liquet, & expressè Græcus Aristotelis commentator lib. *πρὸς Ἀτόμους γραμμάτων*, ait in hoc paradoxo Zenonem, *ut rationem sequeretur, sensum descriuisse*.

Lib 6.c.9.  
Physic.

Cap.5.

Vulgò etiam fertur Diogenes, cùm negari à Zenone motum localem audisset, illicò surrexisse, & ita redituq̃ue aliquoties magnâ festinatione replicato inambulasse; & rogatus, quis eum subito entusiasmus perculisset, respondisse: *Zenonem refello*. Nisi hæc fabella est, ex eâ patet, Zenonem seriò motum sustulisse, & id (sensu quantumvis reclamante) maluisse, quàm iis consentire, qui magnitudinem ultimò constant ex atomis. Tam *ματιώων*, inquires, & sensu communi egentem Zenonem fuisse? Ita. Tales enim in Philosophis istis olim quidam, *ὑπερβαίντες τὴν αἰσθησιν, καὶ περιδόντες αὐτῇ, πρὸ λόγου ἀκολουθεῖν, qui sensum supergressi, & eum despicientes, rationem tantùm sequebantur*.

Arist. lib. 1.  
c 8. General.  
rat.

Habeo hîc tamen quod tibi aurem vellicem. Zenonem videlicet illum Stoicæ sectæ conditorem, supparem tantùm Aristoteli, parem discipulo eius Theophrasto fuisse. Itaque viuentē Aristotele, ignoratus, aut ignobilis fuit, neque apud Aristotelem facilè Stoicorum mentionem aut nomen repereris; vti neque Epicureorum, qui vno cum Stoicis tempore post Aristotelem statim exorti.

Igitur Zeno iste aduersus quem Aristoteles lib. vi. Physic. discipulat, meo animo, non ille Citticius & Stoicus, sed verustior, Eleates Italus est, Leucippi Eleatis quoque, atomorum illius molitoris & cribratoris præceptor. Vnde ex doctrinâ illa inopinabili magistri Zenonis, quâ per compositionem continui ex partibus sine fine diuisibilibus, omnem localem motum fisti credebat, existimo discipulum

pulum Leucippum cepisse consilium de condendâ & concin-  
nandâ nouâ compositione ex atomis.

Hic etiam, opinor, ille Zeno est, aduersus cuius scita librum  
vnum Aristotelem scripsisse, quemque *ἀνδρα θνητὸν καὶ ἐν φι- Laërt. in  
λοσοφίᾳ καὶ ἐν πολιτείᾳ, virum & in Philosophiâ & in repub. nobi- Aristot.*  
lissimum fuisse Laërtius, & Aristoteles *ἑρπύλιω διαλεκτικῆς, Dialecti-  
ce inuentorem* narrat. Sed quid circa Zenonem istum trepido aut  
dubito? ecce enim se mihi nec opinanti argumentum suggerit, quo  
non opinor, sed scio iam paulominus non Stoicum fuisse, sed  
Eleatem illum, Parmenidis discipulum, & Leucippi præceptorem.  
Nam de isto Laërtius: *Τὸν Ἀχιλλεῖα πρῶτος λόγον ἡρώτιστο. Primus,  
ait, rationem quamdam Achillem appellauit.* Audi iam Aristotelem  
de alterâ ratione, quâ Zeno ille cum quo disceptat, motum loca-  
lem oppugnabat: *Δύο πρῶτος λόγος Ζήνωνος, ὁ καλεῖται Ἀχιλλεύς, ὅτι Lib. 6 c. 9.  
ἔπος, ὅτι τὸ βραδύ πρὸς ἰδίῳ καταληφθήσεται δίον ὑπὸ τῶ ταχέως. Se- Physic.*  
cunda ratio, inquit, *Zenonis, qua vocatur Achilles, est hæc, quod tardius  
numquam currens apprehendetur à velocissimo.* Videtur igitur Ze-  
no ille primus (quamquam Phauorinus Parmenidi præceptori  
eius tribuit) argumentum insuperabile, & qualis Achilles Home-  
ricus inter Græcos, Achillem appellasse. Hunc denique Zenonem  
Eleatem, præter iam dicta, non fuisse in sententiâ Leucippi & De-  
mocriti, eadem coniecturâ quâ statim in Pythagorâ & Platone ute-  
bamus, ostendere possumus: quod *κενὸν μὴ εἶναι, vacuum non esse,* Suidas,  
asseruerit; quod nulli olim faciunt atomorum magistri, qui inani-  
tates punctis omnes interfecerunt, vt locum inueniant corporum  
condensationi.

De ceteris in veteri memoriâ, extra Epicuræos, qui magnitudi-  
nem ex atomis & punctis acervauerit, vix quemquam alicuius fame,  
vsque ad tempora Ioannis VVicleffi, certo reperio, præter fortasse  
Plutarchum, vt infra apparebit. Quispiam tamen etiam Macro-  
bium huc pertrahere tentauerit. Ait enim, *Punctum protractum ef- Lib. 1. c. 2.  
ficat lineam, id est, corpus* (hoc enim nomine omnem magnitudi- Somnij.  
nem appellat) *vnus dimensionis.* Hanc lineam si geminaueris, alte-  
rum mathematicum corpus efficies, quod duabus dimensionibus esti-  
matur, longo latoq, sed alto caret. Et hoc est quod apud illos (Mathe-  
maticos) superficies vocatur. punctis autem quatuor continetur, id  
est, per singulas lineas binis. Si verò dua linea fuerint duplicate, vt  
subiectis duabus dua superponantur, adiicietur profunditas, & hinc so-  
lidum corpus efficitur, quod sine dubio octo angulis continebitur,  
quod

quod videmus in tessera, quæ Græco nomine cubus vocatur. Ecce enim satis explicite affirmat, ex duabus lineis superficiem, è quaternis verò (è quibus binæ subiiciantur binis aliis) profunditatem nasci: quod est, quantitatem totam componi ex atomis, & adiectione indivisibilis ad aliud indivisibile, aliquod divisibile conflare.

Cic. Acad.  
dem. 1.

Verumtamen qui sic censeat, toto scopo & cælo à mente Macrobij aberraverit. Hæc enim ex cõmuni Mathematicorum imaginatione, præstruendum ad Platonici Timæi, & Ciceronis, uti faretur, intelligentiam præmittit: tam verò Timæus, ut supra ostendimus, quàm Cicero omnem magnitudinis particulam infinitè dissectat. Nam etiam iste exerceat ait, *Materiam interire, non in nihilum, sed in suas partes, quæ infinitè secari ac dividi possunt, cum sit nihil in rerum naturâ minimum, quod dividi non queat.* Satin' id expresse & disertè?

Deinde, si hoc voluisset Macrobius, lineam etiam primam & simplicissimam compingere debuit è binis tantum punctis. Id verò cauet, sed ait tantum, lineam quæ protractione puncti efficitur, *longam esse sine lato, sine alto, & duobus punctis ex utraque parte solam longitudinem terminantibus contineri.* In qualibet igitur lineâ longitudinem duobus, punctis interiectâ ac terminatâ utrimque agnoscit. Originem ergo trium dimensionum continui, secundum Geometrarum fictionem, & talem quidem quæ etiam numerorum (qui ex solis unitatibus, seu punctis, coaceruantur) longitudini, latitudini, profunditati competeret, voluit repræsentare, non docere quibus partibus coalesceret vera magnitudo; quod cuilibet cogitatè paullisper eum legenti apparebit.

Lib. 1. th. 8.  
Element.

David Fleurantius etiam, ut iam video, Psellum, quem circa annum Christi 1050. vixisse existimant, hac opinione Epicuræum, & lineam è punctis, superficiem è lineis, corpus è superficibus composuisse, facit. Sed in Syntagmate geometrico Pselli omnia contraria, & ex Elementis Euclidis sumpta inuenio. De Plutarcho, in quibus eum partibus ponam, fluctuo, nisi quod inter utrasque forsitan fuerit, & ipse in fluctu. Nam in lib. *ὅτι τῶν κοινῶν ἐνοικῶν*, acriter absurda quædam persequitur quæ ex infinitis continui partibus existere videntur, atque Chrysippum & vulgus totum Stoicorum eâ re, cèrebro indigere, & in sensum communem impingere.

Lib. de Sup-  
position.

Alibi verò ait: *Ἀτόμος τις οἷον ἡ κενὸν ἀρχὰς εἶναι τῶν ὄλων; Ὡς οὖν ἡ ὑπόληψις ἀλλὰ ἔλκος ποιεῖ, ὅδε σφυγμὸν, ὅδε ὁδὸν ὡς ἀέρος.* Existimat quis atomos & vacuum esse principia uniuersæ? In falsâ est opinio-



*opinione, sed qua ei neque ulcus, neque febrim, neque dolorem perturbantem gignat.* Et sparsim aliubi atomos Democriticas vexantem videbis. Quàm falsò autem & inuitos D. Angustinum & Lincolnensem ad Epicurum & se trahat VVicleffus, infrà demonstrabimus.

## CAPVT III.

*Subtiliores, inter eos qui continuum ex atomis struxerunt, ex infinitis potius quàm finitis composuisse. Epicurum tamen & Empedoclem finitas maluisse.*

**M**Irabitur fortasse quispiam, quomodo Leucippus, Democritus, Epicurus, Mathematicarum (& duo priores præsertim) non ignari, in compositionem illam ex atomis decidere potuerint, si ea in principia & conclusiones Mathematicas tam manifestè, quàm vulgò existimatur, impingat. Nam Democritus à sacerdotibus Ægypti Geometriam, à Chaldaeis Astrologiam, ab aliis alias artes tam callidè & scitè didicit, vt vulgò *ἀνὰ τὸν λόγον*, quia Naturalia, Moralia, Mathematica, & vniuersam liberalium artium encyclopædiam calleret, sit dictus. In Geometriâ etiam quædam, vt *ὅτι ψάφους κύκλου καὶ σφαίρας*, de contactu circuli & sphaera, teste Laërtio, scripsit. Inter voluminum tamen Epicuri trecentos illos cylindros (omnium enim Philosophorum *πολυγραφοτάτων* eum facit Laërtius) nihil Mathematicum reperio, nisi fortasse libellum *ὅτι τῆς ἐν τῇ ἀτόμῳ γωνίας*, de angulo atomi. vnde planè apparet, Mathematicarum disciplinarum modicum, aut omnino nullum fuisse, verumquæ hîc quod de eo Cleomedes, *καταγέλασον εἶναι & deridiculum*, *ὅτι ἀπαλακων τυφλόπρον*, deridiculum esse, nec clariùs vidisse quam taliam.

*Epicurus in Mathematicis cæcus & deridiculum.*

De isto igitur non impensè mirum, in Mathematicorum scita & axiomata sic potuisse offendere; de duobus verò aliis, & maxime Democrito, magis aliquando sum miratus. Sed aduertit tamen iam nuper, quod largiter mihi minuit hanc admirationem. Omnes enim isti, aut certè in ipsis acutiores, non ex finitis atomis & punctis, vt VVicleffus, & hodie plerique, sed ex infinità eorum congerie quamlibet magnitudinem constituunt; & hac viâ plurima Mathematicorum argumenta euadunt, aut eludunt. Hinc de Leucippo Laërtius: *Ἦρ᾽ οὐκ ἂν αὐτῷ, ἀπειρα εἶναι τὰ πάντα, καὶ εἰς*  
B *ἀλλὰ*

ἀλλὰ μεταβάλλει. Placebat, inquit, ei, infinita esse omnia (per infinitarum videlicet atomorum in vnumquodque continuum congeriem & compositionem) & in se inuicem commutari. Quomodo verò per hanc punctorum infinitudinem euitauerit molestias argumenti præceptoris sui, Zenonis Eleatis, qui ex infinitate partium spatij, motum localem tollebat, viderit ipse. An Democritus verò infinitas atomos in quolibet continuo statuerit, ambigo: nam quod Laërtius narrat eum censuisse, τὰς ἀτόμους ἀπειρος εἶναι καὶ μέγεθος καὶ πᾶσι, atomos & magnitudine & numero infinitas esse, videtur de infinitorum, quos somniabat Democritus, mundorum, non de cuiuslibet continui atomis intelligendum: quas magnitudine, non solum numero, infinitas dicebat; quia, opinor, etsi in se minimæ & verè ἀτόμους essent, infinitorum tamen mundorum moles constituerent: quo etiam modo atomos infinitas, pro infinitorum mundorum, non pro cuiuslibet continui compositione, Epicurus & Lucretius sæpè asserunt. Verumtamen, cum σοιχεῖα ἀπειρα, principia infinita Democritus & Anaxagoras fecerint, verosimile est ut vnamquamque etiam rem principia & indiuisibiles particulas infinitas inculcasse.

In Democrito.

Aristot. lib. 3. c. 4. Phytic.

Epicurus tamen infiniti, in quo nihil cernere poterat, tenebris absteritis, numerum finitum atomorum in quolibet continuo hamatis quibusdam, ut loquitur, figuris, & vncis inter se perplexis contexere maluit, etsi mundorum infinitudinem cum Democrito non sit reueritus. Ipse enim in Epistolâ quadam ad Herodotum apertè ait, καὶ ἐνδοξόν ἐστὶ ἀπειρὸν τὸ πᾶν τοῦ τοῦ χωρίου, interiori diuisionem continui non in infinitum procedere. In quâ etiam sententiâ ante Epicurum fuit Empedocles, qui καὶ ἀρχὴν παντὸς κόσμου, ex principis finitis, Aristotele teste, cuncta composuit. Principia verò hæc fecisse, instar Leucippi & Democriti, atoma & indiuisibilia, ex eodem Aristotele & Plutarcho didicimus. Sed Empedocles in Mathematicis non maior Epicuro, & Rhetor ac Poëta melior quàm Philosophus fuit. Nam Aristoteles eum πρῶτον ἐν τέλει λέγειν, primum Rhetoricam artem inuenisse scribit, & Timon forensium formatorem verborum appellat. Etsi verò rem naturæ carmine descripserit; Mathematicas tamen non attigit, neque sciuisse apparet.

Lib. 1. c. 6. Phytic.

Ex quibus liquet, VVicleffum, Hufsum, & quotquot hodie ex finitâ turbâ punctorum continuum struunt, potiùs Epicureos, aut Empedoclistas, quàm Leucippianos, aut Democriticos esse.

CAPVT

## CAPVT IV.

*Sententiam Epicuri iam obsoletam instaurauit Ioannes VVicleffus. Damnata erroris in Philosophiâ à Concilio Constantiensi. Auctoritas sessionis 15. in quam censura illa incidit, adstructa.*

**S**ententiam Epicureorum iam olim cum totâ scholâ suâ destitam reuocauit circa annum Christi 1350. Ioannes VVicleffus Anglus, Academiæ Oxoniensis antè Theologiæ Doctor, deinde hæreticus, & Ioannis Hussi Bohemi, Hussitarum hæreticorum antesignani magister. Cùm enim iuuenis admodum Theses Philosophicas de compositione continui Aristotelicâ defendere suscepisset, & argumentum quo stringebatur, ex tempore se posse dissoluere desperaret, subito & in arenâ ab Aristotele ad Epicurum transcurrit, & totam deinde vitam in eâdem sententiâ pertinaciter durauit.

Annis postea circiter 28. à morte VVicleffi, videlicet Christi 1415. in Concilio Constantiensi, multi eius Articuli, propugnantibus eos Ioanne Hussio & Hieronymo Pragensi (qui paullo post ob hæresim à Concilio cremati) hæreseos, cum aliis mollioribus quibusdam censuris condemnati sunt. Præter autem Articulos principales 45. quos Concilium sess. 8. anathemate fulminat, alij 260. extrapendentes, vt Patres illi loquuntur, eodem fulmine iciuntur. Quia verò, inquit, *libris Ioannis VVicleffi diligenter examinatis per Doctores, Magistros Vniuersitatis studij Oxoniensis, ultra dictos quadraginta quinque Articulos, ducentos sexaginta extrapendentes collegerunt, quorum aliqui cum supradictis in sententiâ coincidunt, licet non in eâdem formâ verborum: & sicuti de alijs superius dictum est, quidam ipsorum erant & sunt hæretici, quidam scismatici, quidam erronei, alij temerarij, nonnulli scandalosi, alij insani, nec non omnes panè contra bonos mores, & Catholicam veritatem fuerunt, propterea per dictam Vniuersitatem scholasticè & debitè reprobati: Hac igitur Synodus sacrosancta cum deliberatione quâ suprà, prædictos Articulos, & eorum quemlibet reprobabat & condemnat, prohibens, iubens, mandans, & discernens, prout de alijs quadraginta quinque.*

Postea verò sess. 15. leguntur in Concilio quinquaginta sex ex

istis Articulis, & residuos sancta Synodus habuit pro lectis; quorum quinquagesimus est iste: *Linea aliqua Mathematica continua componitur ex duobus, tribus, vel quatuor punctis immediatis, aut solum ex punctis simpliciter finitis. Vel tempus est, fuit, vel erit compositum ex instantibus immediatis. Item non est possibile, quin tempus & linea, si sint, taliter componantur.* Et subditur proximè censura: *Prima pars est error in Philosophiâ: sed ultima errat circa divinam potentiam.*

Asta Syn-  
odi. Hos autem Articulos à Doctoribus & Magistris studij Oxoniensis examinatos & reprobatos, *Omnes hac sancta Synodus, inquirunt, petiit examinari, & sapius recenseri per plures Patres Ecclesie Rom. Cardinales, Episcopos, Abbates, Magistros in Theologiâ, Doctores utriusque Iuris, & alios plures notabiles diversorum & generalium studiorum in multitudine copiosâ. Quibus Articulis sic examinatis, fuit & est repertum, aliquos & plures ex ipsis fuisse & esse notoriè hereticos, & dudum à sanctis Patribus reprobatos, quosdam blasphemos, alios erroneos, alios scandalosos, quosdam piarum aurium offensuos, nonnullos eorumdem temerarios & seditiosos. Et propterea in nomine Domini nostri Iesu Christi hac sancta Synodus prædictos Articulos, & eorum quemlibet, hoc perpetuo decreto reprobat & condemnat, inhibens omnibus & singulis Catholicis sub anathematis interminatione, ne de cetero dictos Articulos, aut ipsorum aliquem audeat prædicare, dogmatizare, efferre, vel tenere.*

Vnde patet, Articulum istum, *Linea ex punctis finitis, & tempus ex instantibus immediatis componitur*, esse prohibitum dogmatizari, non tanquam hæreticum quidem, sed tanquam erroneum in Philosophiâ: hunc verò, *Non est possibile, quin linea ex punctis finitis, & tempus ex instantibus immediatis componatur*, grauiori censurâ, veluti circa divinam potentiam erroneum feriri. Censuerunt enim Concilij Patres, compositionem ex partibus infinitis nullam inuoluere contradictionem, ideoque sine omnipotentie diuinæ deductione & iniuriâ negari non posse, Deo esse possibilem, negabant tamen esse possibilem VVicleffus, Hussus & Pragensis, affirmantes nullam posse esse lineam, nisi ex punctis finitis, nec vllum tempus, nisi ex instantibus finitis immediatis.

Verumtamen nullum opinioni Epicuri ex istâ Concilij definitione ortum esse præiudicium, sic ostendi videtur.

Primò, quia condemnatio illa Articulorum VVicleffi incidit in tempus, quo Concilium acephalum & sine capite fuit. Nam statim post sessionem secundam Ioannes XXIII. legitimus, vti vulgò

vulgò existimatur, Pontifex furtim Constantiâ profugerat, quia Patres formulam quamdam resignationis Pontificiæ potestatis ei præscribere conabantur, quam, vt nimis absolutam, abnuebat. Fugâ igitur istâ visus est totam Concilio auctoritatem abrogasse, & ipsum dissoluisse.

Deinde, esto non abrogasset, sententiam tamen depositionis, à Concilio sess. 12. in se latam, statim & ante sessionem 13. confirmavit, & insuper *Papatus & iuri, si quod in eodem sibi qualitercumque competierat, seu quod sibi tunc competeat, purè, simpliciter, & absolute, libereq; & spontè cessit, & renuntiauit.* Acta Synodi. Similiter Gregorius XII. alter in schismate illo Pontifex, sess. 14. per Carolum Malatestam Ariminensem Dominum, *Papatum, & omne ius Papatus, titulum, & possessionem, quod, quem, & quam habebat, resignauit.* Igitur sessio 15. inde proximè secuta nullum habuit Pontificem & legitimum caput: nam Benedictus XIII. siue Petrus de Luna, qui tertius supererat, sine dubio (saltem plurimorum, & meo) Pseudo-Papa fuit, neque etiam auctoritate eius, (imò renitente ipso & spernente) Concilium conuocatum fuerat.

Cùm autem Concilium acephalum infallibili Spiritus sancti assistentiâ destitutum sit, nihil firmum ab eo decerni potuit vsque ad sess. 41. id est, ad Martini V. noui Pontificis electionem.

Secundò, errauit, vt omnino videtur, Concilium sess. 12. arrogando sibi auctoritatem destituendi Ioannem XXII. verum ac legitimum, vt passim Auctores credunt, Pontificem: igitur ex vno isto actu disce omnes.

Tertiò, Martinus V. à Cardinalibus & Concilio Papa ritè electus, solos 45. principales VVicleffi Articulos, à Concilio sess. 8. damnatos, anathemate fulminauit, neglectis aliis 260. *extrapendentibus*, inter quos est ille, de compositione continui, & temporis ex partibus indiuisibilibus. Videtur autem alios Articulos contempsisse, & infirmasse, quibus eandem firmitatem, quam ceteris, non impertiuuit.

Hæc sanè satis perspicuè videntur ostendere, decreta sessionis 15. non habere culmen illud supremum auctoritatis, quod vel præsentia Pontificis in Concilio, vel per secutam eius approbationem, potuissent adipisci: nihilo minùs tantum saltem videatur inde roboris accepisse, quantum solent, quæ à Conciliis generalibus legitime conuocatis, sine Pontificis instructione, aut confirmatione decernuntur.

Nam in primis Martinus V. in diplomate quo Articulus 45. VVicleffi, sessione 8. damnatos iterum condemnat, honorificè de Concilio loquitur, & à *Synodo generali* illos Articulus damnatos dicit; etsi tunc tamen illà sessione 8. Ioannes XXII. cuius solius auctoritate Concilium coactum fuerat, iam aufugisset, & nequedum nouum illud auctoritatis pondus Concilio accessisset, quod ante sessionem 15. (in ipsà videlicet sessione 14.) alter Pontifex Gregorius XII. adiecit.

A. A. Syn-  
odi.

Antequam enim Gregorius ius Pontificatus quod hætenus prætenderat, resignaret, *Vt sancta, inquit, unio, reformatio, & hæretica prauitatis extirpatio, Deo auctore meliorem sortirentur effectum, & ut sub diuersorum professione pastorum dissidentes Christiani, in unitate S. Matris Ecclesie & charitatis vinculo coniungerentur, istud sacrum Concilium generale conuocauit, & omnia per ipsum agenda auctorizauit, & confirmauit*, idque sessione 14. Igitur Concilium, quod initio non tam certò Generale erat, (quia Ecclesie pars quæ Gregorio adhærebat, & Pontificem non omnino improbabili iure nixum sequebatur, aberat) iam plenam, ab hac conuocatione Gregorij, generalitatem accepit. De Benedicto XIII. nulla mihi sollicitudo, cui passim nihil in Papatum iuris tribuitur, & toties vocatus & rogatus ad tollendum tam longum & exitiabile Ecclesie schisma, venire aut mittere quemquam pertinaciter renuerat, & licet à cunctis destitutus, suam tamen se pertinaciâ nutrebat, vt inquit Aretinus. Igitur Concilij status sub sessionem 15. hic fuit. Maximus vndique ex toto Orbe Christiano eò confluerat Prælatorum & Doctorum cœtus, initio solum à Ioanne XXII. studio & diligentia Sigismundi Cæsaris, postea etiam à Gregorio XII. conuocatus & confirmatus. Ante tamen illam sess. 15. vterque Pontificatu se abdicauerat, vnde Concilium tunc acephalum erat: Generale tamen & legitimum, ac quale eo tempore esse potuit, quando ad abolendum schisma, omnes Pontifices cedere iuri suo, Ecclesie paci necessarium erat. Auctoritatem ergo, quantam Concilio generali ritè coacto, Sede Romanâ vacante, tribueret solemus, sessio illa 15. habuit.

Leon. Aret.  
in Histor.  
sui temp.

An verò tale Concilium, ante legitimi Pontificis approbationem, errare possit, etiam hodie inter Doctores ambigitur. Fateor tamen plures existimare probabilius, errare posse; quia res ad decretorium & vltimum Ecclesie iudicium (quod à capite proficisci debet) nondum peruenit, & ex Concilio Basiliensi, & hocce Constantin-

stantienſi errorum exempla adferri ſolent: nam vtrumque definiuit, *Concilium ſupra Papam eſſe*: quod iam reputatur erroneum, poſtquam ab Eugenio IV. primum, & deinde Leone X. in Concilio Lateranenſi id reprobatum fuit.

Verum, aliud longe eſt, loqui de conciliabulo ſchiſmatico & à capite ſuo diſcorde, aliud de legitimo Concilio generali. Leo vero X. non Concilium, ſed *Conciliabulum Baſilienſe, præſertim poſt tranſlationem per Eugenium Papam IV. factam*, appellat. & ipſe Eugenius, *Concilio ad Bononiensem civitatem*, ait, *legitimè tranſlato, ibidem poſtmodum Baſilea convenientes, velut locuſta acephali, canonicum ſine noſtris præſidentibus non fecere Concilium*.

Concil. Later. ſeſſ. 11.

Sed quando tranſlatio hæc & diſſolutio Concilij facta? inquires. non enim videtur, quod mox à principio, & ante ſeſſionem 2. in quâ decretum illud Concilij Conſtantienſis, de eminentiâ generalis Concilij ſupra Papam, renouatum fuit. Fateor, ſic videtur vir ille magnus exiſtimaviſſe, qui ſcribit, *Concilium Baſilienſe, ſeſſione ſecundâ, unâ cum Legato Pontificis, communi conſenſu ſtatuit*, Concilium eſſe ſupra Papam: quod certè nunc iudicatur erroneum. & inde, Concilium generale legitimum, ante Papæ ſuffragium, poſſe aberrare contendit.

Bellar. li. 2. cap. 1. de Concil.

At enim ex Actis Concilij, Bullâ retractionis Pij II. & Eugenio ipſo diplomate demonſtrare mihi videor, etiam ante primam ſeſſionem, cum *ferè octo menſes effluxerant, poſtquam initiari debuerat ſancta Synodus, nec adhuc Baſilea convenierant tres Episcopos*, &c. inſu Eugenio tranſlatum inde Concilium. Permaſit tamen Iulianus Sancti Angeli Card. Legatus Apoſtolicus & Concilij Præſes, qui *audita Eugenio reuocatione præſidentiam dimiſit, tamquam Summo Pontifici vellet obedire. Sed cum augeſceret in dies Eugenio vel inuito Concilium, & multi ex diverſis regionibus Episcopos, & Regum Legati aduenerant, Cardinales quoque ex Romanâ Curia profuſi in dies nonnulli concurrerent, præſidentiam reſumpſit, & auctoritatem Concilij mirum in modum extollens, eminentiam primæ Sedis ſupprimere cepit*. En cœptam auctoritatem Concilij eleuari ſupra Papam, poſt Eugenio reuocationem, teſte *Ænæ Silio*, qui in partibus Iuliani & ſchiſmaticorum tunc ibi iuuenis aderat: vnde facile colligas, quia reuocanti obedire volebant, in ſecundâ ſtatim ſeſſione decreuiſſe, quod paullo antè Conſtantienſes, *Concilium poteſtatem immediatè à Chriſto habere, cui quilibet cuiuſcumque ſtatus vel dignitatis, etiamſi Papalis exiſtat, obedire tenetur in his quæ perti-*

Eugen. IV.

Pius II. ſi. ue *Æneas Silvius*.

Acta Synodi.

*pertinent ad fidem, & extirpationem schismatis, & ad generalem reformationem Ecclesie Dei in capite, & in membris.* Denique ex Actis Concilij satis intelligitur, sessionem 2. anno Christi 1432. 15. Cal. Martij celebratam, cum tamen constet, reuocationem factam anno precedenti 1431. 15. Cal. Ianuar.

Bellar. li. 2.  
cap. ult. de  
Concil.

Non igitur à Concilio legitimo generali, ante Pontificis approbationem, sed à schismatico conciliabulo, commissus est iste error. De sessione illà quartà Concilij Constantiensis, quæ similiter impiegit, tantumdem dicere possumus, & debemus. Noctu enim Constantià tunc ante sessionē 3. aufugerat Ioannes XXIII. qui solus Concilium istud conuocauerat, & tugà istà, auulso capite truncam Synodum reliquerat, detraxeratque legitimi Concilij auctoritatem. Qualis enim auctoritas esse possit acephali corporis, rebellis tunc & discordis à suo capite? Negant etiam aliqui Concilium tunc fuisse generale: *Cum tantum adesset*, inquit, *tertia pars Ecclesie, id est, ij solum Prælati qui obediebant Ioanni: nam qui obediebant Gregorio & Benedicto, repugnabant iis quæ à Synodo fiebant.* Hic tamen defectus, ut antè monui, obijci non potest sessioni decimæ quintæ.

In reliquis etiam, quæ adferuntur, errantium Conciliorum, ante Pontificis confirmationem, exemplis, aut Patres à Legatis Pontificiis, aut omnes à Pontificis instructione discrepabant: quod etiam Conciliabulo Basiliensi euenisse affirmat Eugenius. *Nam multa & grania, inquit, præter illa tria, propter quæ fuerat ibi principaliter Concilium à principio constitutum, tamquam haberet generalis Synodi, nobis etiam contradicentibus, potestatem, disponere, ordinare, statuere, sancire, declarare, & mandare præsumpsit.* In summà igitur, nullum hætenus Concilium generale legitimum allatum est, in quo ante Pontificis approbationem, omnium concordia suffragia à vero aberrauerint: quod; an ex directione aliquà præparatoriâ Spiritus sancti veniat, suppare illi quæ adfuit & regit Pontificem: an, quia moraliter impossibile, tot doctissimorum & præstantissimorum virorum oculos circa idem allucinari & cæcutire, meritò dubites. Quidquid id est, Articuli à Concilio legitimo generali disputati & decreti tam veri, aut verisimiles sunt, ut Pontifices (exemplum vidimus nuper in Tridentino) illicò calculum adiciere soleant.

Tanta igitur, id est, maxima veri (ut mollissimè dicam) similitudo, imò moralis certitudo sententiæ Aristotelis, præter cetera omnia



omnia argumenta, ex abundantia accessit per auctoritatem Patrum 15. sessionis Concilij Constantiensis.

Hoc etiam ex superuacuo adiciam. Quod etsi sessio illa 15. legitime Synodi non esset, tamen inde confici, totius Orbis Christiani, & humani patris generis sententiam fuisse, *magnitudinem & tempus ex indivisibilibus partibus non consitui*. Qui tam publicus & communis sensus veritatem habet, aut probabilissimam eius imaginem.

Vis autem Concilij frequentiam & celebritatem videre? Audi, inquam, ab eo qui ipse aderat, & quidem domesticus ac familiaris Ioannis XXIII. *Incredibili Principum, Prælatorumq; frequentia*, inquit, *Concilium celebrabatur; ut essent quandoq; in eo loco equorum supra triginta millia: ex quo multitudinem hominum licet coniectare*. Et alius, *Gerebantur*, ait, *res in Concilio quinque nationum suffragiis, Italica, Gallica, Germanica, Hispanica, Anglica. Quidquid autem harum nationum suffragiis decernebatur, id ita ratum erat: atque per præconem, atque per Notarium publicum pro Curia enuntiabatur, si omnium consensu postea confirmatum fuisset*.

Leon. Arcet. in Hist. sui temp.

Plarin. in Io. XXIII.

Verum, quousque abibis extra oleas? inquires. Non tam procul, inquam, quam tu putas: & idemtidem respicio in viam quam tere re institui. Hæc enim omnia in cumulum auctoritatis iuvant condemnationis sententiæ VVicleffi & Epicuri.

Sed argumētis initio allatis etiam reponendū aliquid. Quantum ad primum, Non infiteor Concilium tempore sessionis 15. caruisse capite: sed quodnam habere potuit, quando in Ecclesiā Pontifex verus, aut certus nullus erat? Ioannes enim & Gregorius, Pontificatum suum in manus Concilij abiecerant, Benedicti verò pertinacia contemnebatur, quia tam dubius Pontifex pro nullo meritò reputabatur, & penes Ecclesiā potestas erat cogendi generalis Concilij, Benedicto, imò duobus etiā ceteris reclamantibus, ut aduersus tam dira schismata sibi prouideret de certo & indubitato capite. Itaq; tunc Concilium quidem acephalum fuit, sed tamen legitimum, quia Pontificio capite ad Synodi generalis auctoritatem in illā tempestate non indiguit. Tunc enim Concilium generale conuocatore, & præside per se, aut Legatos suos, Pontifice eger, quando Sedem Apostolicam certus, & extra controuersiam Præsul implet. Eiusmodi tamen Concilium legitimum acephalum, si quid circa fidem, & extra negotium prouisionis indubitati capitis, definiat, sine Pontificis postea confirmatione, plenissimam auctoritatem &

C

firmi-

firmitudinem non obtinet ; perinde atque decreta alius legitimi Concilij generalis, quod præfidentibus Rom. Pontificis Legatis, sine aliâ Sedis Apostolicæ directione & instructione, celebratum fuerit.

Igitur, vt disertè quod ex historiis illius æui, & Actis Concilij mihi visum, edicam. Cogita, quanta Concilij Tridentini nuper ante confirmationem Pij IV. fuerit auctoritas, & parem circiter sessioni 15. Synodi Constantiensis dare, ne admodum formidaueris.

Ad secundum etiam argumentum, facilis responsio. Nam Concilium Ioannem XXIII. tamquam non omnino indubitatum Pontificem, ceterosque duos multò magis, ne Ecclesiæ certum caput deesset, exauctorare, inquiunt Card. Bellarminus aliique, potuit. Nullus igitur fortasse, illius sessionis 12. in quâ Ioannes depositus, error tuit. verumtamen alius error, vt ante dixi, sessione 4. quæ Concilium supra Pontificem esse decreuit, præcesserat. sed Synodus tunc Ioannem, cuius solius auctoritate coacta erat, id est caput adhuc suum, & præsidem, è Concilio fugitium persequabatur & oppugnabat. vnde quantum ad priores illas sessiones, id est, à tertiâ ad decimam quintam, aut certè ad duodecimam (quando iam à Concilio destitutus Ioannes, Pontificatum insuper ipse resignauit, & Concilium suâ iam, seu Ecclesiæ auctoritate stare cœpit) plerique doctiores negant iis auctoritatem legitimi Concilij generalis : secus verò de sessione 15. vt antea differuimus.

Quòd verò Martinus V. solos 45. Articulos sessionis 8. aduersus Vicleffum, non alios 260. sessionis 15. postea confirmauerit, nihil me mouet. nam Articulos illos 45. Episcopis se dare pro *fidei subditorum directione* expressè ait: ad quam ceteros Articulos, præsertim tam philosophos quàm noster de structura continui, parum tunc referre existimauit. Aliàs si animum ad confirmationem sessionis 15. adieciisset, videtur, si rem humano more æstimemus, in omnes 260. eius Articulos (quos ipse Martinus, Cardinalis tunc S. Georgij ad Vellus aureum, cum celeberrimo mille circiter Patrum Concilio tam solemniter damnauerat) eandem censuram iteraturus fuisse : quandoquidem illos 45. sessionis 8. (id est, eo tempore conditos, quo Synodus veriùs non erat legitima) ne apice quidam addito aut detracto, adprobauerit. Denique fatentur vniuersi, Articulos ceteros omnes sessionis 15. censuram à Concilio inflictam commereri, vt causæ nihil habeamus, cur illum, de

compo-

*compositione continui*, vnicè oporteat excipere (vt sit, parcemia vulgari, coruus inter cygnos, aut anser inter olores) nisi quia videtur nobis intellectu nimis perplexus & difficilis. Aliàs de toto Constantienti Concilio, audite Card. Bellarmini sententiam: *Quantum ad ultimas sessiones*, inquit, *& ea omnia quæ probant Martinum V. ab omnibus Catholicis recipitur*. Quin verò inter *ultimas sessiones*, nostram decimam quintam habeat, haud equidem ambigo: ex cuius etiam alibi auctoritate probat Pontificem Rom. esse caput Ecclesiæ, quia *Concilium Constantiense*, ait, *sessione 15. damnauit hæresim Ioannis Hus dicentis, non esse Papam caput Ecclesiæ*. Et ceteri passim Articulus huius sessionis 15. tamquam legitimæ Synodi, in fidei & morum decretis solent citare. Falsum igitur est, Martinum V. quando sessionis 8. Articulus 45. confirmauit, ceteros infirmasse: robur enim quod à Concilio habebant non detraxit, sed solum non addidit nouum.

Lib. 1. c. 7.  
de Concl.Lib. 2. c. 15.  
de Concl.

Hæc verò diffusius, & fortasse extra locum, à me sparfa ne mirere: examinanda enim penitus sessionis illius 15. Concilij Constantiensis auctoritas fuit, vt intelligeremus, quantum hinc ponderis sententiæ Aristotelis valuerit aduci.

## CAPVT V.

*Non falsò tantum, sed imperitissimè D. Augustinum à VVicleffo in suam & Epicuri sententiam trahi. D. Basilium etiam, & SS. Patres passim in Mathematicorum & Aristotelis sensu fuisse.*

**N**on disputare amant heretici, sed quoquo modo impudentissimè *peruicaciâ superare*, ait D. Augustinus. Ecce enim VVicleffus non tantum rationibus, sed Augustini etiam auctoritate opprimere vult Aristotelem. Non solum Democritus, inquit, Plato, & Lincolinensis, sed etiam D. Augustinus magnitudinem & tempus ex puris punctis finitis composuit. En autem omnes quos sciuit Philosophiæ suæ auctores, aut patronos. sed à caluo, vt dicitur, ad caluum, & vniuersum fallitur, in Augustino tamen perperam & turpissimè.

Lib. 13. c. 12.  
cont. Fault.Tho. Waldensis tom.  
1. lib. 1. a. 1.  
c. 13. 4.

Epicurum enim aut Empedoclem (vti Cap. 111. ostendit) pro Democrito verius capere debuit. de Platone, vanum etiam esse ex Cap. 11. patet: Lincolinensem (cuius Philosophiæ ingens olim

apud Britannos auctoritas) in mediâ Aristotelis sententiâ fuisse Thomas VValdensis demonstravit.

De Augustino igitur, id est, ingeniorum humani generis, ut existimo, aquilâ, & vertice, paulisper videamus.

Lib. 11. cap.  
10. Trinit.

Sententia eius illustris est lib. de Trinit. *Ratio*, inquit, *docet minutissima etiam corpuscula in finitè diuidi. cum tamen ad eas tenuitates vel minutias peruentum fueris, quas visas meminimus, exiliores minutioresq; phantasias iam non possumus intueri, quamuis ratio non desinat persequi ac diuidere.* Satin' hoc disertè, VVicleffe, & Epicure? Ecce Augustini mente, ratio diuidere sine fine pergit, ubi imaginatio stat nec potest sequi, quia minutiz quædam sunt ad quas ista non valet descendere.

Lib 2. c. 4.  
Gen. ad  
litter.

Iterum alibi, Mathematici, aut Philosophi subtilissimâ ratione persuadent, ait, nullum esse quamlibet exiguum corpusculum, in quo diuisio finiatur, sed in finitè omnia diuidi: quia omnis pars corporis corpus est, & omne corpus habeat necesse est dimidium quantitatû suarum. En non suadent, tantum, inquit, sed persuadent.

Epist. 151.  
ad Nebrid.

Et nocte litteras Nebridij sui, qui Augustinum beatum appellauerat, in lectulo suo, ut ait, ruminans, *Vbi est*, inquit, *ista beata vita? ubi? ubinam? O si ipsa esset, repelleret atomos Epicuri. O si ipsa esset, scires nihil deorsum esse præter mundum. O si ipsa esset, nosset extrema sphaera tardius rotari quam medium, & alia similia quæ similiter nouimus. Nunc verò quomodo, vel qualiscumque beatus sum, qui nescio, cur tantus mundus sit, cum rationes figurarum per quas est, nihil prohibeant esse quantum quis volueris ampliores? Aut quomodo non mihi diceretur, imò non cogeremur confiteri, corpora in infinitum secari, ut à certâ velut basi in quantitatè certam certus corpusculorum numerus surgeret? Quare cum corpus nullum minimum esse finitur, quo pacto sinamus esse amplissimum, quo amplius esse non possit?*

Igitur audistis iam confitentem, quod si beatus esset, cogeretur (ab euentiâ videlicet obiecti, quod ei iam erat certum, sed tamen in nebula) confiteri, corpora in infinitum secari. Quod verò sequitur: *ut à certâ velut basi, &c.* obscurum est, habet tamen, opinor, hunc intellectum. Licet cumulus aliquis corpusculorum (puta, arena-rum) basim, & culmen, numerumque eorum certum contineat, tamen in infinitum secari potest. Indicat ipse, infra. *Sensibilis numerus*, ait, *(nam quid est aliud sensibilis numerus, nisi corporeorum, vel corporum quantitas?) minui quidem in finitè, sed in finitè crescere nequit.* Et ideo, addit, fortasse meritò Philosophi in rebus intelligibili-bus

libus diuitias ponunt, in sensibilibus egestatem. quid enim arumnosius quàm minus atque minus semper. posse fieri? Ac paullulum inde: Vnum illud multum monebat, quòd infinitè corpora secarentur.

Vis aliud? Nec ipsas atomos esse, ait ad Diolcorum, villo modo con- Epist. 56.  
ad Diolcor.  
cedendum est, quod, omisâ subtilitate, qua de diuisione corporum à doctis traditur, vide quàm facile secundum ipsorum (Epicurcorum) opinionem possit ostendi, &c. Vbi, si animaduertisti, diuisionem corporum infinitam à doctis tradi dixit, nec vmquam ad atomos posse perueniri. Et mox de atomis istis Epicuri: Sed iam pudet me ista refellere, cum eos non pudueris ista sentire. Cum verò ausi sint et- Atomi E-  
picurcorum  
Augustino  
porientosa.  
iam defendere, non iam eorum, sed ipsius generis humani me pudet, cuius aures hac ferre potuerunt. Cum igitur tanta sit cecitas mentium per ingluuiem peccatorum amoremq; carnis, ut etiam ista sententiarum portenta, otia Doctōrum contereere disputando potuerint, dubitabis tu Dioscore, &c.

Itē nunc VVicleffitæ & Hufsitæ, & Augustinum in portenta Epicuri, quæ sic abhorret, si potestis, pertrahite.

Si verò hæc etiam non sufficiant, en plaustrum totum benè dimensum accipite. Dialogus est Augustini Soliloquiorum, in quo Augustinus & Ratiō interfantur. Hæc ab illo quærit. R. Ergo lineam Lib 2. c. 4.  
8. Soliloq.  
in duas lineas per longum scindi manifestum tibi est nullo modo posse? A. Manifestum. R. Quid transuersim? A. Quid, nisi infinitè secari posse? De sphærâ deinde seu pilâ quædam, & alia complurcula Ratio Augustinum, tamquam discipulum interrogat: ac denique R. Sed responde quomodo hæc acceperis, ut probabilia, an ut vera? A. Planè ut probabilia, & in spem, quod fatendum est, maiorem surrexi: nam præter illa duo de lineâ, & pilâ, nihil abs te dictum est, quod me scire audeam dicere. Coniunge hæc prioribus, intelliges Augustinum non tamquam probabile opinari, sed scire, ac sibi manifestum esse, lineam transuersim (id est, veluti cultro tranuersim, non secundum longitudinem ducto) infinitè secari posse. Et ne multitudo ista & paritas in fastidium veniat, finio cum Dialogorum istorum libro 2. R. Clamat ratio innumerabiles (lineas à cir- Lib 2. c. vlt.  
Soliloq.  
cumferentiâ circuli ad centrum) posse duci, nec sese in illis incredibilibus angustiis, nisi centro posse contingere, ita ut in omni earum intervallo scribi etiam circulus possit. Ad hunc tamen rationis clamorem Epicureos, VVicleffitas, Hufsitæ obfuscescere necesse est, ut infra demonstrabimus.

Non vnus porro Augustini, sed omnium SS. Patrum, qui v-  
C 3 quam



Epist. 10.

quam aut venerunt, aut inciderunt in huius rei cogitationem, eamdem esse sententiam, non difficile foret, nisi superuacuum ostendere. Pro sideribus cunctis ἡλιος ἐν ἀστέριον, *sol inter sidera*, (vbi discipulus olim Athenis, & familiaris D. Nazianzenus appellat) nobis sufficiat S. Basilus. Philosophus enim summus & Mathematicus fuit, id est, eius in re quam iam expendimus auctoritas infinitis aliis, qui in hæc aut numquam, aut non admodum altè se demiserunt, præponderare debet.

Homil. 1.  
Hexam.

Is verò non vno loco Epicurèas atomos odio capitali incessit. Quidam, inquit, ἄτομα & ἀμερῇ σώματα, καὶ ὄγκος καὶ πῶτος συνίσχεται, *τῶ φυσῶν τὸ θεῶν ἐφαρτάειναι*, *indivisibilia & impartibilia corpora*, item acervus eorū, & meatus naturā omnium visibilium cōtinere imaginati sunt. ac deinde tam tenuia naturę principia irridēs, ἰσὺν ἀεὶ ὄγκου, καὶ ἀνυπόστατους, *stamen araneorū, & res sine essentiā & hypostasi* vocat.

Ac ne putes fortuitum solum atomorum concursum, aut permixtam, opinione Epicuri, inanitatem Basilio displicere, tempus mox ex infinitis particulis componit, negatque disertè momentum esse partem temporis, id est, continuum permanens ex infinitis partibus etiam constituit; cū omnes sciant, & infra demonstrabimus, infinitudinē partium temporis ex infinitudine partium spatij resultare, nec vnā sine alterā defendi vllā ratione posse.

## CAPVT VI.

*Admirabilis maximorum omnium totius humani generis ingeniorum consensus in infinitudine partium continui.*

Lib. 16.

Subtil.

Archimedes.

Lib. 1.

Tuscul.

**M**Emini, nescio vbi, Lipsium nostrum quatuor istos, Homerum, Hippocratem, Aristotelem, Iul. Scaligerum in culmine ingeniorum humani generis collocasse, & à viro magno in laudatione funebri Lipsium ipsum (& demus hoc patrię nostrę) quintum istis adiectum fuisse. Cardanus verò alium ingeniorum censum facit, & ad duodecim extendit.

Primus ingenio & summus ei ab omni retrò memoriā, Archimedes, in Mechanicis, & totā Mathematicā non tam primus auctor, inquit, quàm inimitabilis. Et profectò diuinum eius ingenium M. Tullius, & omnes olim appellant. Cū Archimedes, ait, lune, solis, quinque errantium motus in spheram illigauit, effecit idem quod ille qui in Timeo mundum adificauit Platonis Deus, ut tarditate & cele-

*celeritate dissimillimos motus una regeret conuersio. Quid si in hoc mundo fieri sine Deo non potest, ne in sphaerâ quidem eosdem motus Archimedes sine diuino ingenio potuisset imitari.*

Testimonia alia à Liuiò, Plutarcho, Valerio (& à quo non?) subter habeo, ne in re notâ ex superuacuo tempus abutar.

Proximam Ptolemæo ingenij laudem dat Cardanus: quia *tam* Ptolemæus.  
*claras siderum rationes, inquit, ut in æternum sufficerent, excogitauit: solusq; diuini opificij modum & subtilitatem exprimere ausus est, ut inuenisse non dicam.*

De tertio loco compugnant apud eum, Aristoteles, Euclides, Aristoteles.  
Ioannes Duns Scotus, Ioannes Suiffer, vulgò Calculator dictus. Donat tamen Aristoteli: quia *cum in singulis disciplinis scripserit, ait, quod probaretur, error tamen conspicuus in tot sæculis in illius scriptis deprehendi non potuit.*

Euclidem *antiquitate & usu* ceteris duobus, quarto loco antepōnit. *Eius verò, inquit, duæ præcipuæ laudes: inconcussa dogmatum firmitas, libri Elementorum, perfectioq; adeò absoluta, ut nullum opus inre huic aliud comparare audeas. quibus sit ut adeò veritatis lux in eo resuleat, ut soli hi in arduis questionibus videantur posse à falso verum discernere, qui Euclidem habent familiarem.* Euclides.

Quintus succedit Ioannes Scotus, *qui subtilis Doctoris, inquit, ob doctrinam parq; vbiq; acumen meris meruit.* Scotus.

Sextus Calculator, *eiusdem, ait Cardanus, insula accola. Ex quo* Calculator.  
*haud dubium esse reor, barbaros (sic Itali nos, & Britannos appellant) ingenio nobis haud esse inferiores: quandoquidem sub bruma calo diuisa toto Orbe Britannia duos tam clari ingenij viros emisit.*

Septimus Apollonius Pergeus, *qui octo de comicis Elementis libros* Apollonius Pergeus.  
*egregios scripsit.*

Octauus Architas Tarentinus, *qui præter lineam columbam volantem, quam construxisse fertur, veram demonstrationem duas lineas inter duas alias propositas in continuâ proportionem collocandi, inuenit.* Architas.

Nonus Mahometus Moyfis filius, Arabs, algebræ inuentor.

Decimus Alchindus, Arabs, *auctor libelli de ratione sex quantitatuum, quo nihil ingeniosius.* Mahometus. Alchindus.

Vndecimus Geber, Hispanus, *clarissimo inuento: cum enim Ptolemæus ex quinque quantitibus maximo labore sextam quarat, hic in ipsdem cum tribus quartam. multa etiam in melius mutauit, quæ ad statum cali pertinebant: ut facile intelligas, multò minis æstus maximos frigoribus gelidis obesse ingenijs.* Geber.

Vlti-

Galenus.

Vltimus *subtilitate, sed clarissimus arte* Galenus.

Exercit.

324.

Nec aduersarius Cardani Iul. Scaliger hunc ordinem multum perturbat; nisi quòd indignetur (quàm immeritò!) *fabrum* (sic Archimedem per contemptum vocat) *Aristoteli antelatum, non minùs illis ipsis artibus erudito, & Ioanni Scoto, qui lima fuit veritatis, ac Ioanni Suiffer Calculatori, qui penè modum excessit ingenij humani. Quòd deinde post Archimedem statueris Euclidem, quasi lumen post laternam.* Sed fallitur profectò Scaliger, si Archimedem solam Mechanicam, & non vniuersas Mathematicas, summo ingenio, & omnium stupore putet tractauisse. sed parcendum Philosopho *ἀγνοῦντες* & quem vix est vt existimem vnamquam Archimedem vidisse. Irascitur deinde, nec adeò iniurià, Scaliger parentem Nominalium Ochamum à Cardano præteritum esse: *cuius tamen, inquit, ingenium ingenia omnia vetera subuertit, noua ad inuictas insanias, ob incomprehensibiles subtilitates fabricauit, atque conformauit.* Quid verò tamen hic ei non inlicitè reposuerit Cardanus, non attinet iam dicere.

Verùm quid tibi vis cum isthoc longo ingeniorum delectu? inquires. Hoc volo: omnes illos subtilitatis & humani ingenij apices de infinitudine partium continui nihil dubitasse. De Homero tamen, aut Hippocrate fortasse non liquet, de ceteris, qui aut professione Mathematici, aut in eà arte egregiè callidi, aut palàm Peripatetici, res est compertissima. Nam & Lipsius noster (si cum placet hic æstimare) Stoicis suis adhæsit, & Galenus alibi à me lectus est atomos Epicuri exercere.

Lib. 1. differt. 1. Physiol.

Nisi longum etiam esset, ego alium, maximè è SS. Patribus, & aliis qui à Christianà fide plus aliquanto luminis acceperunt, ingeniorum catalogum, in quo mihi præirent Augustinus, Basilus, Nazianzenus, Chrysostomus, &c. instituerem. Ad familias deinde res Scholasticorum descenderem, quarum capita, Thomas angelicus, Scotus subtilis, Ocham venerabilis: quibus discipuli & acumine supares, aut pares quandoque, Capreolus eximius, Caietanus ingeniosus, Mayronius illuminatus, Aureolus argumentator, Marsilius clarissimus, Gabriel egregius: & quid ceteros cōmemorè? Dehinc extra familias istas, Henricus noster solemnns, Albertus Magnus, Alexander irrefragabilis, Richardus solidus, Durandus resolutissimus, alijque sine fine recenseri possunt, qui vniuersi omnes perpenfis vtrunque rationum momentis, in Aristotelis & Mathematicorum sententiam non descenderunt, sed coacti præcipites abiue-



abiuerunt. Vnum tamen Ioannem Maiorem oportet numero isto eximere, qui non in Epicurum tamen, sed in Deinocritum elapsus, ex punctis solis, sed infinitis, concinnat nobis continuum: non sine diffidentiâ tamen. nam vbi satis diu punctatim finxit & refinxit suum opus, denormat torum hac vltimâ lacinia: *Valeat hoc paradoxum quantum valere potest.* In 1. d. 1. q. 1.

Ceterum, si quis iam ingenij & humani intellectus ista lumina cum obscuro Epicureorum grege, VVicleffo, & Hufso componat, quis à noctuis istis acutiùs, quàm ab illis aquilis conspectam fuisse credat veritatem? Quis duos atræ mentis hæreticos cælestibus SS. Patrum, & Scholasticorum tot ingenijs audeat anteferre? Quis tam vecors, vt Academiâ, Lyceo, Stoa neglectâ, in ganejs & lustris Epicuri verum puter inuenire? Nihilominus tamen quia in grege ebriorum quandoque est ingeniosum aliquem reperire, de Epicuri ingenio non inutile, aut iniucundum erit, longiùs aliquid sciscitari.

## CAPVT VII.

*Quale ingenium Epicuri, & eorum qui παρωπίστει  
atomorum repererunt.*

**Q**Vatuor in vrbe Atheniensi, aut circa eam fuerunt olim Philosophorum scholæ, Academia Platonis, Lyceum Aristotelis, Stoa Zenonis, Viridarium Epicuri. De Platonis, Aristotelis, Zenonis ingenio, quod Sallustius de Carthagine, *silere melius puto, quàm parum dicere.* superuacuum etiam sit, cum tota perstrepat, & pro me loquatur antiquitas. Quis enim *sapientia Principem* (ita D. Hieronymus appellat) *diuinum, profundum, nec à iuuenilibus ingenijs intelligendum* Platonem, *finem humani intellectus* Aristotelem non audiuit? Subtilissimus ille Academix nouæ conditor Carneades in tantum Zenonis ingenium extimuit, vt aduersus eum scripturus cerebrum helleboro aliquoties purgauerit, *ne quid ex corruptis in stomacho humoribus ad domicilia vsq; animi redundaret, & constantiam vigoremq; mentis labefactaret: tantâ curâ, tantoq; apparatu vir ingenio præstanti ad refellenda, qua scripserat Zeno, aggressus*, inquit Agellius. Lib. 1. aduers. Iouin. Plutarch. Auerr.

Li. 17. c. 15

De Epicuri ingenio, in re tam naturæ, quàm morum, contraria & latissimè discordantia inuenio. Lucretius qui libris sex Phyllicam

D

Epi-

Epicuri Romanis carmine vulgavit, Diogenes Laërtius, & omnes vniuersim Epicuræi magistrum in omni Philosophiâ immensum extollunt. Audite de eo Lucretium :

Lib. 3.

*Tu pater, & rerum inuentor, tu patria nobis  
Suppeditas præcepta, tuisq; ex include chartis,  
Floriferis ut apes in salibus omnia limant,  
Omnia nos itidem depascimur aurea dicta,  
Aurea, perpetuâ semper dignissima vitâ.*

In Epicu-  
ro.

Et Laërtius, Præstantiam eius satis ostendit, inquit, perpetua scho-  
le eius successio, quæ ceteris ferme omnibus deficientibus, sola persistit,  
discipulis perpetuò sibi inuicem succedentibus.

Lib. 35. c. 2.

Tanti verò discipuli Epicurum faciebant, ait Plinius, ut natali  
eius, vigesima lunâ, sacrificarent, feriasq; omni mense custodirent,  
quas εὐαῖας vocabant. Solum enim eum veram felicitatem, & in  
re naturali veritatem reperisse iactabant, vnicum eum Philoso-  
phum, ceteros οὐκ εἶναι, seu umbras volare. Tanti etiam ipse  
supercilij erat, inquit Plutarchus, ut neminem, præter se vnum, do-  
ctum & sapientem esse diceret, aut eos qui ex scholâ suâ prodijissent.

Lib. contra  
Epicur.

Clarus quippe conceptibus mentis, & elocutione erat : quales  
sibi mirifice placere solent, ac difficulter se ab eo auelli sinunt, quod  
oculis parè videre existimant, etiam si nexus, quibus eos aduersarij  
impeditos tenent, dissoluere non valeant.

In Epicur.

Epicurus, ait Epicuræus Laërtius, ἀργενταὶ λίξαι κατὰ τῆς  
σοφίας, ἢ, ἐν ἰδιωτῶν ὄρεϊ, Ἀριστοφάνης ὁ Γραμματικός αἰνᾷται,  
dictione viuitur propriâ & rebus accommodatâ, quam, quia simplici-  
sima & planè vernacula est, Aristophanes Grammaticus reprehendit.

Epist. ad  
Magnum.

Et huc fortasse oculos coniecit S. Hieronymus, quando ait *Epicu-  
rum litteras non didicisse*. Stilum enim non scholasticâ exercita-

Lib. 2. Mc-  
teor.

tione, sed ἀπὸ μόνος ἀποσολῆς, è mediâ mendicorum profenchâ, ait  
Cleomedes, & verba e luto tibi formauerat.

Sed aliorum de toto Epicuri ingenio sententias etiam audiamus.

Lib. 3. Inst.

*Epicuri disciplina*, inquit Lactantius, *multo celebrior semper fuit,  
quàm ceterorum, non quia verè aliquid afferat, sed quia multos popu-  
lare nomen voluptatis inuitat: nemo enim non in vitia pronus est.*  
Ac de quibusdam Lucretij versibus in laudes Epicuri effusis :

*Qui genus humanum ingenio superauit, & omnes  
Resinxit stellas, exortus vii. æthereus sol:*

*Hos equidem versus, inquit, numquam sine risu legere possum. Non  
enim de Socrate, aut Platone hoc saltem dicebat, qui velut reges ha-  
bentur*

*benitur Philosophorum, sed de homine, quo sano & vigente nullus aeger ineptius deliravit. Itaque Poëta inanissimus leonis laudibus murem non ornauit, sed obruit & obtrinit.*

Alibi etiam D. Augustinus, *Hoc didicit, inquit, ab Epicuro*, PGal 73.  
*nescio quo deliro Philosopho, vel potius amatore vanitatis, non sapientia: quem ipsi etiam Philosophi porcum nominauerunt, quia voluptatem corporis summum bonum dixit, hunc Philosophum porcum nominauerunt volutantem in cæno carnali.*

Verum, ne in moribus tantum delirasse putes, quàm sanus in Philosophiâ naturali fuerit, non à SS. Patribus, ne odij, aut nimij fortassis in eum zeli suspectentur, sed à Philosopho Cleomede potius discamus. De Dialecticâ eius, & acutâ illâ ac argutâ Philosophiæ parte, nihil dico, quàm omnino nullam habuit. Epicuræ, ait ille effusissimus Epicuri laudator Laërtius, τὴν Διαλεκτικὴν, ὡς παρὰ λυκοῦσαν, ἀποδοκιμαζουσι ἀρετὴν γὰρ τὰς φυσικὰς χρθεῖν καὶ τὰς τῶν πραγμάτων φύσεις, Dialecticam, tamquam peruerentem, repudiant: *Physicis enim simplicia rerum vocabula sufficere aiunt.* Et Cicero alicubi Epicurum pessimum Dialecticum fuisse, & negasse alteram contradictoriarum debere esse veram, affirmat. *Totum hoc, inquit, aut etiam, aut non, negauit esse necessarium: quo quid dici potest obtusus?* Et eodem aspexit D. Hieronymus, dum ab hac Dialecticæ ignorantia, inimicum suum Ruffinum, Epicurum facit. *Quoniam, inquit, Stoici Logicam sibi vindicant, & tu huius scientiæ deliramenta contemnis, in hac parte Epicurus es.*

Lib. 1. de  
Nat. deor.

Quantus igitur in Physicis, in quibus ὁ μὲν καὶ πρῶτος ἀνθρώπων τὴν ἀλήθειαν ἐξέλεον, *solus & primus omnium mortalium veritatem reperiisse, iactabatur à discipulis, inspiciamus.*

In primis, sensum, omnium veritatum vnicum & incorruptibilem iudicem constituit. *Timuit Epicurus, ait M. Tullius, ne si unum visum esset falsum, nullum esset verum: omnes sensus veritatis dixit esse.* Hinc docuit, solem, lunam, ceteraque astra tantula reuera esse, quantula nobis apparent. Audite istum e scholâ eius rudentem:

*Nec nimio solis maior rota, nec minor ardor  
 Esse potest, nostris quàm sensibus esse videtur.*

Lucret.  
lib. 5.

Et mox de lunâ:

*Lunaq;, siue notho fertur loca lumine lustrans,  
 Sine suam proprio iacet de corpore lucem,  
 Quidquid id est, nihilo fertur maiore figurâ,*

: D 2

Quam

Lib. 1. Me-  
teor.

*Quàm nostris oculis quam cernimus, esse videtur.*

Hinc, inquit Cleomedes, fatebantur Epicurei solem in exortu maiorem reuera esse, quam in meridie, quia ita oculi renuntiant. unde, cum eodem temporis momento, ait, quibusdam oriatur, & aliis in meridie sit, conspectaneum est, ut bipedalis tantum, ac tamen simul etiam tripedalis diametri sit, ἡ δὲ ἐν ὅσῳ ἀλογώτερος, *quod nihil est*, inquit, *stupidius.*

Secundò, existimauit Epicurus, ait idem, solem cottidie manere accendi, vesperi extingui oceani aquis. cum igitur omni temporis puncto alicubi oriatur, & alibi occidat, ubique perpetuò simul accendi & extingui oportebit: quod non nisi à παχυδέρμῳ, *crasso corio*, & pinguisimà Mineruà venit.

Denique ut alia ridenda, quæ ibi exhibilat Cleomedes, fileam, animam immortalem, diuinam providentiam, & omnem funditus religionem interfecit, & ut ille ait, τὸ σωὸλον ἐν πάντῃ σκήμματα κατεπλήτῃ ἀσφαλτικῶν τυφλώσεων, *prorsus in omni consideratione magis omnibus talpis cecutiuit.* Neque id mirandum, inquit, quia veritas à sobriis & siccis, ἔχῃ δὲ τοῦ σαρκὸς δεσφῆς κατὰ σῆμα ἀγαπῶντων, *non saginam corporis amantibus*, videri se sinit. Homericò Theristæ deinde eum componit, iactabundo supra modum, cum tamen caudex & turpissimus esset, & verè ad eum Ulysses:

Οὐ γὰρ ἐγὼ σὺ φημι χρεώτερος βροτῶν ἄλλων  
ἔμμεναι. —

*Non equidem noui qui te sis turpior alter.*

Lib. de Ira  
Dei.

De Leucippo verò, & Democrito, à quibus atomos suas accepit Epicurus, & illo quidem clamat Lactantius: *An solus Leucippus oculos habuit? solus mentem? qui profectò solus omnium cecus & excors fuit, qui ea loqueretur, quæ nec ager quisquam delirare, nec dormiens possit somnare. Quatuor elementis constare omnia Philosophi veteres differebant, ille noluit, ne alienis vestigijs videretur insistere; sed ipsorum elementorum alia voluit esse primordia, quæ nec videri possint, nec tangi, nec ullà corporis parte sentiri. Tam minuta sunt, inquit, ut nulla sit acies ferri tam subtilis, quàm secari ac diuidi possint: unde illis nomen imposuit atomorum.*

Democritum verò (quem Metrodorus & alij Epicurei fatentur ad veram Philosophiam, & fundamenta naturæ viam aperuisse Epicuro) stultitiam, & tacta eius hypochondria, insinuat. *Democritus, ait, quasi in putco quodam sic alto, ut fundus sit nullus, veritatem iacere demersam queritur: nimirum stultè, ut cetera.*

Præter

Præter alios denique sine fine errores, animam nostram mortalem, & ex ignitis atomis, similes illis quos pulmonibus respiramus, acervatam & malè coherentem, existimavit: quod antè etiam fecerat magister eius Leucippus, secutusque deinde utrumque Epicurus. Atque hanc intimam causam fuisse reor, cur Democriti libros in ignem iniiciendi impetum Plato ceperit; quidquid aliam prætexat Democrito honorificam Laërtius. Ex his, opinor, facile intelligimus, atomorum & punctorum illam, ut Democritus appellabat, *πανσπερμία*, *omni-seminarium* à paucis, nec magni & illustri ingenij aut famæ Philosophis, sed qui ad captum suum & angustias vulgi conati quidam dicere, fuisse repertam.

In Democrit.

Itaque si auctoritate res agitur, S. Augustinus, & tot illa SS. Patrum columnina, cum tribus Thomistarum, Scotistarum, Nominalium scholis, aliisque extra eas sparsim, par illud hæreticorum, Vicleffum & Hussum, tres Athenarum scholæ, Academia, Lyceum, Stoa, Epicurum immensum excedunt, & si componantur, oppriment. Sed deserta auctoritate, ad rationes, scio, prouocabunt. De istis ergo posthac arbitremur: quas in Mathematicas, & Physicas distinguemus. Et primum quidem compositionem continui permanentis, siue magnitudinis, deinde temporis & motus tractabimus.

## CAPVT VIII.

*Argumentum primum Geometricum, quo demonstratur, magnitudinem non componi ultimè ex solis punctis finitis: Non à quouis puncto circumferentiæ rectâ duci poterit ad centrum.*

**E**Picureorum tota factio, æquo semper errore à vero deuia, & illa existimans ridenda qua nesciat, ut inquit Macrobius, argumenta ista è Mathesi irridebit, à quibus disciplinis ita semper abhorruit, ut in summis laudibus, nescio cuius Philosophi Apellis olim posuerit, ait Plutarchus, *numquam ab adolescentiâ suâ contaminatum fuisse disciplinâ Mathematicâ*. nempe pecudes istæ plus solidæ felicitatis in capone vno bellè asso, quàm omnibus Mathematicorum libris constituebant. Sed ad sanos, à hypochondriacis istis appello & transfero iudicium.


Lib. i. c. 2.  
Sonnij.

Lib. contra  
Epicur.

Itaque inprimis docent Mathematici, quod si describantur duo

circuli concentrici, omnes lineæ rectæ, ductæ à quolibet puncto circumferentiæ maioris ad centrum, debéant necessariò transire per aliud & aliud semper circumferentiæ minoris punctum, & numquam duæ per idem. Cuius ratio est, quia si plures lineæ à diuersis punctis circumferentiæ maioris descendentes transirent per idem punctum circumferentiæ minoris, concurrerent inter se antequam peruenirent ad centrum; quod est impossibile, cum supponantur esse rectæ.

Datà verò hac demonstratione, sequitur euidenter, circumferentias illorum circulorum ex punctis finitis non componi. Fac enim circumferentiam  $ABCD$ . in segmento arcus  $AD$ . con-



tinere mille puncta, & arcum minoris circumferentiæ  $EH$ . ei respondētis continere dimidium numerum, id est, puncta quingenta. Ducantur iam à 1000. punctis segmenti  $AD$ . totidem lineæ rectæ ad centrum  $I$ . Si transeant singulæ per aliud & aliud punctum segmenti  $EH$ . igitur in isto segmento  $EH$ . erunt etiam 1000. puncta localiter extra mutuum situm expansa, id est, dimidium erit æquale suo toti, & numerus 500. æquabitur 1000. &

totus

totus circulus A B C D. nō erit maior circulo ei inscripto E F G H. quod est manifestum impossibile. Hac demonstratione aduersus Epicurum, sed paullo aliter conceptā, vtitur Scotus.

In 1. d. 1.

q. 9.

Duo tamen, quantum video, possunt respondere.

Primò, Aristotelem respicient eadem absurditate, dicentque nec sententiam eius posse defendi, nisi totidem in minori, quot in maiori circulo, sint puncta, & vterque circulus par sit. Sed incassum nituntur. nam si de punctis realibus, id est, Phisicis & diuisibilibus, res sit: totidem in minori circulo sunt; sed minora, quàm in maiori, vt infrà mox ostendemus. si de punctis Mathematicis & imaginariis, pro vnoquoque puncto maioris circuli aliud semper nouum in circulo minori ei respondens, cum fundamento in re imaginari possumus; quia, cum infinita sint, non possunt aliquando deficere. Puncta verò Mathematica realia, lineasque omnes, & superficies reales Cap. xxxii. continuo expungimus.

Secundò, (& sic qui hodie Louanij in sententiā Epicuri, ferè solent) affirmabunt plures lineas segmenti maioris A D. deduci ad centrum I. eadem viā, ac per idem punctum segmenti minoris E H.

Subtilitas Scoti tamen oppositum tam putauit euident, vt dicat: *Quod minor circumferentia non secetur in vno eodem puncto, si secetur à duabus lineis, non oportet probare, nisi propter proteruiam aduersarij: quia satis est manifestum, quod eadem linea, si protrahatur (à centro) in continuum & directum, numquam terminabitur ex eadem parte* (in circumferentiā circuli maioris) *ad duo puncta*: ita videlicet, vt linea vnica à centro I. ad punctum minoris circuli L. directè protracta, diuidatur deinde in duas, quæ terminentur ad duo puncta circumferentiæ maioris M. & N. aut certè ad tria M. O. N.

In 1. d. 1.

q. 9. nu. 11.

Verum quia propinquititas punctorum M. O. N. potest esse tanta, vt iudicio sensus videantur esse vnum punctum, ac proinde lineæ M I. & N I. esse eadem cum lineā rectā O I. vnde lineæ M I. & N I. videbuntur etiam in directum protractæ; idcirco fingamus circumferentiam A B C D. esse longè ampliorem circumferentiā E F G H. vt exempli causā, sit illa circumferentia supremi cæli, hæc verò globi terrestris. Quia igitur vna alteram in immensum quodammodò superat, pone decies centena millia punctorum circumferentiæ maioris respondere vnico puncto minoris, & consequenter totidem lineas à circumferentiā maiori per punctum L. circuli minoris transire ad centrum I. Ergo iam omnes lineæ

Lib. 1.

lineæ magni tandem & notabilis segmenti circuli maioris, non recta, sed insigni inflexione & curuaturâ, necessario traici debebunt per punctum L. ad centrum I. ac proinde falsum erit hoc Mathematicum principium, *A quolibet puncto circumferentiæ posse lineam rectam ad centrum duci.* & generaliter, falsum quod tamquam lumine naturæ rationalis evidens, postulat sibi sine demonstratione concedi Euclides, *ὅτι παντὸς σημείου ἐπὶ τῶν σημείων ὁδὸς ῥαμμένη ἀγὰρ ἐστίν*, à quolibet puncto ad quodlibet aliud punctum lineam rectam posse duci. Dupliciter tamen hoc eludere possunt Epicurei.

Primo, postulet quantum volet, inquit, id sibi dari Euclides, nisi tamen demonstret, vtrò ei non dabimus.

Secundò, alij liberaliores, concedunt ei quod petit. sed omnes illæ lineæ, etsi per idem punctum circuli minoris descendant ad centrum, sunt tamen rectæ, inquit, quia rectiori viâ trahi nequeunt. Vnde fatentur lineam M I. esse reuerà rectam. Quomodo? inquit. nōne linea recta est, quæ inter duo aliqua puncta est brevissima? linea autem O I. sine dubio (sensus enim id ostendit) brevior est, quàm M I. aut N I. Respondent, verum id esse, linea tamen M I. est etiam, aiunt, hoc sensu brevissima, quia à puncto M. non potest breviori tramite, quàm per punctum L. ad centrum I. (incedendo per quantitatem & spatium verum) descendi.

Attamen quantum ad primum, difficile non erit Euclidi quod postulat demonstrare. Cum enim aliqua puncta sic in directum disponi possint, vt lineam rectissimam, qualis est I O. in præcedente figurâ, conficiant; fiat ex talibus regula, ego quibuscumque assignatis à te punctis eam interponam, & sic brevissimum omnino dimetiar quod interiacer spatium, ostendamque verum hoc esse, *A quolibet puncto ad quodlibet aliud punctum lineam omnino rectam posse duci*, ac talem esse lineam spatij, cui regula illa superponitur.

Itaque linea I O. exactè & mathematicè recta, transferatur in M. ostendet manifestè inter M. & I. esse brevius & directius spatium, quàm illud quod iam metitur linea I M. quæ torquet se & à recto tramite deuiat transeundo per L. cum per punctum P. esset ei transeundum.

Ex quo etiam vanitas secundæ responsionis statim apparet. Si enim linea I O. ad M. transferri possit, igitur series aliqua punctorum inter M. & I. quæ per punctum P. transit, directior & brevior est, quam illa quæ per L. descendit. hæc ergo erit linea M P I. cui  
regula



regula similis lineæ  $IO$ . superponetur. Nec illa linea  $MPI$ . ex punctis imaginariis tantum, sed etiam realibus, ut loquimur, contexta erit; quandoquidem totum vndeunque spatium imaginarium veris punctis veraque quantitate plenum sit, nec in vllâ vel minimâ particulâ dehiscat aut vacet.

Ex his ergo, opinor, liquet, numquam duas lineas à duobus punctis circumferentiæ maioris ad centrum descendentes, per idem punctum circumferentiæ minoris transire, sed semper per aliud aliudque: quod facillè deprehendi potest, si linea  $IO$ . vsque ad  $A$ . circumducatur. nam omni momento quo supremum eius punctum  $O$ . in circumferentiâ maiori locum mutabit, etiam medium punctum  $L$ . seruata proportione mutauerit. vnde cum  $O$ . transierit in  $M$ . etiam  $L$ . in  $P$ . migrauerit, atque ita deinceps vsque ad  $A$ . Id autem vt fieri possit, totidem puncta in segmento minori  $E H$ . quot in maiori  $A D$ . esse oportet, si vtriusque circuli circumferentiam ex puris punctis Mathematicis finitis constituas. Istud autem absurdum, impossibile, & contra sensum est: igitur infinitæ partes in circumferentiâ minori, etsi minores quàm in maiori, compingendæ sunt, ut quoties punctum  $O$ . se mouet per segmentum  $A D$ . maius, punctum quoque  $L$ . inueniat in segmento minori  $E H$ . aliquod spatium, quò se (licet tardius, quàm  $O$ . in segmento maiori) promoueat. Quod demonstrandum fuit.

Atque hæc doctrina Peripatetica eodem & firmo satis pede incedet, siue per puncta & lineas Physicas, siue per Mathematicas & imaginariâs expedire velis. Nam lineæ Physicæ sunt vera segmenta circuli, in summâ peripheriâ vnde incipiunt, latiora, & deinde paulatim versus centrum descendendo, angustiora. Tales autem in quolibet circulo (si is in segmenta proportionalia diuidatur) infinitæ, & rectissimæ sunt, reperiuntque singulæ in circulo minori concentrico noua puncta per quæ ad centrum transeant, quia hæc puncta non Mathematica ac omnino indiuisibilia, sed naturalia & diuisibilia sunt, ac proinde in circumferentiâ circuli minoris tantò minora, quantò circulus ipse est angustior maiori circulo, quo includitur.

Nihil igitur mirum in sententiâ Peripateticâ, omnes lineas naturales infinitas à punctis naturalibus circumferentiæ maioris  $A B C D$ . educatas, transire per alia semper puncta naturalia circumferentiæ minoris  $E F G H$ . quia paulatim in descensu gracilescent & cuneantur; veluti etiam in segmento  $A I M$ . cernere licet, quod in

E

summâ

summâ circumferentiâ latissimum est, & intercipit arcum A M. ac verò in circulo minori, solummodò arcum E L. & perpetuò se restringit donec perueniat ad centrum I. Sic igitur res se habet in qualibet, ac quantumlibet gracili lineâ naturali, quæ reuerà tenue quoddam circuli segmentum est, quod non eodem filo, sed sensim gracilescente (vt in aristis, aut barbæ etiam nostræ pilis videmus) à circumferentiâ descendit ad centrum.

Singulis ergo partibus diuisibilibus circuli maioris totidem in circulo minori respondent, sed minores, per quas proinde lineæ naturales in descensu se perpetuò extenuantes, faciliè transmittuntur rectâ ad centrum, cum punctum naturale, siue particulam minorem circuli minoris in transitu intercipient, quàm sit punctum illud naturale in circumferentiâ circuli maioris, vnde incipiunt. In continuo verò Epicuri, quod ex meris punctis Mathematicis finitis componitur, omnes lineæ pari filo, & crassitudine, vt sic dicam, vbiq; punctuali, ad centrum decurrunt: vnde si rectæ sint, necesse est, vt singulæ nouum punctum in peripheriâ circuli minoris intercipient, eiusdem molis cum puncto circuli maioris, quòd est earum linearum principium. & hinc planè conspectaneum est, totidem in ambitu vtriusque circuli puncta eiusdem molis esse, ac circulos ipsos æqualem habere peripheriam.

Putabunt fortasse eàdem, quâ nos, viâ elabi, per lineas nempe Physicas & diuisibiles perpetuò deorsum se cuneantes & adstringentes: sed fallentur. Nam si in schemate superiori, lineam Physicam Epicuri ex tribus punctis M O N. in latum dispositis crassefcere, statim ecce deorsum se extenuando, ad duo puncta crassities eius veniet, & deinde mox ad vnum, & dehinc eodem vnus puncti filo perget vsque ad centrum: id est, linea illa Physica reuerà recta esse non poterit, cum nec vniformis crassitie sit, nec vniformiter decrescat vsque ad finem: vnde, vt ex demonstratione superiori patet, lineæ istæ extremæ M L. & N L. quæ terminant vtrimque crassitiem lineæ Physicæ, nullâ rectâ viâ possunt peruenire ad centrum I.

Præter autem lineas nostras Physicas, Mathematici alias imaginarias infinitas ad centrum deducunt. Binas inprimis, quæ vtrimque lineæ Physicæ latera cingant, deinde alias sine fine quæ intra lineam istam Physicam, à summo deorsum ad centrum decurrant. Cum enim iuxta circuli maioris circumferentiam latius à se mutuò distent, & paullatim se cum lineâ Physicâ restringant, donec


donec concurrant in centrum, Mathematici imaginantur per angustias illius particulæ circuli minoris, quam linea Physica intercipit, totidem lineas Mathematicas posse transire, quot à punctis imaginariis maioris circumferentiæ possunt inchoari. nam quæcumque & quantumcumque propinqua duo puncta in maiori circulo designaueris, inter ea est pars lineæ, quæ in infinitum decrescere potest; ac proinde si à punctis illis lineæ duæ versus centrum deducantur, spatium inter eas perpetuò restringetur ac decrescet, atque ubi ad minoris circuli circumferentiam lineæ perueniant, eam in duobus punctis propinquioribus secabunt, quàm fuerint illa duo puncta in circumferentiâ maioris circuli, à quibus inceptæ sunt. Quotquot igitur lineas Mathematicas imaginarias à punctis arcus A O. imaginatio nostra inchoat, totidem per arcum minorem E L. ad centrum I. deducit. Secus verò esset, si lineæ parallelæ, siue æquidistantes traherentur. nam eo casu non omnes inchoatæ à punctis arcus A O. inciderent in aliquod punctum arcus E L. sed tantum eæ quæ inchoarentur à parte arcus A O. tantâ, quantus est arcus E L. ut scienti quid linea parallela, & paullisper cogitanti faciliè liquet.

An igitur totidem in arcu minori E L. puncta sunt, atque in arcu maiori A O? inquires. Resp. Puncta vera & realia nec plura, nec pauciora, nec æquali numero sunt, quia puncta eiusmodi, cum lineis suis, & superficiebus realibus Cap. xxxii. vniuersim continuo expellimus. Partes tamen in utroque arcu infinitæ sunt, licet plures in maiori, quàm in minori. Ut tamen omnes lineæ à punctis imaginariis circuli maioris rectâ perueniant ad centrum, satis est infinitudo quælibet partium circuli minoris, inter quas lineæ imaginariæ indivisibili tramite, ac sine vllâ spatij extra partes illas occupatione, sed ipsis implicitæ, imaginatione nostrâ in centrum traiciunt. Atque ita hæc infinitudo partium minoris circuli dat Mathematicis sufficiens fundamentum imaginandi rectitudinem imaginariæ lineæ, à quocumque puncto imaginario maioris circuli, cogitatione suâ eam voluerint deducere ad centrum. Potest tamen id etiam de punctis & lineis Physicis intelligi, quas diximus initio latiores esse, deinde pedetentim accessu ad centrum restringi. Tales enim infinitæ recto, sed paullatim angustiori tramite descendunt ad centrum.

## CAPVT IX.

*Argumentum secundum Geometricum idem demonstrans:  
Tot erunt in Diametro puncta, quot in toto semicirculo.*

**E**X sententiâ Epicuri iterum hoc ἀδύνατον & impossibile sequitur, Tot esse præcisè in diametro circuli puncta, quot in totâ circumferentiâ semicirculi. Describatur enim semicirculus ABC. cuius diameter sit AC. Si circumferentiâ siue lineâ ABC. finito numero punctorum constât, aio non pluribus, quàm diametrum siue lineam AC. constare. id est, duz lineæ inter eadem duo extre-



ma puncta A. & C. quarum vna est recta, & altera curua, erunt æquales, cum eundem punctorum extra mutuum situm expansorum numerum contineant. Quæ res non verbis, sed flagris est dignissima.

Sic autem ostenditur. A singulis punctis circumferentiæ duci possunt lineæ rectæ perpendiculares, quæ per alia ac alia semper diametri puncta transeant, quales sunt MN. & IL. &c. igitur tot præcisè erunt puncta in arcu semicirculi ABC. quot in diametro AC. Nam aliàs aliquot lineæ necessariò per idem punctum diametri transire deberent. vt, exempli causâ, lineâ à puncto M. nulla posset in punctum N. perpendiculariter, seu ad angulos rectos deduci, sed in punctum L. fortassè cum lineâ IL. necessariò deberet ad angulos obliquos incidere, nec posset directiùs per aliud punctum diametrum interfecare.

Hoc verò statim ridiculum apparet. Cur enim magis potest  
L. in


I. in L. rectissime & perpendiculariter, quàm M. in N. protrahi? Iam enim Cap. præcedenti ostendimus, verissimum hoc Euclidis pronuntiatum esse, inter quælibet duo puncta rectam omnino & Mathematicè lineam posse duci. Igitur inter M. & N. extrema puncta tam valet rectissima linea, quàm inter I. & L. aut inter B. & D. &c. interiacere.

In sententiâ verò Aristotelis & Mathematicorum, sufficit in diametro puncta, aut partes infinitas esse, licet in circumferentiâ semicirculi plures inueniantur: vnum quippe infinitum alio maius esse nihil vetat, quemadmodum in numero hominum possibilem infinito, non tantum vnitates, sed centenarij infiniti sunt, etsi vnitates, quàm centenarij, plures sint.

## CAPVT X.

*Argumentum tertium Geometricum idem demonstrans.*

**I**dem in lineis rectis facile potest ostendi. Sit enim triangulus A B C. cuius basis B C. contineat quemcumque punctorum numerum. Habeat igitur 10. vt in paruo numero res tota facilius capiatur: latera verò singula habeant duplum, id est, puncta 20. eritque totus triangulus isosceles, siue æquicrurus, cuius latera duplo longiora basi. Ducatur deinde à puncto proximo (si tale aliquod est) supra angulum B. linea recta ad punctum ex aduerso positum, proximè supra angulū C. fiatq; linea D E. quam, quia intra triangulum cadit, manifestum est esse breviorē




E 3

basi

basi B C. Nam cum latera trianguli perpetuo comprimantur, donec tandem in conum A. concurrant, fieri non potest, quin lineae basi parallelae, triangulo sic inscriptae, secundum sursum pergendo, perpetuo decurrantur. Igitur linea D E. breuior erit basi B C. vno, ut minimum, puncto. minor enim mensura, quam puncti indiuisibilis dari nequit. Itaque D E. nouem punctorum erit. proxime deinde sequens octo punctorum, & ita deinceps sursum cundo; & vnicum semper punctum carpendo, decimam lineam F G. vnius tantum puncti esse inuenies: & tamen dimidiam solum arcus trianguli partem lineis inscriptam & occupatam vides. Quae igitur magnitudine superiores decem lineae usque ad conum A. inscribendae constabunt? Certè enim spatium illud non magis est vacuum, quam inferius. Hoc igitur fateri Epicurum oportet: lineas supra F G. inscribendas esse minores lineam F G. punctuali, & proinde puncto esse aliquod minus: unde punctum esse diuisibile, nec esse punctum, & eiusmodi tanta alia delirare, ut nemo Medicus tam tardus sit, qui ad cucurbitas statim non decurrat, aut Hippocraticis vinculis ligatum in Anticyranam nauem non iniiciat. Haec verò demonstratio ante me etiam Gregorij Ariminensis est, cui olim cum clarissima mihi videretur, & tenebras tamen aliquas in gratiam Epicuri, offundere studerem, nihil aliud post longam mugitationem exprimere valui, quam

In 1. d. 1.  
q. 1.

triangulum isoscelem, chimæra esse, & rem impossibilem. Et ut intellectum meum in hanc fidem cogerem, & fucum ei aliquem non omnino improbabilem facerem, ego superficiem ex punctis, ceu pavimentum ex tessellis, sic sternebam, ut vnumquodque punctum quaterna alia proxime cingerent, hoc modo:



Ex qua punctorum acie construi quidem vides quadrangulum A B C D. inclusum quatuor

quatuor lineis perfectè rectis, sed triangulum nequaquam potest. Nam licet duo latera recta, vt exempli gratiâ, A C. & C D. pro triangulo sumi possint, tertium tamen latus, videlicet A D. quod est diameter quadranguli, perfectè & Mathematicè rectum esse nequit. Cùm enim quodlibet punctum quaternis solummodò aliis, sursum, deorsum, & ad utrūq; latus proximè ambiatur, nulla linea recta ab eo puncto sic inclusò exire potest, nisi per aliquod ex quatuor illis punctis ipsum ambientibus. Igitur à puncto extremo D. (quod quia in ultimo angulo est, à duobus tantum punctis quadranguli cingitur) recta linea solum duci potest versus C. & versus B. non autem versus A. per mediam diametrum areæ quadranguli; sed oportet lineam serpentinam & delirantem, hoc quo ibi cernis pacto, à D. versus A. contorquere. Et hæc est linea rectissima (aut certè alia hac non correctior) quæ à D. in A. protrahi per puncta intermedia potest, si tota area contexta est ex meris punctis. Ne nimis effusè tamen rideas, linea illa D A. ad sensum recta est, quia paucula proxima & contigua puncta per quæ à rectitudine Mathematicâ deuiat, non efficiunt quantitatem quæ oculis cerni possit: etiam si in præsentī figurâ, vbi puncta cum intervallis ad distinctionem depicta sunt, euident flexus & deliratio lineæ appareat.

Cur autem non sufficit, inquires, vt per vnus solum puncti latitudinem extra viam rectam vbique se detorqueat? Resp. quia sic numquam lineam tuam à D. vsque ad A. deducere poteris, sed necessariò finietur in E. decimo puncto lateris; ita videlicet, vt C D. & C E. (duo trianguli quod inde resultabit latera) sint lineæ æquales. Periclitare, si vis, ita rem habere inuenies, & ex Capitis xii. demonstratione patebit.

Sic igitur ego olim pro Epicuro papyrus meam dispungebam. Sed bonâ fide, estne excusare hoc, an accusare? qualis enim est iste Epicureus triangulus A D C. quàm ridiculus? Infamiet, si videat, non irascitur Euclides, & *frontem clamabit perisse de rebus.*

Incredibile enim nimis est, à D. in A. lineam directiorem & breuiorem istâ non posse pertrahi. Nam sumatur linea A C. quæ rectissima est, & aliquot punctorum additione prolongata (diameter enim quadranguli D A. est aliquantò longior, quàm latus A C.) inter puncta extrema D. & A. interponatur: iam diametri illius longitudinem perpetuâ & directissimâ punctorum suorum serie metietur, punctaque eius in totidem areæ puncta cadent, cùm nullibi

nullibi vacuum sit, unde diameter D A. tam recta, quàm latus A C. erit: quod tamen fieri nequit, si tota area composita sit ex puris punctis.

Deinde, quomodo A D C. est triangulus, cum multæ lineæ basi C D. parallelæ triangulo isti admirabili inscriptæ, sint inter se æquales, superiores scilicet cum inferioribus? hoc enim est manifestum impossibile; nam tales lineæ, sursum versus conum trianguli scandendo, perpetuò contrahuntur & sunt breviores, & inferior semper est longior proximâ superiore: idque iudicio etiam sensus intelligi potest. Finio igitur, & aio: si triangulus ullus isosceles, seu cuius basis brevior est lateribus, aut si vlla in mundo perfecta pyramis esse potest, manifestè deprehensus est sine effugio, nec solum à ratione, sed etiam à sensibus ipsis quorum iudicium tanti facit Epicurus.

Negare verò perfectum isoscelem posse fieri, est vnâ operâ vniuersas figuras rectilineas conturbare & euertere: cur enim aliarum potius figurarum areæ rectis lineis omnibus claudi possunt, quàm area talis trianguli? Non negabitur saltem, spero, Deum tres lineas isoscelis ex punctis directissimè & Mathematicè compositis posse concinnare, areamque iis conclusam verâ & reali quantitate totam complere. Hoc verò si detur, satis est: omnia enim illic sequuntur absurda, & impossibilia quæ antè demonstraui.

## C A P V T X I.

*Argumentum quartum Geometricum, quo Aristoteles idem demonstrat.*

Lib. 10.  
prop. vii.


In 1. d. 1.  
q. 9.

Geometrix passim & Euclides demonstrant, τὸ δὲ διὰ μέγεθος καὶ πλάτος τετραγώνου ἑνὲς ἀοικνέστερον εἶναι, *diametrum & costam quadrati longitudine incommensurabiles esse.* Hoc autem falsum est, inquit Aristoteles, si quadratum componatur ex meris punctis. Antecedens ex Euclide scitè demonstrat subtilis Scotus. Si enim diameter & costa (id est latus) quadrati inter se commensurabiles essent (hoc est, si pars aliquota assignari posset, quæ foret communis mensura longitudinis vtriusque lineæ) sequeretur hoc impossibile: numerum aliquem parem esse æqualem impari.

Nam si diameter & costa longitudine commensurabiles sunt, habent inter se proportionem, qualem numerus vnus ad alium nume-



numerum, ut olim demonstravit Euclides, ac insuper quadrata linearum eandem habebunt proportionem quam numeri quadrati, geniti ex ductu & multiplicatione istorum numerorum in seiplos. Lib. 10.  
prop. 5.  
& 9.



Sit enim linea A B. trium pedum, & altera C D. quatuor pedum. sunt igitur commensurabiles longitudine, & eandem proportionem habent quàm numerus ternarius ad quaternarium. igitur & quadrata illarum linearum, ut ex Euclide & Geometriâ est certum, proportionem eandem, quam quadrata numerorum, servabunt. Nam ut in schémate hic appictò cernis, quadratum linæ A B. quæ est trium pedum, occupat novem pedes in quadrato, qui numerus etiam est quadratus ternarij, nam ter tria faciunt novem. quadratum verò linæ C D. quatuor pedum, diffundit se ad sedecim pedes in quadrum, qui numerus quoque est quadratus quaternarij; quater enim quatuor colligunt sedecim. Vides igitur eandem esse proportionem inter maius quadratum linæ C D. & quadratum minus linæ A B. quæ est inter 16. & 9. siue inter numerum quadratum quaternarij, & quadratū ternarij.

Id si ita est, & proportio talis, aut quæcumque alia inter diametrum quadrati & costam eius sit, exprimaturs illa aliquo numero quocumque tandem. Igitur ad vitandam confusionem, eosdem numeros retineamus, & quoniam diameter longior aliquantulo est, quàm costa, sit diameter ut 4. & costa ut 3. unde statim conficitur, quadratum numerum quaternarij, id est 16. eandem habere proportionem ad 9. qui est quadratus ternarij, quam habet quadratum diametri, siue linæ C D. ad quadratū costæ, siue linæ A B. Hoc autem est manifestum impossibile: nam aliàs oporteret nu-

F  
merum

Lib. 1.  
prop. 47.

merum 9. qui est impar, æqualem esse 8. qui par est. quod sic ostenditur. Euclides quippe, & antecum Pythagoras demonstravit, quadratum diametri cuiuscumque quadrati præcisè duplum esse ad quadratum costæ. quæ demonstratio si falsa, nã egregiè frustra fuit Pythagoras, qui eius inuentione tam impotenter lætatus est, ut illicò bouem vnum ( alij *ἑκατόμυλλον* *centum boues* ) quamquam non oppidò diues, & *δακτυλογλύφου*, *annulorum sculptoris* filius esset, dicatur Musis immolasse. Verùm, et si factò isto ipse delirus, non tamen delirat eius demonstratio: quod, nisi longum & extra scamina iam id foret, faciliè esset ostendere. sed apud Euclidem, & eius commentatores potes videre.

Si verò quadratum diametri duplum præcisè est ad quadratum costæ, & eamdem proportionē numerus quadratus 16. ad numerū quadratum 9. habet; igitur numerus 9. est æqualis 8. quia 16. ad 8. tantum dupli proportionem obtinet. Quod cum absurdum sit, dicendum est, numerum quadratū 16. non eamdem habere proportionem ad 9. quam quadratum diametri ad quadratum costæ, ac proinde (argumento ab opposito consequentis ad oppositū antecedentis) diametrum & costam quadrati non esse lineas longitudine commensurabiles. Sparsa iam igitur sic colligamus in nodum:

Quotiescumque duæ lineæ sunt longitudine commensurabiles, quadrata numerorum quibus earum proportio exprimitur, habent eam inter se proportionem, quam quadrata illarum linearum, & contrà:

Sed nullorum numerorum quadrata possunt habere illam proportionem (videlicet dupli ad dimidium) quam diametri & costæ quadrata habent:

Igitur diameter & costa longitudine cōmensurabiles non sunt.

Vt autem minor intelligatur, recense omnes numeros quadratos in infinitum ( vt 4. cuius radix est 2. deinde 9. cuius radix est 3. postea 16. cuius radix est 4. Item 25. cuius radix est 5. & ita scandendo sine fine ) numquam duos reperiēs, quorum vnus sit alterius duplum, id est, qui obtineat proportionem quadrati diametri ad costæ quadratum.

Antecedente igitur hoc stabilito (diameter & costa quadrati incommensurabiles sunt) infertur euidenter: igitur duæ istæ lineæ ex puris punctis finitis non componuntur. Cum enim omnes numeri finiti commensurabiles sint, & eadem parte ( videlicet vnitāte, vt minimum ) tamquam mensurā communi possimus eos metiri,


quo-

quocumque numero finito punctorum diameter quadrati constiterit, semper erit commensurabilis costæ, ac proinde quadrata numerorū punctorum diametri & costæ habebunt inter se proportionem dupli ad dimidium, quam quadrata (vt toties iam diximus) diametri & costæ obtinent, quod omnino est *absurdum* & impossibile.

Hæc tam diffusè disseruimus ad lucem & intelligentiam demonstrationis Scoti, quæ breuitate suâ quibusdam forsitan fusca videbitur. Ne tamen hic etiam aliqui tenebras Matheseos accuserent, aliâ viâ rem eodē deducemus, tam clarâ & illustri, vt talpæ etiam in eâ videant. Hac eadem tandem etiam Scotus & Gregorius Ariminensis inceslere, sed diuertunt tamen paullisper, & tenebras è Mathesi iterum miscent.

## CAPVT XII.

*Argumentum idem aliter, ac magis dilucidè propositum.*




**F**iat Epicuræum è puris punctis finitis quadratum  $ABCD$ . atque iam in isto, contra manifestam Euclidis demonstrationem, diametrum esse commensurabilem costæ, imò ipsi aut æqualem esse,

esse, aut duplo maiorem; quorum utrumque refellitur evidenti iudicio oculorum: nam mensura sensibilis tibi dicet, diametrum aliquanto solum esse costâ longiorem. Ducantur enim lineæ rectæ à punctis omnibus vnus costæ in omnia puncta alterius ex aduerso opposita, quæ necessariò transibunt per mediam diametrum. Vt à puncto E. ducatur recta ad punctum F. à puncto G. in punctu H. & ita porro tota area compleatur lineis, quæ vniuersa eius puncta, nullo excepto, intercipiât, transeantq; omnes per diametrum B D.

Vel igitur duæ proximæ lineæ,eductæ à duobus proximis & contiguis punctis vnus costæ in duo proxima alterius (quales sint E F. & G H.) intercipiunt vbique duo proxima puncta diametri, nullo intermedio relicto, vel inter duas quasque lineas vnum saltem diametri punctum intactum à lineis manet. Si primum: igitur tot sunt præcisè in diametro puncta, quot in singulâ quâque costâ, & proinde costâ est diametro secundum longitudinem æqualis. Si secundum: igitur diameter duplo plura puncta, quàm costâ continet, atque ita est dupla ad ipsam.

Quid ad hæc reponeret Epicurus, equidem nescio, hoc tamen pro eo olim sum muginatus. Deformabam quadratum A B C D.



punctatim, vt vides. Deinde cùm cernerem diametrum rectissimam non posse duci, delirando hàc illac, vt hìc conspicias, ab angulo C. ad angulum B. instar serpentis atramentum conspirabam. Vbi hæc diameter C B. est tam recta quam esse potest, punctis ab vnâ costâ in aliam secundùm absolutam & Mathematicam rectitudinẽ ordinatis. Quia enim à quolibet puncto non nisi per quatuor vias rectissimè exire licet, idcirco in figurâ perfectè quadratâ, vbi omnia latera æquè multa puncta habent, per vnus saltẽm vbique puncti flexû lineam diametralem torquere oportet, vt à C. ad B. perueniat. Si autem figura non perfectè quadrata, sed alterâ parte longior esset, maiori flexu & plurium punctorum deuiatione, vt ab imo angulo ad summum oppositum pertingi posset, opus foret, vt Cap. x. dicebamus: & nisi credis, cape calamum, & periculum facito, mentior, aut sic inuenies.

Quid igitur pro Epicuro hìc respondendum? Hoc sanè, vel tacendum erit. Diametrum C B. duplo plura puncta, vt ibi cernis, quàm latus A C. aut B D. habere. nec tamen esse duplo longiorem, quia puncta eius non in directum ab angulo C. ad angulum B. ordinantur, sed ex quâuis lineâ à latere A C. in latus B D. directè productâ diameter duo puncta rapit: atque ita non directo itinere, ab vno quadrati angulo versùs alterum oppositum, proficit, sed se conspirat & torquet. Verumtamen quàm hæc infirmiter dicantur, inde patet. Cur enim diameter per mensuram rectam tantò apparet longior, quàm latus, si non rectâ, sed in singulis lineis areæ se per vnus puncti spatium detorquendo, versùs angulum oppositum se promouet? Deberet enim saltẽm mensurâ rectâ, si non obliquâ, lateri esse æqualis.

Deinde, quòd diameter C B. nequeat esse tam recta quàm A C. aut quoduis aliud quadrati latus, tolerari vix potest. nam rectissimâ lineâ, qualia sunt latera quadrati, longitudinem diametri metiri possumus, ita vt puncta mensuræ in totidem diametri puncta, & eadẽ directissimâ serie disposita, cadere oporteat.

Denique ex latere quadrati cuiuscumque potest fieri diameter, si ei aliud quadratum circumscribas: igitur sicuti, cùm officio lateris prioris quadrati fungebatur, linea Mathematicè rectissima erat, ita iam erit, cùm eadẽ immota manens ad officium diametri alterius quadrati assumitur. Si verò diameter est tam recta, quàm latus siue costa, iterùm in mediam difficultatem retrahimur, nec

fatis extricare nos possumus, quin vel diameter duplo plura puncta in directum disposita contineat, quàm costa, vel æquè præcisè multa, si omnia sua puncta à lineis quæ ipsam secant, suffuretur.

In 2. d. 2.  
9. 9.

Occasione porro huius argumenti concludit Scorus: *Generaliter totus decimus liber Euclidis destruit istam compositionē lineæ ex punctis; quia nulla esset omnino lineæ irrationalis siue surda, cum tamē principaliter tractet ibi de irrationalibus.* Imò verò omnium pænē librorum Mathematica corruunt, dissoluta texturâ illâ quantitatis & fundamenti, cui pleraque omnia innituntur: vt non immeritò Aristoteles alicubi pronunciarit, *corpora ex superficiebus componere*, *ὑπὸ πλείονος τῶν μαθημάτων, ἢ ἀπὸ πλείονος ὅτιν* id ē, *aduersari disciplinis Mathematicis, facile statim primo aspectu esse videre.* Hinc Polyænus Philosophus, vbi in Epicuri & voluptatis scholam transfugit, omnes protinus Mathematicas, ceu fatuas & delirantes, abiurare debuit.

Lib 3. c. 1.  
Cæli.


## CAPVT XIII.

*Argumentum quintum Geometricum. Circulum nullum ex punctis Epicuri fieri posse.*

**C**Ap. x. omnes figuras rectilineas à punctis Epicuri conturbari & dissolui ostendimus, idem nunc circulo faciemus; licet in primo & secundo Argumento, tamquam sensu notum, supposuerimus circulum posse dari. Cum enim attentius punctorum istam in plano aciem oculis circumlustro, circulum nullum omnino ex ipsis conicinnari posse animaduerto. Rem enim istam (quia paradoxorum tarda solet esse fides) vt credas, imò videas, ad disputationem vocemus.

Ex quadrato igitur ABCD. excindere circulum tentemus. Ac inprimis, quia per quatuor solum vias ab vnoquoque puncto exire (incedendo per spatia punctorum realia) licet, minimus circulus 12. punctorum in ambitu erit, talis qualem hîc in medio quadrati vides. Periclitare enim, ex paucioribus punctis describere nullum potes, nisi eum per centrum suum circumducas, id est, centrum inter circumferentiæ suæ puncta enormiter & turpiter ponas. Circulus verò iste 12. punctorum, cum quatuor lateribus constet, quorum vnumquodque à tribus punctis in lineam

neam




neam rectam conformatis conficitur, reuerà non circulus, sed quadratum est. Deinde circuli omnes alij maiores ei concentrici, quos etiam in schemate cernis, nil aliud, quàm maiorum perpetuò laterum quadrata sunt, & longiùs à circuli verà rotunditate recedunt.

Hoc verò absurdum, & contra sensum est. Sumatur enim circinus benè firmus, & circulus eo circumscribatur, certum est, pedem qui circumducitur, numquam secundum lineæ rectæ segmentum incedere, nec quadratum posse ab eo describi, cum linea quam describit, vbique æqualiter remoueat à pede altero qui est defixus in centro. Aut certè, cum nulla sit causa, cur pes ille centrum circumambulans, potiùs vno loco quàm alio lineam rectam pro circulari describat, totus circulus linea vna recta erit.

Idem etiam ratione istà, licet sensum non haberemus, potest ostendi.

Sit globus aliquis, siue circulus, si potest dari, tangens lineam perfectè plani in vnico puncto. Cum spatium inter circumferentiam

rentiam circuli & lineam plani finitum sit & admodum angustum, ac quanta est distantia inferioris segmenti circuli A B C D.



à lineâ E F. quam in puncto C. tangit, si circulus paullò maioris circumferentiæ fiat, statim nō in puncto vnico ampliùs, sed in duobus, aut tribus, & pluribus quo amplior conficietur circulus, tanget, ac breuè totum circuli segmentum  $\alpha \beta$ . coëxtendetur lineæ  $\gamma \delta$ . ita vt punctum  $\alpha$ . in punctum  $\gamma$ . &  $\beta$ . in  $\delta$ . cadat. Amplia iam circuli tui circumferentiam vsque ad lunæ, aut firmamenti concauum: quàm ingentem plani lineam circulus ille Epicuræus in omnibus punctis suis tanget, seq̃ue illi secundum exactissimam eius rectitudinem conformabit? Itaque tota cæli concauitas planissima & rectissima erit, ac quidem tam rigidè & contumaciter, vt ne Dei quidem omnipotens manus eam inflectere, & in perfectum, circa terræ centrum, orbem incuruare valeat.

Hoc verò, quia vanissimum esse videtur (potest enim Deus tantum circumum fabricare, cuius pes vnus in centro terræ, alter in con-



concauo lunæ varicûs consistat) euidentissimè, si quid video, hinc Epicurus refellitur. quia, inquam, Deus circulos sine fine ampliores efficere potest, qui planum numquam contingant, nisi in solo puncto ( quæ enim ratio minimi circini & circuli, eadem est omnium etiam maximorum) idcirco impossibile omnino est, distantiam inter inferiorem arcum circuli, & lineam contingentia (id est, spatium  $\alpha \gamma$ . & spatium  $\beta \delta$ .) ex finitâ punctorum multitudine contextam esse, sed certissimum est, infinitudine partium proportionalium indigere.

Si etiam latus inferius circuli secundum rectitudinem lineæ contingentia E F. extendatur: igitur totus circulus ( rideant Epicurei quantum velint) linea rectissima erit. Cur enim non esset, cum vna omnium segmentorum ratio sit, & omnibus circuli punctis linea aliqua contingentia extrinsecus ad contactum admoueri possit? Fiat igitur, & illic videbis, ne quidem vnicum esse in toto circuli istius chimærici ambitu punctum, quod alicui lineæ rectæ contingentia conformatum, & in longum porrectum non sit.

Itaque si vllum vmquam circuli, aut globi sensum habuerunt Epicurei, opinionem & intellectum eorum oculi corrigant; aut si oculis, tamquam Pyrrhonij, non credant, tactu ( beato scilicet & vero illo sensu, cui ipsi culmen suæ felicitatis imponunt) rem periclitentur. an nihil in mundo sit, inquam, quod tactus iudicet esse globum.

Quis, malum, etiam Peripateticus tam acutus, fortasse inquit, qui Mathematicum, à vulgari tornatorum nostrorum globo valeat sensu discernere?

Sed Mathematicum nil curo, vulgarem tantum quem centies viderunt, & manu voluerunt, globum volo. Hunc enim, ex disciplinâ illâ bellâ Epicuri, superficiem planissimam, & vniuersos, qui globi rotunditatem cingunt, circulos, lineas rectissimas esse pronuntio. Adde deinde, omnes figuras columnares, pyramidales, & quidquid vsquam in aliquam etiam rudem rotunditatem se colligit, subitura hoc fatum, & redire debere in vniuniformem & exactissimam planitiem. Quo enim argumento id de circulo & globo ostendimus, etiam de cylindro seu columnâ iacente, ac in lineâ planum tangente, & vniuersim de figuris omnibus rotundis, demonstrare nullo negotio possumus. Si enim cylindrus gracilis & tenuissimus planum in longitudine lineari con-

G

tingit;

tingit; igitur paullo plenior & crassior statim in superficie secundum latitudinem diuisibili tanger; atque ita paulatim si crassescat & dilatetur, ad subiecti plani formam latissimè se complanabit.

Hæc ex Geometriâ sufficere poterant, ne tot exemplorum similitudo abiret in fastidium; sed hoc tamen etiam addendum quod iam incidit, & est illustre.

Quia igitur oculorum & tactûs non semper falluntur Epicuræi, dare nobis debent aliquem saltem rudem & cute exasperatâ globum, qualis est, exempli causâ, orbis terræ. Hunc ergo assumamus.


## CAPVT XIV.

### *Argumentum sextum Geometricum.*

*Luna integrum undique terræ globum, sol nihil omnino eius illuminabit, nisi fallitur Epicurus.*

Compertum in Geometriâ, ac in Opticâ sensu etiam cognicum est: si luminans rotundum æquale sit opaco rotundo, mediam circumcisè opaci superficiem, ex quacumque distantia illuminandam esse: si verò luminans sit maius opaco (qualis sol respectu terræ) ultra medietatem opaci (ex quocumque itidem intervallo) exhibunt extremi radij illuminantes: si denique luminans est minus & angustius opaco (qualis est luna comparatione orbis terræ) non totam opaci medietatem siue hemisphærium radiis suis amplecti poterit. Quò tamen longiori intervallo vnum ab altero remouetur, eò latius & latius diffunditur basis pyramidis illuminationis in superficie opaci, id est, luna, exempli gratiâ, ampliorem terræ partem illustrat, quò ab eâ est distantiôr, minorem, quò propinquior. numquam tamen in tantum remoueri potest, vt totum vnum terræ hemisphærium illuminet. Et hinc dicunt vulgò Optici, vmbra æqualis opaci esse columnarem & vniiformi crassitudine, vmbra minoris opaci pyramidalem, initio crassissimam, ac deinde paulatim in conum & cuspidem gracilescere, vmbra denique opaci maioris, pyramidem inuersam esse, cuius tenuissima pars opaco proxima est, dein perpetuò se inflat & crassescit. Id si quis non cre-

credat, experiatur, res non est in experimento difficili: & schematismi etiam isti eum docebunt.



Sit A. luminans, opacum ei æquale B. luminans maius C. opacum minus D. luminans minus E. opacum maius F.

Primum illuminat præcisè hemisphærium opaci, adeò vt extremi radij G H. & I L. deftrinant & radant extrema puncta diametri M N.

Secundum illuminat plus hemisphærio, caduntque extremi radij vltra polos diametri.


Tertium illuminat minus hemisphærio.

Hoc etiam addendum: quò longius luminans maius recedit ab opaco, eò magis retrahit extremos radios, & minorem opaci partem illuminat: contrà verò luminans minus longinquiore recessu dilatat orbem illuminationis, & maiorem opaci partem lumine perfundit; ita tamen vt numquam ad totum opaci hemisphærium illuminatio perueniat, multò minus vltra ipsum diffundi possit. Hæc vniuersim compertissima sunt. & sensus refutare ne-

gantem potest, etiam si ratio & demonstratio euidens non satis valeret.

Attamen omnia vanissima sunt, nisi vanus Epicurus. Singula persequi nil attinet, extremum schema, ubi luminans est minus, accipiamus.

Igitur luminans minus E. sit luna, opacum maius F. sit terra. Dico, si superficies terræ componitur ex finitis punctis, terram illuminari posse à lunâ ultra hemisphærium, quod cum experientia pugnat. Nam si E. luna proximè admoveatur F. terræ, illuminabit insignem eius partem, citra tamen dimidiū: radij ergo eius extremi cadant in extrema puncta lineæ C D. deinde per vicum etiam solum punctum spatij recedat E. longius ab F. ecce statim circulus illuminationis in superficie terræ crescat, & ut minimum, ad vnus puncti latitudinem (sic enim iam cum Epicuro loqui & balbutire oportet) vndique in orbem proficiet. Remoueat iterum, altero spatij pun-



cto, E. ab F. circulus illuminationis nouam in superficie terræ punctorum circumferentiam occupabit, & perget se promouere versus circulum terræ maximum, qui eam in duo hemisphæria æqualia diuidit. & cum tot punctis retrocesserit E. ab F. siue luna à terrâ, quot inter C. & A. item D. & B. in superficie terræ interiacent, tunc totum terræ hemisphærium vsque ab A B. illuminatum erit. Si verò etiam pergat retrocedendo luna à terrâ, radius eius ultra diametri polos pertingeret, & extrema puncta lineæ G H. radet. Deinde, quia perpetuo illo recessu certum est augeri circulum illuminationis, tandem radij extremi etiam ad puncta I. & L. pertingent, ac tandem integrum globum, vsque ad M. & N. & ultra, perfundent.

Stultum id est, inquit, quia terræ vndique in orbem tumor, & gib-

& gibbus perpetuus eam præcingens, impedit ne circumferentia circuli illuminationis peruenire possit vsque ad circulum in terrâ maximum.

Fateor, in sententiâ Aristotelis, & Geometriâ est stultissimum, Epicurus tamē pro stulto habere non potest, nisi opinionem suam, vnde manifestē id sequitur, velit etiam æstimare talem. Si enim perpetuò per finitos circulos increfcere oporteat basim illuminationis isto illuminantis recessu, nec vñquam stet & finiatur incrementum, vt ratio conuincit, & experimur; tandem, & quidem breuī, circuli illi ex quibus terræ superficies secundum Epicuri Philosophiam contexitur, finientur, & antequam luna à terræ superficie ad cælum in quo est, imaginatione nostrâ retrocesserit, totum terræ ambitum, radiis suis contra naturam, in puncta G H. item I L. & M N. inflexis, lumine inuoluet, atque ita cū ipsa antipodas nostros illucebit, lumine etiam suo nos aspergere ex illo opposito hemisphærio valebit: quod apertè fatuum est, & cucurbitulas quærit. Argumentum etiam soli, siue luminanti maiori respectu opaci minoris, admoueri, & per eadem aut paria absurda deduci potest.

Conuersâ enim imaginatione, puta in schemate præcedenti, solem esse F. terram E. sole minorem. Experimento autem constat, quò luminans maius ab opaco longius recedit, eò minorem partem illustrare, & ad singula recessuum momenta, lumen in superficie opaci contrahi ac minui.

Solem igitur iuxta terram primum statue, aliquantò amplius hemisphærio, non tamen totam vñdique illuminare poterit. Itaque reducendo se à terrâ in altum, statim circulum illuminationis vsque ad circulum in terrâ maximum retrahet, id est, dimidiatam terræ superficiem præcisè illustrabit. Eleuetur deinde porrò, & retrocedat à terrâ per totidem spatij solum puncta, quot sunt in quartâ parte longitudinis terræ, id est, à puncto O. ad punctum Q. quod spatio breuissimo fiet. ecce autem iam extremi radij solis radentes polos diametri terræ O P. retrahentur in punctum Q. & illud vnicū ē totâ terræ superficie sol illuminabit, si superficies terræ consuta est ex circulis secundum latitudinem indiuisibilibus, vt Epicuro placet. Reducatur denique sol in cælum suum, vnde eum imaginatio nostra deduxerat, iam etiam è puncto Q. radios quos in eo collegerat, recipiet, & ne hilum quidem aut punctum latum ē totâ terræ superficie, lumine contingeret.

Quomodo tam insignem & illustrem absurditatem demonstras? inquires. Facile est, inquam, ex istis quæ proximè de lunâ diserebamus. Cum enim numerus circulorum in superficie terræ à punctis O & P. perpetuò decreſcentium vsque ad punctum Q. sit finitus, vt credit Epicurus, lumen solis circulatim per eos etiam decreſcendo dum à terrâ retrocedit, breuî in punctum Q. necessariò se contrahet, & longiori solis à terrâ recessu, omnino terrâ euaneſcet. Vnde radius eius, in tantâ iam à terrâ distantia, huc vsque perſtingere non poterit, nec quiſquam vmquam mortalium, niſi in cælum ipſum ſcandat, ſolem oculis (qui lumine ab eo delapſo adiuuari debent) videbit. Veriſſimum igitur eſt, lunam integrum terræ globum vndique illuminaturam, & hinc in altero hemiſphærio lucentem à nobis eſſe videndam; ſolem verò nihil eius illuminaturum, neque claro etiam meridie cernendum, niſi Epicuri ſchola allucinatur in texturâ illâ ſua ſuperficie terræ ex meris punctorum atomis.

Lib. 3. c. 4.  
Cæli.

Quàm igitur ſcitè & meditatè Ariſtoteles, cum ait, *ἀτομα σώματα λήγοντες*, indiſiſibilia corpuscula aſtruentes, non tantum μάχαρ ταῖς Μαθηματικαῖς ἐπιστήμας, ἀλλὰ καὶ πολλὰ ἤδη ἐσθλὸν καὶ ἤδη φαινομένων καὶ τῶν αἰσθητῶν ἀναρπῆν, *pugnare cum diſciplinis Mathematicis, ſed multa etiam communi ſententiâ recepta, & qua ſenſum feriunt, deſtrere*. Si igitur Epicuro credimus,

Horat.

*Nil intra eſt oleam, nil extra eſt in nuce duri.*

Putaueram hîc Mathematica finire, ſed non tempero, quin etiam iſthoc adiciam.

## CAPVT XV.


*Argumentum ſeptimum Geometricum.*

*Solem à nobis tantum videndum certis quibuſdam interuallis, non in omni puncto ſui circuli.*

**R**iſum paullisper minuamus, rideamus tamen, ſed oſculo collectiori. Dixi iam ſolem numquam videndum in ſententiâ Epicuri, oſtendami hîc videndum ſolum ſaluatim, & quibuſdam tantum horarum interuallis, etiamſi meridies ſit, & nubiſa omnia deterſeris.

Cum enim ſol in paralleli, id eſt, circuli alicuius circumferentiâ terram circumeat (reſ tamen eodem ibit, ſi cum Copernico terram

terram immoto sole moueas,) consideremus circulum istum super terræ, id est, suo centro, ab ortu in occasum, vsque ad viam solis erectum esse. Quia verò, vt Cap. xiiii. diximus, & pictura punctorū faris ostendit, à singulis punctis alicuius areæ per quatuor solum proxima puncta, viâ rectâ exire ad circumferentiam circuli licet, ducantur quatuor semidiametri rectæ A B. A C. A D. A E.



Vel, ne existiment nos incertum assumere, & putent mysterium aliquod, aut fraudem in tam paucis viis rectis delitescere, quater-nas alias semidiametros addamus, & rectas arbitremur. aut certè numerum alium quemcumque semidiametrorum, modò finitum, nobis assignent, in easdem prorsus absurditates hac, & omnibus præcedentibus demonstrationibus (vt paullisper attentè meditan-ti statim liquet) eos impellemus.

Sint igitur semidiametri A F. A G. A H. A I. etiam rectæ. Sol deinde, aut aliud quoduis astrum per circumferentiam B C D E. spatio 24. horarū circumcurrat. Pone etiam oculum spectatōrē in centro A. aut alibi in superficie terræ, vbi voles, nil ad rem attinet.

Aio

Aio iam solem in punctis B F C. &c. quæ terminant rectas diametros à centro A. In circumferentiam eductas, videndum ab oculo ex centro A. sursum spectante, non tamen in toto arcu intermedio B F. nec in arcu F C. aut C G. &c.

Cùm enim ex centro A. nullæ lineæ rectæ ad puncta inter B. & F. media peruenire valeant, vt ipsi etiã adfarentur, & patet ex primo argumento Cap. viii. & sidus (nisi per refractionem) debeat per lineam rectam ac breuissimam videri, palàm est, interuallis B F. item F C. &c. non posse ex A. conspici. Itaque in puncto B. subito emerget, deinde in toto segmento sequenti vsque ad F. condetur. in F. iterùm momento emicabit, ac statim denuò ex oculis euanescet vsque ad C. & tales porro inimicos & ridiculos lusus exercebit circa totum orbem.

Si inquant plures longè semidiametros rectas ad puncta alia inter B. & F. aut inter F. & C. &c. media posse deduci, demus id sanè gratiæ Epicuri, & numerum quem volet eligit. postulet centum, postulet mille, postulet millia centum, ego in tam amplo, quantus est parallelus solaris, aut stellæ fixæ, circulo, statim demonstrauero, inter quaslibet proximas duas tales semidiametros multa milliaria in circumferentiã interiici, per quæ motum sidus, fenoto omni alio impedimento, nequibit à nobis adspici. Igitur si hæc duo principia, quæ satis experta sunt, minimè delirant, *Sol in quolibet puncto sui circuli potest directè videri, & Ad visionem quæ res directè in suo loco, non extra eum refractè adspicitur, opus est specie visibili per lineam Mathematicè rectam ad oculum traiectâ*, iudicent Medici de Epicuri scincipite.

## C A P V T X V I.

*Argumentum primum Physicum.*

*Equus Adraffi, si Epicuro credimus, numquam cursu  
testudinem assequetur.*

**E**Picurei, vel, vt honestiori eos nomine compellem, Empedoclistæ quidam nostri Louanienſes, non cessant Aristotelem è Mathematicis ad Physicam euocare. Vincat Aristoteles, vincant omnes Mathematici, inquit, in melancholico & à sensibus abstracto Euclidis sui tribunali, ad Physicum prouocamus, vbi sine dubio victores sumus. Hæc apud discipulorum frequentissimas classes



classes magnâ auctoritate, non sine splene meo & risu, sæpè audiui proclamari.

Igitur deferatur appellationi, sequatur eos Aristoteles, & secundum Physicum tribunal lis ista detur. Zeno olim paralogismo quodam, ex infinitudine partium continui, intulit, *βραδύτης ἂν ἴσως ποτε καταληθῆσιν* (Zeno ἰσὺς τῆ ταχέως, *velocissimum numquam posse assequi id quod tardissimo fertur motu*). Nec alatus Adraști equus, ait Plutarchus, adipiscetur tardigradam testudinem: sed idem verâ demonstratione poterat ex finitudine atomorum Epicuri.

Arist. lib. 6.  
c. 9 Physic.

Lib. Κανὼν  
ἰμῶν.

Totus igitur campus, in quo testudo Adraști equum, vel Pegasum Bellerophontis, aut illum Martis qui apud poetam

*Ante notos Zephyrumq; volat,* —

Virgil.

ad certamen prouocauerit, punctis Epicureis instratus sit. Tempus etiam (quod inde planè consequens) suis tantum momentis, nullis partibus in infinitum diuisibilibus, decurrat. Præcedat deinde testudo vno saltem passu (quid enim alatus equus minus concedere potest miseræ bestię, domo suâ, supellestiale, & totâ familiâ onustæ?) Incipiant iam dato signo, & missâ à Prætorē mappâ currere. Ride quantum lubet, aio testudinem victricem, & vno toto passu, à carceribus ad metam vsque, perpetuò ante equum fore.

Nam primo temporis momento quodlibet testudinis punctum mutabit punctum spatij cui insidebat, & emouebit se ad punctum sequens. secundo momento tantumdem perget, & ita ad metam vsque, singulis temporis momentis nouum semper occupabit spatij punctum, id est, non segniùs, quàm equus movebitur. Quid enim iste amplius potest? Nullum enim temporis momentum otiosum testudo finit abire, omnibus, inquam, se mouet, idem equus facit, nec vnumquodque eius punctum plus puncto spatij, momento vno temporis (aliàs totum equi corpus in varia loca adæquata, per replicationem dissiliret) conficere valet.

Sint igitur (ne numero nimis prolixo rei claritatem infusceremus) mille puncta spatij decurrenda, mille temporis momentis testudo ea peragrauerit; sed totidem etiam omnino equus, nec plura poterit, quantumcumque pedibus pennisque cursum incitauerit. Tam manifestò deprehensus Epicurus, tribus, quantum prospicio, viis potest fugam moliri.

Primo, si testudinis punctum omni momento temporis gressum quidem promouere dicat, sed non per totum spatij punctum. Verumtamen hæc fuga improbabilis est, quia cum punctum in-

H

diuisi-

diuisibile & impers sit, non potest pars vna eius sine aliâ pertransiri. minima igitur particula, quæ puncto temporis à puncto mobili confici potest, est punctum spatij.

Duplex igitur via restat, vtraque à Louanienſibus nostris Empedoclistis vſitata iam & trita.

Aut enim remoranda est certis temporum momentis testudo, vt eam equus motu præuertat intereà dum ipsa quiescit, aut certe pergente per singula momenta temporis ad vnius puncti longitudinem testudine, equus duo triaue spatij puncta debet transilire. Vtroque enim modo equus citius, quàm testudo, poterit ad metam pertingere.

Sed difficile non est hanc etiam vtramque viam obſtruere, & auspicemur à posteriori.


## CAPVT XVII.

*Vana fuga eorum, qui mobile acceleratione  
motus censent replicari.*

**S**I punctum vnum volantis equi duo vel tria campi puncta vnico temporis momento peruolat; igitur totus iam equus replicatus in diuersis locis illo momento, & duplo aut triplo, imò centuplo quandoque, longior apparebit. Et demonstratio est in promptu, & facili.

Hoc enim A  
temporis mo-  
mento quie-  
ſcat punctum  
testudinis A.

in puncto spa-  
tij B. & pun-  
ctû Pegali C.



ſimiliter conqueſcat in puncto ſpatij D. deinde ſequenti proximo momento A. ex B. tranſeat in punctum E. & C. (quia velocius duplo mouetur) eodem temporis momento, ſaltu quodam per F. perueniat in G. Dico iam, hoc eodem momento C. eſſe ſimul in punctis F. & G. Nam cùm à primo puncto D. ad tertium G. ſine tranſitu per ſecundum F. tranſilire non poſſit, & momentum temporis partes priores & poſteriores nullas habeat, nec eſſe proſus eſt, vt

est, vt vno temporis indiuisibili puncto in F. & G. simul sit, punctaque ista tangat, & iis insistat: quod aliud nihil est, quàm replicatum esse (vt iam loquuntur Philosophi) in pluribus locis.

Intendat iam cursum Pegasus ille, & centuplo, aut millecuplo (quod facillè potest) velocius feratur, quàm testudo: ecce nunc punctum eius C. per lineam mille punctorum se effundet, & ab F. vsque ad V. & longè vltra, ad millesimum spatij punctum aufugisse, & tamen in omnibus intermediis simul esse apparebit. Cum verò non vnicui equi punctum, sed omnia pari impetu volent, totum equum in mille simul locis adæquatis, eodem momento dispersum videbimus. quando enim rei alicuius motum oculo sequimur, nullum temporis momentum elabatur, quo rem illam, & vnà situm eius ac præsentiam quam ad partes spatij habet, non intueamur: igitur si in tot præsentias vno momento se induit, nil causæ est, cur sub omnibus illis oculus illo momento spectator eam non adspiciat, aduertatque. Itaque hanc in celeri cursu punctorum corporis replicationem iudicium oculorum manifestò refellit.

Adde iam, sublimi D. Thomæ ingenio tam difficilem & impeditam, circumscriptiuam eiusdem corporis in diuersa loca adæquata replicationem visam esse, vt virtute etiam diuinà posse accidere negauerit. Hinc si veterum Philosophorum dogmata memoriâ repetis, qui vacuum in mundum, qui penetrationem corporum, & id genus falsa admiserunt, facillè reperies, neminem (aut valdè mentior) cui replicatio corporum vnumquam in mentem inciderit. & verè ad Sositam suum Amphitruo ille ridiculus:

*Tu me verbero audes herom ludificarier?*

*Tu' id dicere audes, quod nemo vnumquam homo antedhac vidit, nec potest fieri, tempore vno*

*Homo eidem duobus locis vt simitu fiet?*

Plaut. Amphit. act. 2.  
sc. 1.

Vis tamen diuina hoc, & longè mirabiliora potest. Ego olim, vt huic corporum replicationi fucum saltem aliquem leuiter & per iocum allinerem, exemplum rotæ, quâ rectiones nostri suos funes, aut sæminæ pensa torquent, afferebam. Si enim rotula ista incitetur, radij replicari, & sua interualla replere sic videntur, vt nequeas amplius transpicere. Simile est etiam in puerili lusu, quo tibi à pueris circumactus videtur in tot loca dissilire, vt impleat totum ignitum quemdam circulum.

Sed puerilia, vana, & ludibria oculorum hæc sunt, quæ libri de animâ explicant. Nam si radij rotæ, celeri vertigine replicantur,

quousque interualla à radiis ipsis verè compleantur , acceleretur deinde motus, quónam, amabò, iam radij, omnibus interuallis plenius, euadent? ad quæ loca se eiicient & replicabunt? nulla alia sunt, nisi mutuò se penetrant & peruadant, quæ merissima ægroti veteris somnia sunt.

Deinde, si res in motu plura loca, quàm in quiete occupat, quomodo superficies continens capere potest corpus contentum, vbi hoc incipit intra eam circumagi? quomodo superficies concaua Empyrei non dirumpitur tam incredibili celeritate cæli primi mobilis, si secundùm mensuram celeritatis, corporum replicatio crebrescit & augetur? sic enim oporteat superficiem conuexam primi mobilis in immensum inflari, & infinities propemodum plus spatij, quàm si conquiesceret (quod fiet in fine sæculi) occupare. Vt aliud dicam magis familiare: quis vmquam expertus, pistillum quo in mortario sinapi teritur, minorem locum, dum quiescit, implere, quàm dum in orbem rotatur?

Fallaciam denique sensus, elongatio oculi à re quæ mouetur, manifestè detegit. nam si medius inter vtrumque scopum consistas, & sagittam ante oculos volantem adspicias, non vnicam, sed binas, aut ternas, omnes simillimis pennis alas videre existimabis; recede verò inde longiusculè, vnicam tantùm, sine congeminatione iam videbis. Sic si quispiam è propinquo incitatissimum illum solis raptum inspicat, non vnum solem, sed aliquot myriades, longissimâ catenatione se cernere credet; cùm tamen nos hinc vnicum & solitarium interuallo cæli & terræ allucinationem (quod alibi demonstramus) detergente, aspiciamus.

Hoc etiam inopinabile & deridiculum in illâ replicatione eueniet. Nam non tantùm replicabuntur in paullò celeriori motu vniuersa puncta corporis mobilis, sed pleraque etiam omnia intra mutuum situm per penetrationē dimensionum compingentur. Si enim tota sagitta, exempli gratiâ, extra se eiici, & ante se ita replicari debet, vt pennæ præcedentis sint ante spiculum seu caput sequentis, oportet pennas, vt spiculum sic præcurrerent, per totam sagittæ siue hastilis longitudinis penetrasse & transiisse ante spiculum. Quod aliter sic demonstrari potest:

Si C. in priori nostro exemplo, sit primum punctum equi volantis, & vnico moimento per omnia spatij puncta vsque in V. replicatur, cùm punctum istud non sit auulsum à cæteris, sed omnia pari celeritate subsequantur; igitur punctum secundum eodem mo-  
mento

mento vsque in T. perueniet, tertium vsque in S. & ita de ceteris. id est, primum punctum mobilis cum secundo, in puncto spatij T. primum cum secundo, & tertio in S. primum cum secundo, tertio, & quarto in R. & ita porro per penetrationem erit. Vel, vt planius hæc percipias: caput Pegasi cum collo in T. caput & collum cum pectore in S. caput, collum, pectus, venter in R. caput, collum, pectus, venter, coxendices in Q. denique caput, collum, pectus, venter, coxendices, cauda, id est tota equi longitudo in P. colligetur, redibitque nobis chaos antiquum, & confusio illa partium, ac *ἁμοιομέρεα* Anaxagoræ.

Alterum iam ecce *ἀπὸ τοῦ* hoc etiam in mentem venit. Cum Pegasus noster extra se in aliud Vbi per replicationem eiectus & duplicatus fuerit, quâ, obsecro, viâ iterum ad unitatē (vt sic dicam) & intra se redibit? Quomodo id fiat in Angelis, aut animâ rationali replicatis, & in sphæram angustiores se quodammodò retrahētibus, res faciliè expediri potest, quòd spirituales substantiæ sint ac sine partibus: equus verò partes naturâ suâ loco impenetrabiles habet, nec in corpore iam replicato ita inter se componi possunt, quin semper duæ aliquæ distinctæ concurrant & sese inuicem contingant, ac ita ab eodem situ se expellant, perinde videlicet atque in corpore non replicato facere solent.

Sic Catholicorum Philosophorum ferè doctrina est: quòd si homo virtute diuinâ circumscriptiue replicatus sibi obuius fuerit, non illicò se in vnicam præsentiam, alterâ abiectâ, recipere possit, sed extra se emanurus sit, donec nouo miraculo secundâ eum præsentia Deus exuat.

Quid si affirmem, inquires, Deum statuisse duas, tres, aut etiam centum præsentias, pro mensurâ celeritatis, dare cuiilibet mobili quamdiu mouetur, statim verò atque quiescere cœperit, vnicâ oportere esse contentum? Dicam te hominem optimi stomachi, qui hoc tam rancidum possis digerere. Non opus diutius (etsi totum etiam diem possim) hic tecum rixari, sensûs experimenta, & alia quæ antè cumulauius affatim retundunt tuam istam subtilitatem.

Fixum igitur ratumque (si quid in totâ naturali Philosophiâ) sit, replicationem corporis, nisi insolenti, magno, & diuino miraculo fieri non posse, ac proinde eos qui accelerationem corporum per eam expedire conantur, valdè frustrâ esse.

Hanc etiam mantissam quæ exciderat, in cumulum coniicio. Si

celeritas motûs replicat mobile; ergo nullo non motu (excepto solo tardissimo) replicatur mobile. Id verò si ita est, omnis, etiam non admodum festina, ambulatio nos replicabit, & in duo, tria, plurave loca adæquata, omnibus momentis quibus mouemur, disperget: quod nemo (nisi forte strabo, cui omnia etiam in quiete congeminantur) tibi, opinor, credet. Etenim ambulatione etiam lentissimâ & testudineâ assignari tardior aliquis (puta, gnomonis horologii, aut alius similis) motus continuus potest. Hoc verò, quem tardissimum appellas, singulis temporum momentis singula spatij puncta à mobili pererrantur (id enim necesse est, ut sit continuus, non interruptus;) igitur, si minimum acceleretur, vno momento punctum quodque mobilis per duo puncta spatij gressum faciet; quod sine replicatione, in istâ sententiâ fieri nequit.

Præclusa igitur hac fugâ, quæ Pegasus & quoduis mobile in motu celeri replicat, inspicimus iam, an sistendo saltem subinde testudinis motum, spatium temporis dari non possit, ut eam in ridiculo isto certamine Pegasus assequatur & præteruolet.

### CAPVT XVIII.

*Fuga aliorum oclusa, qui in motu quolibet tardiore moras & pausas interseminant.*

**P**Lures hic Louanij, & pauci quidam in Hispaniâ, ut iam intellico, ab Aristotele ad Epicurum transfugæ, sistere testudinem malunt, quàm Pegasus replicare. Id est, in omni motu tardo pausas & morulas quasdam intericiunt quibus mobile quiescat, quæ in motu celeriori complentur; ut mirum non sit, tardum à veloci præuerti, quia momentis quibusdam temporis stat & otiaur, dum alterum pergit & negotiatur.

Hæc fuga probabilior in speciem videtur, quàm altera; quia fortè sensus facilius replicationis in motu celeri falsitatem, quàm morarum in motu tardo apprehendit.

Stemus igitur paullisper (aut saltem simulemus) à partibus eorum, & filum vtriusque motûs legamus quod texunt testudo & Pegasus.

Cum itaque missâ tessera currere incipiunt, primo momento temporis vterque punctum vnicum spatij peragret. secundo verò momento, ut Pegasus anteuertere testudinem occipiat, pergit ipse  
 sic mo-

se mouere ad sequens spatij punctum, ipsa verò in suo puncto immota consistat. tertio porro momento promoueat se iterum ad tertium spatij punctum equus, & testudo ad secundum. quarto momento pergat more suo Pegasus, testudo autem iterum quiescat & halitum resumat. Breuiter, moueat se perpetuò omnibus momentis equus, testudo solum alternis. Hinc eniui fiet, vt ille duplo celerius progrediatur, & dimidiatâ horâ ad metam perueniat, vbi ista totam horam impendere debebit.

Verumtamen, quoniam non duplo tantum, sed millecuplo, & vltra, Pegasus testudinem celeritate vincit, quid facimus? Nil aliud possumus, quàm istud.

Post primum momentum motus, non solum vnico momento, vt proximè dicebamus, sed integrâ catenâ mille momentorum testudo interquiescat, quibus se mouet equus: ac deinde istis elapsis, resumat ipsa impetum, & ad secundum spatij punctum erepat: vbi iterum mille momenta otiosa præterlabi sinet, Pegaso interim minimè dormitante, sed viam perpetuò prosequente; & legem istam seruent vsque ad finem motus. Ita ferè Valesius, etsi Lib. 3 c. 8.  
Controuer. magnitudinem & tempus ex infinitis cum Aristotele componat, moras tamen & *mansuinculas*, vt vocat, motui tardo interspergit, eamque Galeni sui, imò Zenonis & veterum Stoicorum sententiam fuisse credit. sed vndique largiter fallitur.

Et in primis quæro ex ipso & Epicureis, quænam est ista causa, quæ testudinem proportionem illam seruare docet, vt post vnumquodque momentum motus, mille semper momentis interquiescat? quis lapidem molarem per aëra maximo impetu deciduum, nunc mouet, nunc sistit? hoc enim etiam fieri debet, cum motus iste tardus etiam sit, si comparetur cum motu solis, aut primi mobilis.

Dicent credo, quod solum possunt à causâ primâ videlicet sic frænari & regi illas causas mouentes, vt nunc exeant in actum, nunc certis, quæ ipsa determinat, interuallis suspendantur & quiescant.

Sed ecce, cui non statim hic fucus & falsitas subolet, cum videt illicò tam procul, & vsque ad causam primam eos aufugere? Lapidem autem in aëre libero, qui casurus aliis omnibus momentis, vt pendulus aliquamdiu ibi hæset, à Deo subinde per certa interualla momentorum frænari? Quis, iterum inquam, non sentit subesse fucum, & illud imaginarium frænum frangere impetum illum, quo causæ naturaliter agentes ruunt laxis habenis in effectus suos,

suos, ubi omnia ad actionem prærequisita eas circumstant: Reponent, scio, non adesse omnia prærequisita illis momentis, quibus lapsus in aëre suspenditur; quia præparatio diuini concursus deest, sine quâ, in omnium sententiâ, causa secunda nequit agere.

Responsio dat aliquid, sed non satisfacit. Non enim solet Deus alia agentia naturalia, ut infessor equum, sic regere, nec habenas adducit, ubi possunt, quantum est ex parte suâ, pleno cursu currere. Non habent, inquiunt, paratum pro illo momento, Dei concursum: sed deberent, inquam ego, habere. hoc enim conditio eorum naturalis flagitat, & effrænis modus agendi. Nam omnibus indifferenter momentis agere possunt, neque per ullam conditionem creatam stat quò minus agant; igitur nec Deus (nisi propter causas extraordinarias & fines superiores, ut factum in igne Babylonico) actionem eorum pro libitu, hoc aut illo temporis momento connaturaliter potest suspendere. Aliud foret, si non omnibus momentis agere possent, & opus esset aliquâ electione, quam diuina providentia pro agentibus illis brutis & deligendi ignaris deberet facere.

Deinde cum appetitus testudinis omnibus momentis imperet potentie progressivæ motum localem, quid causæ est, cur non obediat semper? Motus enim ille sequitur per naturalem sympathiam potentiarum, quam in aliis à motu locali effectibus impedire non assuevit causa prima (omni enim momento quò voluntas intellectui, aut appetitus inferior phantasie imperat, illic & perpetuò in actionem impelluntur, & obediunt imperio;) cur in motu locali aliam legem sequatur? Quàm videtur id mihi deridiculum: voluntatem meam, cum impellit potentiam loco motiuam ut moueat manum, etiam quàm potest celerrimè, non posse tamen efficere, ut omnibus momentis effectus sequatur; imò contra expressum eius imperium, quo omnibus vellet mouere, potentia tamen motiua à Deo frænctur ne pro toto tempore, sed quandoque solum obediat, & morulis ubique interiectis, redeat postea tandem ad motum & obedientiam.

Referre etiam hîc lubet, quid his annis à Philosopho non exigi nominis Anglo, sed studio Salmanticensi audiverim, dum Spadæ fortè inter hydropotas versor. Epicureus in re naturali erat, quò alios quosdam iam in Hispaniâ aiebat etiam prolapsos, aut inclinare. Loci illius amœnitatibus Musarum etiam delicias & iocos permiscebamur, & in Labyrinthum compositionis continui semel delapsi,



lapsi, quid causæ esset, exquirebam, cur lapis ex alto decedens, tot stationibus & moris interpellaret suum motum? Ipse nihil (tamquam in re facili & certâ) cūctatus: Quia, inquit, fatigatur, & quiete intermediâ vires mouendi eum oportet reparare. Cū hæc valde seridè, & exemplo animalium affirmaret, quæ cursu fatigantur, & pigriora fiunt ad motum: Putasne igitur, inquam, lapides & saxa esse animalium quoddam durum genus, quæ dissipatis motu spiritibus quibus nerui & muscoli intenduntur, flaccescant, & ad virium instaurationem quiete indigeant? Cū negaret esse animalia, instar tamen animalium lassitudinem perseueraret tribuere; Res ista Medica est, inquam, & iurisdictionem huic Æsculapij filio, (Medicus fortè magnæ eruditionis per cliuum vicini collis molli-ter inambulans subibat) permittamus. Adsentitur, adimus. Auditis partibus: Ita, inquit, oportebit posthac culcitas & lectos lapidibus substernere, in quibus lassitudinem deponant à motu: agrotant etiam tandem, & ad explorandum febricitantium pulsum vocabimur. & sic inter hunc, aliosque risus, Philosophi verò nihilominus pertinaciam & responsitationes, institutam ambulationem continuabamus. Hinc autem vides, quonam ingenium humanum abeat, vbi semel extra oleas & verum aberrare cœpit.

Inspiciamus etiam attentè, fortasse sensu ipso deprehendemus vanitatem istarum pausarum in motu tardiori.

Et in primis supponamus, moram aliquam temporis minimam & primam esse, intra quam sensus possit quietem corporis aduertere, ita vt si minori tempore interquiescat, putetur perpetuò moueri. Sit ergo, exempli causâ, tempus illud decem millium momentorum.

Secundò supponatur etiam, minimam lineam, siue quantitatem spatij sensibilem totidem punctorum esse, ita vt minor seorsim ab aliis inspecta effugiat sensum: vnde corpus tum primum mutasse locum videbitur, cū pertransierit minimam illam, siue primam sensibilem spatij particulam. nam citrà, etsi moueretur, non tamen apparebat, quia quantitas peragrata nondum erat sensibilis.

Itaque reuocarâ iam testudine, aio quietem eius fore manifestam, si tot momentis motus eius interruptitur.

Dicebamus enim, primo momento testudinem ad vnum punctum spatij prorepere. Deinde, quia Pegafus millecuplo & suprâ moueretur celerius, eam mille momentis interquiescere. post quæ  
I  
elapsa,

elapsa, iterum motum priori similem repetere, & ad secundum spatij punctum pergere. Vbi denuò abrupit, & redit ad quietem mille momentorum; & ita porro alternatim. Iam verò sume in manus calculum, reperies testudinem post decem millia & dena momenta (id est, tempus quod iam cœpit esse sensibile) solum decem spatij puncta (quæ nondum sub sensum cadunt) confecisse, ac proinde tempore quod morâ suâ notari valeat, videbitur eodem loco immobilis adhærescere. imò verò longo pòst tempore ibidem pertinaciter apparebit conquiescere, donec scilicet ad decies millesimum circiter spatij punctum peruenit; quia quantitatem decem millium punctorum fecimus inter sensibiles minimam.

Ultrâ etiam progredior, & intrepidè asseuero, Pegasi, imò velocissimæ sagittæ, aut globi tormenti volatum paulis & mansuiculis Valelij sic interpolandum, vt quies manifesta in oculos veniat.

Causa remota non est: quia motus æquinoctialis primi mobilis, quo metimur nostrum tempus, est infinitè propemodum velocior, quàm globi volatus. Expertum enim est, globum tormenti maioris, vno horæ minuto, nondum tria milliaria Italica, siue vnum Belgicum transuolare: igitur tertiâ parte minuti, id est, viginti scrupulis secundis (quorum vnumquodque creditur ad æquare circiter moram pulsus arteriæ humanæ) milliare vnum Italicum conficiet, ac vno scrupulo vicesimam partem Italice milliariis. Hoc autem eodem temporis scrupulo, secundum nouam Kepleri Astronomiam, punctum vnum æquinoctialis firmamenti septuagies quinque centena millia miliarium Germanicorum (quorum quodque Italica quatuor comprehendit) pererrat. Statue iam supra firmamentum, vt Ptolemaici & Astronomi vulgò faciunt, duas tresve alias sphæras immanis spissitudinis mobiles, rapiditas æquinoctialis sphæræ primæ mobilis, & excessus celeritatis quo motum globi vincit, enarrari, aut cogitari vix poterit.

Lib. 4. Epit.

Si igitur punctum illud Æquatoris sine replicatione (quam Cap. præcedenti euidenter, si quid video, confutauimus) tantâ rapiditate moveri potest, numquam vno temporis veri aut imaginarij momento duo puncta spatij peruolat, sed singulo quoque momento tantum singula. Sit tamen motus iste, si vultis, tam celer, vt celerior nullus esse valeat, citra mobilis replicationem. sic enim omnia momenta temporis imaginarij aliquâ parte indiuisibili, siue *αἰνίσματα* illius motûs occupabuntur, id est, omni omnino instanti imagi-

imaginario, sine vllâ vel minimâ intermediâ quiete, tale mobile mouebitur. Accipite iam calculum, & videte, quot millia momentorum otiosorum inter duo quælibet momenta quibus se globus mouet, oporteat intercurrere, vt intereâ temporis Equator se promoueat, vt tam ingenti celeritatis mensurâ possit globum anteire.

Itaque cùm inter duo quævis momenta motus, oporteat globum tanto agmine momentorum interlabentium quiescere, interruptio in motu manifestè prodetur, vt antea ostendimus in testudine. Nec tegi (quod fortè quisquam putet) hæc interruptio poterit, si non post singula momenta motus, sed post duo, tria, aut plura quibus perpetuò mobile se moueat, moræ illæ otiosorum momentorum interueniant; quia tunc multò plura momenta otiosa continuanda erunt, quæ aliàs medio aliquo momento quo mobile pergebat, distinguebantur: vnde hac ratione detegetur faciliùs interruptio motus, non obtegetur.

Aliis argumentis detrahi hæc larua, & morarum motui tardo inpersarum vanitas ostendi potest: & quia omnes ferè hodie Epicurèi naturales, deserat replicatione, per istas moras elabi conantur, pluribus eas vrgebimus. si enim obstruere has lacunas possumus, & demonstrare motum etiam tardum, esse continuum, non morulis & mansuiculis interpolatum, fuga omnis quæ euadant Epicurèi occlusa est, redire ad Aristotelem compelluntur, & telam illam malè ex atomis suis contextam dissoluere.

## CAPVT XIX.

*Argumentum secundum Physicum:*

*Puer ferreos rotæ radios minimo nisu incuruabit.*

**M**Irata est vetustas ingenium Archimedis, qui helice fabricatâ, non magno nisu urbem, veriùs quàm nauem regis Hieronis, attraxit in mare: sed tamen puer iam nullâ helice adiutus, simplice manu tantumdè & amplius potest, si vera sentètia Epicuri.

Facenim ferreis, aut adamantinis (qui nullâ malleorum vi inflecti valeant) radius, axe facili & versatili suspensam esse rotam, quam puer circumagere possit: aio radios istos, cuiuscumque duritiei tandem & rigoris fuerint, insigniter, etiam leuissimâ pueri manu incuruandos esse.

Cùm enim pars radiorum axi propinquior tardiùs, remotior

velocius circumagatur, momentis quibusdam temporis circumferentia rotæ & pars radiorum ei infixæ in orbem mouentur, cum interea pars propinqua axi stat ac moratur; quod sine partis superioris flexu & incuruatione fieri nequit. Nam, ut alicubi verè Aristoteles, linea recta non potest nisi per se primò, siue secundum omnes suas partes simul moueri. si enim pars vna moueatur altera immobili, necesse est eam inflecti & rectitudinem amittere. Sic si arbusculæ rectæ cacumen velis in latus inclinare, oportet rectitudinem eius necessariò deprauare, si pars in terram defixa non sequatur, sed immota permaneat.

Ita igitur etiam radiis cuiuscumque rotæ eueniet, minimo ad circumagendum conatu. Nec id solum in hac sententiâ quæ motum tardiozem quiete interpolat, sed in alterâ etiam quæ mobile per motum celeriozem replicari mauult: nam replicatio & eiectio partis superioris radiorum in spatium antecedens, non replicatâ eousque parte inferiore, accidere etiam nequit sine superioris partis inflexione.

Sed ecce quid etiam iam ridiculi hîc in mentem venit. Equus, inquam, trahens currum, mouebit rotæ axem (per axem enim modiolò insertum rotam circumagit) & inde proximè circumferentiam, non mouendo modiolum intermedium, cui axis tamen est contiguus. nam quiescit, aiunt, aliquo tempore modiolus, & partes radiorum ei vicinæ, quæ breuiori & tardiori gyro aguntur, cum interea circumferentia circuit.

Deinde, cum quispiam brachio extento gladium in orbem rotat, extrema cuspis (quia mouetur celerius quàm brachium, quod centro illius orbis est propinquius) aliquo tempore necessariò rapitur quiescente brachio, quod tamen gladium & cuspidem agit: quasi verò anima, non moto antè brachio, motum proximè in gladium transfundere possit.

Sed cur magis miraris, inquiunt, partem rotæ vicinam centro, aliquanto tempore interquiescere, quàm centrum eius, siue centrum globi intra eadem sua vestigia circumacti, numquam moueri? Resp. tamen, latum & euidentem esse discrimen. nam centrum nullum habet spatium, circa quod in orbem verti possit, quemadmodum omnes partes distinctæ à centro habent. nec potest etiam centrum in loco suo manens intra se, ut sic dicam, conuerti; quia intelligi non potest, quâ ratione punctum centrale, quod partibus mediis & extremis caret, valeat eodem loco permanens in orbem ambu-

ambulare: ὃ δὲ μήτε μέση μήτε μέσῃ περιέσκηται, τις μηχανή, τὸτο  
 κύκλῳ ποτὶ ὅττι τὸ μέση ἐπιγῆται; cui enim neque medium ullum ne-  
 que pars ulla competit, quò fieri potest, ut illud in orbem circa medium  
 feratur? Deinde nullum in Philosophiâ meâ centrum aut pun-  
 ctum positium reale est, quod suscipere motum possit, vt  
 Cap. xxxii. persuadere etiam aliis conabimur. vnde quidquid  
 in globo reale positium est, circa imaginarium centrum ambulat.

Plat. in  
 Parmenid.

## CAPVT XX.

*Argumentum tertium Physicum:*

*Trochus acri flagello in orbem actus, longissimo tamen  
 tempore quiescet.*

**I**Maginemur enim lineam rectam à centro, seu axe trochi in vl-  
 timam vsque mundi superficiem extendi, quam reuolutione sui  
 vnâ circumagat trochus. Extremum huius lineæ punctum tam  
 citò vniuersum mundi ambitum, quàm punctum aliquod super-  
 ficiei trochi, circellum suum circa trochi axem, absoluet. Cùm igitur  
 extremum illud punctum non replicetur, vt Cap. xvii. de-  
 monstrauimus, singulis temporis momentis vnicum, vt summum,  
 spatij punctum pererrabit, totidemque momenta in vnâ reuolu-  
 tione trochi, quot sunt in vltimo mundi circulo puncta, impende-  
 re debet. sunt autem in isto circulo infinities propemodum plu-  
 ra puncta, quàm in circello qui trochum cingit. Si igitur per puncta  
 circelli tantò pauciora non citiùs se reuoluit trochus, quàm extre-  
 mum illius lineæ punctum per totum ambitum cæli, diutissimè  
 interquiescere debet, & prolixissimum inter omnes vbique partes  
 motus, momentorum agmen otiosum transmittere: nam aliàs si  
 omnibus, aut multis temporis momentis moueretur, longè bre-  
 uiori tempore, quàm vltimum illud punctum, circuitum suum,  
 tantò breuiorem, absolueret. Quòd autem trochus in vnâ sui tam  
 rapidâ reuolutione toties & tam diu interquiescat, est contra mani-  
 festum iudicium sensus.

Aliud exemplum ab oculo sumere possumus, qui vnicâ capitis  
 nostri circumactione, extremum lineæ visualis punctum, circa to-  
 tam mundi superficiem vnâ circumferre potest. Ex quibus, & aliis  
 id genus exemplis facillè quis intelligit, modum reperendum esse,  
 quo duo mobilia, sine quiete tardioris, aut replicatione celerioris,

continuò sic moueri valeant , vt æquali tempore spatium conficiant inæquale. Modus verò omnis alius frustra tentabitur, præter vnicum qui in spatio angustiori, partium infinitudinem, perinde atque in ampliori, compingit.

## CAPVT XXI.

*Argumentum quartum Physicum:*

*Vmbra gnomonis horologij solaris non projicietur in partem  
plani directè auersam à sole.*

**S**ensus, & Mathematica ac præcisa omnis dimensio dicit, vmbra gnomonis, siue stili erecti in horologio solari, directè semper versari in parte auersâ à sole, numquam contra solem, aut in latus projici. Sit, inquam, sol nobis in meridie, vmbra stili in polum aquilonarem, non in meridiem, ortum, vel occasum dirigi potest. Falsum tamen hoc est, si verus Epicurus.

Cùm enim vmbra, propter angustias circelli quem circa stilum describit, multò tardiùs, quàm sol moueatur, pergente & circum-eunte per sat multa momenta temporis sole, ipsa in eodem situ defixa quiescere debebit; vnde cùm sol non eundem situm in principio & fine quietis vmbrae obtineat, palàm est vmbra, si initio è regione solis fuerit, in fine alium respectum habituram, & in latus detorqueri oportere.

Quod hoc etiam pacto demonstrari potest:

Si stilus tam longus esset, vt vmbra vſque in cælum solis proiicere valeret, vertex axis vmbrae in punctum cæli è regione centri solis caderet, ac pari cum centro isto celeritate in orbem circuiret, paulatim verò à vertice vmbrae vſque ad terram & ipsum stili contactum, celeritas decreſceret, & iuxta stilum tardissimus motus esset. Hoc autem euentu, vt ex Cap. XIX. & XX. patet, necesse est longitudinem vmbrae in arcum curuari, cùm ſuprema pars citissimè, medix aliquantò lentiùs, infima lentissimè feratur: vnde consequens planè est, vt si vertex vmbrae pari cum sole passu è regione obambulet, ima pars eius quæ ad stilum est, retrò deferatur, & in aliam partem reflexa sit; quod nemo hætenus vidit, nemo fando accepit.

Et vide quid etiam iam occurrit:

Non in nodis, siue capite aut caudâ draconis euenient lunæ eclipses,

eclipses, cum videlicet in eadem mundi diametro cōstitit vtrumque sidus. nam, etsi quando sol est in capite, vertex vmbre terræ, si ad cælum solis extenderetur, in caudâ sine interfectione quam in cælo solis imaginamur, foret; tamen in cælo lunæ, vbi lunaris eclipsis accidit, vmbra à puncto interfectionis oppositæ centro solis largiter deflectet, quandoquidem vmbre pars quæ lunam attingit, maximo interuallo depressior, & terræ vicinior sit, quàm culmen vmbre quæ cælum vsque solis se porrigeret: vnde & segnius multò per cæli lunæ ambitum eam incedere necesse est, quàm culmen illud vmbre per orbitam cæli solis, è regione centri solis incederet. Igitur vmbra terræ in cælo lunæ nequaquam è regione solis, sed retrò aliquantum semper erit. Denique cum sol ad punctum Meridiani mediæ noctis pertigerit, nondum media nox nobis erit, neque in axe ipso vmbre telluris versabimur, quia videlicet axis vmbre iuxta superficiem terræ non obambulat è regione centri solis, sed retrò necessariò, vt antè diximus, relinqui debbit. Quæ omnia falsa, sine dubio, & sensus ipse communis reuincit.

## CAPVT XXII.

*Argumentum quintum Physicum:*

*Oculus rem pupillâ suâ maiorem simul distinctè non videbit.*

**P**ythagoras, inuento quadrato lateris trianguli quod angulo recto subtenditur, æquali duobus reliquorum laterum quadratis, repente lætitiâ effusus dicitur bouem Musis victimasse: ego vitulum saltem benè pinguem fecissem, si per Christianas leges licuisset, vbi per tubum in Belgio nuper inuentum mihi primum incidit quod iam dicam.

Si continui planities ex meris punctorum atomis sternitur, oculus numquam simul distinctè videre poterit rem pupillâ suâ, aut minimo meo vnguiculo ampliorem. Quis sic? inquires. Quia, inquam, tubus ille docuit nos, ad perfectam & distinctam rei visionem opus esse, vt omnes partes obiecti visibilis in fundo oculi extra mutuum situm, per species suas depingantur: id verò impossibile est, si obiectum latius sit fundo illo, siue tabula tunicæ retiformis, in quâ depingi ipsum oportet, si superficies obiecti amplioris, & superficies tabulæ retiformis compactæ sint ex solis punctis. Fac enim superficiem visibilem constare mille, tabulam verò solum

centum

centum punctis in orbem dispositis. vbi centum obiecti puncta tabulæ, sine confusione & extra mutuum situm, impresseris, vniuersa tabulæ puncta occupaueris; reliqua igitur nongenta obiecti puncta sine picturâ competenti erunt. vbi enim picturam eam collocabis? nam si picturam picturæ intra idem spatium superfundas, omnia obiecti lineamenta confundes, & nil nisi confusum chaos oculus ille videbit. Igitur vt puncta reliqua nongenta in vnâ visionem distinctam cum aliis centum admittantur, locum alium in tabellâ illâ oculi reperire debent, quod non possunt, quia tabella centum tantum punctorum planitiem habet. Nongentorum ergo punctorum obiecti pictura competens & distincta excludetur, nec videri simul distinctæ cum aliis centum, possibile erit.

Accurrent illic, scio, & ex veteri suâ Philosophiâ reponent punctorum patroni: non opus esse picturam in oculo extendi, sed ad distinctissimam etiam visionem sat esse, si oculus omnium partium obiecti species, intra vnus etiam puncti angustias confusas recipiat. Sed profectò nihil intelligo, vel naturam & ingenium visionis non intelligunt isti. Dissimulemus hoc iam tamen, & à veris ad crystallinos oculos, ad lentes, inquam, dioptrarum nostratium, licet transferamus, & oculorum suorum (nisi aperire dedignantur) iudicio eos confutemus.

Lens, siue vitrum connexum, quod ad obiectum spectat in Belgicis dioptris, tunicarum & humorum anteriorum oculi nostri vera imago, amplissimi obiecti in exiguo papyri spatio imaginem sic affabrè & distinctè exprimit, vt omnium picturas partium oculis ipsis videre & distinguere possimus. Exempli causâ, excipiat in papyrum species arboris, omnia folia numerare etiam poteris: aut si vastus ager admittatur, spicas illas innumerabiles capita conferentes, & vento agitari in papyro miraberis. Numera iam tot spicarum innumerabilium innumerabilissima puncta, si potes, & in illis papyri angustis numerum punctorum reperis in quibus omnia extra mutuum situm depingas. Non faciet Callicrates ipse, qui complusculos versus Homeri in grano vno milij insculpere ad ostentationem solitus. Quomodo autem Aristoteles tuus, inquires, spatium ibi tot spicis, arboris, & totius Africæ messi, imò hemisphærio tam ingentis cæli inueniet? maximum, non diffiteor, naturæ miraculum est, tamen (postea dicemus) inueniet.



## CAPVT XXIII.

*Argumentum sextum Physicum:**Fluius nullus poterit nauigari.*

**F**luuij plerique omnes molli, aut præcipiti inclinatione aluei cunt, aut feruntur in mare. In leni aquarum agmine, ex Alberto Magno, & Geometris docet Daniel Barbarus, in singula Lib. 8. c. 6. Vitru. aluei milliaria Italica, siue millenos Geometricos passus, sufficere deuergentiam vnus pedis, id est, vt alueus ita perpetuò inclinetur & deuerget, vt in termino Italici milliariis, vno pede propinquior centro terræ sit, quàm in principio. Fluij verò rapidiores 3. 4. aut etiam 5. pedum deuexitate habent, qui vero ad sextum aut septimum pedem deuergunt, præcipitio & violentiâ aquarum intractabiles, & nauium impatientes sunt.

Si autem aluei punctis Epicuræis strati sunt, fluuios omnes, tales, & longè magis præcipiti vndâ futuros, imò post singula milliaria vno etiam toto milliari (quod mirum, imò ridiculum) depressiores futuros affirmo.

Facile in sensum huius rei hac cogitatione te deducam. Imaginare tantum vnus milliariis continuam ex punctis lineam, cuius secundum punctum sit depressius primo, & tertium secundo, & iterum quartum tertio, & ita porro. Cum enim secundum non possit esse demissius primo, minori excessu quàm punctuali, & sic de quolibet puncto sequenti, comparato cum proximè præcedenti, erit igitur tertium punctum duobus punctis, quartum tribus punctis, & ita deinceps, depressius, quàm primum; & tandem extremum totius milliariis punctum tot, quot in toto milliari sunt, punctis, propius ad terræ centrum accedet, quàm primum. Vnde hoc admirabile accidet. vt, inquam, fluuius (qualis fermè Nilus) qui per sextam circuli maximi in terrâ partem perpetuâ & mollissimâ deuexitate decurreret, in fine, siue in ostio suo, centrum terræ contingere debeat. ostia igitur Nili & Ægyptus in centro terræ erunt.

Hinc porro fiet, vt nulli aquæductus commodi deduci, nulli canales, nisi præcipientes, & aquarum incontinentes; imò vt  
K nullus

nullus baculus ( quod effusissimè rideas ) aliter possit versus centrum terræ inclinari , quin pars ima tanto intervallo sit centro terræ propinquior parte suprêmâ , quanta est totius baculi longitudo. Hoc , ne fortè non intelligas , volo . Vidisti quandoque Germanos milites hastas illas decumanas humero gestantes ? spiculum quod retrò est , aliquantulo tantùm elatius est , quàm pars anterior & ima quæ terræ solet defigi . si Epicuro tamen credis , spiculum , dum hasta sic in humero iacet , tantò est à centro terræ remotius parte alterâ quæ antè est , quantò , si hæc pars anterior terræ defixa esset , & spiculum rectâ in cælum spectaret : nam in utroque hastæ situ pars superior est totâ longitudine hastæ eleuatio à centro terræ , quàm ima . Vel , si hoc est familiarius : dum iaces in lecto , corpore à capite ad pedes molliter declinui , sic ut caput vno palmo sit , quàm pedes , elatius , non minori intervallo caput superat distantiam pedum à centro terræ , quàm si corpus in pedes erectum foret : id est , palmus vnicus est æqualis longitudini sex pedum , si corpus tuum sex pedibus longum sit .


Nec tantùm dicis & risus ergò hæc à me dicuntur . reuerà enim opinioni Epicuri omnia hæc euidenti sequelâ adhærent , & eâdem demonstratione , quâ in alueo fluminis vsi iam sumus , manifestari possunt .

## C A P V T   X X I V .

*Argumentum septimum Physicum :  
Pleraque , aut omnia ædificia corruerent .*

**H**Oc , & præcedentia aliquot argumenta Mathematicis accenseri , sed tamen etiam Physicis possunt , quia in materiâ sensibili versantur .

Vt autem ædificia firmiter & extra periculum lapsus consistant , ad perpendiculari normam fieri , id est , lineâ rectâ in centrum terræ spectare debent : vnde turres , ne cadant , oportet angulis rectis superficiæ terræ insideant . Id autem in plerisque ædificiis seruari nullâ ratione poterit , nisi vanæ sunt atomi Epicuri . Nam retractâ huc Capitis VIIII. figurâ , sit *A B C D .*  
terræ



terræ superficies, & puncto M. sit turris aliqua imponenda. Dico ruituram, quia axis eius non lineâ rectâ, sed curvâ, & ab axe horizontis imaginario deflexâ respicit terræ centrum: lineâ, inquam, M L I. Nam à puncto M. ut ipsi adfatentur, non potest breviori & directiori viâ ad centrum terræ I. per veram & realem punctorum quantitatem incedendo, perueniri, quàm descendendo per punctum L. id est, per lineam reuerâ obliquam.

Itaque turris in puncto A. aut B. aut C. aut D. ad perpendiculum excitata, in directo horizontis axe, & extra ruinæ periculum erit; quia à quatuor illis punctis lineæ rectissimæ ad centrum terræ I. decurrunt, nempe A E I. B F I. &c. sed omnibus aliis punctis imposita minabitur ruinam.

Diximus enim Cap. xv. quatuor solum viis Mathematicè rectis, iuxta Epicurum, à centro exiri posse ad circuli circumferentiam, aut certè, si aliquantò plures (ut exempli gratiâ, etiam I L O. & tres aliæ, quæ reliquos tres circuli quadrantes in duas partes æquales similiter secant;) pauca tamen comparatione curvarum erunt. ceteræ enim omnes lineæ à centro I. in quodvis pun-

æum segmenti A O. item O D. &c. educæ, rectæ nullatenus esse possunt.

Igitur si demus octo itineribus rectâ à centro circuli ad circumferentiam transiri, ut in schemate Cap. xv. vides esse concessum, octo solum turres in circumferentiâ tali extrui poterunt ad Mathematicum perpendicularum. imò istarum octo non omnes lineæ, sed media tantum, siue axis à vertice in mediam basim decurrens, erit perpendicularis ad terræ superficiem, reliquæ verò lineæ circumstantes, parte suâ inferiore versus axem declinabunt, ut cum eo in idem punctum concurrere possint, antequam ad centrum terræ pertingant: sicuti in præsentî schemate lineam M L. obliquam cum rectâ O L. cernis concurrere. Hinc ergo etiam earum octo turrium latera pendebunt extra Mathematicum & præcisum perpendicularum.

Hoc quoque ad risum adiicio. Nullibi in toto circuli terræ ambitu erecti sine inclinatione stare valebimus, nisi in illis punctis octo, quæ rectas à centro ad circumferentiam terminant. In A O D. &c. igitur erecti, & in Mathematico horizontis axe consistere poterimus, at nequaquam in M N. &c. sed incuruari necessario nos oportebit, cum discrimine ne in nasum decidamus.

## C A P V T X X V.

### *Argumentum octauum Physicum:*

*Continuum contexti ex indiuisibilibus sine vacuo interiecto non potest.*

**H**Oc cum curâ animaduerti. Plerosque omnes veterum, qui magnitudinem ex atomis compegerunt, etiam vacuum quoddam singulis intertexuissent. ita enim de Leucippo, Democrito, Epicuro narrat Laërtius. & profectò acutiùs & penitiùs mihi videntur texturam illam introspexisse, quàm ij qui hodie sine mixturâ inanitatis continuum suum agglutinant ex immediatis & perpetuis atomis. reuerà enim magis consequenter philosopharentur, si proximis duobus quibuscumque punctis modicam saltem vbique inanitatem interlicerent. Quod demonstrari hac Aristotelis ratione potest.

Punctum puncto proximè additum, vel ipsum tangit, vel non. Si non tangit, igitur vacuum inter vtrumque intercedit, cum partes alias

tes alias quantitatis realis medias, quæ puncta non sint, hæc sententia respuat.

Si verò punctum vnum alterum tangit; igitur ei illa bitur, & penetrat, neque extensus aliquid cum eo, quàm sine eodem facit. Hoc est, quod Aristoteles toties iterat: *indiuisibile proximè additum indiuisibili diuisibile extensus facere nequit.*

Non ignoro hanc Aristotelis rationem vulgò contemni ab aduersariis. Nónne, inquit, duo puncta aliquid amplius sunt, quàm vnum? Sanè, sed non fuit tam obtusus, vt hoc etiam non viderit Aristoteles. aliquid, sine dubio amplius sunt, si numerum spectes, sed non idcirco statim faciunt vnum continuum extensus. nam in compositione Physicà, anima & corpus plura sunt, quàm solum corpus, & tamen sic vniuntur, vt non constituent compositum maioris extensionis; quia videlicet pars vna collabitur in situm suæ compartis. Hoc autem idem euenturum duobus proximis punctis, sic ostendi potest.

Punctum res omnino indiuisibilis est secundùm extensionem; ergo, si nullo inani, aut pleno interposito, vnum ad contactum alterius admoucas, impossibile est, vt extra situm eius emaneat: nam per se primò tangere ipsum debet, cùm omni extensione partium careat, nec secundùm aliquid sui tangere, & secundùm aliud extra situm eius remanere possit.

Hic clamant, & fatigant se admirando nostram & Aristotelis hallucinationem, qui concipere mente non valeamus, quomodo duo indiuisibilia per se primò sese tangant, & tamen extra mutuum situm in diuersis immediatis spatiis sint.

Iam intelligo profectò, quàm verè ille apud Augustinum: *Non possum longitudinem, qua adhuc nullam latitudinem assumpserit, cogitare. si enim filum aranea in animo constituerò, quo nihil exilius solemus videre, occurrit mihi etiam in eo tamen & longitudo per se, & latitudo, & altitudo: qua qualescumque sint, esse tamen negare non possum.* Difficillimum, inquam, esse humano intellectui sensibus assuefacto aliquid indiuisibile, & præsertim punctum, vndique circumcississimum, cogitare. Loquere subtilissime Nominalium: *Difficillimum est, ne dicam impossibile, imaginari punctum.*

Nam quia super quolibet obiecto visibili (atomo etiam in radio solis oberrante) basim visuaalem diuisibilem constituimus, & imaginatio ac intellectus, quamdiu corpori immersus, visum maximè inter sensus imitari in conceptibus suis consueuerunt; idcirco licet

Lib. de  
Quant.  
animæ c. 6.

Gregor.  
Arm. in 1.  
d. 2. q. 2.  
art. 1.

minimum quid apprehendamus, aliquam ei magnitudinem dare solemus, & mente eam concidendo, particulas quidem toto minores, sed tamen extensionis alicuius etiam retinentes facimus, ac difficillimâ prorsus; aut nullâ umquam fortè mentis analysi ad punctum vndique impers & indiuisibile rem illam deducimus. Periclitetur quisque secum, valdè fallar, aut subtilitati suæ nimis impensè blanditur, nisi sic experiri se affirmet.

Itaque existimo, istos qui tam facile punctum puncto proximum concipiunt, veram puncti imaginem perdidisse, quam Aristoteles fortassis habuit, & pro Mathematicâ atomo, Physicam substitueret, qualem in radiis per fenestram illapsis ludentem sæpè conspiciamus. Talis igitur Physica & vulgaris vna atomus tam alteri proximè deinceps, quàm globulus precarius globulo in rosariis nostris, esse potest; Mathematica verò & omnino indiuisibilis atomus non potest: quod acutè intellectum à Leucippo, Democrito, Epicuro, & illis veteribus, ideoque non atomum atomo immediatè, sed modicâ interiectâ inanitate consueverunt.

Non possunt ergo duo puncta se totis extra mutuos situs in diuersis spatiis immediatis esse; quia (iterum dico) si contigua sunt, & sine intervallo se premant, inuicem confundentur, cum profunditate, & omni extensione, quâ vnum à situ alterius recedat, careant. Non intrant mutuuum spatium, sed capitella tantum conferunt, inquier.

Verè puncta sua tamquam rotundula quædam capitella & globulos cum omnibus suis dimensionibus sibi deformant, qui sic cogitant. Aliàs si imaginatione suâ capita duo plana inprimis & superficialia sibi concinnent, ac deinde immediatè coniungant, nisi phantasia me mea decipit, penetrabunt se, ac mutuos situs confundent, quia sine profunditate vtrimque sunt, quâ se repellant. Et idem eueniet, si duarum linearum latera (vt sic dicam) aut cuspides duorum inter se proximè & cum contactu componantur.

Non eueniet, iterum inquier: sed punctum tangit punctum, quia & extra situm eius est, & nihil tamen spatij imaginarij interiacet, cui vel quantitas punctualis inferi possit, ideoque sine vllâ intermediâ inanitate, & penetratione est ei proximum. Quod enim absurdum, aut difficile, duorum punctorum præsentias ad duo proxima puncta imaginaria, non ad idem, mente concipere?

Nescio quid ipsis sit, certè est difficillimum mihi: & mentior, aut ipsi iterum allucinantur, quia spatium imaginarium, ad modum

dum Epicuræi continui, è solis imaginariis punctis confarcinant, & id tamquam fundamentum, aut exemplar quoddam, ad cuius instar reale continuum contexant.

Verùm, quandoquidem imaginarium spatium, imaginarium tantum, id est, reuera sit nihil, nec magis punctis, aut aliis partibus, quàm chimæra capite & caudâ, constet, non oportet spatium reale ipsi, sed ipsum spatio reali conformare: sic enim entia rationis ad realium imaginem solemus fingere.

Igitur inquirendum ante omnia de texturâ realis continui, & deinde iuxta filum ac stamen eius, continuitatem spatij imaginarij oportet consuere.

Dico itaque falsum eos fundamentum supponere, & perperam duo proxima imaginaria puncta in spatio imaginario, quæ a duabus realium punctorum præsentis respiciantur, statuere. Ex infinitis enim partibus contortum spatium illud chimæricum imaginari oportet, non punctatim tessellatum, vt continuum Epicuri. Inter ergo duorum punctorum realium præsentias, quæ distincta spatij imaginarij puncta respiciant, extensio imaginaria necessario intercedit, nec ad mutuum contactum (vt sæpe iam repetitum) duo realia puncta venire possunt, nisi se penetrrent, & in vnum spatij imaginarij punctum collabantur; quia totis se tangere debent, nec secundum vnâ partem in contactu, & secundum alteram extra ipsum esse valent, quandoquidem partibus careant. Itaque propter summam suam tenuitatem puncta, & omnia indivisibilia statim atque leuissimo contactu immediato in murua, vt sic dicam, oscula peruenerint, ita se inuicem quodammodò rapiunt, vt extra se consistere amplius non possint.

Sapient ergo VVicleffus, Huius, & alij in Epicuri sequelâ hodie, si non saltuatim eum vno pede, sed vtroque gradatim sequantur, & atomis *κεῖρα*, *vacuum* eius permisceant: id est, rem ab Aristotele & bonis omnibus Philosophis omnium occisissimam denud resuscitent. Et hoc quidem argumento non tantum pura puncta finita Epicuri, sed Leucippi, Democriti, & nouissimè Ioannis Maioris infinita confutantur.

In 2. d. 1.  
q. 1.

## CAPVT XXVI.

*Argumentum nonum Physicum:*

*Sine vacuo, vel partium penetratione, aut replicatione propriam condensationem corporum expedire non possunt Epicuræi.*

Lib. 8. q. 3.  
Sympos.

**V**eteres omnes atomorum hyperaspistæ vacuitates per vniuersa corpora disseminauerunt, quarum dilatatione & ampliori hiatu ipsa rarefcerent, aut constrictione densarentur. Ita ex disciplinâ Epicuri Boëthus apud Plutarchum venuste satis (si tam verè) modum explicat, quo aër frigore nocturno intra pororum suorum inanitates contrahitur, & manè radio solis ictus, iterum dehiscit & expanditur. Sine talibus enim inanitatibus, aut partium penetratione, aut certè replicatione condensationem non posse explicari intelligebant. Elegerunt verò potissimum vacuitatem, quia durissimum & incredibile existimabant, corporum partes, quas tam pertinaciter inuicem resistere experimur, intra idem spatium naturaliter posse compelli. Replicatio etiam corporum res insolentissima est, extra omnem experientiam, & vires naturæ. In aliquam tamen ex tribus istis viis discedendum esse, sic ostenditur.

Vel enim inter puncta vacuitates sunt, quæ rarefactione diducantur, & condensatione conniueant, vel certè omnia continua & immediatè inter se connexa sunt. Si immediatè connexa & contrahi debeant, aliter profectò non possunt, quàm si vnum punctum spatium alterius proximi intret, aut nisi in corpore illo rariori puncta replicata fuerint, quorum præsentia per condensationem minuantur, & dicatur corpus condensatione eodem modo contrahi, quo angelus, quando intra maiorem sphaeram replicatus, ac cisis præsentis suis redigit se ad minorem.\*

Sic enim aër vnius palmi, aut, si maior, sit mille punctorum continuus, & sine miscelâ vacui, dico, nisi puncta antea replicata fuerint, non posse condensari, siue ad spatium minus redigi sine penetratione mutuâ eorum. Nam si mille puncta continua erant, totidem etiam puncta imaginaria (sic enim concipimus, & loquimur) continua implebant. redigantur ergo iam ad quingentorum punctorum imaginariorum spatium, id sanè fieri non poterit, nisi  
in vno-



in vnoquoque puncto imaginario bina puncta realia compingantur. Debet enim per condensationem punctum vnum loco se mouere, & in proximum spatium punctuale transire, in quo aliud punctum inuenit, nec tamen inde expellit, ne omnia simul puncta suos locos ita deferant, vt spatium æquale occupent ante & post condensationem; quemadmodum euenit dum linea mille punctorum sine condensatione aut rarefactione loco transfertur.

Quispiam fortasse existimabit hæc etiam contra Aristotelis sententiam valere, nec posse in eâ, condensationem sine vacuo, aut penetratione, aut replicatione partium expediri: sed fallitur iste, nec formauit quam debet, infinitudinis in partibus continui imaginem. Verum hoc postea, nunc dispiciamus quâ probabilitate per vacuum, penetrationem, vel replicationem Epicuræi defendere possint corporum condensationem. Et primum de iis, qui desperantes posse omnia absurda trium istarum viarum perumpi, omnem propriam & Philosophicam condensationem respuunt, contenti solâ vulgari.

## CAPVT XXVII.

*Frustrâ euidere tentant, negando quidquam, nisi vulgari condensatione, posse naturaliter condensari.*

**Q**uidam citò se & vnico saltu, condensationis hoc Labyrintho expediunt, id est, propriam condensationem negant. Propriam voco, de quâ passim Aristoteli & Philosophis sermo, per quam corpus sub eadem partium multitudine minus spatium occupat.

Præter hanc verò est alia vulgaris, quæ fit per expressionem corporis tenuioris ex poris alterius erassioris. sic condensatur spongia, quando compressione manûs, aqua vel aër intra poros eius delitescens expellitur.

Verum hæc condensatione vulgari partes spongiæ non minus spatium, quàm antè occupant, quia spatium intra latera pororum aqua vel aër, non partes spongiæ antea occupabant. Vnde cum expressâ aquâ partes spongiæ in locum eius subintrant, simplici motu locali spatium vnum deferunt, & inuadunt alterum, nec magis propriè & Philosophicè condensantur, quàm acies militaris quæ per milliare prius expansa, ad dimidium milliariis se contrahit.

trahit. secùs verò foret, si ante spongiæ compressionem, pori essent occlusi, & totum spatium intra extremam spongiæ superficiem comprehensum, partibus spongiæ, non alio corpore permixtum, oppletum esset: tunc enim sine propriâ condensatione ad minus spatium redigi spongia non posset.

Quidam igitur non Epicurei tantum, sed etiam Peripatetici, difficultate absteriti, negant aliter vîquam corpora condensari, quàm vulgariter, & per expressionem corporis rarioris ex meatibus & poris alterius densioris.

Sed difficile non est eos refellere. Nam in primis, raritas & densitas, omnium sententiâ, dispositiones quædam sunt ad formas substantiales: dici verò nequit, formam aliquam esse, quæ corpus alterius speciei partibus materiæ suæ interiici postulet; nec enim forma terræ, aut alia quævis flagitat mixturam alterius corporis, etiam si aqua terræ permisceatur in eodem luto. Omnis tamen forma eiusmodi mixtionem postulabit, in istâ sententiâ, præter eam cuius materia est omnium, citra partium penetrationem, densissima: nam ubicumque minima est raritas, ibidem erit materiæ per alicuius alterius corporis interiectionem interfectio. unde fiet, ut omnes formæ, quæ aliquam raritatem, siue densitatem non summam flagitant, (quales omnium animalium, plantarum, lapidum & metallorum, præter fortasse aurum, formæ sunt) materiæ suæ discontinuationem naturâ suâ postulent. & quandoquidem nulla vnius potior, quàm alterius partis (præsertim in metallis, & inanimatis homogenijs) sit ratio; omnium vniuersim partium in ultimas atomos suas & puncta dissolutionem, & (ut Chymici loquuntur) calcinationem naturaliter exigent. Alia igitur est raritas, & densitas, præter vulgarem quæ materiæ continuationem non dissoluunt, sed modi quidam materiæ sunt, quibus partes omnes inter se proximè (nullo alio rariori, aut densiori corpore intertexto) deuinctæ, nunc ad maioris, nunc ad minoris spatij mensuram componuntur. tali enim partium densitate, aut raritate formæ quædam substantiales, ad obeundas ritè suas functiones, indigent.

Secundò, incredibile est, nullum in vniuerso corpus esse purum & sincerum, excepto vnicò corpore densissimo. Cur enim vnus saltem puri aëris, in toto elemento tam vasto, palmus non potest inueniri? atque is frigore potest densari, neque tamen per alterius corporis interpositi expressionem, cum sit aër sincerus, nec poris  
vllis

vllis perforatus, qui alterius extranei intra se mixturam recipiant.

Tertio, nullum aliàs corpus vniformiter rarum, nisi in partes omnes suas vsque ad vltima puncta dissectum, assignari posset. vnde tot semper oporteret esse puncta interiecta corporis alterius speciei, quot sunt puncta corporis vniformiter rari. Cuiusnam autem, obsecro, speciei sunt tot illa puncta singulis aëris, aut aquæ vniformiter raræ punctis intertexta? Aquam sanè quandoq; purissimam, ac summâ partium vnitatem perspicuam & homogeniam cernimus, quæ tamen summam nondum densitatem est adepta, sed raritatem adhuc aliquam, & quidem vniformem habet: quis verò ibi sensus, quæ apparentia alicuius alterius corporis non aquei, quod singula aquæ puncta à proximis abscindat, & eorum vbique continuitatē interpellet? Omnis aqua, quam sincerissimâ existimamus, impurissima erit & valetudini maximè inimica, si res ita habet.

Quarto, experimento certo constat, aquam, aut aërem intra vas vndique conclusum, ad spatium angustius, non per expressionem partium heterogeniarum alijs corporis, contrahi. sic enim hieme lagenæ, & alia vasa, congelatiò intus humore, ob metum vacui rumpuntur: quod haud dubiè non fieret, si partes humori permixtæ in proximum tantum spatium exprimerentur. operculato enim vndique vase erumpere foràs nequeunt. intra vasis igitur capacitatem permanerent, & totam, perinde atque ante congelationem, sine periculo vacui implerent.

Aliud illustre & manifestissimum exemplum nupera Psychiologorum inuentio nobis suggessit. Fistula vitrea capitata, instar longi vrnalis inuersa, est, quæ aquâ infernè non tota repletur; superiora enim & globum capitis aër complet. Hac fistulâ intensionem & remissionem frigoris hieme metimur. Si acius gelet, aqua in tubo metu vacui ascendit, quia aër in superiori fistulæ parte frigore contrahitur: si frigus remittit, aëre se relaxante, aqua desidit. Cum autem in superiore fistulæ cavitare, vbi est aër, nullum sit foramen, quo fistula respiret, dici non potest, aërem, per expressionem alterius corporis intermixti, ad minus spatium frigore contrahi; quia nulla est via, quâ extra fistulam quidquam foras exprimi valeat. Idem igitur omnino aër, nullius alterius corporis accessu, aut decessu nunc maius, nunc minus occupat spatium.

## CAPVT XXVIII.

*Alij cum Veteribus per vacuitates fistulosas fugam moliuntur:  
quam tamen non est difficile obstruere.*

Arist. lib. 1.  
c. 7. Cæli.

**V**eteres Epicuræi, aliique olim atomorum aduocati, magno consensu per vacuitates quasdam corporibus vbique permixtas condensationis difficultates effugere conati sunt. huic enim fini

Problem.  
Maria q. 6.

Poteram verò hanc vacui confutationem, vt satis procul olim ab Academiâ, Lyceo, Stoâ reiecti, protritique, præterire, nisi quosdam hodie iterum in inania ista pronos & labentes cerernerem.

*Densari & coire aqua nullâ aliâ ratione potest*, inquit Casmanus, ex disciplinâ magistri sui Patritij, *præterquam quòd vel ærem per atomos sibi intermixtum in alias impellat partes, unde spuma fit: vel in atomos vacui sibi intermixtos interim resideat, quos dilatata & rarior facta mox aperiat.* Id est, vel nulla alia, præter vulgarem, condensatio esse potest, vel certè defendi non potest, nisi per vacui beneficium.

Lib. de  
Calore.

Gallorum eruditissimus Adrianus Turnebus, sustinens lumen corpusculorum quoddam flumen esse: *Nec verendum est*, ait, *ne penetrando, corpus corporis alterius locum obsideat. Sunt enim inanitates quædam interpositæ, per quas radij elabuntur. nec enim summa rerum ita conferta est, vt non crebræ inanitates interiectæ sint.* Id declarat ær qui modo latus remissusq; est, modo spissus & contractus. Eius enim laxitas & raritas, quid aliud est obsecro, quàm foraminum eius dilatatio? eius contractio, quàm foraminum compressio, vt minutiora sint quàm prius? alioqui cum se laxat ær, ecquod tandem corpus vacua eius spatia implet? cum se densat, nonne in eadem residit? Id adèò sub oculos ab Herone in Pneumaticis subiicitur, vt nemo qui legerit, contradicere quidquam possit. Heronem tamen legi, & adhuc contradico, Turnebe. Quæ enī illa tam inuicta Heronis argumenta? Eadem planè quæ Turnebi.

Quòd scilicet aliter intelligi nequeat, quomodo lumen per ærem immotum, aut vitrum penetret: quòd si vas aëre vndique, sine permixtis inanitatibus, plenum sit, concipi non possit, quâ ratione,  
vel

vel minima alterius corporis particula ei inferciri valeat : & alia eiusdem commatis.

Sed primum soluitur, negando lumen esse corpus. Est enim accidens, quod in eodem spatio cum subiecto suo esse potest, imò debet.

Secundum, quod difficultatem in hac materiâ maximam continet, explicabitur infrâ cum sententiâ Aristotelis. Sed experimentum etiam manifestæ, vt putat, vacuitatis Hero, & ex eo Turnebus hoc nobis obiicit.

*Si pilam vitream perforaueris, & per foramen siphunculum in eam immiseris, diligenterq; ad foramen adplumbaueris, ore interiorẽ aërem elicies, magnaq; intus relinquetur inanitas : cuius argumentum hoc fuerit. Si enim priusquam externus subeat aër, siphonem digito operculaueris, & in aquam inuerteris, amoto digito humor succedet, sursumq; in pilâ sinum feretur.* Sanè faciet ; sed non quia vacuum in pilâ illâ vitreâ, sed aër admodum rarefactus fuit, qui frigore aquæ subito inhorrescit & se contrahit, aquamque metu vacui sursum inuitat.

Falluntur igitur Hero & Turnebus, existimantes siphone illo vniuersum aërem e pilâ exsugere. pars enim vna solum extrahitur, remanet altera, rarior tamen & extenuatior, vt totum illud pilæ spatium valeat implere. Cùm enim pertinax contiguitas aëris ad superficiem concavam pilæ, non sinat aërem auelli, & tamen siphonem vi attractrice oris, aliquam partem exsugat, aër in pilâ residuus istâ attractione violentâ expanditur, quousque pilam totam complere possit. Raritatem enim, & densitatem solo motu locali, sine alteratione præuiâ, induci posse, est etiam alibi in comperto.

Alia quædam vacuitatis argumenta (vt vas, quod cinere impletur tantumdem aquæ videtur capere, ferri candentis, quod substantiam ignis inanibus quibusdam poris videtur combibere) puerilia ferè iam sunt, & nemo trium dierum Peripateticus est, qui nesciat respondere.

Ceterum, vacuum nullum in naturâ rerum esse, infinitis exemplis non tam probare, quàm obruere eos possumus. Quis nescit plurima organa hydraulica, & fontes artificiales non aliâ de causâ, quàm ad propulsandum vacui periculum, fluere ? quæ ancilla ignorat, liquorem, extracto infernè epistomio, si vas supernè non respicit, stare tamquam congelatum, nec effundi ? quis puer adeo puerilium nescius, vt corio illo suo orbiculari silices platearum

non attraxerit, aut attrahi ab aliis, cum admiratione non conspexerit? quis nescit, vasa ænea ingentis spissitudinis, instar vitreorum, frigore dirumpi? quis aquam per quantævis capacitatis siphonem, exsucto aëre, magnâ abundantia & pleno tubo sponte subire? Atqui hæc, & sine fine alia plura operatur vnicus metus vacui.

In Zeno-  
ne.

Cur verò natura tam accuratè contiguitatem inter corporum superficies conseruet, causâ est, vt influentia cæli per omnes vsque-  
quaque mundi angulos & spatia traici possit, quod interposito vacuo fieri nequiret. vacuum enim actionis continuitatem, & perpetuam illam ab agente vsque ad patiens catenam abrumperet. Pulchrè de Stoicis Laërtius. Docent, inquit, *ἐν τῷ κέντρῳ ἐστὶν εἶναι κενόν, ἡνῶδ' αὐτὸν τὸ πρὸ ἀναγκᾶς ἐστίν, τὸ δὲ ἑξ ἑαυτοῦ οὐδ' ἐστὶν ἐν τῷ κέντρῳ, ὡς οὐκ ἐστὶν ἐν τῷ κέντρῳ*, in mundo nihil esse vacuum, sed omnia inter se colligata: hoc enim necessarium esse ad cælestium & terrestrium consensum ac concordiam.

Lib. de  
Calore.

Sed insignem solum vacuitatem, inquirunt, non paruam & angustam natura refugit. Quod enim tam intolerandum vniuerso malum, si alicubi continuitas eius paullisper dehiscat, vt rarefactioni & condensationi corporum locus aliquis esse possit? *Vacuitates istas*, ait Turnebus, *omnibus corporibus insensit natura, ne si soliditate continuatâ constarent omnia, excluso lumine & calore (quæ corpora cum suis dimensionibus esse credit) nihil hic rerum gerere posset.* sed probabilius necessitatem talis vacui ad rarefactionem & condensationem inducendam referemus. Verùm nec sic longè euadit Turnebus. nam ipse mox subdit. *Altera est inanitas vastâ quadam lateq; patens, quam refugit natura, cuius causâ miracula molitur, & grauiâ sursum pellit; quæ tamen effici potest.* Ecce, quomodo postquam fenestram solum aperuisset, iam ostium totum pandit. Ait enim iam vastam etiam vacuitatem posse effici, & artem id efficiendi per vitream pilam & immissum siphunculum ex Herone nos docet, quam iam paullò antè reieciimus.

Igitur affirmo, paruas illas vacuitates quibus corpora perforarentur, ruptis parietibus coituras sæpè in magnas lacunas, valdè noxias vniuerso. nam si aqua, exempli gratiâ, tot pusillis inanitatibus foraminosa est, cum in centuplo maius spatium per rarefactionem naturaliter expandi possit; eadem etiam natura centuplo maiores inanitates æquo animo tolerabit.

Dein-

Deinde innumeræ illæ vacuitates in vno corpore tam angustis parietibus distinctæ, cælestes, & ceterorum agentium influxus notabiliter interpellarent, distorquerent, diminuerentque.

Tertiò, maxima etiam spatia quandoque naturaliter euacuanda fore, sic potest ostendi.

Corpora quædam sunt quæ rarefactione in maximam amplitudinem extenduntur, vt aqua vitæ, pyrius puluis, &c. nam flammam grani vnus, centies vices quinque millies maius <sup>12,5000.</sup> spatium, quàm granum ipsum, occupare Snellius expertum se dicit. Igitur vacuitates quæ in grano pulueris adstrictæ erant, toties largiùs diduci possunt, & ingentibus tandem foraminibus dehiscere. Potest enim aliquo artificio puluis vase sic includi, vt flamma eius totum aërem vase expellat, & alium nullum, ad complendos flammæ hiatus, admittat.

Denique, quot punctorum crassitudinem inter duos quoslibet grani pulueris inanes poros intericiere placet? Sanè cum puluis vbique eiusdem sit raritatis, & æquè fistulosus, plurimos per totum ipsum vacuos meatus discurrentes fateri est necesse; vnde & paucorum punctorum interuallo esse discretos. Cum autem per rarefactionem inflentur & tumescant inanes illi meatus, oportet parietes interiectos tendi & extenuari: & quandoquidem hi paucorum punctorum crassitiem habeant, modicâ statim rarefactione ad superficiem tenuitatem, siue puncti vnus crassitudinem rediguntur, quæ auctâ rarefactione dirumpetur, & sic omnium foraminum inanitatulæ, vt sic dicam, in vnâ insignem inanitatem rescindentur, ac vniuersa grani pulueris puncta eiiciuntur in flammæ circumferentiam. Computent enim Epicuræi, non sufficient omnia pulueris puncta ad texendam tam magni ambitûs flammæ extimam superficiem. Vnde sequitur hoc absurdum & deridiculum: totam flammam esse vnâ tantum sine corpore superficiem, & totum spatium inter latera eius tam turgida, esse vacuum. Quod verò de grano vnico pulueris demonstramus, potest de modio, & mensurâ quâcumque.

## CAPVT XXIX.

*Sed neque per penetrationem partium quantitatis effugere possunt.*

**R** Eiectis igitur vacuitatibus istis iam dudum obsoletis, plurimi hodie ad penetrationem partium decurrunt.

In condensatione, inquirunt, partes corporis quæ antè extra mutuum situm erant, per illam compressionem incipiunt se ingredi & penetrare, quæ in rarefactione denuò extrahuntur, & expanduntur in ordine ad locum. Cogita cultrum, qui vaginâ suâ nunc conditur, nunc eximitur, & rudem huius Philosophiæ habes imaginem: sic enim ferè vna pars continui intra aliam se insinuat (cum penetratione dimensionum tamen, quod cultro & vaginæ non accidit) ac deinde se educit.

Hæc tamen penetrationis, ad expediendam condensationem, via vetustis illis in mentem non venit, quia nimis contumaciter corpora inter se configi, & ab eodem spatio inuicem se repellere, ac plurima naturæ miracula, penetrationis fugâ existere cernebant. Pulueris nostri pyrij necdum tamen vires & turias in penetrationis metu conspexerant. *E maximâ bombardâ, quam duplicem cartoam vocant, globus ferreus ad obliquum emissus, intra duo minuta temporis vix motu fessus terram pertingit, ut Rothmannus Principem suum (Vilhelmum Hassiæ Lantgrauium) aliquando periculum fecisse mihi indicabat, ait alicubi Tycho.*

Igitur ad duo circiter milliaria Belgica globus expuitur antequam decidat in terram, cum singulo quoque horæ minuto, id est, parte horæ sexagesimâ, 3000. passuum, siue milliare ferè Belgicum præteruoler. Historiæ etiam cum ingenti admiratione basiliscum illum Mahometis II. Turcarum Principis loquuntur, qui 700. librarum spheram tanto turbine excutiebat, vt montes etiam totos, aiunt, paucis ictibus comminueret.

Quas etiam tempestates in cuniculis subterraneis pulvis iste excitet, nuper in Meteorol. nostris diximus. Et breuiter, formidandi illi fulminum impetus, terrarumque agitationes fugam penetrationis etiam pro causâ habent.

Videtur igitur nimis longè natura penetrationem refugere, quàm vt tantâ eam facilitate admittat in omni condensatione. Duo enim maxi-

Lib. 4. cap.  
vlt. a. 9.



maxima naturæ odia, vacuum, & partium quantitatis penetrationem, ab experientibus, nec iniuriâ vocantur, propter quorum fugam nulla non molitur & patrat miracula. Aristoteles etiam nullo fortiori argumento, lumen non esse corpus ostendit, quàm quòd aërem penetret: ἐδὲ ὅδ' δύο σώματα ἄμω συναρτῶν ἐν τῷ αὐτῷ εἶναι, *Lib. a. c. 7. Animæ.*  
*duo enim corpora, ait, non possunt in eodem simul esse.*

D. Thomas etiam, Scotus, & vniuersim Theologi dotem subtilitatis corporis gloriosi explicantes, penetrationem corporum solâ Dei virtute supernaturali posse induci affirmant, ideoque beneficium illud supra naturæ debitum esse. imò acutissimum Durandi ingenium ita hîc hæsit, vt negauerit etiam virtute diuinâ penetrationem istam posse fieri. SS. Patres deinde ingressum Christi Domini ad discipulos ianuis clausis, egressum ex vtero & sepulchro, cælorumq; in ascensione penetrationem in maximis diuinæ omnipotentiae miraculis ponunt. *Si corpus erat,* ait Augustinus, *si hoc surrexit è sepulchro quod pependit in ligno, quomodo per ostia clausa intrare potuit? Si comprehendis modum,* inquit, *non est miraculum: ubi deficit ratio, ibi est fidei adificatio.* Eadem aut similia Gregorius, alijque Patres passim. Et reuerà difficilis est imaginatio, quomodo corpus vnum cum naturali partium extensione per alterius soliditatem, ad modum spiritûs se transfundat. *In 4. d. 44. Serm. 149.*

Respondent tamen vulgò, distinctorum corporum penetrationem, non tamen partium eiusdem corporis, naturaliter esse impossibilem. Quasi dicas, aër aquam penetrare nequit, aëris tamen partes se penetrant, si frigore condensentur.

Verùm tam leui & paratæ responsioni numquam potui firmiter acquiescere.

Cur enim continuitas illa, siue vnio integralis partium continui tantas vires habet, vt claustra naturæ quodammodò aperiatur, & partes intra mutuum situm admittat, quæ inter se discontinuatæ pertinacissimè ab eodem loco se repellunt? Quid si illa vnio (quæ sententia Nominalium est, & valdè probabilis) nihil reale extremis suis superaddat?

Sed vnio ista, inquiunt, non propriâ aliquâ virtute, sed Dei manu id facit, qui occasione vnionis partium, vnâ partem aliam ingredi permittit, non facturâ aliâs, si non essent per vnionem colligatæ.

Verùm legem istam diuinam nullâ reuelatione, aut firmâ ratione probant.

M

Nam

Nam inprimis, si experientiam attendimus, veluti aëris partes condensatione videntur se aliquousque penetrare; ita vapor aëri permixtus, qui contiguitatem solum, non continuitatem cum eo habet, pari omnino modo in eandem cum ipso massam, & in spatium angustius, viribus condensationis compingitur, nec secus vapor aërem, & aër vaporem, quam aër aërem, vapor vaporem apparere ingredi. Igitur, si quod ducere nos videtur experientia condensationis, sequi volumus, non solum eiusdem, sed etiam diuerforum corporum partes naturaliter se penetrare valebunt; vt cum in eundem virem, aërem nostrum tot exhalationibus & vaporibus impurum inferimus.

Deinde, Partes eiusdem corporis continuæ, quantum experimur, pari contumaciâ, atque corpora discontinua, sibi inuicem resistunt, & ab eodem situ depellunt.

Tertiò, Non solum penetrationem distinctorum corporum, sed etiam partium eiusdem (vt accidit membris Christi Domini in mysterio Eucharistiæ se penetrantibus) in ingenti & supernaturali miraculo ponunt SS. Patres & omnes Theologi: igitur non facile in quavis condensatione admittenda talis partium penetratio.

Sed aliquot solummodò, non omnium (sicut in illo mysterio) partium in condensatione fit penetratio, inquirunt; ideoque vnum est miraculum supra naturam, & rarum, alterum verò res naturæ, & cottidiana.

At facile est eos ex hac fugâ retrahere.

Si enim tot puncta auri, quot sunt in grano vno milij, se penetrant in auro, quod tantò densius est, quam milium; cur non omnia etiam milij puncta redigi poterunt ad puncti spatium? Quòd enim puncta auri habeant continuitatem cum aliis auri punctis, non adiuvat penetrandi facilitatem, vt paullo antè diximus; sicuti nec eam impedit discontinuitas, quâ granum vnum milij circumcisum est & separatum ab aliis. Tota igitur milij quantitas compelli poterit naturaliter in suum centrum, & in puncto spatij colligi; atque ita per vires agentis naturalis illi corpori fiet, quod Christi Domini in Eucharistiâ: quod profectò durissimum est, & omnino reiiciendum.

Idem aliâ viâ confici potest. Abradatur enim fortè ramentum punctuale auri, in quo puncta auri fortassis mille se penetrant: ecce iam totum factum est, quod antè auri erat pars, & integrum corpus, sine vllâ partium extensione locali, nactus sumus.

Deinde,

Deinde, si punctum vnum intra spatium suum, recipit primum alterum, & secundum, & tertium; cur non etiam centesimum, millesimum, & omnia vniuersim integri alicuius corporis puncta admittit? reuera enim vna, aut par omnium est ratio. Vnde, veluti Cap. præcedenti ex multis paruis inanitatibus grande vacuum posse inferri ostendimus; ita hîc ex paucorum punctorum penetratione, omnium totius corporis penetrationem conficere possumus. Illa etiam extractio punctorum extra mutuos situs, in quâ rarefactionem consistere existimant, sine transitu quantitatium per mutua spatia fieri nequit: & quantulum verò hoc à miraculo Christi distat, quo per clausas fores ineffabili modo ad discipulos penetrauit?

Denique penetrationem istam partium simili argumento, quo Seneca permixtas corporibus raris vacuitates, refellere possumus. *Aërem, inquit, quidam ex distantibus corpusculis, ut puluerem struunt* Lib. 2. c. 6. *(Epicuræi videlicet) plurimumq; à vero recedunt. numquam enim* Natur. *contexti nisi per unitatem* (continuitatem, aut immediatam contiguitatem) *corporis nixus est, cum partes consentire ad intensiorem debeant, & conferre vires. aer autem, si in atomos diuiditur, sparsus est: teneri verò dissecta non possunt.*

Quemadmodum, inquam, ex condensatione & intensiōe aëris, quâ partes eius in vtre inflato se inuicem premunt, & resiliunt si relaxetur locus, demonstrat atomos illas nullis intercisis esse inanitatibus, quibus arceantur à mutuo immediato contactu; ita eodem exemplo aduersus penetrationem vti possumus. Si enim partes aëris in condensatione se penetrât, non premunt se, nec resiliunt laxato obice, cum refultus fiat metu penetrationis, cuius periculum in illâ partium compressione natura quodammodò formidat. non enim tanto impetu penetrationem reiiceret, quam iam admisisset: quod manifestè in corporibus densis & simul duris (vt in metallis) apparet. Ibi enim, etsi partes plurimæ, eorum opinione, se penetrarent, non conantur à mutuâ penetratione resilire tamen, sed sine nisu in eâ conquiescunt; idque idèò, quòd non cum periculo aliquo penetrationis se premant.

Sic igitur partibus aëris etiam eueniet, si quis in inflato vtre bina semper proxima puncta aëris in eodem puncto imaginario sic contineat, vt tertium punctum in idem spatium punctuale compingere, & duobus aliis aggregare non contendat. Hac enim ratione pars vna aëris reuera alteram non premet, nec causam

sam habent, cur perforato vtre, tanto impetu foràs se explodant.

Scio quam responsionem parent. nempe, penetrationem illam partium esse contra aëris naturam, ideoque à formâ eius substantiali illicò, tamquam noxiam repelli, vbi licuit per effractus carceres & sublatum impedimentum. Nónne enim aqua, inquit, contra naturæ inclinationem calefacta, expellit, quantum potest, calorem simul atque remota fuerit à contrario agente? Sic igitur forma aëris, sublato obice, rapit illicò occasionem, penetrationem illam partium dissoluendi, & refundendi se motu locali in naturalem suam raritatem.

Primâ fronte satis probabili hæc statim occurrunt; sed tentemus laruam.

Nam inprimis forma aëris resultum partium, & rarefactionem illam tamquam naturalem, non efficit; cum vaporis, aut exhalationis partes compressæ, eodem modo & impetu, quo partes aëris, resiliant: & tamen forma aquæ in vapore, & forma terræ in exhalatione non raritatem illam aëream, sed aqueam, aut terream densitatem potius expetant. Si igitur venti aut exhalationis resultus, actio naturalis resultantis non est, magno sanè argumento tantumdem existimare debemus de resultu tali partium aëris. Effectus enim tam vndique similes, similè in vtroque corpore, aëre, inquam, & exhalatione videntur habere causam. sed in exhalatione compressâ nō fit resultus à formâ terræ; igitur nec in aëre à formâ aëris, sed alia causa est vtrique communis, quam alibi diffusè explicamus.

Tandem igitur huc, ut video, delabentur, ut dicant à quantitate fieri hunc resultum, quia penetratio est contra naturam partium quantitatis. Sed veluti tamen calor, inquit, in aquam contra aquæ naturalem inclinationem, virtute agentis naturalis (id est, sine miraculo supernaturali) induci potest; ita penetrationem partium quantitatis, contra propriam inclinationem & renisum causâ condensans, citra miraculum efficere valet. Vbi tamen impedimentum, quod partes intra idem spatium cum penetratione mutuâ continebat, semotum fuerit, abiciunt illæ, & in naturalem libertatem se expediunt; quemadmodum aqua calorem ignis coacta accipere, eum absente igne illicò contrario frigore pugnat excutere, quantum maximè valet.

Sic olim, fateor, Epicuro paulò pronior, etiam responsabam, & nihildum video, quid in hac sententiâ possit probabilius. Iam non probo tamen, imò omnino displicet.

Sic

Sic enim materiæ primæ quantitas, imò materia ipsa prima (cuius proprietas naturalis, est quantitas, aut certè etiam, quæ fortè eadem est cum suâ quantitate) sub omnium animalium, plantarum, lapidum, metallorum, & omnium vniuersim corporum naturalium formis (vno fortassis igne rarissimo excepto) contra naturam suam consisteret. omnes enim illæ formæ aliquam in materiâ suâ densitatem flagitant, quæ si sine partium, quam ita materiæ quantitas refugit, penetratione haberi non potest, formis benè esse nequit, nisi quantitati & materiæ malè sit. Id est, natura hæc rerum à conditore pessimè constituta est, cùm vniuersorum corporum materia ad formarum susceptionem naturaliter ordinetur, quas tamen non potest naturaliter, & sine naturalis proprietatis iacturâ, suscipere. Incredibile etiam est, materiæ primæ melius & connaturalius esse sub formâ ignis (si hæc fortè maximam sine vllâ densitate raritatem postulauerit) quàm sub formâ auri, aut etiam hominis, eò quòd illam sine naturalis impenetrabilitatis dispendio, has cum penetratione partium, necessariâ (vti credunt) ad densitatem recipiat. Vnde cùm homines, cæli, & elementa in æternum duratura sint, materia prima sub eorum formis in statu violento & contra naturam per totam æternitatem erit. Igitur longè sapientius videtur facturus fuisse conditor, si materiam talem creauerit, quæ sicuti omnes formas sine discrimine appetit; ita naturales proprietates eiusmodi habeat, quas sub omnibus retinere possit. aliàs enim non omnes indifferenter appeteret, sed magis eas quæ ei permittunt seruire partem extra partem, id est, quæ nullam, aut minorem densitatem flagitant. Et hinc etiam frigus & dispositiones quæ densitatem cum illâ penetratione inducerent, abhorreret, amaret verò solum calorem & quæ raritatem efficerent: cùm tamen perinde atque calore rarefieri, ita frigore sinat se condensari, nec maiorem inclinationem in calorem & raritatem, quàm in frigus & densitatem ostendat. Nam aliàs materia sub formâ aquæ conaretur à densitate se expedire, & in aëream aut igneâ raritatem se dissoluere: nec eam mollis & fluxa aquæ (quæ tam paruo igne funditur & liquecit) conditio impedire valeret. Imò si perpendimus vires quibus materia accensi pulueris se rarefacit, & penetrationem partium (vt volunt) abrumpit; etiam metallorum durities non tam dura & fortia vincula materiæ suæ iniiciet, quin ipsa tali impetu & conatu, quo se distendere pugnat, faciliè diffringere possit: & sic breuì terram, lapides, metalla, homines ipsos, instar pul-

ueris pyrij, in igneam raritatem dissilire & dissolui, id est maximas nugas, videbimus.

Concludo igitur, nullam in densitate partium esse penetrationem, neque materiam auri, & ceterorum metallorum, quantumvis fuerit densa, conatum vllum adhibere, vt partes extra mutuum situm, & densitatis nodos expediat, cum nullæ eius partes in eodem sint situ, & tam patienter densitatem, quàm raritatem earum toleret. Video tamen adhuc aduersarios breui hac fugâ posse elabi. Dicent, inquam, materiam sine vlllo renifu parti densitatem & penetrationem partium, si ea per alterationem aliquam (exempli gratiâ frigesactionem) fiat, non autem si per merum localem motum. Hi ne ergo tam cõtumaciter in follem lusorium iam vento rumentem alius aër inspirari & inferciri potest, quia videlicet mero motu locali condensationem, quam partes materiæ aëris refugiunt, hîc fieri oportet: vbi verò materia frigore condensatur, obediunt illicò sine renifu partes, & spontaneâ penetratione confluunt in idem spatium.

Verumtamen ex hac etiam fugâ facilè reprehendi possunt. Nam perinde hoc est, ac si dicas, calorem productum ab igne, non tamen productum à sole, esse contrarium aquæ: quod nemo non videt, quàm absurdum sit. Quid enim refert à quâ causâ qualitas illa efficiatur, cum tota species sit noxia tali subiecto? Igitur si partibus materiæ impenetrabilitas, & situum distinctio est connaturalis, penetratio & confusio sitûs est contra naturam, & eam abhorrebunt, à quacumque causâ efficiente proveniat. vnde partes aëris non tantum sibi inuicem resistent, cum intra follem syringe & mero locali motu, sed etiam quando frigore hiemis condensabuntur, & à se resilire summis viribus connitentur. Hoc tamen pugnat cum experientiâ: nam si partes aëris frigusculo aliquo contracti tanto conatu se rarefacere niterentur, facilè causam illam condensantem vincerent; quandoquidem motus localis haud difficulter eam vincat, cum videlicet aër flagello diuerberatus, non obstante frigore rarefcit.

Stet igitur fixum, nullam in condensatione, partium penetrationem accidere, sed eam tam esse materiæ detestabilem, vt ipsam omnino, & à quacumque causâ, siue ab alteratione, siue à solo motu locali veniat, naturaliter excludat, nec nisi manu fortiori & diuinâ ac per ingens miraculum posse induci.

## CAPVT XXX.

*Nec condensatio explicari potest per diminutionem replicationis, quâ singula puncta replicata esse aiunt in corpore raro.*

**T**Andem postquam vacuitas, aut penetratio partium quantitatis non sat feliciter ad condensanda corpora Epicureis successit, quidam eò prolapsi sunt, vt affirmant, per rarefactionem puncta materiæ replicari, & vnumquodque duas trêse, aut centum præsentias occupare: cùm verò corpus per condensationem contrahitur, carpi & minui singulorum præsentias opinantur, donec ad vnicam veniant: quo facto si inter puncta nihil alterius corporis interiectum sit, sed inuicem proximè continentur, maxima in eo corpore futura est densitas, quæ naturaliter & sine partium penetratione, esse potest.

Sed vara sequitur vibiam, vt cascì illi loquebantur. Tam enim reuerà hæc fuga improbabilis & absurda, aut magis, quàm si fieret per vacuum aut partium penetrationem.

Primò, Quia si in rarefactione omnia puncta replicantur, igitur totum corpus est in diuersis locis: quod quale hoc sit, patet ex Capite xvii.

Secundò, Rarefactio plerumque non fiet sine penetratione plurimarum partium quantitatis, quam tamen illi Philosophi conantur per replicationem istam euitare. Nam certum est calore ignis partes aquæ in orbem vndique ( nisi à corpore continente prohibeantur) rarefcere; igitur duo proxima puncta versus se mutuo rarefcunt, & in mutua spatia se penetrabunt.

Tertiò, Actio per rarefactionem agentis non relanguescet & remittetur, sed robur ac intensiorem accipiet; quod experimento constat esse falsum. Nam punctum vnum caloris in igne, cum puncto materiæ cui inhæret, replicatum, viribus agendi, pluribus punctis caloris æquiualeat. Vnde non aliter vis agendi augebitur, quàm si totidem alia puncta caloris, in pari densitate prioribus punctis sine rarefactione adderentur. imò puncta illa per rarefactionem ampliores vires, quàm per additionem nouorum, acquirerent; quia plurima replicando se in orbem, sese, vt statim diximus, penetrant, & ad agendum magis & pressius, penetratione istâ, adiuvant. Hinc etiam agentis rarefacti sphaera actiuitatis ampliabitur; cùm  
tamen.

tamen experientia clamet, carbonem vivum, quàm tenuem & rarissimam aquæ vitæ flammam, longius & acriorem spargere actionem.

Quartò, Experimur per rarefactionem corporis colores discingi ac remitti, aut etiam quandoque in alium colorem dilui, quia opacitas densitatis sæpè comes, vnà cum densitate minuitur: id autem numquam eueniet, si rarefactio fiat per punctorum replicationem. singulorum enim punctorum præsentia tam compressè spatium maius post rarefactionem implent, quàm præsentia pauciores ante rarefactionem spatium minus occupabant. Vnde etiam colores rarefactione, seu replicatione subiecti magis incitabuntur, & longius radios iaculabuntur, quàm si singula puncta per condensationem ad vnicam præsentiam rediissent.

Quintò, Quispiam vinum igne rarefactum, aut calidam aliam forbitionem hauriat: ecce duo, triæve fortasse puncta scutellam eius & ventriculum replebunt, quæ vbi ad vnicam præsentiam condensatione redacta fuerint, sacrum istum egregie delusum inanitate solâ pascunt, nec eiusmodi ex cibo tam plenam corpus alituram inueniet, quàm experimur.

Sextò, Scoti, & probabilis Philosophia est: si res alibi replicata interimatur, hic, & vbi cumque erit, interituram; quia substantia rei verè destructa trahit secum omnia accidètia, & præsentias vbi cumque fuerint, in interitum. extinguatur ergo punctus caloris in extremo igne, ecce per totum spatium, quod etiam in profundo ignis occupat, interibit, & magna pars ignis videbitur extingui.

Alia huc vndique cumulare possem, sed quid opus? Quis vniquam Theologus dixit membra Christi Domini in Eucharistiâ, aut alterius hominis replicati, rarefieri? Plerique omnes vbi quærent, quomodo ex tantillâ costâ Adami materiâ mulier iustæ plenitudinis formari potuerit, tres afferunt modos. Primus per rarefactionem costæ: alter per multiplicationem costæ in se, id est, per replicationem, vt iam loquimur: tertius, per alterius materiæ additionem. Magister secundum modum est amplexus, & ei consentiens Gabriel, *Quando modica materia, ait, sine sui multiplicatione* (replicatione) *multum extenderetur, tunc induceret varietatem: sed in formatione corporis Eva materia costâ in seipsâ multiplicata est, & per hoc corpus Eva non caruit debitâ densitate.* Non accredo ei, corpus Eux ex solâ costâ replicatâ esse contextum; hoc tamen censuit verissimè, corpus aliquod, & omnia eius membra in suâ densitate,



fitate, ac sine vllâ omnino rarefactione posse replicari. Igitur longissimè distat rarefactio à replicatione.

Finio itaque, & repeto quod Cap. xxvi. dixi, tribus solùm viis, per vacuitatem, penetrationem vel replicationem partium corporis, propriam condensationem & rarefactionem explicare possunt Epicurei: sed omnes, vt ostendimus, improbables sunt, & in aperta absurda deducunt; igitur ex istis semitis in publicam & Aristotelis viam est redeundum. quam antequam tamen explicemus, circumspiciendum, an nulla alia supersit; siue, an deserto Epicuro, necessarium ad Aristotelem sit transeundum.

## CAPV T XXXI.

*Frustrâ quidam conati inter Aristotelem & Epicurum mediij incedere, negando vllas esse in continuo partes, aut asserendo infinitas, sed indivisibiles.*

**Q**uidam nuper admirabili inuento litem hanc inter Aristotelem & Epicurum non composuerunt, sed abruperunt. Nec finitæ, nec infinitæ, inquiunt, in continuo partes, sed nullæ omnino sunt. Continuum enim, aiunt, est tale ens vnde excindi partes possunt, sed in quo tamen, priusquam excindas, non continentur. Sic ferè gallinis nostris oua excidunt: in exitu enim formantur, ventrem si aperias, omnia informia, & necdum oua reperiuntur.

Sed in continuo tamen profectò res habet aliter: in quo nisi partes formatæ & formaliter continentur, non magis inde eximi poterunt, quàm pecunia ex crumenâ inani.

Itaque non improbabilis tantùm, sed ridicula mihi videtur hæc imaginatio. Non enim primulùm fit & producitur, instar oui, linea pedalis cùm ex bipedali excinditur, sed soluitur solùm vnio integralis, quâ suæ comparti alligabatur. Igitur hac viâ non possunt mediij inter Aristotelem & Epicurum diu incedere, sed statim in mediam rixam retrahentur, si quæras, an ea (siue partes, siue quocumque alio nomine placet appellare) quæ lineâ bipedali excinduntur, multitudine finita aut infinita sint. Nam solùm potest de modo loquendi esse controuersia, an quamdiu in toto sunt, partes vocari debeant. ipsi videntur negare, ego affirmo; imò numquam aliàs partes posse appellari, quandoquidem ratio fundandi relatio-

N  
nem

nem partis, sit vnio cum toto, quam perdunt illicò vbi à toto reuelluntur.

Alia tamen via est quæ media inter Aristotelem & Epicurum tendit, & ab vtroque aliquid accipit: nam partes continui indiuisibiles cum Epicuro statuit, sed earum infinitudinem ab Aristotele capit.

In 1. d. 2.  
q. 1.

Hæc sententia Leucippi & Democriti fortasse, vt Cap. III. coniectabam, olim fuit, quam dudum intermortuam Ioannes Maior, è scholâ Nominalium Scriptor non ignobilis, à centum iam circiter annis rursus excitauit.

In 2. d. 2.  
q. 2.

Huius tamen ante eum opinionis meminit Gregorius Ariminensis, & refellit: quia magnitudo ex puris punctis se proximè sequentibus infinitis composita, *esset infinita secundum extensionem: quod de factò suppono esse falsum. Consequentia patet: nam haberet in se partes inuicem aequales secundum magnitudinem, infinitas multitudine (utpote infinitas partes, quarum qualibet esset ex quatuor indiuisibilibus, vel decem indiuisibilibus constituta: ) quoniam in infinita multitudine indiuisibilium essent infiniti quaternarij, & quilibet quaternarius esset cuiuslibet alijs quaternario aequalis magnitudinis.* Quæ ratio, si benè perpendatur, est sanè optima. Nec militat (quod quis fortè existimare possit) contra sententiam Aristotelis: quia etsi partes infinitas, & fortassis indiuisibilia continuantia infinita continuo inferciat, nullas tamen extensiones inter se æquales, numero infinitas admittit.

Ex sententiâ etiam Maioris sequitur, quodlibet tempus, infinitorum momentorum perpetuum agmen esse, ac proinde numquam posse totum elabi, continebit quippe partes quatuor aut decem momentorum se proximè sequentium æquales infinitas, quæ non magis omnes successiue, quàm infiniti dies, elabi possunt.

Argumentum præcipuum Maioris condendi talem magnitudinem & tempus, fuit, quòd non intelligeret, quomodo punctum globi, aut angelus ad spatium puncti reductus, continuò per lineam moueri posset, nisi perpetuam punctorum seriem numerando, & ab vno immediatè ad alterum, sine alius partis interiectione, transeundo.

Verùm hanc charybdim vitando Maior in aliam incidit scyllam: nempe, vt nullum diuisibile spatium à quouis mobili vniquam possit pertransiri, & vt nullum diuisibile tempus valeat vniquam totum effluere; cùm tam spatium, quàm tempus partibus

tibus æqualibus constet infinitis, vt egregiè Gregorius statim demonstrauit.

Præter alia etiam, quæ faciliè cogitari possunt, Maiorem confutat axioma illud Aristotelis: *Indiuifibile immediatè additum indiuifibili, diuifibile facere nequit*: quod quàm verum fit, Cap. xxv. ostendimus.

Item, si ratio quàm Aristoteles à grauitate corporum accipit, aliquid in Epicurum valet, iisdem viribus contra Maiorem pugnabit. Lib. 3. c. 1.  
Cali.

Si corpus, inquit, constituitur ex atomis, grauitatem nullam habere poterit. nam eam à partibus suis accipere debet, atomi verò siue puncta sunt expertia grauitatis.

Si autem primum punctum grauitate caret, secundum etiam, & tertium, & centesimum eadem ratione carebit; atque ita tota magnitudo ex iis conflata necessariò grauitatis experta erit.

Hoc tamen telum (etsi à magnâ, & Aristotelis manu, nec spernendum) in superioribus neglexi, quia videbam non magno nisu ab aduersariis posse eludi.

Merito igitur Ioannes Maior cum fluctu, & *gratiâ*, inquit, *scholastica disputationis* opinionem istam asseruit, & disputationem finiens, *valeat*, ait, *hoc paradoxon, quantum valere potest*. Quæ verò ibi in Aristotelem iacit, infra cum ceteris reuellemus.

## C A P V T   X X X I I.

*Verius, nulla in continuo reperiri positiua indiuifibilia præter partes in infinitum diuiduas.*

**H**Atenus partes continui indiuifibiles finitas, aut infinitas oppugnauiamus, & si expugnauiamus, ad Aristotelem (quod solum superest) redire Democriticos & Epicureos perpulimus. Posthac tamen de tutando etiam Aristotele, quem aduersarij non impigre profectò assiliunt, sollicitos nos esse oportebit. Primum tamen dispiciamus, an præter partes proportionales infinitas, etiam infinita indiuifibilia continuantia partibus interfereere debeamus.

Si quis Philosophos Peripateticos, si quis Mathematicos puncta, lineas, superficies suas vbique concrepantes audiat, non dubitabit, præter partes, continuo terminos quosdam alios positiuos in-

terspergere. Si tamen non paucos eorum interroges, quid termini illi sint, respondebunt, nil reale, sed negationes solum quasdam ulterioris extensionis: linguam tamen se conformare menti, & tamquam de rebus positiuis loqui, quia sic solent concipi à nobis. Nam ecce Aristoteles, qui in Logicâ & Metaphysicâ lineam & superficiem inter species quantitatis recenset, qui *στιγμήν γραμμῆς κοινὸν ὅσον πῶς διὰ τὰ μέρη αὐτῆς συνάπτει, punctum linea communem terminum esse, quo partes eius inter se copulantur*, asserit; alibi tamen ait, *ἡ στίγμη, καὶ πᾶσα διαίρεσις, καὶ τὸ ἕτερος ἀδιαίρετον, δηλῆται, ὡς περ ἡ εἰρησις, punctum, & omnis diuisio, & eo modo indiuisibile* (linea, & superficies quæ quatenus terminum, etiam indiuisibiles sunt), *manifestatur, ut priuatio*. quod exponens Themistius Hermolai, *Intellectus*, inquit, *cognoscit illa definitâ, non priuato adortu, aut directo in ea incubitu* (quia nullam formam à se obinens cui possit incumbere) *sed sequens, & praevidendo dimensum & magnitudinem*. Vbi formam, siue, ut opinor, essentiam positiuam indiuisibilibus istis negat, cui possit intellectus incumbere. Et addit Aristoteles ea ab intellectu cognosci, *πῶς τὸ κακὸν, ἢ τὸ μέλαν, καὶ τὰ ἐναντία, quomodo malum, aut nigrum, ac per suum contrarium*. malum verò priuationem significat, & de nigro (quidquid alij tot hodie repugnent) multis alibi argumentis ostendimus.

Scio tamen hæc Philosophi verba aliorum posse & solere detorqueri: sed utcumque ista se habeant, numquam quæ alibi de puncti immobilitate disserit, ab errore grandi liberabunt, nisi essentiam puncti in negatione quadam constituent. Eamdem existimo fuisse Commentatoris mentem, dum ait: *Secundum considerationem Geometrarum, superficies & sphaera possunt se contingere super punctum; sed cum fuerint in corpore naturali, non possunt se tangere, nisi super partem diuisibilem*. Imaginantur, opinor, vult dicere, Geometrarum punctum aliquod in circumferentiâ sphaeræ suæ, à materiâ sensibili abstractæ in quo tangatur ab ea planum; cum tamē si consideretur, ut reuerà in corpore naturali tactus illæ exercetur, potius fiat in parte diuisibili, eâ ratione quæ infrâ à nobis explicabitur.

Idem Platonis sensus, ex cuius disciplinâ M. Varro apud Ciceronem ait, *Nihil omnino in rerum naturâ esse minimum, quod diuidi nequeat. Quæ autem moueantur, omnia interuallis moueri, quæ interualla item infinite diuidi possint*. D. Nazianzenus etiam in eadem sententiam deduci potest. Πολλὰ Εὐκλείδης ἐμμήσαιο ταῦτα, γραμμαῖς ἐμφιλοσοφῶν ταῖς ἡ ἐστὶς, & καμῶν ἐν ταῖς ἀποδείξεσι; *Et quis*

Categor.  
Quant.

Lib. 3. c. 6.  
Animæ.

Lib. 3. c. 44.  
Animæ.

Lib. 6. c. 10.  
Physic.

Lib. 1. c. 4.  
Cæli.

Lib. 1. Acad.  
dem.

Orat. 34.

*Ecquis Euclides, inquit, hac imitatione expresserit, de lineis philosophans nusquam extantibus, & anxie desudans in demonstrationibus?* Ecce lineas (& idem de ceteris indiuisibilibus iudicium) nusquam affirmat extare. Fauet quoque nonnumquam (etsi alibi videtur aliter) D. Augustinus. *Umquamne, ait, oculis istis corporeis, vel tale punctum, vel talem lineam, vel talem latitudinem vidisti?* R. *Omnino numquam. non enim sunt ista corporea.* Ac deinde colligit, animum nostrum esse incorporeum, quo cernuntur illa incorporea. quæ collectio nulla, aut valdè imbecillis erit, si indiuisibilia ista, entia realia positiua sint: sic enim materialia, & reuerà corporea futura sunt, id est, dependentia à subiecto corporali. Negationes verò, sicuti propriè non sunt, ita neque propriè corporeæ (etiã si in corpore à nobis cogitentur) dici debent; neque aliã potentiã cognitiuã, quàm intellectu spiritali; cognosci possunt. Alius tamen, fateor, verborum Augustini sensus esse potest, cuius in fine Capituli huius mentionem habes.

Lib. de  
Quantit.  
Anim. c. 11.

In eadem sententiã Iul. Scaligerum primulùm iam video. Ipse enim aduersus Cardanum, *Naturalis superficies, inquit, pati potest diuisionem, Mathematica non: est enim imaginaria, ex quã corpus nullum constituitur.* Et infra probat, ex indiuisibilium superficialium coitione non componi corpus, quia *nihil ex priuatione aut ex negatione, tamquam ex materiã, consieri potest.* Et tamen hic est, opinio-nũ Aristotelis tam pertinax ille Scaliger, vt de eo alibi Franc. Patricius: *Scaliger vir fuit sanè acutus, sed qui pro Aristotele contra manifestam veritatem etiam peierare lubens sustinuerit.*

Exercit. 65.

Hæc omnium passim Nominalium etiam opinio est; nec aliter, vt opinor, Euclides, & plerique Mathematicorum, si interrogen-tur, censeant. nam reuerà figuræ & Mathemata eorum punctis, lineis, superficiebus positiuis realibus non magis indigent, quàm Logici chimæris & hippocentauris quadrupedibus, quibus tam multa vera explicant. Hæc sententia mihi quoque olim allubuit; quòd cernerem per eam multa, quæ in Aristotelem iaciuntur, in irritum cadere. Et ecce etiam dum hæc scriptito, commodum incido in libros Reuerèdissimi D. Paulli Aresij Episcopi Derthonen-sis, qui inter cetera quæ in Aristotelem de Generatione eruditissi-mè commentatur, etiam indiuisibilia ista positiua egregiè conuel-lit; etsi non omnia placeant, & quædam videam quæ in partes infi-nitas Aristotelis faciliè possint retorqueri.

Nota verò, indiuisibilia in continuo duplicis generis esse: quæ-

In 1. d. 1.  
9. 4.

dam enim terminant, alia continuant & copulant partes continui. Indivisibilia terminantia reiicit Durandus, quia inutilia sunt; quandoquidem linea sine finiente puncto, superficies sine lineâ, corpus sine superficie, habitura nihilominus sint aliquem finem ultra quem non excurrant. *Fatum enim est*, inquit, *imaginari, quod nisi essent puncta terminantia lineam, linea ex utraque parte efflueret in infinitum*. Non enim puncta continent utrimque lineæ fluxum, quemadmodum Hollandiæ aggeres frementem & erupturum Oceani impetum, aut veluti epistomium vas obstruit, ne effundat suum vinum.

Suar. to. 2.  
d. 40. sect. 5.  
Metaph.

Verumtamen, nisi finis lineæ sigilletur puncto positivo, tantummodò erit negatiuè terminata, inquirunt; cum tamen positivam terminationem *secundum connaturalem modum essendi requirat: licet tamen repugnantia* (addunt) *non videatur tam clara, quin probabiliter dici possit, conservari posse à Deo lineam sine puncto terminantem*. Sed vnde connaturalis iste essendi modus colligitur? *Quia alias*, inquirunt, *corpus carens intrinseco termino non esset aptum ad physicum contactum cum aliis corporibus, neque ad figuram, & alia similia accidentia*.

Sed responsio est in promptu, quam paullisper tamen differo. Nunc verò breuiter necessitas illa terminorum positivorum enervatur: quia qualitates materiales eodem modo secundum intentionem & extensionem, quo quantitates, componuntur: sed qualitates terminis positivis naturaliter carere possunt; igitur & quantitates poterunt. Antecedens patet in qualitatibus repugnantibus. nam si summus calor termino suo positivo occupaverit punctum lineæ, aut quemcumque quantitatis terminum, ab isto termino quantitatis arcebit positivum terminum contrarij frigoris, ut ipsi etiam adfatentur: vnde frigus solum negatiuè, per negationem vterioris extensionis erit terminatum.

Eodem modo, si vestis aliqua sit bicolor, linea panni quæ est in confinio utriusque coloris, non potest rubedinis, exempli gratiâ, & viredinis positivos terminos recipere, cum repugnantium formarum termini etiam repugnent: igitur alter, aut uterque color sine termino positivo erit ab illâ parte. Non est verò potior unus quàm alterius ratio; ubi præsertim agentia quæ utrumque contrarium producant, simul & viribus æqualibus agere incipiunt. Cur enim eo casu unum contrarium potius, quàm alterum, positivum quantitatis terminum in medio utriusque positum occupet?

Si qua-

Si qualitas autem positiuè interminata esse potest, nihil omnino bonæ causæ est (quidquid alij causificentur) cur quantitas etiam esse non possit. Nam & color vnus talis alterum tangit, & figuram suam habet, etsi terminum positium non habeat.

Deinde, cui bono vsui superficies illa conuexa globum instar membranæ inuoluens? an periculum est, ne corpus globi sine eâ, vt vinum rupto vtre, effundatur?

Non, sed quia figuram sine eâ recipere non potest, inquit. Sed exspoliet Deus globum superficie, & partes in eodem situ contineat, creduntne non habituras figuram, & eandem omnino quidem, quam, cum superficie inuoluerentur? Figura enim à situ partium extremarum in nullo distinguitur, siue illæ termino positio, siue solùm negatio ambientur. Nam detur nobis globus, cuius vnum hemisphærium, tam in conuexo quàm in profundo, sit album, & alterum nigrum, horizon siue superficies media quæ album à nigro separat, neutrius, aut saltem alterius tantum coloris, vt antè dicebamus, terminum positium recipiet. Recipiat igitur nigredinis: ecce iam à parte illâ planâ hemisphærij, siue dimidij globi, albedo nullo termino suo positio finitur, & tamen propriam figuram ex eâ etiam parte habet, à quantitatis figurâ diuersam, & quam referuare potest, si Deus albedinem sustineat extra omnem quantitatem & subiectum. Quomodo etiam globus sine tali superficie tangere planum, aut quodcumque aliud contiguum, possit, mox Cap. xxxiv. ostendetur.

Quàm etiam fallatur Gabr. Vasquez, dum ait, *de superficie* Tom. 2. 1. p. d. 191. c. 2. In 2. d. 2. *extremâ cuiusque corporis hactenus neminem dubitasse, dicet ei Durandus: Sicut punctus dicitur terminus lineæ, ita lineæ superficiei, & superficies corporis. & tunc in corpore rotundo esset imaginanda superficies indiuisibilis quoad profunditatem, differens realiter à corpore, & inuoluens ipsum tamquam terminus extrinsecus: quod est absurdum.*

Ecce puncta, & lineas positivas refellit, quia eadem operâ superficies in globo admittenda esset, quod tam euidenter absurdum reputat, vt sine probatione id affirmet. Sed Fonseca, & recentiores quidam Vasquium, opinor, fefellerunt, qui punctis, & lineis reiectis, extremas solùm corporum superficies retinent. Aliàs Nominales superficiem cum omnibus vniuersim terminis posituis à corpore rescant. Audite inter eos facilè subtilissimum. Dico,

*quod nulla entitas extra animam est in magnitudine simpliciter indiuisibi-* Greg. Arimin. in 2. d. 2. q. 2. a. 1.

*uisibilis, qualem existimant punctum; nec aliqua diuisibilis tantum secundum vnā dimensionem, qualem dicunt esse lineam; nec aliqua diuisibilis tantum secundum duas, qualem opinantur esse superficiem.*

Indiuisibilibium continuantium inutilitas etiam facile ostenditur. Cur enim non possunt partes lineæ proximè vniri sine puncto, partes superficiei sine lineâ, partes corporis sine superficiei interiectâ? Nam sicuti punctum lineam terminans Deus auferre potest, auferat etiam continuans: cur partes lineæ in eodem situ permanentes (id est, immediatæ, & nullo spatio imaginario vel minimo interhiante) nequeunt integraliter copulari? anima & corpus proximè sine tali indiuisibili intercopulante, vniuntur: cur duæ partes lineæ minùs possint?

Quia proxima extrema vnionis penetrare se debent, inquirunt, pars autem lineæ vna alteram non penetrat, et si penetret punctum. Verum, et si ad vnionem essentialē, & integram intensiuam necessaria fortasse sit extremorum penetratio, nulla est causa, cur eam etiam requiramus ad vnionem extensiuam; sufficere enim potest contiguitas, sine penetratione. Et vide, quid hic absurdi sequatur, si punctum penetret extremas lineæ partes, quas inter se committit. nempe, partes istæ videntur etiam inuicem se penetrare. nam quæcumque sunt in eodem situ cum aliquo tertio, sunt etiam inter se. Duæ igitur partes extremæ penetrantes punctum, etiam se penetrant: quod naturaliter est impossibile, siue penetratio in parte determinatâ, siue indeterminatâ fiat, modò fiat in parte.

Eodem etiam argumento omnia indiuisibilia terminantia reuelli possunt. nam si corpus locans & locatum extremis suis superficibus se penetrant, & superficies in eodem situ sint cum partibus corporeæ profunditatis quas terminant, igitur & istæ partes se penetrabunt, quandoquidem in eodem spatio cum superficibus se penetrantibus sint.

Vnde indiuisibilibium positiuorum Patroni reuerà videntur ipsa extra partium quas terminant situm imaginari: quasi superficies, instar membranæ cuiusdam tenuis quæ parumper extet, globum inuoluat, aut punctum articulus quidam sit, vel plumbatura, quæ partes lineæ ita ferruminentur, vt vtrique interiaceat, sitque extra vtriusque spatium.

Sed corrigenda est imaginatio. nam aliàs indiuisibile parti cui  
addi-



additur adderet etiam extensionem, & indiuisibile faceret magis diuisibile extensiuè; quod in scholâ Aristotelis omnino falsum.

Cogitemus igitur omnia lineæ puncta à Deo, manentibus partibus, destrui, lineæ hilo breuior non erit, quàm cum infinitis illis punctorum myriadibus esset interpuncta. Et hinc iterum magis patet eorum inutilitas. quòd, inquam, nullam lineæ extensionem addant, & aliàs ad officium terminandi, & copulandi, vt ostendimus, vsum nullum bonum habeant.

Sed impossibile est, ait Suarez, Deum vniuersa lineæ puncta, partibus saluis, destruere. cum enim omnis pars continui sit vlteriùs composita, necessariò puncta includit quibus partes eius copulantur. Sed frustra.

Fateor enim, si de vnione partium agatur, non possunt omnes vniones sic destrui, vt partes superstites permaneant; cur tamen non omnia puncta possint, nondum video. Partes enim sunt distinctæ ab omnibus punctis, si ipsæ considerentur præcisè compositæ ex vnione integrali, & partibus in vnionem proximè (sine interiectu puncti) conuenientibus. talis quippe vnio contradictionem nullam implicat. vnde licet supponeremus omnes partes proximè in punctum intermedium ad vnionem concurrere; posset tamen Deus omnibus punctis vniuersim abolitis, aliud vnionis genus partibus immediatè interiicere, & sic sine punctorum superfluis istis vinculis conseruare.

Quidni igitur iam potiùs id faciat? sufficiunt continuo partes proportionales infinitæ, quid opus punctorum, linearum, superficierum infinitudine ex superuacuo ipsum onerare? Omnibus enim rationibus, quibus puncta à lineis repelluntur, lineæ à superficiebus, & superficies à corporibus possunt.

Nequaquam, fortè tamen inquit: nam lineæ à puncto nullam accipit dimensionem, superficies verò à lineâ sumit suam longitudinem, & corpus à superficie latitudinem.

Sed ab imaginatione varâ & à vero detortâ hæc dicuntur. nullæ enim partes superficierum longæ sunt per longitudinem lineæ quæ inter ipsas interiicitur, sed propriam & sibi inhærentem dimensionem (quaquauersum per eam extendantur) habent. Sicuti enim à lineâ distinctæ sunt; ita proprium & peculiare Vbi, & extensionem tam in longum, quàm in latum obtinent. Quid igitur lineæ confert superficierum? inquires. Hoc solùm, vt terminata vtriusque, & intercopulata inter partes suas sit: non autem extendit

cam in ordine ad locum. id est, reuerà inutilis est, cùm partes terminari seipsis, & copulari satis valeant.

Negligere etiam non oportet hoc Reuerendissimi Aresij argumentum. *Sequeretur*, inquit, *tot esse puncta in circulo pedali, quos sunt in supremo calo: quod est absurdum. Probatur consequentia: Quia si ponatur circulus pedalis circa centrum mundi, cùm ex quolibet puncto calis deduci possint lineæ ad centrum, & qualibet lineæ debeas transire per punctum circuli pedalis diuersum, planè efficitur, ut nullum possit assignari punctum in calo, cui etiam respondens assignari non possit in circulo pedali. Hoc autem esse inconueniens satis per se constat.* Nam reuerà non possunt esse plura puncta in circello illo pedali, quàm sint in vnico segmento calis, pedalis etiam longitudinis. cùm igitur innumerabilia pænè sint in toto calis ambitu segmenta pedalia, puncta etiam in circulo cælesti, sine fine plura erunt, quàm in circello pedali. Itaque lineæ & puncta ista realia totam circulorum fabricam perturbare videntur. quod ne vltra faciant, expellantur & reicula sunt.

Lib. 1. d. 2.  
quæst. 23.  
sect. 4. Gen-  
nerat.

Nodos quosdam qui hic menti fortassis occurrunt, Caput VII. (reuisse) tibi dissoluet. ac hunc inter ceteros: Quomodo à quolibet puncto maioris circuli recta lineæ ad centrum, per circulum minorem possit trahi. quod de lineâ Physicâ, reapse verissimum, de imaginariâ etiam, ex imaginatione haud absurdâ Mathematicorum, suam etiam habet veritatem.

Omitto alia istorum indiuisibilium incommoda. vt, quòd per materiæ diuisionem infinita puncta, lineæ, & superficies substantiales continuantes pereant, & nouæ terminantes in partibus vtriusque resultent à materiâ per impetum & resultantiam naturalem, vt passim docent. Hæc enim difficilia creditu sunt, quia hoc est materiæ (quæ tamen ens est tam inefficax & otiosum) donare ferè creandi virtutem; cùm materiæ indiuisibilia substantiaalia propriè à nullo subiecto dependere ipsi fateantur, ac proinde nec per actionem verè educitiuam effici. Oportebit etiam infinitos terminos tempori, & omnibus qualitatibus corporeis, imò spiritalibus intensiuus inferere, id est, naturas rerum multis superuacuis prægrauare. Sic igitur censeo. Nihil est in toto continuo indiuisibile, sed quidquid ex eo sumperis, secundum omnem dimensionem diuidi potest, & reuerà est corpus.

Estne igitur longum sine longitudine, latum sine latitudine?  
inquires:

inques: nam longitudo est linea, latitudo superficies. Verum, si tollatur æquiuocatio, responsio est facilis. Si longitudo sit quantitas quædam aptitudinalis à parte rei in latum & profundum indiuisibilis, corpus sine eâ longum esse potest; quia in rerum naturâ talis quantitas reuerà est nulla; nec, si esset, conferret ei extensionem in longum, sed eam partes corporis à se habent.

Si longitudo autem sumatur pro extensione actuali in longum, sine illâ nequit corpus esse actu longum, sed eam non dat ei linea, vt statim dicebam, sed partes corporis à se immediatè habent, quod eam recipere possint. Instabis. non est longitudo actualis sine aptitudinali (actus enim supponit aptitudinem ad ipsum); igitur corpus non potest esse actu longum, nisi inuoluat lineam, quæ est longitudo aptitudinalis.

Resp. in longitudine aptitudinali iterum esse æquiuocationem.

Nam, vel est quantitas apta solum in longum, non in latum & profundum, extendi. & talis nulla necessaria corpori. Vel est quantitas apta in longum (non excludendo alias duas dimensiones) expandi. & cuiusmodi lineam corpus inuoluit: cum nihil sit aliud, quàm corporæ quantitas inadæquatè concepta, & prout vnius dimensionis capax esse potest, sine exclusione ceterarum. Et sic modum iam inuenimus retinendi tres species magnitudinis: Logicas, lineam, superficiem, & corpus, quas non re, sed ratione saltem (quod ad Logicam & prædicamenta sufficit) per conceptus inadæquatos distinguimus. Eadem res, inquam, est linea, quatenus recipere potest extensionem in longum, non remouendo tamen, sed supprimendo tantum, id est, non representando eodem conceptu expressè capacitatem ad extensiones in latum & profundum. Deinde est superficies, quatenus capax extendi in longum & latum. Denique corpus, quatenus in tres dimensiones diduci potest.

Atque hanc esse D. Augustini sententiam existimat Gregorius Ariminensis, vir, si in vetustis illis scholasticis quispiam, lectionis D. Augustini diligens, & sensuum perspicax rimator. *Sola longitudo*, ait Augustinus, *non nisi intelligi animo potest, in corpore inueniri non potest.* Ac paullo pòst: *Hanc longitudinem meram & simplicem, si tibi placet, lineam vocemus: hoc enim nomine à doctis multis appellari solet.*

Lib. de  
Quant.  
anim. c. 6.

Et in hunc sensum verba, quæ initio Capitis citauimus, duci possunt. vt videlicet, colligat Augustinus animum nostrum esse incorporeum, quia longitudinem à latitudine & profunditate præscindere valet, quod corporei sensus non possunt. Interpretamentum tamen hoc, vt verum confitear, certum non est: nam fortasse solum vult, longitudinem numquam reapse, sed solâ mentis præcisione, separari à corpore, etsi reapse ab eo distinguatur. Quomodo verò nulla etiam temporis positiua momenta interseminanda, inferius ostendetur.

## CAPVT XXXIII.

*Argumenta quibus indiuisibilia, tam continuantia, quàm terminantia, quantitati videntur inseri.*

**S**ententia quæ puncta, lineas, & superficies entia negatiua esse affirmat, est, vt existimo, in Philosophiâ valde falsa, ait Franciscus Suarez. Et Gabriel Vasquez, *Mathematicâ*, inquit, *demonstratione ostendimus, in quantitate esse puncta indiuisibilia* (ex tactu videlicet globi & plani in puncto,) *ex quo sequitur, esse etiam superficies & lineas.*


Lib. 6. Physic. d. 1. q. 4. Murcia sententiæ nostræ nescire se dicit, quod aliud fundamentum esse potuerit, nisi quod indiuisibile, vt nomen sonat, idem est quod non diuisibile. sed non diuisibile carentiam dicit: ergo. Hoc tamen fundamentum satis friuolum est. & meo quidem etiam consensu, bone & docte Murcia. friuoli enim & miseri essemus, si tam imbecillo tibicine niteremur.

Lib. 6. c. 2. q. 1. a. 4. Physic. Modestiùs Conimbricenses, qui sententiam Fonseca, omnia indiuisibilia positiua, præter superficies corporum extremas, destruunt, non minùs probabilem, quàm eam quæ vniuersa admittit, esse affirmant.

Sed videamus Mathematicas istas demonstrationes, in quibus sic triumphant.

Globus planum in puncto tangit, inquiunt; igitur in superficie globi & plani puncta duo positiua sunt, in quibus tactus exercetur. Tactum autem fieri in puncto, non in parte diuisibili, pater; quia cum omnis pars diuisibilis superficiei planæ sit plana, pars superficiei globi non potest eam tangere & ei adæquari ac conformari, nisi etiam induat aliquam planticiam; quod est contra rationem

tionem superficiæ corporis perfectè globosi , cuius omnis pars curua est & conuexa, nulla plana.



Vt in secundo schemate Cap. xiii. si globus  $ABCD$ . tangeret planum  $EF$ . plusquam in puncto  $C$ . oporteret partem illam inferiorem globi complanari , & retrudi versus globi centrum. Secundò, cylindrus siue columna perfectè rotunda tangit planum in solâ lineâ ; igitur positiuæ lineæ utrimque sunt , tam in superficie cylindri curuâ , quàm in planâ subiecti corporis plani. Antecedens probatur eâdem ratione , quâ contactus globi in puncto : quia nulla pars superficiæ conuexæ cylindri est plana , sed curua ; igitur nulla potest se conformare & adæquare parti planæ in subiectâ superficie , quemadmodum requiritur ad contactum ; sed linea vnica cylindri iacentis in plano , incumbet vnice lineæ plani.

Tertiò , Duo corpora similium figurarum tangunt se in superficiebus , secundum profunditatem indiuisibilibus , quales duæ superficies planæ , item concaua loci , & conuexa locati :

igitur superficies positiuæ, quæ extremas saltem corporum partes inuoluant, constituendæ sunt. Anteced. ostenditur: quia si corpora secundum profunditatem se tangerent, partes aliquæ profundæ necessariò se penetrarent; quod per naturam impossibile demonstrauimus Cap. XXIX. Solæ ergo superficies tangunt se, & intrant in idem spatium, corpora verò ipsa secundum totam profunditatem extra se manent.

Quartò, si nulla sint in aëre indiuisibilia positiua, non poterit vniformiter difformiter actio aliqua per eum diffundi. Nam lumen, exempli gratiâ, non potest ab octauo vsque ad quartum gradum paullisper decrescere, nisi aliquid in aëre signari possit, in quo sit lumen quatuor graduum: hoc autem pars aëris diuisibilis esse nequit, quia hæc in duas alias partes diuidi posset, quarum vna propinquior, altera remotior ab agente, quæ haberent lumen æqualis intentionis; quod repugnat conditioni actionis vniformiter difformis.

Quintò, Et quod olim me maximè sollicitum habuit. colores corporum, qui in superficiebus eorum hærent, solum cernimus (per profunda enim & opaca non penetrat visus; ) igitur corpora inuoluuntur extremis quibusdam positiuis superficiebus; nam color in negationem recipi non potest. Sic lumen superficiem opaci, non eius profundum pro subiecto habet.

Sextò, Angelus, aut anima rationalis in puncto spatij indiuisibili esse, item in lineâ solâ, aut superficie replicari potest: non posset autem, si nulla eiusmodi indiuisibilia in spatio essent.

Septimò, Momenta sunt in tempore, quæ actiones instantaneas metiuntur; ergo & puncta, ceteraque indiuisibilia in continuo: nam instantia temporis oriuntur ex indiuisibilibus spatij per quod mobile transit. sicut enim parte motûs successiuâ & temporaneâ pars spatij diuisibilis pertransitur; ita mutato esse ( sic vulgò appellant ) instantaneo motûs, mobile spatij indiuisibile peragrat.

Quædam alia cumulari possent, sed minoris momenti sunt, nec nodi difficilis. Quale istud: Radium esse lumen lineare, ac proinde aliquam esse in aëre lineam, quæ radium illum in se suscipiat. Sed sufflamine hic nullo opus, ex tempore ac de plano Princeps Opticorum respondeat. *In lineâ radiali, inquit, secundum quam fit diffusio luminis, est aliqua latitudo, propter quam inest ei sensibilitas, & in medio illius linea est linea Mathematica imaginabilis,*

Vitell. li. 2.  
prop. 3.

*bilis, cui omnes alia lineæ Mathematicæ in illâ lineâ naturali æquidistantes erunt. Quæ sic accipio, ut lineæ luminis naturalis, id est, vera & realis, sit diuisibilis secundum latitudinem, Mathematica verò, quæ tali latitudine careat, sit imaginaria tantum.*

## CAPVT XXXIV.

*Ex globi, cylindri, planorum contactu, puncta, lineas, superficies positiuas corporeæ quantitati perperam assui.*

**S**ubtilitas humanæ mentis varios modos, quibus argumenta ista elideret, aut eluderet inuenit.

Reuerendissimus Paulus Aresius citò se à primo & secundo expedit. negat enim corpus perfectè sphericum etiam à Deo posse fieri. quod etiam censet Alexander Piccolominus, & *ex nostris*, inquit Aresius, *principiis, quibus puncta negamus, manifeste constat; quia sine centro & circumferentiâ indiuisibilibus perfectè sphericum constare nequit.*

Lib 1. d. 2.  
quæst. 23.  
sect. 7. de  
Generat.

Sed fallitur profectò, nam centrum imaginarium, & circumferentia etiâ talis globo sufficit. Auferat enim Deus à globo centrum reale (si vllum est tale) & circumferentiam quæ eum inuoluit, ceteris omnibus in eodem situ permanentibus, globus, globus esse perseuerabit, & omnes lineæ à centro imaginario ad superficiem imaginariam tractæ erunt æquales; cum extrema superficies realis detracta, à singulis lineis vnicum solùm punctum finientem auferat, qui linearum extensionem non augebat: nec, si augeret, referret quidquam; quia si ab omnibus æqualibus partem æqualem auferas, quæ remanent erunt iterum æqualia.

*Sed adhuc validioribus ictibus, inquit Aresius, hoc sphericum in præceptis impellamus. Si daretur perfectè sphericum planum in puncto tangens, ut volunt aduersarij, sequerentur duo maxima absurda contra ipsorum sententiam.* Prius est, quòd pars lineæ, quæ immediatè sequitur punctum in sphærico distaret à plano solùm per vnicum punctum; vnde punctum occuparet locum, & esset quantum. Posterius (quod tamen à priori vix, aut nihil differt) quòd punctum diuisibile esset.

Sed profectò neutrum iterum sequitur; sed distantia inter partes sphære, & plani proximas punctis contactus, extenditur per infinitas partes æris-proportionales, si sphæra & planum in ære  
se con-

se contingant: ac tota illa Reuerendissimi Paulli Aresij imaginatio oritur ex prauo intellectu prop. xv. lib. 111. Euclidis, quam infrà Cap. xxxix. explicamus, vbi angulum contingentiae lineæ rectæ & circuli, etsi dicatur minor aliquo sensu omnibus angulis rectilineis, esse tamen in infinitum diuisibilem demonstramus.

Quòd etiam idcirco cælorum solidas sphæras diffingat Aresius, ne perfectè rotundas esse admittat, fero de Planetarum orbibus (quos etiam imaginarios esse cum vniuersis eccentricis & epicyclis aliquando ostendimus) de firmamento, & empyreo non possum.

Demus igitur id potentiae diuinæ, vt circinare possit corpus perfectè sphæricum, & talem esse fixarum orbem, aut etiam fortasse solis globum.

Talis autem tangit planum in puncto, non tamen aliquo reali, sed tangit non adæquatè in parte diuisibili.

Sed contactus est realis, clamant; ergo in aliquo reali (quod sit punctum, vel pars) debet exerceri.

Fateor, contactus fit in aliquâ parte, quia nil est aliud, quàm certa realis propinquitas globi & plani, fundata in certis Vbi vtriusque extremi.

Igitur pars illa globi contingens planum, est plana, inquit.

Verùm nego id sequi: quia nulla vel minima particula globi adæquatur vel conformatur parti plani, cùm nulla assignari valeat, quæ per se primò planum attingat: nam quamcumque assumpseris, resolui poterit in duas alias partes, quarum vna propinquior, altera remotior est à plano. & hoc credo voluisse illos Nominales, qui dixerunt planum à globo in parte indeterminatâ tangi: quia, inquam, nulla pars determinari potest, quæ per se primò (esset enim indiuisibilis) sit plano proxima. Vnde non magno merito eos sic ridet Vasquez.

Tom. 2.  
1. p. d. 192.  
c. 1.


*Quòd nonnulli, inquit, dicunt tactum illum fieri per aliquam partem non determinatam, ridiculum est; quia cùm tactus realis & determinatus sit, & non fiat secundum totum corpus, debet fieri aliquo eius determinato.* Sed faciliè reponi ei à Nominali potest: tactum esse realem, quia est realis relatio propinquitatis tantæ, quanta inter ista corpora saluis figuris, & sine penetratione, esse potest. Est etiam determinatus, quia certa & determinata extrema illa relatio habet. Licet enim certam partem globi (vt exempli causâ, inferius hemisphærium) designare, quæ certam plani partem contingat, nullam tamen quæ per se primò (id est, secundum



dùm omnes suas particulas) proxima sit. Si verò id ad contactum determinatum requirant, nego talem contactum determinatum debere esse; imò non potest. nam in sententiâ Aristotelis comperitissimum est, nullam partem globi esse, quæ per se primò plano vicinissima sit.

Et videte, amabò, quomodo tota tempestas quam in miseros Nominales excitant, in caput eorum repluat.

Tangant igitur se (quandoquidem tam valdè volunt) globus & planum in reali puncto, & per imaginationem paullisper partes lineæ curvæ in globo, & rectæ in plano, quæ vtrimque puncto contactûs proximæ sunt, inspiciamus. Tales autem in hoc schemate



sunt lineæ  $\alpha$  C. &  $\beta$  C. in globo, item  $\gamma$  C. &  $\delta$  C. in plano, quæ vtrimque assident puncto contactûs C.

Quæro iam ab iis, an in lineâ, exempli gratiâ  $\alpha$  C. sit aliqua pars per se primò proxima puncto contactûs C. Negare debent, si Peripatetici sint, quia illam partem oporteret indivisibilem esse. In quâ igitur parte suâ linea ista contingit planum? Respondebunt

P

sine

sine dubio, In nullà per se primò, sed contactus fit in puncto C. quod proximè incumbit plano. Sed destruat Deus punctum C. (vel potius duo puncta, vnum globi, alterum plani, quæ concurrunt ad contactum, & penetrant se in spatio punctuali C.) & globum planumque relinquat in priori situ: in quo iam fiet contactus? Negare enim non possunt, quin aliquà se ratione contingant, cum in eadem quâ antea propinquitate permaneant. puncta enim vtrimque extra globi & plani superficies nihil omnino extant, sed intra partes vtriusque demersa sunt: vnde siue inferantur, siue eximantur, globus & planum in pari & eadem omnino propinquitate perseuerant. Igitur quemadmodum, destructis punctis illis, partes se tangerent, sic se iam tangere asserimus, qui nulla inter partes puncta positiua inferimus. id est, globus & planum, vt antè dicebam, tam propinqua sunt, quàm esse possunt saluis vtriusque figuris, & sine penetratione.

Tom. 2.  
disp. 40.  
sect. 5. Me-  
aph.

Sed tamen reuerà non tangunt se, inquires; quia àër totum circumcircà globum ambit, & etiam vbique se insinuat inter ipsum & planum. *Hoc verò, inquit Suarez, tam est per se incredibile, vt nullà indigeat refutatione: nam quid potest impedire realem contactum? Item, si sphaera esset grauis, impediretur à plano ne descenderet, vel si ipsa vinceret pendere, secum deferret planum: quomodo autem hac possunt fieri sine reali contactu?*

Sed splendide mentior, nisi hæc imaginatio punctum aliquod benè crassulum & ventrosum inter planum & globum interponat. Quæso, etiam atque etiam cogitent, quid sit punctum, & illicò videbunt, quàm imaginationis fallantur. Nam in eorum etiam sententià omnino necesse est, vt àër vndique circumfundatur globò qui in plano iacet. Quid enim impedit? punctum illud contactus? Vix sine risu cogitationem meam inter globum istum tam celebrem, & planum infero. Reuerà enim ridiculam allucinationem me videre existimo. Nam punctum illud circumfusionem àëris interrompere non poterit. quoràm enim partem àëris excludet, ne inter globum & planum se insinuet? Nullam partem, inquit, sed vnicum solum àëris punctum excludet. Sed tamen neque tantillum faciet: nam veluti punctus plani punctum globi cum penetratione in eundem situm admittit; ita neque vterque punctum àëris continuantem respuit. Itaque partes àëris globum circumfluentes concurrent, & sine interruptione continuabuntur puncto àëreo, qui in spatium indiuisibile punctorum contactus intra-

intrabit. Vnde, siue puncta ista contactûs tollantur, siue ponantur, perinde aër totum vndique globum exambit.

Sed linea quæ è profundo corporis plani vsque ad superficiem ascendit, & in puncto ipso contactûs terminatur, sustinet diametrum globi, inquit, siue lineam rectam quæ à summo globi puncto, per centrum, ad punctum contactûs descendit, & in eo terminatur, atque ita duæ lineæ obuiam quodammodo sibi occurrunt in puncto contactûs, & linea globi lineæ plani incumbit, & ab eâ sustentatur, ne globus descendere possit: cui nihil simile reperire est, si puncta contactûs cum lineis quas terminant extrahas; quod nos facimus, qui tam lineas reales, quàm puncta realia à continuo reiicimus. In quo enim tunc pedem figet globus? manebit profectò in aëre pendulus, nec vmquam ad plani contactum veniet. Hæc utrumque primâ fronte aperta videntur; sed inspiciamus, an larvâ tamen aliquâ frons ista amicta non sit.

Quæro enim, an linea globi, aut etiam punctum supra proximas superficiæ globi partes emineat. Negare oportet; nam globus aliàs, nec globus, nec vndique circumciscus esset. Deinde punctum non magis est extra situm partium quas copulat, quàm nuda vnio integralis, quæ proximè inter partes lineæ sine puncto interiecto, consisteret: sed vnio integralis supra partes vnitas emicare non potest; igitur neque punctum poterit: nam aliàs propriam extensionem extra partes obtineret. Si verò punctum illud contactûs in globo non extat; igitur vicinarum circumciscâ partium descensum non impedit, sed hæc tam propinquæ plano sunt, quàm si punctum ibi nullum esset: vnde destructo puncto, & lineâ siue diametro globi quam terminat, partes globi non subsident, nec fient plano propinquiores.

Hinc statim apparet, falsum esse, quòd si puncta contactûs, & lineæ globi ac plani, in contactu sibi occurrentes destruantur, globus magis pendeat in aëre quàm antè. quia, inquam, lineæ & puncta illa descensum partium circumiacentium globi non impediabant, cum supra partes superficiæ globi proximas punctum globi non emineret, nec procurreret solum, aut cum lineâ suâ in planum, vt alij imaginari videntur.

Imò, procurrit, fortassis inquit, quia omnes partes globi à puncto contactûs vndique sursum refurgunt, & refugiunt à plano; punctum verò contactûs id non facit, sed delibat & osculatur planum in puncto.

Sed profectò, si argumentum valet quantum videtur, efficiet ut punctum contactus in globo, situm medium ita inter partes proximas obtineat, ut extra spatium earum positum & extricatum sit; quod apud Aristotelem fieri non potest: quia si extra partes quas vnit expatiatur, & ad situm inter vtrasque medium se retrahit, aliquam iis extensionem necessariò addit, cum tamen indiuisibile indiuisibili aut diuisibili adiectum extensionem dare aut augere non possit. nam *vnit punctum partes linea indiuisibiliter sese totum vniens utrique, non adherens toti alicui parti diuisibili determinatè, sed quasi intimè assistendo utrique parti*, ut inquit Suarez. illa autem assistentia fit cum intimo ingressu in spatium vtriusque partis, etiam si neutri adæquatè adiaceat, cum indiuisibile parti diuisibili adæquari non possit.

Si verò punctum ita partibus quas copulat implicitum sit, supra eas nec eminet, nec ipsæ hinc inde ab eo ita recedunt, ut spatiolum intermedium concedant in quo planum contingat, quidquid imaginatio nostra, puncta nimium pingua & crassula fingere assueta, aliud nobis imponat. Imò verò, si punctum intra spatium vtriusque partis se immergit, vix potest id sine eius replicatione intelligi, cum partes diuersæ per se primò occupent spatia, in quibus punctum simul esse oportet, si vtrique parti intimè assistit. Quid igitur hic eueniet? Hoc nempe, ut vtraque pars punctum ad se rapiat, nec in situ illo quem medium imaginamur, relinquat, ut ibi seorsim à partibus & distinctè tangere planum possit.

Ex quo toto discursu satis, opinor, apparet, quàm punctum illud ad contactum plani inutile, imò ad copulandas partes incommodum sit, quandoquidem sine sui replicatione officio isto vix fungi possit.

Itaque sat firmiter, ut equidem existimo, concludamus: contactum globi in aliquà parte eius diuisibili fieri, sed nullam posse assignari quæ per se primò plano proxima sit, cum omnis quam dabimus, duas partes habeat, quarum una propius ad planum quàm altera accedat. Et nōne simile prorsus philosophantur, dum aiunt partem lineæ nullam esse per se primò proximam puncto quod eam copulat, aut terminat? Quod tandem aduertens Suarez, *Factor*, inquit, *hoc argumentum non parum enervat rationem superius factam de tactu globi in puncto, aut plani in superficie*. imò non enervat, sed planè (quidquid ipse dissimulet) interimit.

Sed

Sed quare globus aërem inter se & planum interceptum pondere suo non exprimit? inquirunt.

Non potest, inquam ego, quia etiamsi in vacuo globus plano superponeretur, non propius accederet; verat enim difformitas illa figurarum, quarum vna perfectè plana, altera vniformiter curua est, & à plano vndique sic refugit, vt nec in minimâ particulâ ei adaptari & conformari velit. Vnde aër interpositus non premitur à globo, vt elidi possit, sed à lateribus globi vndique vsque ad contactum descendendo ita decrescit & extenuatur, vt in punctum quoddam suum negatiuum desinat, quod in idem spatium punctuale cum puncto negatiuo globi, & plani incidit. In eodem enim spatium, in quo punctus negatiuus globi, punctum plani negatiuum, imaginatione nostrâ, penetrat, punctum aliquod aëris negatiuum est, à quo vndique in orbem partes aëris inter globum & planum diffunduntur, tenuissimè circa punctum illud, deinde magis ac magis crassescunt, quò ab eo recedunt longius. Sed an igitur globus ferreus in planum vitreum incidens ipsum non confringet? Dico, confringet, nam non ab eo aëre, sed à plano sustentatur, haud secus, quàm in vacuo.

Quæres, cur non potius in puncto globi & plani negatiuo, quàm in parte diuisibili, dicatur fieri contactus.

Resp. id posse dici: nam reuerà ista indiuisibilia negatiua sunt illa extrema, quæ Aristoteles dicit esse simul, cum aliqua se contin-  
gunt, sed tamen, quia contiguitatem per modum præsentiae loca-  
lis, aut propinquitatis positiuæ concipimus, quæ in ente negatiuo in-  
hærere non potest, idcirco eam potius in parte globi & plani posi-  
tiuâ posuimus, quæ quidem puncto illi negatiuo proxima, non ta-  
men per se primò, sit.

Lib. 5. c. 3.  
Phyc.

Omnia verò quæ de tactu globi & plani dicta, ad cylindri & plani contactum possunt transferri. nam oblonga illa cylindri rotunditas, ita videtur vndique à plano in quo iacet, refugere, vt vnica solùm lineam ei obuertat, in quâ fiat contactus. Sed reuerà linea ista tantum negatiua est, id est, non est pars vlla cylindri in latum diuisibilis. Partes tamen diuisibiles, quæ in istam lineam negatiuam à lateribus cylindri descendunt, proximæ sunt illi lineæ, & per consequens, plano, ideoque possunt dici positiuè ipsum tangere. nulla tamen pars est per se primò ei proxima; cum omnis sit in infinitum diuisibilis, & in duas medietates, quarum vna vicinior est, altera remotior à plano & ab illâ lineâ negatiuâ contactus. Atque ita

primo & secundo argumento superioris Capituli factum satis. Nec maior etiam in tertio, sed eadem prorsus difficultas; quidquid tamen eam Suarez magnificet.

*Duo plana solida & perfecta, inquit, non possunt se tangere nisi in re indiuisibili secundum profunditatem. Et in hoc evidentissimè, meâ sententiâ, refellitur responsio de tactu indeterminato; quia illa corpora non possunt se penetrare in aliquâ parte, siue in profunditate determinatâ, siue indeterminatâ. non possunt autem se tangere secundum aliquam profunditatem, nisi se penetrent.*

Verum fortius in eum retorqueri potest argumentum. Duæ planorum se tangentium reales superficies se penetrant: sed istæ superficies sunt in situ partium profunditatis quas terminant; igitur etiam partes profunditatis sese penetrabunt: quæ enim in situ se penetrantium sunt, etiam se penetrant. Respondebit Suarez, superficiem nulli parti profunditatis determinatæ adhærere, eamque penetrare.

Sed reponam illic ei, quod ipse ante nobis: nempe, in nullâ parte profunditatis, siue determinatâ, siue indeterminatâ, posse corpora tangentia se penetrare. Si autem superficies vna sit in situ alicuius partis indeterminatæ, hæc pars indeterminata debet secundum profunditatem suam indeterminatam, penetrare partem alterius corporis indeterminatam, cui superficies alia tangens indeterminatè cohæret. Si enim duæ partes indeterminatæ sint in suarum superficierum spatio; ergo ubi istæ superficies in mutuo contactu se penetrant, duas etiam partes suas indeterminatas secum attrahunt, ac in idem spatium per penetrationem compingunt. Vel certè quacumque tandem ratione nitentur ostendere, omnes partes duorum illorum corporum consistere extra mutuum situm, ea nobis, sine dubio, etiam vsu veniet ad demonstrandum, quomodo partes planorum se tangentium proximæ inuicem ita esse possint, vt sese non penetrent, etiamsi nullâ reali superficie inuoluantur. Deus enim exuat vtrumque planum istis penetrantibus se superficiebus: ecce corpora nullo interiecto vel minimo hiatus (superficies enim eorum non prominebant, sed intra spatia partium retractæ & implicitæ erant) proxima remanent, & illo modo, quem iam defendimus, se contingunt. Id est, prima pars vnius est proximè extra primam partem alterius, perinde atque si integraliter vnitæ & continuæ essent. nulla tamen pars vnius est adæquatè proxima parti alterius; cum omnis pars profunda, constet semper

semper duabus aliis partibus, quarum vna longius recedit in profundum, quàm altera. Et hoc solum, credo, volebat Suarez, cum diceret, superficiem corporis plani nulli parti profundæ determinatè (id est, adæquatè, seu per se primò) adhærere. Nam licet pars prima à facie exteriori (quæ est superficies imaginaria corpus suo modo inuoluens) certum limitem habeat, versus profundum tamen infiniti limites statui possunt, nec partem tam propinquam determinare valemus, quin adhuc propinquiorem sine fine. Si enim cepero partem vno pede profundam, possum deinde profundam pede dimidiato, deinde iterum dimidiâ parte minorem, ac ita in infinitum.

Stet igitur, ex tactu globi, cylindri, & planorum indiuisibilia magnitudini non posse instrui.

## CAPVT XXXV.

*Ad explicandam actionem uniformiter difformem, non esse necessaria indiuisibilia terminantia, aut copulantia in medio, per quod actio se extendit.*

**Q**uartum argumentum ex falsâ imaginatione difformis extensionis actionis per medium, natum fuit. Nam etiamsi indiuisibilia potitiua constituentur in illo corpore medio, superficies aëris finiens diminutionem illuminationis vsque ad quartum gradum inclusiuè, non recipit totum quartum gradum luminis, sed terminum solummodò indiuisibilem luminis, qui quinti gradus decrementum terminat, & quarto gradui vltimum indiuisibile complementum donat. Est enim hoc indiuisibile (si à fine sphæræ actiuitatis, versus agens progrediamur) summus apex quarti gradus, & ima basis quinti: est enim in confinio vtriusque gradus, quemadmodum superficies aëris, quæ est subiectum illius superficialis luminis, est limes & confinium duarum partium integralium aëris, quas inter se copulat.

Veluti etiam superficies (& idem de lineâ & puncto iudicium esto) quantitatis aëris non est eiusdem omnino rationis cum parte corporeæ quantitatis in infinitum: secundum omnes dimensiones diuisibili; ita lumen superficiale in eam superficiem receptum, diuersæ rationis debet esse à lumine quod in corpoream quantitatem recipitur, & secundum eius dimensiones est in longum, latum, & pro-

& profundum diuisibile. Quemadmodum enim, ex doctrinâ eorum, partes & indiuisibilia materiæ primæ eandem inter se proportionem obseruant, quam partes ac indiuisibilia quantitatis; ita videlicet vt puncta, lineæ, & superficies materiæ inuicem, & à partibus materiæ corporeis differant specie. (quia partes naturâ suâ postulant omnes dimensionēs, indiuisibilia non:) sic nulla est ratio, cur similis proportio inter partes qualitatis in subiecto corporeo extensæ non intercedat. Itaque superficies quantitatis æris veluti non est nata, nisi in superficiem materiæ proximè recipi; ita non nisi superficiale lumen (id est, ineptum naturâ suâ vt quantitati corporeæ immediatè inhæreat, & accipiat extensionem in profundum) apta est recipere.

Hinc intensio luminis quæ in tali superficie æris sit, non est corporei, sed superficialis tantum luminis, sitque adiectio superficiæ luminis ad superficiem, secundum mensuram corporei luminis, quod vtrumque in partibus corporeæ quantitatis etiam intenditur. quod enim lumen ab vtraque vel alterutrâ parte illius superficiæ æris fuerit intensius, eò etiam gradus eius pluribus terminis extensiuus (non tantum intensiuus) indigent, ac proinde singuli gradus corporei luminis singulas luminis superficies secum afferunt, & in vicinam semper quantitatis æris superficiem coniiciunt, & istâ accumulatione lumen istud superficiale intendunt.

Hinc statim se pròdit imbecillitas huius argumenti:

Suar. to. 2.  
disp. 40.  
sect. 9.  
num. 26.  
Metaph.

*Dum sol illuminat calum sibi propinquum, necesse est vt in superficie conuexâ calis contigui determinatus gradus luminis recipiatur, quod uniformiter difformiter minuitur in toto illo calo vsque ad superficiem concauam, & in eâ ultimâ superficie concauâ necessariò erit lumen in alio minori gradu determinato. Sit ergo prior gradus luminis octo, posterior vt quatuor. Iam illud lumen continuâ & uniformi difformitate minuitur ab octauo gradu vsque ad quartum: non potest autem continuè transire ab vno gradu ad alium extremum, nisi per medium, alioqui non esset diminutio uniformiter difformis. Ergo necesse est, vt in aliquo subiecto intermedio sit lumen vt sex, & vt quinque, &c. hoc autem esse potest, nisi in subiecto indiuisibili, quia aliàs actio non esset uniformiter difformis. Si enim in parte diuisibili esset lumen vt sex (cùm hæc pars constet aliis partibus quarum vna est propior, altera remotior ab illuminante) lumen in parte propinquâ & remotâ esset eiusdem intentionis, nec vniformiter decrederet pro mensurâ elongationis ab agente.*

Pro-



Proditur, inquam, huius discursus infirmitas, quia inter puncta, lineas, superficies luminis, & corporeum ipsum lumen, nihil distinguit, quasi idem & eiusdem prorsus rationis lumen per omnia puncta, lineas, superficies, & corpus cæli sol dispergeret: cum tamen ita subiecto tali se accommodet, ut secundum vniuscuiusque capacitatem aut punctuale, aut lineare, aut superficiale corporeum, ve lumen indiuisibilibus ac partibus quantitatis cæli aut aëris distribuat.

Itaque argumentum solum videtur esse sollicitum, quomodo intensio superficierum luminis, à conuexâ superficie cæli ad concavam, vniuniformiter difformiter, per omnes cæli superficies continuantes, decreseat, non quomodo corporeum lumen decrescere etiam possit, quod tamen non minus vniuniformiter difformiter, quàm superficies luminosæ, aut quæuis alia luminis indiuisibilia, à sole per corpoream cælorum crassitiem descendit.

Quæro igitur ab istis, quâ ratione corporeum lumen, quod in nullo termino indiuisibili cæli, sed in mole ipsâ corporeâ proximè inhaeret, vniuniformiter difformiter minui possit. Quidquid dederint, illud arripiemus, quia nobis id ad decrectionem luminis vniuniformiter difformem explicandam etiam sufficiet. quandoquidem præter corporeum & secundum tres dimensiones diuisibile lumen, nullum aliud diuersæ rationis vel punctuale, vel lineare, vel superficiale agnoscamus: uti etiam nec similia in substantialem materiam molem indiuisibilia substantialia inculcare debemus. Sublatis enim semel à quantitate otiosis istis, imò partium vnionem perturbantibus (quod supra ostendisse puto) terminis, materia quantitati subiecta, & qualitates quantitati iniectæ non indigent amplius similibus indiuisibilibus. Igitur vniuniformiter difformem illuminantis actionem sic explicamus.

Lumen sic à centro sphaeræ actiuitatis effunditur, ut in qualibet parte medijs viciniori centro, sit intensius quàm in remotiori, & id. proportionem tali: ut. quânto pars secunda habet remissius lumen quàm prima, tantò pars tertia remissius quàm secunda habeat, si tantum à secundâ, quantum secunda à primâ distet.

Finitur autem decrementum quinti gradus luminis vsque ad quartum, non per aliquod lumen superficiale, quod sit quinti gradus quasi basis, & quaticulumen; sed seipso, vel per superficiem imaginariam eandem, quâ ipsæ etiam partes quantitatis in quibus lumen quinti & quarti gradus extenduntur. Veluti enim partes

Q

corpo-

corporeæ quantitatis (quarum vnaquæque, exempli gratiâ, vnus milliaris habeat longitudinem) ad mediam aliquam vnionem, seipsis sine reali superficie interiectâ, finiuntur, & ab inuicem distinguuntur, in quâ tamen vnionis superficiem imaginariam, ad vtriusque quantitatis discerniculum, solent interponere, ita qualitates duorum graduum per illas duas quantitates extensæ, seipsis in vnionem, quandam integram mediam proximè sine reali superficie qualitatis interpositâ concurrunt, & seipsis ad illam vnionem immediatè vtriusque finiuntur; aut certè superficie quadam imaginariâ, quam Mathematici, vulger ad suas demonstrationes, immittere solent. Pari modo, vbicunque tota subiecti extensio seipsâ, & sine vnione cum parte vllâ sequente, terminatur, qualitas ei coextensa, finem etiam seipsâ accipit, vel non per realem saltem superficiem, sed, vt summum; per Mathematicam, & imaginariam, quæ tam extensioni subiecti, quâto qualitatis imponat finem extrinsecum. Eadem enim superficie imaginariâ, quâ Geometrarum corpulentiam globi inuoluunt finiuntque, potest etiam globi albedo inuolui & finire.

Sed si lumen quatuor graduum in parte diuisibili medij producit, in parte propinquiore medij & remotiori erit æquale lumen quatuor graduum, inquit, nec fiet vniforme decrementum. Vt, exempli causâ, si sol. in superficie conuexâ vitrei globi inciperet productionem luminis quatuor graduum, lumen in eadem intensione penetrare debet intra aliquantam globi profunditatem, si nulla sit realis superficies conuexa, quæ statim in summâ globi cure, vt sic dicam, totam luminis quatuor graduum intensiorem excipiat.

Verum nodus iste non est tam, quàm apparet, difficilis. Nam lumen superficiei, vt antè ostendi, in istâ sententiâ debet esse superficiale tantum, & alterius rationis à corporeo: non solum autem lumen superficiale, sed etiam corporeum, vniformiter difformiter minuitur, & tamen lumen corporeum quatuor graduum non producit totum simul in aliquâ superficie, vel in alio quantitatis termino indiuisibili, cum lumen tale postulet naturâ suâ quantitatem corpoream pro immediato subiecto, & extendi in eo secundum omnes suas dimensiones.

Signum igitur est, ad vniformiter difformem luminis cuiuscunque remissionem non requiri, vt omnes certæ intensiōis gradus in aliquo indiuisibili medij, toti simul producantur.

Dein-

Deinde, demus lumen superficiale eiusdem omnino esse rationis cum corporeo; ostendere tamen possumus, ad vniuniformem illam difformitatem; superficiem globi inutilem esse. Quæro enim, an superficies conuexa vitrei globi longius distet à sole, quam pars profunditatis, quæ proximè eam sequitur. Negabunt haud dubie: par enim est vtriusque distantia. si enim superficies foret soli propinquior quam tota profunditas, oporteret eam supra profunditatem eminere, & augere eius extensionem; quod non potest. Si ergo æquali intervallo à sole distant, æqualis etiam intensiois lumen recipient; atque ita non in solâ superficie, sed etiam in profundo lumen quatuor graduum produceretur; & subinde, frustra est illa superficies ad lumen quatuor graduum in subiecto secundum profunditatem indiuisibili totam simul colligendum: nam etiam in proximâ profunditate est eiusdem intensiois lumen. Igitur illa superficies solam potest esse vtilis, si lumen superficiale, sit alterius rationis à corporeo; & postulet pro subiecto solam medij superficiem. tunc enim necessariè erunt superficies partibus profunditatis intertextæ; quæ lumina superficialia luminibus corporeis similiter intertextæ recipient, & per quas saluatim quodammodo (nam inter duas quaslibet superficies interiacet pars profunditatis) lumen superficiale, vnâ cum corporeo, vniuniformiter difformiter per medium remittatur.

Lumen verò corporeum quatuor graduum intra globi profunditatem sic decrescit; (etiam in eorum, si benè philosophentur; sententiâ) vt nulla pars eius assignari valeat, quæ per se primò quatuor gradus intensiois habeat. Cum enim quælibet pars profunditatis duas alias partes contineat, quarum vna soli vicinior quam altera sit, necesse est, vt in parte viciniore plus luminis (si rem Mathematicâ præcissione æstimes) quam in remotiore sit: hoc enim postulat vniuniformis illa difformitas corporei luminis in profundum extensi. Nec id vllâ prorsus admiratione dignum. nam si qualitatem octo graduum in eodem etiam indiuisibili subiecto consideres, in eodem, vt sic dicam, octauo gradus, nullam tantulam particulam intensiuam sumere licet, quæ per se primò sit altissima, cum quacumque decem partibus, liceat in duas alias particulas intensiuas iterum resolvere, quarum vna sit altior & propinquior summo apici indiuisibili finienti octauum gradum. Si igitur tales partes intensiuæ per magnitudinem sic expandantur, vt gradus qualitatis intensiuæ supra extensiuos spatij, cum tali propor-

tione cadant, ut maxima qualitatis intensio cum principio spatij corporei incipiat, & sensum deinde decreascit, planè intelligimus modum quo lumen corporeum quatuor graduum vniformiter difformiter minuitur per vitrei globi profundum. Nam uti in lumine quatuor graduum non potest signari pars intensiua, quæ per se primò altissima sit in quarto illo gradu, ita nulla pars profunditatis globi dari potest, quæ per se primò recipiat altissimam particulam intensiuam quarti gradus: nam quantulacumque pars profunditatis accepta, constat aliâ parte viciniorè superficiei conuexæ globi, quæ altio rem partem quarti gradus luminis recipit, quàm altera sua pars quæ est profundior. Quando igitur intensio qualitatis ita extensioni spatij congruit, non magis est mirum, non posse assignari partem profunditatis per se primò luminosam. ut quatuor, quàm non posse designari partem profunditatis, quæ per se primò sit prima, & proxima omnino conuexæ superficiei globi: aut, quàm non posse accipi supremam partem quarti gradus, quæ per se primò sit suprema, nec in partem altio rem & inferiore m resolu i possit. Nam reuerà nulla est pars eiusmodi: deberet enim esse necessariò intensiue indiuisibilis; cum tamen in sententiâ Aristotelis, qualitates perinde constent gradibus intensiuis proportionalibus infinitis, atque quantitas infinitis partibus extensiuis.

Ex quibus liquet, extensionem luminis per corpoream profunditatem, eodem modo, tam iis qui quantitati indiuisibilia positiua ingerunt, quàm illis qui ea adimunt, explicandam esse, solumquæ inter nos ipsosque discrimen hoc interesse: quodd superficiei positiuâ, & lumine superficiali globum illum vitreum ipsi amiciant, nos ei vestem istam vtramq; detrahamus, & nudum soli exponamus. Et certè, si sic vestitus est, exuat eum Deus, & in ipsum agere solem permittat: ecce profunditas illa iam superficiei suâ supernè nudata, radium vniformiter difformiter transmittet illo modo, quem maxime, & vnicum esse, iam probauimus.

Denique, etiam si hætenus de quantitate, ut re à materiâ distinctâ locuti sumus; si tamen eam solâ ratione distinguas, & partes ei ac indiuisibilia positiua substantialia tribuas, discursus totus iisdem omnino vbique viribus procedit.

## CAPVT XXXVI.

*Color qui in superficiebus corporum opacorum dicitur conspici, aut lumen ab iis reflecti, nihil eos qui superficies reales fabricantur, adiuvant.*

**Q** Vintum argumentum Capitis XXXIII. me olim terruit; sed larua tantum fuit, quam iamiam ei exueimus.

*Superficies alba, inquit Suarez, prout obicitur visui, non terminat visionem secundum aliquam profunditatem, etiam indeterminatam, ergo secundum solam superficiem.* Tom. 2. disp. 40. sect. 5. numer. 1. 1. Metaph.

Conatus tamen olim est Gregorius Ariminensis discrimine satis ingenioso respondere.

*Duplex, ait, potest esse sensus antecedentis. Vnus est, quod aliqua res quæ est lata & non profunda videtur. & iste sensus est falsus. Alius est, quod corpus ipsum videtur secundum quod est latum, & non secundum quod est profundum: id est, visione quâ mediante cognoscitur, quod ipsum est latum, & non cognoscitur ipsum esse profundum. & in hoc sensu contingit antecedens esse verum: sed non sequitur, quod alia res est superficies, & alia profunditas. Acute, sed tenuiter nimis, nec implet mentem.* In 2. d. 2. q. 2. a. 1.

Dicent enim aduersarij: verum quidem esse, quod intellectus occasione visionis albedinis in pariete determinetur, ut parietem secundum latitudinem, non secundum profunditatem cognoscat; sed tamen in quo præcisè subiecto residet illa pars albedinis, quæ respectum essentialem visionis ad albedinem parietis terminat? Si in solâ superficie; iam triumphant, & realem superficiem inuenerunt: si in aliquantulâ corporis profunditate; ergo visio intrat & scrutatur profundum opaci, quod fieri nequit, si corpus omnino est opacum. Quis non iuret hoc argumentum inuictum esse? Vinci tamen nec difficultè potest, si antè inspiciamus, quid alios oportet de illâ coloratâ superficie philosophari.

Inprimis quæro ab istis, quam albedinem cernere se putent in aduerso pariete. Dicent, albedinem superficalem, non corpoream, id est, eam quæ in superficiem, non quæ in corporis profunditatem, nata est recipi. Igitur non nisi terminum indiuisibilem albedinis, nullam autem partem integram eius vident; cum tamen indiuisibilia illa qualitatum sensibilium, tam intensiua, quam extensiua

(id est, quæ partes intensivas aut extensivas earum terminant aut copulant) non videantur esse sensibilia per se, sed tantum gratiâ partium qualitatis quas afficiunt. Veluti enim vniones partium albedinis non mittunt in oculos sui speciem, per quam proximè videri possint, sed solum officio vinculorum funguntur inter illas partes, quæ speciem iaculantur; ita puncta, lineæ, superficies quæ copulant partes albedinis, non videntur ad alium usum reptæ, quam ut essent medijs quidam articuli, ad quos appellerent & terminarentur adstantium utrimque partium vniones. Vnde non magis, quam ipsæ vniones, videntur ullam sui speciem visibilem iaculari. Si verò superficies colorum copulantes per se videri non possunt, neque superficies terminantes poterunt; cum eiusdem prorsus cum superficiebus copulantibus rationis sint.

Deinde superficies albedinis, si speciem sui mittit, hæc etiam species tantum erit superficialis, id est, inepta aliter quam in longum & latum, sine profunditate diffundi; quod tamen omnino fallum, quia species albedinis parietis in profunditatem oculi & aeris medijs recipitur, & dilatatione sui versus omnem dimensionem, eam implet. Si verò contendant, colorem superficiale esse eiusdem speciei cum partibus quas secundum extensionem copulat aut terminat, demus id ipsis iam, etsi perperam & inconsequenter philosophentur. Nam, ut nuper aiebam, sic se habent indiuisibilia ista ad suam qualitatem, quomodo puncta, lineæ, & superficies ad corpoream quantitatem, & materiæ primæ indiuisibilia ad substantialem materiæ molem. vnde negare superficiem coloris esse diuersæ rationis à partibus coloris, est reuerà talia indiuisibilia è qualitativis expungere. Sed tamen dissimulemus iam.

Vident ergo ipsi solum, ut aiunt, superficiem unicam albedinis, id est, colorem omnium quos imaginari quis potest, tenuissimum, & in subiecto quidem diaphano (nam prima opaci superficies diaphana est, inquit, non opaca; aliàs non reciperet lumen: ) vnde totus ille color pellucebit, & superficies illa parietis, ex parte medijs diaphani speciem visibilem transmittentis, potius se tenebit, quam ex parte obiecti visionem terminantis: veluti etiam superficies aeris contigui, quæ superficiem illam parietis penetrat, propter similem suam perspicuitatem, ad medium transparens, non ad obiectum visibile spectat. Itaque tam tenuis, & diaphana parietis superficies sistere, ut sic dicam, in se visum non poterit, sed transmittet usque ad corpus, quod tenuissimo & pellucidissimo veluti aranearum

flamine

flamine inuoluit. Quod hinc etiam ostendi potest: quia superficies parietis non protuberat supra proximas profunditatis partes, sed intra situm earum recedit (nam aliàs extensionem profunditatis augetur,) vnde si species visibilis à superficie parietis emicare ad oculum potest, etiam à parte profunditatis determinatà vel indeterminatà poterit, intra quam superficies illa se abscondit: nam æqualiter, & per idem omnino medium superficies & talis pars ab oculo remouentur, ac consequenter ex quo intervallo vna speciem iaculatur, altera, nullo opaco maiori occurrète, iaculati poterit: aut si pars opaco aliquo prohibeatur, etià superficies parti implicita & inculcata, per eiusdem opaci obstaculum trahere speciem non valebit.

Vnde, si res ista satis altè inspiciatur, superficies parietis nihil confert omnino ad visionem eius. nam, vt iam ostendi, sine parte aliquà profunditatis videri non potest. Si autem pars immediatè videri possit, detrahat Deus parietis superficiem, per quam pars ista profundi tralucet, corpus nihilominus parietis cum albedine suà corporèa immediatè visibile remanebit.

Deinde speciem aliquam venire etiam ex profundo, probatur manifestius ex coloribus mediis. Nam isti quamdam opacitatis mixturam, quæ tantum in profundo, non in summà superficie, reperitur, habent: vnde non color medius superficiiei (imò in superficie nullus videtur inesse color medius, cum ibi opacitas non sit, vt dixi, quæ debet coloribus mediis in eodem spatio & subiecto permisceri,) sed profunditatis color speciem viroris, rubedinis, &c. iaculatur, & per eam ab oculo conspicitur.

Itaque falsum est, in quocumque opaco visibili, solam coloris superficiem videri: & quicumque id asserunt, loquuntur (vt Aristoteles non raro) de superficie non Mathematicà, sed vulgari; vulgus enim superficiem vocat tenuem, sed diuisibilem tamen in profundum, rei alicuius summam cutem. imò I C. arbores & plantas, quæ super soli faciem nascuntur, appellant soli superficiem; & vitis vineæ, seges arui est superficies. Et profectò, si Philosophi rogentur, quid concipiant pro superficie illà coloratà, si in se redeant, & ex intimo sensu loquantur, dicent se tenuem aliquam velut membrulam, & supremam corporis cutem, quæ ceteris partibus paulisper emineat; apprehendere, & alia addent, quæ satis significabunt, eos non Mathematicam, sed pinguiculæ alicuius alterius superficiiei conceptum habere.

Quid ergo nos, aduersariosque nostros dicere hinc oportet? nam idem

L. 13. D. De  
seruit. præd.  
rustic.

idem prorsus onus utrisque incumbit, quandoquidem ad videndum aliquod corpus, inutilem esse superficiem Mathematicam, statim ostenderimus. Qui in hanc rem valdè penetrare conatus sit, neminem umquam meminisse legere; nisi quòd Ludovicus Coronellus à centum ampliùs annis, maximo mendacio, quo lyncem per medijs montis crassitiem, visum traicere posse affirmat, ad verum, ut opinor, mihi in parte præiuerit.

Lib. 3.  
Phyfic.

*Lumen, inquit, productum à corpore luminoso in corpore opaco non transparente, non est tantum superficiale; imò est profundum, & partes interiores corporis opaci illuminantur. nec est possibile dare aliquod corpus ita opacum, cuius superficies illuminetur, quin partes etiam interiores lumen suscipiant: quia & per poros lumen diffundi potest, & quando pori non ponerentur, deberet tamen fieri interior illuminatio. nec admittitur, quòd sit corpus aliquod ita solidum vel densum, quin lumen possit per partes interiores diffundi. Et inde est, quòd lynx ex altera parte montis visibile positum potens est videre, quandoquidem visibile per interiores partes montis illuminatas, usque ad oculum lyncei producit species visibiles.*

Epist. ad  
Philbert.  
Pignonii.

Et Io. Bapt. Benedictus ad eruditum quemdam: *Neque te ignorare volo, inquit, lumina reflexa colorata, non reflecti à puris proprijs, superficibus corporum coloratorum, eò quòd pauca corpora tam opaca reperiuntur, ut immediatè lumen à superficie propriè reflectant, sed lumen penetrat aliquantulum dicta corpora, & ita illorum colore afficitur: ubi verò non penetrat, non coloratur colore corporis illius.* Hanc autem penetrationem & colorationem luminis, adeò necessariam ad visionem coloris existimat, ut perfectissimorum quorundam speculorum superficies non cernantur, si laevigata & polita sint secundum continuitatem suarum partium, radio tamè non profundante.

Et profectò, si cogitemus, quòd minima profunditas, ut, exempli gratià, tenuissimæ araneolæ telæ, sit in tenuiores & tenuiores alias membranas sine fine divisibilis, non mirabimur, si solis aut quodcumque aliud lumen, metalli etiam alicuius cutem, quæ centies fortè millesimam partem profunditatis aranæ nondum adæquat, valeat penetrare. Quod manifestius apparebit, si (quod naturæ consultissimi probant) opacitas corporum quæ respuunt lumen, ex certà partium interiorum & inæquabili positione, in quâ radius nimis sæpè offensat, nascatur; ita ut opacitas in profundo, eodem parè modo radios frangat & dissipet, quemadmodum asperitas in superficie.

Id



Id enim, si ita est, facile intelligi potest, quomodo tenuissimam saltem aliquam profunditatis laminam irrumpere, & ibi mox, (plurimarum in angusto partium compositurâ inæquali eum frangente) deficere radius possit. Ita enim niuem, scobem, & quemvis puluerem, ob similem quodammodò particularum situm, & internam veluti asperitatem, maximè opacum esse, & contumacissimè respuere traiectum luminis vîdemus. Idem in glacie comminutâ vîsu venit. nam integra & continua, ob æquabilem partium posituram, tota pellucet, contracta verò & farinulenta radium ad interiora non admittit, sed reflectit innumeris parvis superficiebus quas in ambitu habet & soli obicit: & dehinc est, iste farinæ candor, qui in integrâ glacie nullus apparet.

Itaque iam in antecessum affirmo, quod alibi pluribus demonstramus, nullum corporis colorem secundum profunditatem omnino indiuisibilem, posse humano oculo videri. Quid si ergo corpus tam constrictum & opacum fuerit, ut à fronte statim primâ lumen excludat, inquires, an conspici fortasse non poterit?

Sanè non poterit. nam si nulla vel minima profunditas lumen accipit, pars coloris profundior (nam in omni quantumvis tenui colore, particula vna magis in profundum, quàm altera recedit) speciem per opacum traicere ad oculum nequibit.

Sed hoc manifesto experimento refelli potest, inclamabunt: quis enim vmquam corpus aliquod ob nimiam opacitatem, in summâ superficie inuisibile est expertus?

Dicam ubi tu ipse sis expertus, ne alio teste sit opus. Campanarum nostrarum æs, in superficie suâ cineritij ferè coloris, facile vides, speculi verò ex eo facti superficiem coloratam non vides, sed lumen tantum reflexum à tali speculo: secus videlicet atque in vitreis, aut crystallinis nostris speculis, in quorum profunditatem se immergit radius, & internum vitri colorem incitare & iuuare ad speciem è profundo iaculandum potest. Igitur aio, æs illud, siue aliud quodcumque corpus ita opacum ut nihil luminis admittat (quamvis talia pauca sint, ut statim dicebat nobis Benedictus) non fore colore suo & sibi inhærente visibile, sed solum circumfusum ei externum lumen aspici.

Color ergo campanæ, antequam limam & polituram senserit, facile conspicitur, quia summa eius cutis paullo fungosior est, & in quibusdam veluti æris recrementis lumen tenuissimè saltem acci-

R

pit:

pit: vbi verò facies detrita est in speculum, color ille æreus euanesceat, nec ampliùs aspici valet.

Dices, saltem lumen in speculo tali infusum conspici: sed illud non penetrat in eius profunditatem; ergo hæret solum in summâ omnino & Mathematicâ superficie.

At profectò non facit, sed si tanta est & tam morosa speculi opacitas, vt ne hilum luminis admittat, totum lumen, sine dubio, extra speculum in circumfuso aëre remanebit.

Quomodo igitur reflecti potest, inquit, cum lumen reflexum, ab eo quod superficiæ speculi inhæret, produci debeat?

Resp. Nullum speculum potentiùs lumen reflectere, quàm omnino opacum. hinc enim chalybea & metallica specula omnium optima sunt; quia nihil, vel minimum luminis intra se sorbent, sed totum regerunt. Lumen verò reflexum non à lumine speculo inhærente, sed à sole & agente ipso principali efficitur, quod directam actionis suæ extensionem, ab occurrente opaco interpellatam, actione reflexâ nititur compensare. Quod vel ex lege ipsâ reflexionis liquet, quæ fit semper ad angulos pares angulis incidentiæ. id est, si radius directus angulo recto in opacum incidat, reflexus in ipsum recurrit, & eodem angulo resilit versus illuminans: si obliquè incidat, obliquatur etiam reflexio, & cum superficie opaci parem angulum aperit, cum angulo quo radius directus inciderrat. vnde apparet vniùs & eiusdem agentis esse opus, nec vlla ratio superesse videtur, cur lumen superficiæ speculi, non vndique potius in orbem radiaret, quàm actionem suam ad angulum illum restringeret, & sese sic conformaret ingenio agentis directi.

Nullo igitur experimento, aut bonâ ratione extorqueri potest, aut colorem, aut lumen quod in corporibus cernimus, sustentari ab aliquâ secundum profunditatem omnino & Mathematicè indiuisibili superficie. Nec cetera quæ de corporibus nigris, quæ opacissima fortè omnium sunt, & alia pauca quæ obici possunt, me valdè mouent, & in promptu est confutatio.

Sed cur potiùs non dicimus (putet quispiam) colorem corporis opaci è profundo in aërem proximum illuminatum actionem suam inchoare, etiam si nihil luminis intret profundum opaci? Nam licet nulla sit pars coloris quin duabus aliis constet, quarum vna sit profundior quàm altera, & proinde sit intra opacum sepulta; potest tamen quælibet posterior partem antecedentem in producendâ specie visibili fortè adiuuare, nullam actionem in medio opaco.

opaco vsq; ad aërem exercendo, sed incipiendo proximè actionem suam foris, in aëre ipso corpori opaco circumfuso. nam hoc pacto partes ignis interiores exterioribus, in calefaciendo aëre vicino, opitulantur, etiam si in partes ignis intermedias nihil caloris producant, ne simile in gradu agat in simile.

Hæc videri possunt non ineprè dicta, sed mihi displicent. nam istâ ratione, totius crassitudinis parietis colorem semper aspiceremus, quandoquidem nulla pars albedinis in profundo parietis demersa, tam longè à primâ, quam videmus, distet, quin faciliè eam in actione & productione speciei possit iuuare. si autem speciem ipsâ, quamuis cooperante primâ albedine, iaculatur, poterit per eam conspici; nam species oculum ad visionem eius coloris determinat, à quo ipsa producitur. Quod etiam assertur de igne, est ambiguum. certè, ut sit, in colore non inuenit locum; cum omnibus experimentis probari possit, nullam coloris particulam mittere vñquam speciem sui per opacum, aut proximè trans opacum actionem suam in distans inchoare. aliàs enim homo foris in lumine solis stans, ex cubiculo per medium murum posset conspici, & ipse speciem sui in cubiculum iaculari.

## CAPVT XXXVII

*Propter Vbi Angeli, aut animæ rationalis indiuisibile, non sunt insuenda magnitudini positiua indiuisibilia. Sine indiuisibilibus etiam termino motus, vel soni, retineri & explicari potest Physica efficientia gratiæ in Sacramentis.*

**S**extum argumentum Capitis xxxiii. contendit, Angelum & animam rationalem posse existere in puncto; igitur puncta aliqua esse in continuo.

Sed negant id quotquot puncta & indiuisibilia respuunt, nec pauci etiam, qui ea admittunt, alij verò sententiæ ambigui sunt.

*Quis enim scire potest, inquit Vasquez, an modus ille (præsentix angelicæ) limitatam naturam habere debeat ad partem corporis diuisibilem, & ei solùm substantiâ Angeli uniat, vel unire etiâ possit punctat.* Tom. 2.  
1. p. d. 192.  
c. 2.

Itaque si res ista ab existentia punctorum, linearum, superficiarum realium dependeat, præsentiam angelicam istis posse applicari, negare omnino oportet: nec enim magis iis præsens Angelus esse potest, quàm chimææ, quæ nusquam existit.

Nihilominus, si iam supponamus præsentiam omnino indiuisibilem, nullam contradictionem inuoluere, sententia D. Thomæ & communior facile sustinetur, si inter partes corporeæ molis Angelum, non in realibus, sed imaginariis indiuisibilibus constituamus.

Si igitur Angelus nunc spatium diuisibili præsentia occupare, nunc sub præsentia indiuisibili esse potest, numquam tamen per indiuisibilem præsentiam reale punctum, sed imaginarium tantum infidet: quod pluribus in Metaphysicâ differere oportet.

Septimum argumentum ex momentis temporis, puncta magnitudini infuebat.

Sed vna omnium est ratio, & momenta ista inferius tempori etiam expungemus, nec actio momentanea in reale, sed imaginarium momentum incidere debet, vt in sequentibus longius prosequemur. mutata esse, vt nostri, seu *κίνησις*, vt Aristoteles appellat, nihil etiam reale positium partibus motus adiiciunt. aliâs enim momenta positiua interfere tempore etiam oporteret: nam veluti duratio partis motus, est pars temporis; ita duratio indiuisibilis *κίνησις* esset futura momentum temporis.

Alia quædam ex Aristotele, vt quod locum vocet finem continentis, & id genus nonnulla obiiciunt, quæ de fine, siue superficie imaginariâ (vnde, vt quidam putant, locum finem immobilem dicit, cum tamen omnis superficies realis loco transferri possit) accipi nihil vetat, aut de corpore ipso continente, non secundum rem, sed secundum præcisionem mentis, vt longum & latum, non vt profundum considerato.

Atque hæc sententia quæ indiuisibilia magnitudinis, temporis, motus vniuersim respuit, videtur mihi vero propior; sic tamen vt altera, quæ D. Thomæ & Scoti auctoritate nixa videtur, suâ retineat probabilitatem. In Theologiâ etiam magnum habet vsum, quamquam tamen etiam omnia præne, eadem, aut maiori facilitate per indiuisibilia imaginariâ expediri possint.

Vnicum tamen iam occurrit, quod indiuisibile reale videtur postulare, nec ei sufficiat imaginarium. Docent enim Theologi iam non pauci, Sacramenta nouæ legis Physicè, vt instrumenta Dei, efficere gratiam, & in ipso indiuisibili termino formæ prolata, aut applicationis materiæ gratiam istam, totam simul in instanti produci. Si verò in successiuâ verborum prolatione, aut materiæ motu non est terminus aliquis indiuisibilis positiuus, quod agmen partiū succe-

succedentium claudat, nihil in fine absoluti Sacramenti reperire erit, quod à Deo eleuari poterit ad Physicam gratiæ productionem: terminus enim imaginarius, cum nihil sit, ad effectum Physicum nequit eleuari.

Verum plurimi etiam negant hanc Physicam Sacramentorum efficientiam: & perfectò res debilissimo pede fulcitur, si non nisi per indiuisibilia ista positiua valeat consistere.

Nam imprimis incertum est, an motus localis sit res quædam distincta à mobili & spatio: omnes enim Theologi Nominales id negant. Quod si verum esset, nulla indiuisibilia realia, imò nullæ funditus partes successiuæ erunt in materiæ Sacramentorum locali applicatione; hæc quippe applicatio motus quidam localis est. Si igitur verba formæ Baptismi, exempli causâ, ante ablutionem absoluantur, quid in termino ultimo ablutionis, eleuabitur ad gratiæ productionem, si fortè Nominalium schola non fallatur, & motus ablutionis non sit accidens reipsâ diuersum ab aquâ & spatio in quo exercetur ablutio?

Ne igitur Physica Sacramentorum efficientia (si talis aliqua in ipsis est) inter spinas istas Philosophicas adhærescat, & difficulter extricetur, magis cum aliis quibusdam inclino, aut labor, ut dicam, aquam ipsam quæ est materia remota Baptismi, Chrisma, quod est materia remota Confirmationis, &c. in primo instanti imaginario extrinseco immediatè post absolutum Sacramentum, producere gratiam, materiæ verò motum & applicationem (quæ materia proxima solet appellari) esse causam talis productionis sine quâ non, non autem Physicam. Remotæ enim Sacramentorum materiæ, nõ eius applicationi, vim abluendi animam, & gratiam infundendi passim tribuunt SS. Patres. Vulgatum enim est istud Augustini: *Vnde ista virtus aquæ, ut corpus tangat, & cor abluat?* Et hoc Nazianzeni: *Lustrales aquæ, extergendi facultate hyssopum superant.* Vbi aquæ ipsi, non motui eam baptizandis applicanti, vis illa diuina tribuitur.

Deinde actio illa naturalis quæ circa corpus exercetur, & supernaturalem alteram significat, quâ Sacramentum in animâ gratiam operatur, ab aquâ, aut oleo, &c. fit (aqua enim corpus abluit, oleum emollit) non ab eius motu & applicatione, nisi tamquam à causâ sine quâ non. igitur verisimile est, ab eodem principio actionem supernaturalem quæ ad gratiam terminatur, egredi. Quod etiam indicat D. Thomas, ubi ait, *Aquam Baptismi abluendo corpus secun-*

Tract 80.  
in Ioan.  
Orat. de  
Baptisma

*dum propriam virtutem, ablueret animam, in quantum est instrumentum virtutis diuine.*

Si verò successiua materiæ applicatio ante vltimorum verborum formæ pronuntiationem absoluitur, plerique verba ipsa terminantia & consummantia Sacramentum credunt assumi ad gratiæ productionem. Quomodo autem possunt, inquit, nisi in fine pronuntiationis sit aliquod *χρημα*, siue, mutatum-esse positium, quod esse possit Physicum instrumentum Dei?

Respondeo tamen, id non esse necesse. nam vox non sic est in perpetuo fluxu, quemadmodum localis motus, cuius partes inter se repugnant, nec duæ vniquam se mutuò expectant. Probabile enim est, particulas aliquas soni successiuè productas intra idem breue tempus cumulari posse & inuicem expectare. vnde finitâ totâ verborum formæ pronuntiatione, primo instanti imaginario extrinseco, reliquæ aliquæ soni superflites adhuc sunt, quæ à Deo ad efficiendam gratiam eleuari possunt, vt proinde opus non sit terminum soni indiuisibilem ad hunc effectum quærere, vbi soni habemus partem. Quod eodem argumento ostendi potest, quo Suarez, terminorum istorum acerrimus propugnator, totam sonorum seriem aliquo termino indiuisibili concludi contendit.

1. p. 9. 61.  
d. 8. sect. 1.

*Forma Sacramenti, ait, est oratio aliqua, quatenus reddit integrum & perfectum sensum, qui sensus in aliquo instanti intrinsecè consummatur per aliquem sonum, qui in eo instanti additur, & realiter existit, tamquam realis terminus totius soni præcedentis. Cuius signum est, inquit, quia in eo instanti ita consummatur oratio, vt in eo multiplicentur seu efficiantur species in auditu: ergo durat in illo instanti aliquid rei, pertinens ad complementum verborum seu orationis. Quæ ratio, si quid valet, non tantum terminum indiuisibilem, sed partem soni eo instanti superesse & existere probat. nam à solo indiuisibili termino species soni ad auditum non potest multiplicari. partes enim soni sunt, quæ speciem sui iaculantur, non termini indiuisibiles. nam aliàs termini isti soli, & seorsim à partibus audiri possent; cum tamen in sententiâ Peripateticorum non magis sint reuerà soni (et si Suarez statim sic appellauerit) quàm punctu quantitatis sit quantitas. Argumenta etiam, quibus Cap. xx. xvi. solam coloris superficiem videri posse negauimus, huc ex parte retrahi & applicari possunt. Sed quid hîc adhæresco? Ipse Suarez alibi disertè,*

Tom. 2.  
dis. 50.  
sect. 4. M.  
raph.

*Sonus, ait, non habet propriè suam esse in successione consistens: nam reuerà plures partes eius simul manent, & aliquamdiu permanent in esse.*

Deni-

**Denique improbari solidè non potest**, Sacramenta per particulam suam vltimam successiuam, producere gratiam non in instanti, sed successiuè & in breuissimo tempore. Duas enim præcipuè ob rationes negant multi id fieri.

Primò, quia gratia non habet contrarium posituum expellendum ab animâ, & Deus est infinitæ virtutis agens, quod tempore non eget ad agendum.

Sed reponi facillè potest, successionem productionis gratiæ, ex parte solius instrumenti prouenire, quod est ens successiuum (sonus scilicet aliquis, aut motus) nec effectum suum aliter producere potest, quàm particulatim, & ita vti parti causæ instrumentalis pars effectus respondeat, & toti totus. cum enim nulla pars entis successiui intra instans temporis, verum vel imaginarium existat, Physicè etiam aliquid in illo instanti efficere non valet; causa enim efficiens Physica effectui suo necessariò debet coexistere.

Secundò tamen, Verba Sacramentorum, inquit, non operantur, nisi post completam suam significationem; hanc autem non habent, nisi in termino vltimo indiuisibili, qui claudit totius pronuntiationis agmen.

Verum ostendimus antè, vocem aut syllabam nouissimam, finitâ pronuntiatione & significatione totâ, breuissimo tempore fortasse in aëre permanere (quod forsitan ex reliquiis sonitus campanæ probari potest, quas aliquantulo tempore audire perseveramus campanâ quiescente) hunc igitur sonum intensiuè & extensiuè diuisibilem (non terminum soni indiuisibilem, qui nullus est) potest Deus pro Physico instrumento arripere.

Si tamen sonus sit ens tam successiuum, quàm motus localis, nec vllæ vel minimæ in eo partiæ se inuicem expectent, Deus statim ab initio vltimæ syllabæ (quæ etiam sonus diuisibilis & successiuus est) gratiæ productionem poterit inchoare, & syllabâ istâ, tamquam instrumento successiuæ actionis vti, simul tempore quidem quo vltima syllaba & sensus orationis perficitur, sed posterius naturâ; cum prius sit syllabæ sonum pronuntiare, quàm ad aliquid efficiendum assumi. Durabit autem ista successiuæ gratiæ productio quamdiu Deo placebit: nam aliàs quælibet minima successiuæ vltimæ syllabæ particula sufficit ad orationem & sensum eius consummandum. Vt enim oratio plenitudinem significationis suæ habeat, est impertinens, vtrum vltima eius syllaba breuius abruptatur, an longius producat, per continuam partium successiuorum  
soni.

soni eiusdem speciei multiplicationem. Potest igitur Deus minore & minore sine fine, partē integrali successiuā ultimæ syllabæ uti, quia in ipsâ orationis sensus satis plenus & absolutus est, ut opus non sit partibus eiusdem speciei sequentibus, quæ pro libitu pronuntiantis possunt in breue, aut in longum extendi.

Atqui hac ratione, magnâ venisimilitudine potest eorum opinio sustineri, qui gratiam à Sacramentis istis successiuis exhibitant successiue produci. Sed in characteris tamen Baptismi, Confirmationis, Ordinis, productione difficultatem maiorem prouideo. nam gratiam omnes Theologi ex gradibus quibusdam intensiuis, qui successiuè effici possunt, componunt, non pauci verò characterem intensiuè indiuisibilem faciunt: vnde consequens est, ut indiuisibiliter & in instanti postulet produci. Verùm maximā varietate & incertitudine Thomistarum, Scotistarum, Nominalium, & Neutralium scholæ ventilant hunc characterem, & in valdè ambiguo est, habeatne gradus quosdam intensiuos, an non. Si enim in intellectu proxime residet, ut credit D. Thomas, aut in voluntate, ut mauult Scotus, fortasse naturam habituum supernaturalium qui in istis potentiis sunt, & eorum intensionem imitatur. si vero in essentiâ animæ proxime defixus est, res est magis ambigua.

Si tamen gradus nullos intensiuos habeat, non producitur ab instrumento successiuo, & in tempore, sed à permanente, & in instanti, ut ab aquâ, Chrismate, &c. aut vocibus finitâ pronuntiatione paullisper in aëre hæsitantibus. Quod etiam transubstantiationi accommodari potest, si existimetur indecens, ut corpus Christi actione successiuâ sub diuersis accidentium panis & vini partibus constituatur: potest, inquam, transubstantiatio fieri tota simul in ultimo instanti prolotionis verborum, ut docet D. Thomas; verùm non à termino aliquo positiuo soni, sed ab extremis & fugitiuis verborum reliquiis, quæ finitâ prolotione, minimo tempore supersunt, & illicò disperguntur.

3. p. 7. 75.  
2. 7.



## CAPVT XXXVIII.

*Tempus etiam ex partibus in infinitum diuisibilibus, sine vllâ positiuorum instantium mixturâ componi.*

**H**Atenus ostendimus magnitudinem partibus sine fine diuisibilibus constare, nec vlla iis indiuisibilia copulantiâ intertexenda, aut terminantiâ adtexenda esse; idem nunc de motu successiuo, & tempore oportet demonstrare.

De motu locali sic potest ostendi:

Si spatij quod pertransitur magnitudo habet partes proportionales infinitas, quarum vna prior est, altera posterior; igitur corpus quod sine replicatione per tale spatium mouetur, debet infinitas partes transire, vnâ post alteram, partēque in eo motu successiuæ erunt etiam infinitæ: nam vnicuique parti spatij permanentis, sua pars motûs successiuui respondet.

Idem demonstrari potest in motibus successiuis, qui ad qualitates intensibiles aut extensibiles terminantur. termini enim eorum motuum partes infinitas continent, vnde & per infinitas partes successiuas motûs debent acquiri.

Si verò motus in partibus successiuis infinitus est, igitur & tempus (quod aliud nihil est, quàm partium successiuarum motûs duratio) similem infinitudinem contrahit, vt rectè olim Aristoteles ostendit. Ex punctis etiam è magnitudine positiuis superficiebus, lineis, & punctis, nulla in motu locali *κίνησις*, nec in eius tempore momenta, seu instantia positiua possunt remanere.

Ratio est, quia si nihil est in corpore mobili, aut in spatio, quod non sit diuisibile in infinitum; igitur nihil etiam est, quod indiuisibiliter & sine successione à tali mobili transeat: nam omnis diuisibilis pars spatij à parte diuisibili mobilis per partem motûs secundum successionem diuisibilem pertransitur. Si ergo sint aliqui transitus secundum successionem indiuisibiles, siue instantanei, debent necessariò esse transitus, quibus indiuisibilia corporis mobilis transfiliunt indiuisibilia spatij. sic punctum mobilis transit in instanti punctum spatij, linea lineam, superficies superficiem; si linea tamen in latum, superficiem in profundum, id est, versus illam dimensionem, secundum quam sunt indiuisibiles, moueantur. Nam vt linea transuersum siue in latum mota, lineæ alterius trans-

uerſalis latitudinem (quam habet nullam) tranſiliat, item vt ſuperficies ſuperficii profunditatem (quæ etiam nulla eſt) penetret, non indiget tempore. Omnis verò tranſitus ſpatij diuiſibilis à mobili diuiſibili, aut ſpatij indiuiſibilis à mobili diuiſibili, aut ſpatij diuiſibilis à mobili indiuiſibili (id eſt, ſi alterutrum, vel ſpatium, vel mobile ſit diuiſibile) ſit in tempore. Igitur ad indiuiſibilem tranſitum requiritur indiuiſibilitas vtrimque, tam ipſius mobilis, quàm ſpatij. vnde ſi mobili & ſpatio nulla intertexta ſunt indiuiſibilia, nulla etiam in motu *κίνησις*, nulla in tempore poſitiua inſtantia poterunt eſſe.

Simili modo, niſi in qualitativis, vt calore, exempli cauſſa, ſint termini quidam indiuiſibiles, qui graduum intenſionem aut extensionem copulent, vel terminent, nulla etiam in motu alterationis *κίνησις*, aut in eius inſinſeco tempore inſtantia erit reperire. nam omnes partes caloris diuiſibiles acquiruntur per alterationem ſucceſſiuè, nullæ in inſtanti.

Poſſunt etiam inſtantia copulancia temporis iſdem ſerè argumentis, quibus ſimilia magnitudinis indiuiſibilia reſelli.

Nam ſi partes temporis præteritæ & futuræ concurrant & vniantur ad inſtans, vt partes lineæ ad punctum, vt paſſim docent, eodem modo inſtans partibus extremis temporis intimè aſſiſtet, quomodo punctum copulans lineæ partibus aſſiſtit, id eſt, extensionem ſucceſſiuam nullam partibus præteritis & futuris addet, ſed intra durationem earum ſucceſſiuam vtrimque ſe retrahet, & duplici duratione, vnâ intra præteritum, alterâ intra futurum, quodammodò replicabitur; vti Capite xxxiv. punctum intra partes lineæ quas copulat, replicandum dicebamus. vnde momentum, quod vocamus præſens, reuerà ſimul præteritum & futurum potius erit.

Reponent nobis, inſtans præſens inter præteritum tempus & futurum eſſe medium, & extra vtrumque conſiſtere. nullas enim partes ſucceſſiuas continet, cùm omnis omnino, etiam minutiffima temporis pars, prius & poſterius habeat.

Verùm hæc imaginatio gemella & ſimillima eſt illi, quæ inter partes lineæ, & extra ipſas, ita punctum abiungit, vt ſpatium reuerà medium obtineat. quod ſi foret, nulla ſuperelſt cauſſa, cur tempus non componatur ex meris inſtantibus, vt & linea ex puris punctis. Si enim inſtans durationem inter partes temporis mediam habet, igitur aliquam maiorem extensionem, ſaltem indiuiſibilem, tem-

pori

pori addit, & indiuisibile diuisibili (& consequenter etiam indiuisibili alteri) additum, aliquid maius & extensius faciet.

Corrigenda igitur hæc imaginatio tam circa momentum præsens, quàm circa punctum est, nisi sententiam Aristotelis in atomos Epicuri funditus velimus dissoluere.

Aliter ergo respondet Hurtadus. Momentum præsens non distrahi à præterito & futuro, sed potius præteritum & futurum attrahi ad præsens à momento. Si inferas, sequi inde, partes aliquas temporis præteriti & futuri sibi coëxistere, & intra momentum præsens colligi, quod est impossibile, quia omnes partes temporis sunt successiue; respondebit: *Nullam partem determinatam posse simul totam esse, ratione successionis, sicuti ratione impenetrabilitatis nulla possunt esse simul in eodem loco: at verò partes indeterminatas posse coëxistere, & se tangere.* Diff. 15.  
sect. 5.  
subsect. 1.  
Physic.

Sed frustra nititur. nam omnes, sine vllâ exceptione, temporis partes (vocet determinatas, vocet indeterminatas, aut quomodo-cumque lubet) successiue sunt, nec patiuntur se teneri intra angustias momenti, vti nec vllæ omnino lineæ partes naturaliter redigi possunt intra spatium puncti.

Deinde, momentum copulans videtur inutile & ineptum ad officium ad quod solet destinari, videlicet, ad copulandas verâ & reali continuitate extremas vtrimque temporis partes. Quando enim momentum præsens existit, nullæ ei vtrimque coëxistunt partes temporis; præteritæ enim iam elapsæ sunt, futuræ nondum appulerunt: igitur momentum vtrimque à partibus abscissum in medio relinquetur, cum res existens extrema non-existentia realiter vnire non possit.

Verum; *hoc est rudis ingenij*, inquit Hurtadus, *difficultatibus ita succumbere, ut aperit ostendant illis esse impares vires, nec se posse continens filum deducere, sed camenta ferre, lapides, & arenam sine talce. nam propter difficultates componendi tempus, illud relinquitur satis incomptè incompositum.* Quibus igitur argumentorum tibicinibus, Hurtade, hanc difficultatum molem sustines?

*Primo*, inquit, *tempus habet veram & realem compositionem, & est una entitas per se, & non aggregatio ex pluribus, quia motus quocalum mouetur est vnus; sed non est vnus simplex, ergo compositus.* Sed petit principium: nam de motu cæli par est omnino, imò eadem difficultas.

*Secundo*, ait, *probatnr, quia continuum permanens habet compositionem*

In 1. d. 1.  
q. 1. a. 1.

*sionem realem per unionem distinctam à partibus, ergo & continuum successivum. Sed latissimum est discrimen: nam partes continui permanentis stant, & simul coëxistunt vt possint reali continuatione inter se coniungi, partes verò temporis in perpetuà fugà sunt, nec vna alteram expectat, vt possit à sequente apprehendi, & ad realem copulam venire. Verius igitur cum arenà sine calce, quàm cum continuo filo tempus comparasset. Itaque qualiscumque ingenij fuerit Hurtadus, numquam, opinor, euadet Gregorij Ariminenlis antiquum hunc risum & dentem. *Quod addunt, inquit, de continuatione partium temporis ad instans quod actu est, non est intelligibile: quoniam quod omnino nihil est, nulli enti vel non enti continuari aut copulari potest: alioqui vna longa chorea posset fieri de hirco-cernuis, & tragelaphis, & chimæris; quod absurdissimum est. Et cum Doctor quidam ei respondisset, quod ens, quod numquam fuit ens, nec umquam erit ens, nulli copuletur; tamen non ens, quod aliquando fuit aut erit ens, possit alicui copulari, optimè ei reposuit: Secundum hoc sequeretur, quod possibile esset, albedinem corruptam vel annihilatam, & vnā causandam continuari, & copulari alieni, & esse vnā albedinem numero; quod nullus diceret.**

Itaque difficulter omnino vera continuitas & vnio partium cuiuscumque entis successiui (quidquid conentur) retineri potest. Sinamus igitur id nobis extorqueri; nam ad explicandum Peripateticum tempus, tali chimæricà partium fluentium vnione & concatenatione non est opus.

Momenta etiam inchoantia, & terminantia partes temporis sine vsu vllò bono sunt: nam, vti magnitudinis partes à seipsis initium & finem habent, ita possunt partes motus & temporis. Rescindat enim Deus primum & vltimum instans temporis, non idcirco corripietur, aut longius effluet; quemadmodum reuulsis vtrunque à lineà punctis, ipsa nec breuius nec longius spatium occupabit. Tempus igitur momento terminari nihil est aliud, quàm negatione vltioris extensionis successiuæ vtrimque finiri.

Argumentis pluribus rem istam onerare possem, sed nihil opus, & vereor quorundam tenebris aliorum lucem infuscare. Denique totam sententiam nostram explicabimus, dissoluendo argumenta quæ aduersus Aristotelem & Stoicos texunt Epicurei & Plurarchus.

## CAPVT XXXIX.


*Argumentum primum Geometricum, quo Aristotelem  
oppugnare potest Epicurus.*

**E**Os qui indiuisibilia, aut sola, aut partibus permixta, magnitudini ac tempori inculcabant, haecenus oppugnauius, sed  
*Cadimus, inq., vicem praebeamus crura sagittis.*

Repugnant, inquam, ipsi acriter, & non crura tantum, sed iugulum etiam Aristotelis petunt, quem iam protegere satagemus. Machinas tamen Archimedis, aut Mathematicas (licet iis ipsi toties lacessiti) quibus resisterent, nullas adhuc ab Epicureis vidi. ne tamen nimis imparibus armis nobiscum compugnent, tormentum etiam aliud tale nos ipsi in caput nostrum à Mathesi fabricabimur.

Euclides demonstrauit, inter rectam lineam contingentiae circuli & circulum non posse rectam aliam, quae angulum contingentiae diuidat, interponi; igitur angulus ille contingentiae est indiuisibilis, ac proinde potest inter duas lineas in angulum concurrentes, spatium solum punctuale interici. vnde tria puncta sibi proxima & immediata erunt in tali continuo: scilicet duo vtriusque puncta linearum concurrentium in angulum, & medium in extremo anguli sinu punctum, quod vtriusque lineae puncta inter se connectit. Sed res ista oculis, quam intellectu solo, cer- ni mauult.

Sit ergo recta BC, tangens circulum AEDH, in puncto A. quod est extremum diametri DA. Demonstrat Euclides aliam rectam non posse interferri inter lineam contingentiae BC.



S 3

&amp; cir-

& circulum  $AEDH$ . quin intra circulum cadat, ac proinde angulum contingentiae  $BAE$ . per nullam lineam rectam posse diuidi, ideoque illum angulum esse minorem quocumque angulo acuto rectilineo, seu qui duabus lineis rectis continetur. Nam quantumcumque acutum rectilineum acceperis, is semper sine fine in angulos minores rectilineos per lineas rectas interpositas diuidi poterit. Vt sit acutus rectilineus  $FAC$ . poterit diuidi per lineam rectam  $AD$ . item  $AE$ . & ita descendendo, & inclinando alias rectas versus  $AF$ . sine fine.

Cum igitur possit angulus acutus rectilineus in infinitum angustior & angustior dari, nec tamen ullus perueniat ad angustias & paruitatem anguli contactus  $BAE$ . in schemate precedenti, signum est, illius anguli angustias infinitas & sine quantitate esse, id est, vnicum punctum inter lineam  $BA$ . & segmentum circuli  $AE$ . in extremo angulo, iuxta punctum contactus  $A$ . interiacere.


Hoc argumentum ita olim Iacobum Peletarium nobilem Geometram, & Euclidis commentatorem conturbauit, vt diceret:

Comment.  
ad prop. 16.  
lib. 3. Euclid.

*Mihi sane in mentem subijt prima specie, Geometriam non satis sibi constare, imò adeò repugnantia in se admittere. Primum enim extra intelligentiam est, vt inter quantitates minima dari possit, qualem hoc loco angulum, quem dicunt contingentia, seu rectius, contactus, minorem omni acuto posuimus. Nec aliam euadendi viam repetit, quàm, vt dicamus, inquit, lineam rectam quæ circulum tangit, cum peripheriâ angulum non efficere: scilicet angulum  $BAE$ . nullo modo angulum dici debere. Omnis enim angulus in sectione consistit, non in contactu.*

Sed hoc profectò eludere est, non dissoluere difficultatis nodum. Nam inprimis omnes alij Geometrarum talem angulum contingentie, vocant reuera angulum, nec ad anguli constitutionem requiritur necessariò duarum linearum intersectio, sed sufficit contactus, qualis est inter lineam rectam & circulum.

Dein-



Deinde, non vocetur angulus, negari tamen nequit, quin inter lineam talem & circulum intervallum aliquod sit, quod videtur ultra indivisibile puncti spatium non extendi. Et hæc fuit causa, cur nuper Capite xxxiv. Reverendissimus D. Paulus Aresius negaret, virtute etiam diuinâ posse corpus perfectè sphaericum fabricari: quia, inquam, inter ipsum & planum quod tangeret, spatium iuxta punctum contactus utrimque interpositum, non excederet latitudinem unius puncti; quod cum Aristotele & omnibus Mathematicis reputat impossibile. Quidquid enim iam de tactu lineæ rectæ & circuli philosophamur, in contactu etiam sphaeræ & plani habet locum: nam sphaera per lineam suam aliquam circularem tangit lineam rectam extensam in plano.

Verum, erroris & allucinationis hæc fient manifesta, si angulum contingentiae, non quidem per lineam rectam (quod rectè demonstravit Euclides) sed per curvam ac circularem diuidi posse cogitemus. Nam in primâ figurâ, linea BC. cum omnibus circulis sibi subiectis, tam parvis quàm magnis, angulum contingentiae, qui per lineam rectam diuidi non potest, constituit, & tamen circulus superior seu maior diuidit angulum contingentiae circuli minoris, estque pars eius. Ut angulus BAG. est tam per lineam rectam indivisibilis, quàm angulus BAF. aut angulus BAE. licet maior sit quàm ipsi, & ab ipsis diuidatur. Nam duo circuli superiores ducuntur per idem punctum contactus A. ac proinde necessariò diuidunt angulum BAG. circuli inferioris. Possunt etiam alij sine fine circuli maiores circulo AEDH. describi, qui omnes per punctum contactus A. transeant, diuidantque in infinitum angulum illum contactus. Ex quibus liquet, angulum contingentiae non continere spatium punctuale absolute indivisibile, sed solum quod per talem lineam, videlicet rectam, diuidi non possit; quemadmodum potest omnis, quantumcumque parvus, angulus acutus rectilineus. Ut in secundo schemate, non tantum angulus rectilineus FAB. qui rectus est, sed etiam anguli rectilinei acuti FAC. FAD. FAE. sine fine in angulos acutos minores, per lineas rectas, à puncto A. ductas, queunt diuidi.

Sed cur etiam angulus contingentiae, inquires, non potest per lineam rectam diuidi? Respondeo, quia inter lineam rectam & circularem continetur. Nam linea circularis gibbo illo quo intra anguli aream extuberat & procurrit, est causa, cur linea recta, quæ à puncto extremo anguli A. in schemate priori, educeretur infra lineam contin-

Lib. 3.  
prop. 2.

contingentiæ B C. ( quæ sit, exempli gratiâ, linea A N. ) tangeret circulum in aliquo alio puncto præter punctum A. ac proinde circulum secaret, unde nec angulum B A E. diuidet, sed extra aream eius ( quæ inter lineam B A. & circulum concluditur ) intra circulum excidet. Linea enim recta, ex disciplinâ Euclidis, quæ duo peripheriæ puncta contingit, necessariò intra circulum transit. Curuitas verò secundi circuli à gibbo prioris circuli non impeditur, cum similis gibbi curuitate assurgat, & prioris contactum, præterquam in puncto A. euitet, unde & angulum eius diuidere potest.

Coronel.  
lib. 8. Ph-  
sic.  
Clau. ad  
prop. 16.  
lib. 3. Eu-  
clid.

Falsum igitur est, angulum contingentiæ punctualem tantum, nec quantum esse, ut existimat Peletarius, & rectè olim Ludouicus Coronellus, ac nouissimè Christophorus Clavius demonstrauit. Nam aliàs punctum reuerà aliquam extensionem quantitati adde- ret, cum angulus contingentiæ angulo semicirculi adiectus angulum rectum absoluat; quo tamen angulo recto angulus semicirculi est minor, si ei angulum contingentiæ demas. Vt angulus semicirculi D A E. minor est angulo recto D A B. solo angulo contingentiæ E A B. quem si ei adicias, angulum rectum D A B. adæquabit; rectus enim ex angulo semicirculi & angulo contingentiæ adæquatè componitur. Si ergo angulus contingentiæ angulum semicirculi augeat, igitur quantus est; nam quantum non quanto, ex omnium Geometrarum & ipsius Peletarij sententiâ, augeri non potest.

## C A P V T X L.

*Argumentum alterum Geometricum, ex præcedentis solutione natum, quod Epicurus in Aristotelem iterum arripere potest.*

VItauimus charybdin, sed incidimus iam in scyllam, ut quispian acutulus videre se existimabit.

Si enim angulus contingentiæ per circulos maiores maioresque in infinitum est diuisibilis, ut planè fatendum in sententiâ Aristotelis; igitur in breui illo inter lineam contingentiæ & circulum spatiolo, infinitæ partes non tantum proportionales, sed certæ alicui æquales, nec inter se communicantes erunt; quod palàm est impossibile; cum tale spatium lineâ rectâ metiamur, quæ infinitas partes



partes non communicantes, alicui assignatæ æquales, sine dubio, nequit continere: talis enim linea in infinitum sine vlllo termino deberet excurrere. Spatium autem illud, futurum infinitum, resumpto superioris Capitis schemate, sic ostenditur.


Possunt, vt fatemur, describi infiniti circuli maiores & maiores sine fine, qui omnes diuidant angulum cōtingentiæ B A G. nec vñquam tam magnus poterit fieri, qui lineam B C. in pluribus punctis, quàm in pñcto A. valeat contingere.

Describatur primò igitur circulus centro I. deinde centro L. tertio centro M. æqualibus inter se interuallis, & ita progrediendo sine fine.

Horum circulorum peripheriæ, ab eâ parte quâ maximè distant, æquali semper interuallo inuicem remouentur (tanta enim est inter O. & P. quanta inter P. & D. distantia;) igitur & iuxta punctum contactûs A. vbi vicinissimæ sunt, pari etiam omnes interuallo distabunt. vnde sequi videtur, inter puncta Q. & C. distantiam fore absolutè infinitam, & tot partes inter se æquales continere, quot sunt interualla peripheriarum, id est, infinitas. Et hinc eueniet illud, quod à se repertum gloriatur Peletarius, miraculum: videlicet, lineam aliquam versus rectam alteram inclinatam, posse sine fine produci, & accedere, & tamen numquam cum eâ concurrere. Linea enim Q R. per circulorum infinitorum æqualia interualla producta, numquam ad punctum C. perueniet, quia nullus vñquam tam amplus circulus transiens per punctum A. describetur, cuius peripheria valeat ad punctum C. pertingere. Simili etiam miraculo linea, quam

T

vocat,




vocat, in infinitum ad rectam alteram paulatim accedit, nec vquam eò vsque pertingere valet.

Deinde Capite xiv. docuimus, corpus sphæricum luminosum, minus opaco, maiorem in infinitum partem opaci illuminare, si ab eo sine fine recedat, & tamen numquam posse tam procul retrocedere, vt ex illâ distantia hemisphærium opaci totum illuminet.

Vt in postremo schemate Capitis xiv. luminosum corpus E. minus opaco F. extremis suis radiis distinguit opacum sphæricum maius in C. & D. punctis. Et quò longius E. ab F. retrocesserit, eò radij P G. & O H. maiorem partem opaci amplectentur; & tamen, si in infinitum recesserit, numquam ad contactum punctorum extremorum diametri A B. pertingent, id est, numquam dimidiam partem sphære istius opacæ maioris illuminabunt. Igitur spatium circumferentia à puncto C. ad punctum A. debet esse absolute infinitum; quia si recessus luminosi E. ab opaco F. per spatia æqualia fiat, etiam radius P G. per portiones æquales à puncto C. versus punctum A. paulatim in superficie opaci serpet.

Verumtamen hæc & id genus plura Matheseos miracula, (etsi primâ fronte aliter) diligenter tamen introspecta, nil ampliùs quàm partes proportionales continui infinitas affirmant. nos verò libenter & vltro damus, tales in omni omnino continui particulâ infinitas cumulari.

Itaque in primo exemplo, falsum assumitur. Nam etsi centra omnium circulorum, punctum contactus A. secantium paribus perpetuò interuallis à se distent, non tamen spatium inter circulum



lum AGOQ. & lineam contingentiae BC. circuli illi discindunt in partes, alicui certae aequales infinitas; quia circumferentiae circularum superiorum, minori & minori perpetuò interuallo, iuxta punctum contactus A. à se mutuò distant. Nec vllà bonà consequentiā colligi potest, circumferentias aequalibus spatiis iuxta punctum A. à se recedere, quia in oppositā circularum parte, quantum D. à P. tantum P. ab O. distat. Igitur ex aequali trium centrorum I. L. M. inuicem distantia, sequitur tantum etiam inter D. & P. quantum inter P. & O. esse interuallum, non tamen inter earumdem circumferentiarum partes puncto A. vicinas: hæc quippe non aequalibus à se interuallis recedunt, sed proportionalibus, adeò, ut quò propius circumferentia aliqua ad lineam contingentiae BC. accesserit, eò minus à proximè inferiori circumferentiā abscedat.

Hoc ergo, & nihil vltrà, argumentum conficit: inter puncta Q. & C. partes perpetuò sine fine minores posse numerari, ideoque lineam QR. si pedetentim per circularum illorum incrementa producat, numquam ad punctum C. peruenturam; quia per partes proportionales, non per aequales, procedit, id est, nihil in Mathesi magni miri accidit: olim enim etiam à Calculatore, & Benedicto demonstratum est, super lineam rectam finitam, motum infinitum, tardius perpetuò per partes proportionales progrediendo, posse fieri.

Io. Bapt.  
Bened.  
disp. c. 12.

Pone enim lineam rectam bipedalem, per eam poterit formica tempore absolutè infinito sic incedere. Primà horà vnum pedē peragret: secundà horà dimidium eius, motu videlicet duplo tardiori: tertià horà dimidium pedis dimidiati, & sic sine fine. Si id fiat, infinitas horas consumet antequam perueniat ad vltimum punctum lineae bipedalis, si in eà sint partes proportionales perpetuò minores sine fine.

Linea etiam conchilis Diomedis non ampliùs euincit, quàm partium proportionalium infinitudinem.

Illuminatio denique corporis sphaerici opaci maioris à sphaerico minore illuminante (ut puta, terrae à lunà) hoc etiam, & ne hilum vltrà, extorquere potest. Nam etsi recessus luminosi ab opaco per spatia aequalia fiat, luminis tamen incrementum per partes spatij proportionales tantum paullatim repit. Itaque in schemate illo Capitis XIV. per recessus aequales luminosi E. ab opaco F. punctum luminis in puncto circumferentiae C. opacum tangens, len-

tissimo gradu , non per partes æquales , sed per proportionales , & continuò minores , versus punctum A. prorepit , nec in æternum ipsum attingit , vt per figuras varias , cuilibet promptum est , periculum facere.

Hæc admirationis sat plena sunt , non diffiteor , sed vera tamen , opinor , & confitenda , nisi in absurditates illas , quas Capite xiv. ostendimus , mauclis te præcipitem dare.

## C A P V T X L I.

*Argumentum tertium Geometricum, quo superficies calorum contiguas Peripateticis obijciunt Epicuræi.*

Lib. 1.  
disp. 23.  
sect. 3. de  
Generat.

**M**Emini qui olim pro Epicuro superficies calorum contiguas mihi , velut grandis tormenti telum , obiectauerit. Negligere tamen potui , vt innoxium , & nullius momenti , nisi Reuerendissimus Paulus Aresius , nuper mihi fortè lectus , ad eius etiam respectum me inuitasset. Igitur , superficies conuexa orbis Saturni , inquirunt , immediatè extra situm superficiei concavæ firmamenti est ; vnde sequitur , indiuisibile indiuisibili immediatum esse , & cum eo quantum & extensionem aliquam constituere.

Simile de lineis argumentum potest contexi. Cogitemus enim arboris truncum in aquà partim , partim in aëre. In hoc aëris & aquæ circa arborem contactu , vna linea circularis in aëre , alterà in aquà est , quæ , quia immediatæ sunt , etiam duas in trunco arboris sibi respondentis immediatas respicient ; vnde fiet , vt tota trunci superficies ex perpetuis lineis circularibus sibi proximis & immediatis contexta sit.

Hoc argumentum non aliter posse dissolui credit Aresius , quàm lineas , & vniuersa continui indiuisibilia repudiando. Sed reuerà potest. Nam Alhazenius & Vitello disertè affirmant vnicam esse in trunco arboris lineam , quam dux , vna aëris , & alia aquæ , circumligant : siue potiùs , tres hic sunt lineæ circulares se penetrantes , & in eandem peripheriam imaginariam incidentes , linea aëris , aquæ , & ligni. Veluti enim superficies aëris contigua aquæ superficiem aqueam penetrat ( aut , veriùs loquendo , vna in spatio alterius est ; ) ita linea circularis extrema aëris quæ truncum arboris

arboris cingit, est in eodem omnino spatio cum summâ lineâ aquæ, quæ in aëris confinio lignum etiam idem ambit. vnde binæ iam simul & coniunctim in spatium tertiz lineæ, quæ est in ligni superficie, se insinuant. Falsum igitur, & contra omnem Geometriam assumitur, cum duobus aëris & aquæ circulis duo in trunco arboris circuli respondere asseruntur. Idem penitus in cælorum superficiebus euenit. In eandem enim superficiem imaginariam cadunt, nec spatio ullâ ratione diuelli possunt, cum omni profunditate careant. Vnde linea per cælorum sphaeras transiens; vnico puncto superficiem vtriusque cæli contigui perforat, nec eas ullâ parte suâ diuisibili tangit. Verè Cardanus: *Quomodo calis iuncti sunt? nam si vna est superficies caua superioris, & conuexa inferioris, quomodo in diuersas partes superius & inferius calum moueri poterunt? Si dua sunt, indiuisibile ab indiuisibili tangitur. Sed duas esse necesse, non tamen quantitatem constituunt: hoc autem sufficit Aristoteli, ne continuum ex non continuo componatur.* Lib. 7. Subtil.

Quantitatem verò non constituunt, quia non coëxtenduntur, sed necessariò collabuntur in eundem indiuisibilem, secundum profunditatem, situm: quod superficiebus loci & locati etiam vniuersim accidit.

Sed linea illa ligni, inquit Aresius, *vel erit in aquâ & in aëre, vel in neutro, vel in altero tantum. Primum & secundum sunt contra experientiam: nam videmus, nihil ligni esse simul in aquâ & in aëre, & multò minùs, extra utrumque. Tertium verò ab ipsis (qui positiuas lineas & indiuisibilia partibus in continuo permiscunt) admitti non potest; quia tunc respondebit vni tantum lineæ, & non duabus. Vitari igitur non potest, quin sint due lineæ immediata, & consequenter, quin superficies ex lineis componatur.*

Sed profectò potest facillimè. Et ex tricorni illo dilemmate, alterutrum priorum cornuum possumus arripere, id est, lineam ligni, vel in aquâ & aëre simul, vel in neutro esse. Si enim in aliquo illud esse dicatur, quod aliquo termino eius indiuisibili tangitur, etsi nullâ eius parte ambiatur, linea trunci, in aquâ & aëre, id est, in vtriusque elementi termino aliquo positiuo est (si tales termini in continuo admittantur,) nec tamen in diuersis locis replicata est, quia aquæ & aëris lineares illi termini se penetrant, & in eodem spatio imaginario confunduntur. Si verò id tantum dicamus in aliquo esse, quod parte aliquâ eius integrali ambitur, linea ligni nec in aquâ nec in aëre, sed in termino & limite vtriusque est. Nec

vllus omnium mortalium tam lynceus est, qui immensam illam punctorum, linearum, superficierum tenuitatem à corporibus suis possit visu discernere, & inde intelligere, an lignea illa linea, aqueâ, an aëreâ alterâ lineâ præcisè circumligetur. Sola ratio, non oculus aut vllus sensus, potest in minutias istas descendere.

Itaque etiamli terminos positiuos indiuisibiles partibus continui permisceremus (quod non facimus) non sequitur, ex talibus solis & immediatis truncum arboris, aut quantitatem cælorum compositam esse. Multò minùs in sententiâ nostrâ qui terminos illos vniuersim respuimus.

## C A P V T X L I I.

*Argumentum quartum, quo ostendere conantur, quantitatem ex infinitis partibus proportionalibus consutam, nullis finibus posse contineri: sed conantur tantum.*

**A** Mathematicis, quas ridere solent, destituti, ad Physicas aut Metaphysicas rationes decurrunt effuso cursu Epicurèi, & his armis credunt Aristotelem se sine remedio iugulasse.

Si partes proportionales non-communicantes, in quouis continuo infinitæ sunt, inquirunt, impossibile est, quin istud sit infinitum actû, & ita extensum, vt nullis terminis valeat contineri. Prima enim pars proportionalis habet aliquam extensionem, secunda non-communicans, siue ab eâ condistincta, etiam habet suam, & ita porro sine fine: igitur infinitæ partes extensiones infinitas afferent, quæ vniuersim in vnam extensionem confluentes, necessariò eam actû infinitam efficient, & omnes terminos & limites talis quantitatis effringent.

Ante responsionem, voces aliquot in hac materiâ, in frequenti vsu, explicandæ sunt.


Partes communicantes vocantur, quæ aliquid idem includunt: vt quantitas pedalis, & dimidium eius. hæ enim distinctæ, sed non condistinctæ sunt. Partes non-communicantes sunt, quæ nihil commune vtrique includunt, sed abscisæ prorsus, & inuicem condistinctæ sunt: quales duæ quantitates pedales, quæ se consequuntur in eadem lineâ centumpedali.

Partes proportionales appellamus, quæ eandem habitudinem seruant

servant ad suum totum. Vt si vna fuerit dimidium sui totius, altera etiam sit; si tertia pars totius, altera quoque sui totius tertia sit. Proportio enim in Philosophiâ & Mathesi, nihil aliud quàm plurium habitudinum similitudo est. Merito itaque partes illæ proportionales vocantur, quæ proportionem, seu habitudinem, quibus tota sua respiciunt, similitudinem custodiunt.

Partes itaque communicantes, in sententiâ Aristotelis & Mathematicorum, in quolibet continuo, omnes inter se æquales, infinitæ sunt. Vt exempli gratiâ, in lineâ bipedali, pedes infinitos, sed in aliquâ parte eâdem communicantes, licet designare.

Sit enim A B. lineâ duorum pedum, in quâ primus pes signe-



tur A C. secundus D E. tertius F G. quartus H I. & ita progrediendo semper, vt inter initium prioris & posterioris pedis, spatium perpetuò relinquatur duplo angustius. Spatium enim D F. est duplo minus spatio A D. & F H. duplo minus D F. Sic verò per partes proportionales in figendis initiis pedum procedendo, numquam poterit ad punctum C. perueniri: vnde nec vniquam ad eum pedem pertingemus, qui vltimus sit, id est, cuius initium in C. & finis in B. vltimum lineæ bipedalis punctum cadat. Sed pedes illi sunt communicantes, non condistincti, quia A C. & D E. communicant in D C. quæ est pars vtrique pedi communis.

Contrà verò, partes proportionales, inter se inæquales, condistinctas in quavis magnitudine, infinitas licet inuenire. Nam in lineâ superiori, ab A. versus C. pergendo, si partes condistinctæ sumantur perpetuò duplo minores patet præcedente (vt D F. est duplo minor A D. & F H. duplo minor D F.) numquam perueniemus ad punctum C. qui est terminus lineæ pedalis.

Partes ergo in eâ lineâ proportionales sunt D F. & F H. nam sic ut D F. est dimidium A D. ita F H. est dimidium ipsius D F.

Itaque argumentum contendit, extensionem inter puncta A. & C. fore absolutè infinitam, si inter ipsa interiaceant partes proportionales condistinctæ infinitæ. Verùm, si tales partes forent alicui certæ & determinatæ parti ( quantumvis minima assignaretur) vt, exempli gratiâ, parti F H. æquales, extensio procul dubio excurreret in infinitum: iam verò, cum partes proportionales eiusmodi sumantur, vt sequens semper sit duplo minor præcedente, infinita.

infinitudo illa non passibus æquis, aut maioribus, sed minoribus progreditur, ac versus minimum descendit, non ascendit versus maximum. Tale verò genus infinitudinis, terminis se claudi patitur: quia, sicuti partes sine fine accumulatur, ita eas sine fine accedit & diminuit, ut proinde una infinitudo alteram castiget, & intra finitos limites cohibeat.

Duplex, inquam, hic est infinitudo, una partium quantitatis, altera perpetui decrementi earum. Si illa sola sine hac esset, in infinitum se quantitas effunderet, quia per partes æquales, aut etiam maiores, incrementa eius procederent: nunc verò secunda infinitudo priorem coercet, facitque ut deorsum, versus indivisibile (ut sic dicam) decurrendo, ita perpetuò partes consumantur, ut ad terminum tandem aliquem appellant, nec ultra effundantur. Quod isto exemplo intelligi potest. Fac aliquam quantitatem esse actu infinitam: ex infinitis pedibus quos continet, licebit aliam magnitudinem concinnare, quæ ad unius pedis extensionem nunquam perueniat. nempe, si ex primo pede dimidium sumas, ex secundo dimidij dimidium, siue quartam pedis partem, ex tertio octauam, & ita porro per proportionalia decrements sine fine pergas. si enim uniuersas istas particulas in unam quantitatem coniicias, unum pedem non implebis.

Itaque tota, aut maxima saltem difficultas, quam intellectus noster experitur in redigendo infinitas partes intra terminos finitos, ex eo provenit, quòd quantitatem in partes æquales, aut notabilis extensionis concidat: infinitas enim illas particularum minutias, quia imaginatio eum sequi non potest, vix concipit. Vbi verò relicta retrò imaginatione, ratio comminuere partes sine fine pergit, nescio quid mihi continuò lucis offunditur, ut videre, aut suspicari saltem facile possim, non esse necesse, ut particulæ tales infinitum spatium occupent (quemadmodum infinitæ partes æquales inter se faciunt) sed capi ac teneri finibus certis posse. Et licet lux ista tam clara & digesta non sit, quin infinitudo illa (quam ideò ubique humanus intellectus reformidat) nebulam aliquam adhuc prætexat; tamen, quamdiu nulla euidens implicantiæ contradictionis inuenitur, talis compositio omnipotentia diuinæ negari non debet. Si verò fieri à Deo potest, certum est, factam esse, ut tot antè aduersus Epicurum argumentis ostendimus. Sed implicat manifestam contradictionem, inquiunt: quia tale continuum ex partibus inter se etiam æqualibus infinitis necessariò debet



bebit constitui. Deme enim ab omnibus maioribus excessum in quo minores excedunt, iam omnes inter se æquales remanebunt. Quid euidentius? quid manifestius? inelamant. Et sanè primo occurfu argumentum terrorem habet. Sed *μορμολυχνη* est, si inspicias, & puerile terculamentum. Certè tamen plus impetûs & formidinis habere oporteat, ut me in fugam coniciat, & retroagat in omnes illas, quas pertransiuimus, Epicuri absurditates, & manifesta præcipitia.

Hoc autem mecum, si voles, animaduertes: eos in omnibus rationibus suis, infinitudinis partium proportionalium obliuisci, & semper numerum aliquem finitum, conceptu faciliorem & cui assueuerunt, præ oculis habere.

Itaque, si numerus partium inæqualium esset finitus, argumentum esset insolubile, quod sponte iam se dissoluit, ubi cogito partes istas inæquales sine fine consumi & decrefcere. Hoc enim infinitum decrementum non finit ullam partem quantumlibet paruum sumi, cui reliquæ omnes possint æquales remanere, cum dentur alix semper sine fine minores ipsâ. Hinc nullus certus excessus est, qui ab omnibus partibus possit demi, ut reliquum manens, in omnibus sit æquale.

Negabunt iterum, scio, se hæc assequi & capere. sed ideò hoc euenit, quia infinitus ille partium decurrentium & se minuendum numerus ante intellectum eorum quodammodò fugit, nec ab eo finit se teneri & comprehendi. vnde omnis intellectus nostri acies & iactus in certum semper & definitum numerum partium cadit.

## CAPVT XLIII.

*Argumentum quintum, quo Zeno motum localem compulſus est negare.*

**H**ic est ille Achilles, qui Zenonem Eleatem perpulit, ut, sensu quamuis reclamante, motum localem negaret, ut Capite 11. diximus.

Si in spatio continuo, inquiebat, sunt partes infinitæ (quod ipse credebat) impossibile est, eas vllò vmquam motu pertransiri, igitur motus localis nullus est. Ita vir iste eruditus maluit tam euidenter in sensum communem impingere, quàm compositionem continui ex partibus infinitis dissoluere. Et licet difficile creditu sit,

V

motum

Lib. de Lin.  
infect. c. 5.

motum seriò ab eo sublatum fuisse; credidit tamen seriò factum Aristoteles, credidit antiquus Commentator eius, qui cum dixisset, *ridiculum & fatuum esse, relicto sensu rationem sectari*, pro exemplo attulit istud Zenonis, *ὅτι ἐστὶ κίνησις, non ἐστὶν κίνησις, non ἐστὶν κίνησις*.

Lib. 6.  
Phyfic.

Vtebatur verò Zeno paradiigmate rotarum in stadio currentium tali, ut narrat Hermolai Themistius. *Si rota currum, que conuoluuntur in stadio, nihil relinquunt stadij, quod non dimetiantur & diuidant, cum diuisio illa sit infinita, & partes diuise sint etiam infinitæ, qui fieri potest, ut finito tempore percurrantur?* Respondent Aristoteles & Themistius, argumentum esse sophisticum, & infinitum potentiâ diuisione cepisse pro infinito actu. Itaque si stadium esset infinitum actu, & infinitos rotæ circuitus contineret, nullo unquam tempore rota ipsum emetiri posset: nunc verò solum potentiâ infinitum est; nam etsi in partes sine fine minores diuisibile sit, certos tamen terminos quibus includitur habet: tale autem infinitum potest finito tempore pertransiri. Itaque si res paulò altius inspicatur, non est magis mirum hoc infinitum tempore finito transiliri, quàm infinitas eius partes intra spatium finitum posse redigi.

Rem totam quàm proximè poterimus ex tenebris suis in aspectum protrahamus.

In primis si spatium tali motu deberet pertransiri, qui in singulis partibus spatij proportionalibus parem moram traheret (ut si in vno pede horâ consumat, & in sequenti pedis dimidio tantum dem, ac deinde in quartâ pedis parte, & sic sine fine eundo per singulas partes proportionales vnâ horâ) proculdubio numquam eiusmodi motu spatium bipedale exhauriri posset. Ratio est, quòd sicuti partes proportionales gradatim in infinitum decrescunt; ita pari passu remittitur & decrescit celeritas talis motûs, cum in qualibet parte proportionali sequente, duplo tardior, quàm in præcedente, sit.

Vnde consequens est, ut celeritas motûs sic relaxata & rarefacta, ut ita dicam, per singulas spatij permanentis particulas, spatio successiuo vnus horæ coextendatur, ac proinde ut numquam motus absoluator, quia infinitæ temporis horæ numquam possunt omnes elabi.

Si verò celeritas motûs non ita proportionaliter cum spatij partibus decrescat, sed vel eadem permaneat, vel aliâ lege diminuatur (ut si secundâ horâ dimidium pedis, & tertiâ iterum tantumdem peragret) duabus horis, aut tribus, aut pluribus (si maius decremen-

tum

tum celeritatis fuerit) finitis tamen, spatium totum bipedale emensum erit. Veluti enim prima celeritas per spatium vnus pedis, horæ spatio, mobile transtulit; ita dimidium eius celeritatis, per dimidium spatij, æquali horæ vnus spatio ipsum transferet, & si iterum repetatur, perducet tandem tertiâ horâ ad finem secundi pedis.

Sed quomodo primus pes peragrari potuit? quâ viâ mobile in ipsum intrauit? quâ semitâ exitum ex hoc labyrintho reperire potuit? Hæ vepres & senticeta sunt, in quibus Zeno adhæsit.

Respondeo tamen, facile fuisse introitum reperire, quia spatium illud pedale principium aliquod habet, quo iniri possit, etiam si nulla eius pars per se primò prima sit. Sufficit tamen spatium illud sine extrinseco terminatum esse, & extensionem aliquam posse assignari, vltra quam non excurrit, vt motus valeat ab eo termino inchoari.

Igitur (quemadmodum in labyrintho) non est difficile hic ostium inuenire, sed exitum per partes infinitas expedire,

*Hic labor ille domus, & inextricabilis error.*

*Ancid. 6.*

Si enim partes infinitæ, quomodo motu finiri & pertransiri possunt? recinet nobis idemtidem, & ad rauium vsque, Zeno.

Verumtamen, quia trans illam partium infinitudinem finem aliquem præuideo, spes est ex huius labyrinthi ambagibus motum tandem posse extricari, & ad finem illum appellere. Itaque veluti partes spatij permanentis infinitæ sunt; ita partes motus successiuæ similem infinitudinem habent. Item sicuti partes spatij, licet infinitæ, per infinita tamen proportionalia decrementsa intra finem aliquem se restringi patiuntur; ita infinitæ partes motus, similibus decrementis accisæ, tandem ad terminum aliquem appellant, ibique conquiescunt.

Rem istam adhuc penitiùs, & in exemplo inspicimus. Spatium pedale, inquebamus, motu vnus horæ pertransitur; igitur dimidiatus pes, motu dimidiatæ horæ, & quarta pars pedis, quartâ itidem parte horæ, & sic sine fine partes motus concidendo & eadem proportionem diminuendo cum partibus spatij. Vnde (quemadmodum statim dicebam) non est maiori admiratione dignum, partes tales infinitas motus omnes tempore finito effluere, quàm partes spatij intra finitos limites contineri.

Imò, fortasse inquiet Zeno: quia partes spatij permanentis non fluunt, sicuti partes successiuæ motus; infinitarum verò partium

fluxus numquam exhauriri potest; veluti etiam infinitum aquarum agmen nullo unquam tempore finito, totum præterlabi valet.

Sed fallitur. non enim ille vnus horæ motus debet comparari cum infinitis aquæ pedibus, qui numquam alueo fluminis effluere possent, sed cum vnico potius aquæ pede, qui infinitas partes aquæ proportionales continet, & tamen omnes successiuè breuissimo tempore ripam præterlabuntur. Sic ergo etiam in motu horario partes infinitæ, sed non inter se æquales, sed proportionales & semper minores sine fine, sibi succedunt, & cum partibus spatij permanentis finiuntur, ac effluunt. Si enim per illam partium proportionalium perpetuam decretionem, ita consumitur extensio spatij permanens, vt archissimis finibus concludatur; cur eodem modo intelligi non potest extensio successiua per particulas proportionales perpetuò sic accidi ac præcipitari, vt infinita illa partium series tandem concidat & tota emoriatur?

Sed alterà etiam viâ rem hanc aggrediamur, & in alias spiras miserum intellectum humanum torqueamus, vt valeat vtcumque ex hoc se labyrintho euoluere. Cogitemus, inquam, mobile primâ sui parte ingredi primam partem spatij: ecce nullam tam paruam partem delibare poterit, quin per infinitarum partium minorum contactum transierit. Licet autem traiectus ille infinitus sit secundum partes proportionales, est tamen simul secundum partes inter se æquales breuissimus. Item, licet, si in omnibus partibus æqualem moram mobile traheret, numquam ex illis angustiis extrahi posset; iam tamen, quia in maioribus diutius, in minoribus minus moratur, & secundum partium spatij decrementa, moræ etiam decrescunt, & breuiiores fiunt sine fine, ecce lux aliqua mihi oboritur, quâ vtcumque suspicari iam valeam, totam illam moram ex omnibus moris conflata, finiri posse eodem modo, quo ipsa extensio spatij, quam moris successiuis perambulât mobile. Cum enim festâ imaginatione, intellectus solus pergit moras, quas super partibus spatij mobile trahit, in particulas successiuas paruitate suâ inimaginabiles, & sine fine se diminuentes concidere, decrescit mihi in inmensum prima mea admiratio, quâ hæsitabam stupidus, quomodo omnes illæ morulæ infinitæ possent aliquando finem accipere. Nam veluti color in quantitate pedali extensus, ab illâ quantitate infinitudinem partium proportionalium, & tamen vnâ finem vtriusque accipit; ita moræ quibus mobile super partibus

quan-

quantitatis spatij hæſitat, infinitudinem in partibus ſucceſſiuis proportionalibus contrahunt, & ſimul intra terminos reſtringuntur ultra quos non effluant. Solùm in eo eſt diſcrimen, quòd partes coloris permanentes, motùs verò partes ſucceſſiuæ ſint, item color quantitati ſpatij, vt ſubiecto inhzreat, motus autem mobili, non ſpatio.

Poſſumus denique tempore imaginario imaginationem noſtram hìc iuuare. Videlicet quòd ſicuti in ſpatio imaginario permanente capacitas quædam eſt (ſic cum fundamento in re imaginamur) quæ anguſtiſſimo ſpatio permanente infinitas partes proportionales magnitudinis poſſit recipere; ita in tempore imaginario, eàdem ratione capacitatem concipimus, quæ breuiſſimo ſpatio ſucceſſiuo infinitas partes proportionales ſucceſſiuas motùs, aut temporis realis valeat comprehendere.

Sed tamen reuerà, priùs oportet oſtendere, nullam in infinitudine illà partium realium permanentium & ſucceſſiuarum contradictionem inuolui, quàm poſſimus concipere in ſpatij permanentis & temporis imaginarij capacitatem poſſe infinitudinem partium realium recipi. Si enim nulla continui compoſitio, præter Epicuræam eſſet poſſibilis, oporteret in ſpatio imaginario tam permanente quàm fluente, imaginari tantum capacitatem ad capiendam realia continua, compoſita ex ſolis atomis, non ex partibus infinitis, quia talia in rerum ratione nulla exiſtere poſſent.

## CAPVT XLIV.

*Argumentum ſextum: Ex tractu globi ſuper planum, aut cuiusvis rei indiuiſibilis motu colligunt, magnitudinem ex ſolis indiuiſibilibus compoſitam eſſe: ſed nituntur fruſtrà.*

**A**rgumentum hoc reputatur vulgò vnum ex moleſtiſſimis. Tangat, inquiunt, ſphæra planum in puncto, & ita per ipſum continuo motu trahatur, vt idem ſphærae punctum lineam in plano deſcribat: Linea iſta neceſſariò ex meris punctis contextitur. nam ſicuti, cum punctum ſphærae quieſceret, tangebatur planum in puncto ſibi adæquato; ita toto tempore motùs, perpetuò per puncta catenatim incedit, cum perpetuò tangat lineam, nec vllibi in parte diuiſibili, ſed vbique in ſolo puncto, tangere poſſit. Ve-

Lib. Κοινῆς  
ἐπιστολῆς.

rum tamen, quàm in sententiâ Epicuri hoc argumentum inutile sit, liquet ex iis quæ Capite xiii. diximus: nam nulla apud Epicuræos potest esse perfecta sphaera, aut perfectus circulus, qui planum in puncto tantum contingere possit. Et Plutarchus in re istâ omnino, aut proximè Epicuræus, clamat, ὅτι ἡ σφαῖρα τῆ ἐπιπέδου καὶ συνεχὴς ἀπὸ τοῦ ἀπὸ τοῦ, quod sphaera planum in puncto tangat, & grauitèr de Stoicis conqueritur, qui τὰ τερα βιάζονται νοεῖν ἡμᾶς, volunt nos per vim cogere, ut id imaginemur & intelligamus. Probat autem planum in parte diuisibili tangi, quia si sphaera purpurea per planum trahatur, lineam in eo purpuream describet, quam à puncto indiuisibili & incorporeo fieri posse negat, quia ἀτομάτω πυρρᾷ καὶ σώματι, ὡς δὲ τῆ ἐνοσίῃς ὅτι, re incorporeâ purpurari corpus, est contra rationem. Item, quia sphaera vitrea cadens in lapideum planum, disiliret & frangeretur; est verò, inquit, contra sensum communem, ut frangatur per punctum. Ex quo, non ut ex ungue leonem, sed ut ex caudâ licet agnoscere ouiculam, & quàm parum callidus in Mathematicis fuerit Plutarchus, ne impensè miremur, in re istâ continui propiorem Epicuro fuisse, quàm Peripateticis.

Igitur qui hodie contactum sphaeræ & plani contra Aristotelem allumunt, supponunt in antecedente sententiam Aristotelis, quam destruere volunt per consequens. vnde virtute sic arguntur. Continuum ex partibus infinitis constat (id enim necessarium est, ut dari possit corpus perfectè sphaericum, quod planum tantum in puncto tangat;) ergo vltimò componitur ex meris punctis finitis. id est, affirmatiuè procedunt à repugnantibus hac simili formâ: ignis est calidus, ergo est frigidus. Si non credant, relegant, quaeso, quæ Capite xiii. differuimus.

Itaque supposito, quod sphaera planum in puncto tangat, non potest, sine dubio, inferri continuum coalescere ex meris punctis, sed omnino oppositum: veram esse videlicet Aristotelis & omnium Mathematicorum sententiam, quia contactus ille hanc necessariò pro fundamento suo supponit.

Quid verò Aristotelem & Mathematicos respondere oporteat, res satis videtur perplexa.

Nos tamen vnico ictu hunc nodum cædimus, negando vlla in continuo esse positiua puncta, quod Capite xxxi. satis diffusè ostendimus. Nullum, inquam, in sphaerico corpore est positium & reale punctum, quod positiuo plani puncto incumbat, vnde nec motu suo

suo lineam ex posituiis punctis catenatam in plano describit. Punctum verò negatiuum, siue negatio vltioris extensionis in longum, cum nihil sit, non potest vero & suo motu de loco in locum transire, sed tantum per accidens dicitur moueri, vt cæcitas ad motum hominis cæci. quod autem tantum sic mouetur, nec vllum omnino motum in se suscipit, per motum alienum rei diuisibilis, quo solo dicitur moueri, veram lineam ex puris punctis indiuisibilibus describere aut designare nequit.

Hæc videtur mens Aristotelis, vbi ait solum *ἡ συνεχὴς κινεῖται τὸ ἀπὸ τοῦ κενεῖσθαι*, per accidens indiuisibile posse moueri: quomodo is qui in naui est, mouetur, inquit, non suo (etiā si tamē etiam suum intrinsecum motum habeat; in quo à cæcitate, & indiuisibili negatiuo differt) sed *ἡ τῆς τῆς ναυὸς πορείας*, ipso nauigij motu, qui ei est extrinsecus. Liquet id paullominus ex ratione quam adfert. Nam *ἰμpossibile ἐστὶν*, inquit, *ὅτι ἰδ quod mouetur, spatium maius se transeat, nisi prius aut æquale sibi, aut minus spatium transferit. Indiuisibile autem spatium minus se transire nequit; igitur æquale transibit. vnde erit tota linea ex punctis. αἰεὶ γὰρ τὸ αὐτὸ κινουμένη, τὴν αὐτὴν περιμέτρου ὅλην καὶ ἀμετέστηται*, semper enim per æquale transiendo, punctum totam lineam mensurabit. Quid disertius dici potuit?

Torquent tamen miserè hunc locum, qui puncta & alia indiuisibilia positiua continuo interfecerunt. cur enim punctum quod est centrum in globo, volando per aërem, lineam ex puris punctis non describit? Quia centrum per accidens tantum mouetur ad motum globi, respondent quidam, non verò per se.

Sed optimè eos refellit Scotus: *Quia quamuis, inquit, pars in toto moueatur per accidens, tamen semper est in spatio sibi equali, & pertranscundo illa, describit totum spatium.* Similiter nauclerus insidens naui, non aliter per spatia sibi æqualia successiue motu nauis aufertur, quàm si pedibus incederet, ac per se moueretur. igitur etiam centrum globi lineam, motu à globo sibi communicato describeret, eodem modo atque si extra globum Angelus aut Deus ipsum continuè deferret.

Conimbricenses aiunt, punctum moueri continuè per accidens & gratià globi, cuius motus est diuisibilis & continuus, secundum se verò non continuè, sed per motus discretos. vnde *etsi*, inquit, *globus ex parte inferiori quā internentu solius puncti planum tangit, non cesset pergere; hand tamen idcirco respectu eiusdem partis, & comparatione plani continuè moueri. Ideo enim dicitur non cessare, quia*

Lib. 6. c. 10.  
Physic.

In 2. d. 2.  
q. 9.

Lib. 6. c. 10.  
q. 1. a. 3.  
Physic.

*quia non intermitit contactus discretos, nec ullum præterit temporis momentum, cui suus contactus non respondeat. Punctum igitur istud globi saltuatini per puncta plani mouetur, nec partem lineæ quæ proxima est puncto transit, sed transilit sine tactu.*

Verum istud videtur non posse intelligi, sine transitu omnium punctorum globi, & cuiusvis corporis mobilis, ab extremo spatij in extremum sine medio. Si enim non continuè mouentur, cessant ubi ad partem lineæ spatij appulerint, & eam transiliunt sine transitu per ipsam, ut ad contactum alterius puncti perueniant. Saltus verò rei corporeæ ab extremo in extremum sine transitu per medium, imaginatione difficillimus est, & apud omnes certum est, per naturam non posse saltari. Et auget difficultatem, quòd puncta globi non videantur sic posse saltare sine simili saltu partium globi quibus continuantur.

Igitur simplicissima & optima Aristotelis interpretatio est, si puncta & indiuisibilia cetera continui negationes quasdam esse constituamus, quæ merè per accidens, & nullo vero suo motu de loco in locum dicantur transferri. talia enim nullum alium motum, quàm totius continui, in quo concipiuntur, habent; per ipsum verò continuum, non lineam, sed magnitudinem corpoream potius describunt.

Sed quid interim Angelo facimus, qui indiuisibilis est, & in unico puncto spatij esse potest, & continuè deinde moueri? cur isto motu, lineam ex meris punctis non describet (argumento Aristotelis) quia per spatia sibi adæquata perpetuò transit?

In 1. d. 1.  
q. 1.

Ioannes Maior hoc exemplo oppressus, dixit continuum ex solis punctis compositum esse, sed infinitis, quem Capite xxxi. reiecit. Plurimi verò alij negant, Angelum aut animam rationalem posse naturaliter in punctum colligi, sed omnem eius præsentiam necessariò esse ad spatium diuisibile; quod plerique omnes censent, qui, nulla indiuisibilia positiua continuo intermiscunt, magnà sanè verisimilitudine: & potest sic demonstrari. Capite xxxiv. dicebamus, vix posse vitari réplicationem puncti, si intimè utrique parti lineæ quam copulat, assistat, intretque spatia extremorum; idem verò Angelo potest applicari.

Pone enim Angelum in centro globi, quò infinitæ lineæ vndique à circumferentiâ concurrunt, videtur non posse præsentia eius ad solum centrum indiuisibile imaginarium terminari, sed necessariò ad partes aliquas omnium linearum in orbem debere effundi.



effundi. Nam veluti, si punctum ibi aliquod centrale positum esset, oporteret ipsum ( sic Capite xxxiv. videbatur nobis ) intra omnium linearum quas terminat ; spatia se retrahere ; ita Angelus in eodem centro constitutus , quia pari modo omnium linearum extremitatibus intimè & cum quadam penetratione assitit ( punctum enim, siue aliud indiuisibile, extra partes linearum extare nequit, aliàs faceret coëxtensionem ) omnibus vndique etiam aliquousque intimè præsens erit , ideoque præsentiam habebit non simplicissimam & indiuisibilem, sed ad spatium diuisibile diffusam.

Angelus verò per præsentiam in infinitum vndique diuisibilem sic replicatus, corpori continuo infinitè diuisibili æquualet : vnde si se moueat, non lineare aliquod spatium, aut superficiale, sed corporeum & in omnem dimensionem diuisibile, imaginatione nostra, describet.

Sed demus tamen, Angelum posse constitui in spatio indiuisibili: dicet tamen fortassis Aristoteles, fore tunc eum immobilem successiue, nisi ante in spatio diuisibili se replicauerit : posse nihilominus saltuatim ab extremo in extremum sine medio, è puncto, inquam, in punctum subsilire ; quod plurimi hodie docent Theologi.

Si verò denique præsentiam indiuisibilem habere, & continuè mobilem esse dederimus, modus tamen adhuc superest, et si paulò impeditior, quo Angelus lineam continuam, non tamen ex solis punctis confutam, describar. Eum nobis indicat Scotus. *Dico*, 1<sup>a</sup> 2. d. 2. inquit, *quòd semper, id est, in quolibet indiuisibili, est in spatio sibi aequali, non autem semper, id est, in qualibet parte temporis.* Itaque ab vno puncto spatij (concedamus enim iam puncta realia in spatio : per hæc enim perumpere etiam difficultatem istam possumus) non salit inmediate ad alterum, nisi per partem intermediam, sed per istam non in instanti, sed tempore inter duo instantia medio transit.

Sed quid in eà parte tangit ? inquires. Respondeo ; In tempore partem, in instanti punctum tangit.

Sed numquam potest nisi punctum tangere, clamant. Respondeo, Si numquam idem sit ac nullo instanti, verum dicunt : nullo enim instanti partem, sed quolibet punctum solum tangit ; *tamen in tempore medio inter duo instantia*, ait Scotus, *fluit super medium continuum inter illa extrema.* Nec adeò difficilis & impedita est huius fluxus & transitus imaginatio, nisi quia momentum momentò

in tempore immediatum, blandimento facillimæ cogitationis inuitati, concipimus, & Epicuræa de compositione temporis sententiâ nobis ipsi imponimus, supponimusque id de quo tota controuersia est: tempus videlicet componi ex instantibus immediatis. Reiectâ verò hac Epicuræa cogitatione, rem totam sic expedio. Cogita mecum attentè paullisper (puncta, res tenuissimæ sunt, & collectis sensibus inspicere debent) quomodo punctum intimè assilât parti lineæ quam finit, aut continuat. ita enim ei intimè præsens est, vt nullam adæquatè particulam, eius tangat: indiuisibile enim, nisi replicetur, diuisibili adæquari non potest. sic de Angelo sub indiuisibili præsentia collecto existimare oportet. In quolibet instanti, inquam, puncto spatij insidet, in tempore infinitè diuisibili per partem infinitè diuisibilem incedit, eamque non in puncto, sed in parte aliquâ, verum in adæquatè, tangit.

Quod vt planius intelligas, fac, Deum vniuersa spatij realia puncta, partibus immediate inter se vnitis, destruere: Angelustamen sine replicatione, eas partes motu suo perforare, ac per eas incedere poterit, nullam nihilominus adæquatè, sed omnes per quas transibit, in adæquatè continget.

Quæ responsio tota ad motum globi super planum tracti transferri potest. Nam singulis temporis momentis planum in alio & alio semper puncto tangit, tempore verò post momentum immediate sequenti, non in puncto (punctum enim nullum est alteri puncto immediatum) sed in parte lineæ plani in adæquatè tangit: eo modo, quo vbique ipsum tangeret, si relicto solum globi puncto, Deus omnia plani puncta destrueret. Si negent Epicuræi se hæc intelligere, idèò, opinor, accidit, quòd in sententiæ Peripateticæ & communis tenebras, intellectum seridè numquam demerserint, maluerintque semper igniculum illum Epicuri fatuum per deum & præcipua consecrari, quàm viâ publicâ & certâ, in hac nocte incedere. Ego ingenij mei aciem non iacto, fateor tamen me non obtusissime ista cernere, & plurima in rebus naturalibus circumspicere, quæ minus valeam terebrare.

Itaque, siue puncta & indiuisibilia continuo permisceamus, siue omnia (quod nos antè fecimus) aboleamus: item, siue Angelus, & anima rationalis spatium tantum diuisibile occupare, siue etiam ad punctum vnicum se reuocare, & sic se continuè mouere possint, numquam euincet Epicurus magnitudinem coalescere ex partibus indiuisibilibus.

Hinc

Hinc etiam intelligitur argumentum Aristotelis, quo ex motu per se rei indiuisibilis colligit, spatium compositum iri ex meris indiuisibilibus, topicum solum, nec firmissimum esse: & quis ei tam obstinatè addictus, qui omnia ab eo asserta paris firmitudinis velit esse? Vnde magister eius Plato, à quo videtur istam de immobilitate rei indiuisibilis doctrinam accepisse, argumentum istud negligit, contentus altero, quo etiam vsus Aristoteles: quoddam res quæ mouetur partim in loco qui deseritur, & partim in eo qui acquiritur, esse debeat; id verò rei indiuisibili, quæ impers est, competere non possit. Quæ doctrina Platonis planè intelligenda videtur de motu locali propriissimè dicto, qui ad locum diuisibilem & circumscriptiuè ambientem debet terminari: ad talem enim locum moueri non potest indiuisibile. Patet verò etiam inde: quoddam dicat *ἐν ὅλῃ* (ita enim vocat indiuisibile) *ἡ δὲ μὴ εἶναι, nullibi esse*, quia nec in se est, cum non distinguatur à seipso, nec alio, *ὅτι ἐν ἄλλῳ οἱ, καὶ κενὸν ἀνὰ τὴν γοῖν ὅτι ἐκείνῃ ἐν τῷ ἀνείν, quia si in alio esset, circulo quodam ab eo in quo esset comprehenderetur*. id verò, inquit, fieri non potest, cum indiuisibile in multis in orbem partibus tangi nequeat à circulo.

Loquendo verò generalius de locali motu, qui ad Vbi mobili intrinsecum, siue diuisibile, siue indiuisibile terminatur, potest res indiuisibilis moueri; sicuti etiam definitiuè, vt loquimur, (et si non circumscriptiuè) esse in loco. Non est etiam necesse, vt tale indiuisibile partim sit in termino à quo, & partim in termino ad quem dum mouetur; vti nec vt transeundo, pedem vbique & perpetuè figat in spatio reali sibi æquali.

## CAPVT XLV.

*Argumentum septimum, quo perperam credunt, in sententiâ Aristotelis, spheram actiuitatis nullum finem habituram esse.*

**S**ed sphaera actiuitatis in infinitum abibit, inquit, si magnitudo, & tempus ex partibus infinitis componantur. nam oportebit quamlibet qualitatem intensibilem ex totidem etiam partibus partibus infinitis constitutam asserere. si enim infinitis temporis partibus qualitas aliqua intenditur, igitur & infinitæ partes intensiue in eâ sunt, quarum vna hac parte temporis, altera istâ produ-

citur. Ex illâ verò partium intensiuarum infinitudine videtur agens posse extendere sphaeram suæ actiuitatis in infinitum. Nam ubi- cumque fines corporis luminosi, exempli gratiâ, sphaeram, lumen in extremâ circumferentiâ limbo, infinitam partium proportionalem intensiuarum multitudinem adhuc habet, quæ longius se propagare, & sibi simile producere poterunt. Cur enim infinitæ illæ partes intensiuæ, in subiecto diaphano, & nullâ contrariâ qualitate imbuto, sibi similem effectum producere nequeant? in sententiâ verò Epicuri, cum qualitas vniiformiter distorteretur vsque ad indiuisibilem partem intensiuam decreuerit, ibi meritò sphaeræ limes est figendus.

Verum quæro ab istis, cur qualitas intensiuè indiuisibilis, quæ eiusdem speciei cum qualitate intensissimâ est, tam infœcunda sit, ut ne quidem alteram etiam indiuisibilem valeat efficere? Quid enim hic aliud respondere possunt, quàm tale esse partis indiuisibilis ingenium, ut nihil sola, aut etiam adiuta ab agente principali quod retro in centro sphaeræ est; vel à partibus qualitatis aliis centro & circumferentiæ sphaeræ interfusus, valeat producere?

Ecce autem idem aut simile omnino ipsis reponere possum: imò faciat pro me D. Thomas. *Non omnia quæ sunt illuminata, aut calefacta, possunt alia illuminare & calefacere: sic enim illuminatio & calefactio essent usque ad infinitum.*

Ad eam itaque luminis particulam intensiuam, vniiformi illo per medium decremento, tandem peruenitur, quæ vires se vltèrius propagandi amittat. Itaque ad agendum certa intensiōis mensura necessaria est, ad quam lumen in extremâ circumferentiâ sphaeræ actiuitatis non pertingit. aut certè, licet tali lumini, quantumvis extenuato, non desint vires ad productionem alterius remissioris vltra limites sphaeræ actiuitatis, tamen non producit, quia ipsum est minimum naturale quoad intensiōem, nec vllum lumen ea remissius, per naturam, extra compositionem alterius intensioris existere potest. si verò aliud produceret, deberet ipso esse remissius, ac proinde minimo naturali esse minus. Ita Optici quidam docent. *Afferimus, inquit Aguilonius, lumen non sub quocumque intensiōis modulo posse suapte vi solitariè existere, sed aliquem esse paruitatis terminum, vltra quem progredi diuidendo non liceat citra interitum, quem proinde minimum naturalem non incongruè possumus appellare. si autem maiori lumini aliud minus adiungatur, quantumvis exiguum, nil vetat quin hoc illius ope queat sustentari,*

Lib. 5.  
prop. 15.  
Opusc.

sari, dummodo utrumque simul minimum naturale saltem attingat.

Si dicas, lumen producendum extra limites sphaeræ actiuitatis, continuandum esse cum eo quod intra eosdem limites est, & proinde non futurum solitarium, & ab omni alio seorsim; responsio est in promptu. ex parte quidem continuationis extensivæ nihil ob stare quò minus existere possit, sed periculum totum ex defectu intentionis, & coniunctionis cum alio gradu intensivo provenire: dari enim minimum naturale non tantum secundum extensionem, sed etiam secundum intensiorem, ac tale esse lumen quod extremum marginem sphaeræ actiuitatis infedit. unde si aliud remissius ultra hunc marginem effunderet, istud esset remississimum, quod naturaliter seorsim ab aliis esse potest, remissius.

Hæc in sententiâ D. Thomæ, qui rebus etiam inanimatis terminum parvitatæ ab intrinseco figit, magnam habent speciem probabilitatis, quam Optici etiam vetustiores videntur oppositæ Scoti sententiæ anteculisse. nam de minimo naturali, saltem quoad extensionem, perspicue Vitello: *In minimâ luce, ait, quæ sumi potest, est latitudo: quoniam minimam lucem dicimus, quæ si diuidatur, non habet amplius actum lucis, quia non erit visibilis, sed utraque pars extinguitur, quia neutra pars eius erit lux, neque apparebit sensui.* Lib. 2.  
prop. 3.  
Optic.

Si verò in lumine, & rebus inanimatis minimum nullum naturale datur, quod fortiter, & multorum assensu, affirmat Scotus, retinenda prior responsio, quam à D. Thomâ sumebamus: quia ad actionem qualitarum talium intensibilium, non sufficit quantulacumque mensura intensiva qualitatis, sed certæ magnitudinis requiritur, etiam ut à qualitatibus quæ à tergo sunt, ad propagandum effectum ultra terminos sphaeræ actiuitatis, possint adiuuari. In 2. d. 29.

Sed heus adeste vos iam Epicuræi, & videte, ut telum istud sphaeræ actiuitatis in caput vestrum redire possit.

Vos conquerimini sphaeram nostram futuram nimis longam, & sine fine, si qualitas quælibet ex partibus intensivis infinitis composita sit; ego affirmo vestram nimis fore breuem, si ex finitis indivisibilibus. Luculam enim illam pallentem putrescentium lignorum, si placet, aut etiam tenuem illum ruborem lunæ, tempore eclipsidis in umbrâ terræ expirantis accipiamus. Quot, quæso, partes indivisibiles intensivas in luce tam remissâ & evanidâ nobis datis? Si totidem, quot sunt in vno pede spatij puncta, nimis, credo, liberales eritis: nam vnicus magnitudinis pes, etiam finita, in-

numerabilia tamen puncta comprehendere etiam Epicurus vester non negat. Demus tamen tot, quot in toto milliari possunt contineri. Radiet igitur deorsum lux illa moribunda lunæ delinquentis. Si actio vniiformiter decrescit, singula spatij puncta, à lunâ deorsum recedendo, perpetuâ serie amittent vnâ semper particulam indiuisibilem intensiuam qualitatis. quia verò non plures sunt (vt nunc supponimus) in totâ intentione luminis lunaris eiusmodi particule, quàm quot in longitudine milliari puncta, necesse erit, vltimum milliari punctum indiuisibilem solum luminis particulam recipere, ibique totam luminis lunaris radiationem & actionem finire. Hinc nemo vmquam è terrâ, tot centenis milliariibus à lunâ distante, lunæ eclipsin poterit cernere; quandoquidem oculus extra limites sphæræ actiuitatis eius tam longè summotus radium, aut speciem visibilem luculæ illius non possit excipere. Infinita igitur, quoad partes saltem proportionales, sit oportet primæ lucis, quæ lunæ inhaeret, intensio, vt extensioni quæ ad nos vsque pertingat, possit sufficere.

Vnde hoc telum quo innoxie nos petunt, possumus cum noxâ in Epicurum regerere.

## C A P V T X L V I.

*Argumentum octauum, quo contendunt, sine vacuo, penetratione, aut replicatione, condensationem ab Aristotele explicari non posse.*

**O**Bieci mus antè Epicureis, ceu grande piaculum, quod sine vacuo, aut partium quantitatis penetratione (vtrouque, naturæ detestabili malo) nequeant corporum condensationem expedire: ecce iam eodè scelere Aristotelem satis calidè respergunt, & tantâ profectò in speciem probabilitate, vt etiam Peripatetici hîc vacillent, aut quidam planè labantur, vt existiment aliter fieri non posse. Nam si totum spatium intra vas conclusum, inquirunt, aliquo corpore continuo, & nullibi interhiante est plenum, concipi nequit, quomodo vel minima corporis alterius particula intra vas idem compingi possit, nisi aut aliquæ loco cedant & vase expellantur (quo casu nulla fiet condensatio) aut pars adueniens ceterarum quæ inerant, per penetrationem locum intret, aut certè vacuum aliquod intermixtum fuisse oportuit, quod à partibus se inuicem compri-

comprimentibus repleri possit, ut corpori intra vas idem coniecto locum facere valeant.

Veteres tamen Scholastici, quia penetrationem dimensionum, & Epicuræas inanitates, omnibus experimentis, & rationibus Academicæ ac lycei refutatissimas esse credebant, aliâ viâ sese expedire ex hoc labyrintho conati sunt. Marsilius noster (nescio quid in mentem quibusdam venerit, hunc Anglum facere, nam vetustissima scripti eius in Magistrum exemplaria eum in Germaniam inferiorem, & diocesim Traiectinam reuocant) imaginatur, dum corpus condensatur, totam veterem quantitatem maiorem abijci, & nouam minorem acquiri. Sed etsi vulgò id ei impingatur, atterent tamen lectus dubium me reliquit, an de quantitate actuali (quam sæpè appellat extensionem) an de aptitudinali loquatur. Si de actuali, res apud me in comperto est, totam nouam in rarefactione, & condensatione acquiri: nam omnes partes locum mutant, & extensionem actualem variant. Scoti subtilitas rem istam penetrare non valuit, si Hugoni Cauello credimus. *Scotus problematicus est*, inquit, *vel magis, nihil resoluisse videtur*. Passim tamen existimatur, putauisse nouæ saltem partis quantitatis accessum corpus rarefcere, & abscessu condensari. Ait enim disertè: *ad minus aliquam partem quantitatis nouam (in rarefactione) oportet omnes ponere; alioqui non esset nunc maius, quàm prius*.

In 4. q. 9.  
a. 2.

In 4. d. 13.  
q. 4.

Sed difficulter id profectò defendi potest, si de quantitate aptitudinali (quæ propriè est quantitas) accipi debet. Cùm enim in rarefactione aëris non creetur noua materiæ pars, quodnam, obsecro, subiectum noua ista pars quantitatis habet? non enim in materiam antiquam inculcari potest, cùm hæc suam quantitatem habeat, quæ ab aliâ in eodem subiecto penetrari nequit. Item etiam si id sanè fiat, non idcirco tamen vel hilo rarior, sed potiùs densior erit; certè tamen non amplius, quàm antè, spatium occupabit. Si etiam in condensatione, pars quantitatis decidit: vel pars materiæ vnà decerpitur (& ita decretio magis, quàm condensatio erit) vel materiæ pars quæ quantitatem abeuntem sustentabat, intra alias partes se retrahet, & in earum quantitatem, exutâ suâ, se induit: tamen etiam fieri non potest, nisi eadem forma accidentaria (quæ tamen non sit duorum extremorum vinculum & vnio) constitutatur in duobus subiectis non subordinatis: eadem, inquam, quantitas in duabus eiusdem materiæ partibus integralibus.

Deinde id contra naturam & finem quantitatis est, qui est, partes

tes

tes materiæ extra se euoluere, & impenetrabiles loco reddere. huic enim fini necessarium est, singulas materiæ partes, peculiare suas quantitates obtinerè, quarum vna alteram ab eodem spatio repellat.

Denique nec Marilius, nec Scotus satis probabilem causam dare possunt, quæ vnam quantitatem aptitudinalem destruat, & alteram inducat. nam duæ formæ solo numero distinctæ, non ita solent inter se repugnare, vt vna alteri immediatè succedat, eamque depellat suo subiecto. Deinde quantitas potius à materiâ cui insidet, & cuius proprietas est, quàm ab agente creato extrinseco, in genere causæ efficientis dependet. igitur ignis calefaciens non potest aquæ nouam quantitatem aptitudinalem dare, sed ea potius è visceribus materiæ primæ aquæ resultare debet: nulla verò causa est, cur materia veterem quantitatem abijciat, & aliam eiusdem speciei immediatè post in se efficiat.

Adde, valdè esse probabile, quantitatem aptitudinalem solâ ratione à materiâ esse diuersam: in quâ sententiâ, nec Marilij nec Scoti doctrina potest habere locum. sic enim sine nouæ materiæ accessione aut decessione, quantitas maior accedere aut decedere nequit. Alijs sufficit dixisse, *densitatem consistere in proprietate quadam, & tali modo se habendi, ratione cuius multa materia potest esse sub paruis dimensionibus*. Densitatem enim & raritatem credunt veras qualitates esse, à quibus quantitas aptitudinalis habet, vt sub eadem partium suarum & materiæ multitudine, minorem aut maiorem locum occupet.

Sed, vt hæc vera essent, altiùs tamen res inspicienda est, & modus reperiendus, quo sine penetratione partium, aut vacuitate interiectâ, id fieri possit.

Omnes omnino gemunt sub onere huius difficultatis. *Communis, & D. Thomæ sententia* (eamdem scilicet in condensatione, & rarefactione quantitatem permanere) *proculdubio vera est*, inquit Archius, *quamuis ingentibus ipsa quoque prematur difficultatibus*. Et Hurtadus *ingenue fateri se ait, continere difficultatem ferè inexplicabilem*. Et sane, dum quis totum locum aliquem solidè plenum esse cogitat, quomodo ferè non desperet, spatium præterea in eo posse reperiri, quod nullâ parte eiectâ, aliud tamen simul corpus sine penetratione recipiat? Deinde omnes partes in corpore raro proximè continuantur, quâ igitur viâ per condensationem propius admoueri possunt? nihil enim propius esse potest proximo & immediato.

In

Suarez  
tom. 2.  
d. 12.  
sect. 5. Me-  
taph.


Lib. 1. d. 4.  
q. 36.  
sect. 3.  
Generat.



In corpore denso etiam, singulæ partes proprium & distinctum Vbi habent, & omnes extra mutua spatia explicatæ sunt; quis ergo intelligat, quomodo sine nouarum partium accessu, aut certè veterum replicatione (quam nuper tam longè refutabamus) maius spatium, per rarefactionem valeant occupare? Quàm verè olim diuina Sapiëntia! *Difficile æstimamus quæ in terrâ sunt; & quæ in Sap. 9. prospectu, inuenimus cum labore.* Ipsa est, quæ diuino suo ingenio admirabilia ista texturæ continui stamina & subremina intricauit, nec alia extricare nobis potest. Hanc igitur (quod in re naturali & simillimâ fecisse olim inuenio magnum Augustinum) de-  
 Lib. de  
 Quant.  
 Anim. c. 8.

Duo autem à longè prouideo, vnde mihi spes aliqua, tenuis saltem, affulget, rem istam non omnino inextricabilem esse.

Primum, quia Capite VIII. dicebamus, à nullo puncto circumferentiæ maioris circuli A B C D. lineam rectam ad centrum L.



deduci, quin semper per aliud & aliud punctum minoris circuli E F G H. debeat transire: vnde consequens videtur, totidem quodammodò puncta & partes in circulo minori, atque in circulo  
 Y  
 maiori

maiori contineri. Quòd si hoc vsquequaque verum esset, multùm decreveret admiratio, quomodo totus circulus maior spatium & angustias circuli minoris posset intrare. nam quomodo intrauit in has angustias quantitas circuli minoris, quæ totidem nec pauciores haberet partes?

Sed proculdubio, plures in circulo maiori, quàm in minori partes sunt, etsi in isto etiam sint infinitæ. Sed tamen, quia infinitæ sunt, spatium etiam occupant eodem modo infinitum, & hinc spes adhuc superest intra ipsum partes infinitas circuli etiam maioris posse citra penetrationem compingi.

Secundò, Capite xxii. asseuerabamus ex fabricâ oculi humani & omnium animalium, item ex lente conuexâ telescopij Belgici, compertissimum esse, amplissimorum obiectorum picturas, omnes vniuersim extra proprios situs partes exprimentes, intra angustissimum oculi hominis, muris, auiculæ, aut muscæ spatiolum posse contineri. Ita, inquam, pro certo, & demonstrato admirabilissimum quod iam dicam, habeo: totam concauam cæli superficiem, sine vllâ partium confusione, & picturarum penetratione, intra brevissimum vnius vnguiculi spatium, beneficio lentis Batauiæ posse depingi.

Cùm igitur singulæ partes cæli speciem & picturam peculiarem habeant, & infinites pænè spatio vnguiculi ampliores sint, quomodo in illas angustias, citra confusionem & mutuam penetrationem se adduci patiuntur? faciunt tamen, & nisi credant Epicurei, facile est periculum. Lentem, inquam, telescopij, & chartam quâ speciem cæli, aut rei alterius maximæ per foramen conclavis obscurati excipiant, in manum sumant, oculorum fide ad assensum cogi possunt. Si verò omnium partium, & punctorum cæli imagines tam angustè sine compenetratione habitare queant, cur non & totum ipsum prototypum, siue quantitas cælestis hemisphærij, potest etiam per compressionem, sine penetratione, ad easdem angustias venire?

Sed nimis hoc est admirabile, inquiunt. Ita est: & idèò diuinus Artifex sic fecit, vt nimium quantum admiraremur. Quasi verò totus hic mundus plenissimus non sit admiratione, nec meritò Rex iste extaticus exclamet: *Multa fecisti tu Domine Deus meus mirabilia tua, & cogitationibus tuis non est qui similis sit tibi.* Et iterum, ac spississimè: *Mirabilia opera tua, & anima mea cognosceat nimis.* Cognoscant etiam, & eum admirentur ac laudent qui in re istâ

totius

Psal. 39.

Psal. 137.

totius naturæ ingeniosissimâ , & sapientissimo ac omnipotente Opifice dignissimâ, sunt increduli.

Porro tota difficultas nostræ imaginationis ex ignorantia rei infinitæ provenit: hæc enim partium suarum multitudine intellectum nostrum obruit. aliàs si naturam eius & omnes conditiones clarè cerneremus, illicò tota quæ nos circumuenit perplexitas solueretur & euanesceret.

Cogitemus ergo (etsi in densâ satis, non diffiteor, nebulâ) in numero partium continui infinito, non tantum infinitas unitates, sed centenarios, millenarios ( & quemcumque finitum numerum capies) contineri infinitos. si enim millenarij finiti tantum essent, sine dubio oporteret & unitates esse finitas, ac totum numerum tandem aliquando finiri. Nec hoc tantum, sed oportet unitates, item centenarios, millenarios, &c. infinities esse infinitos. Patet, quia in qualibet parte continui sunt aliæ particulæ minores infinitæ, & singulæ comprehendunt infinitas aliarum partium unitates, &c. igitur in quavis parte sunt particulæ aliæ infinities infinitæ. Quæ omnia certissimò & euidenter sequuntur posita illâ admirabili partium infinitudine. Denique in numero infinito nulla potest sumi unitas, quin ei infiniti respondeant centenarij, infiniti millenarij. nam aliàs, ut antè dictum est, totus numerus unitatum esset finitus. Hac numeri infiniti quamuis nebulosâ cogitatione instructis scintilla fortassis aliqua allucebit, quâ allucinantes saltem & morosè nos paullatim ex hoc labyrintho extrahamus.

Itaque etiam si locus aliquis aëre mensuræ pedalis plenus sit, capere tamen adhuc aliquid potest, quia locus ille infinities infinitas partes proportionales habet, & in vnum eius angulum qui etiam infinitus est, aër pedalis se retrahit, ut alteri etiam locum faciat.

Sed angulus iste antea parte vnâ aëris etiam plenus erat, inquirunt.

Respondeo, ita esse: sed compressione partium locati, plenior, ut sic dicam, esse poterat.

Verumtamen quò se (malum) partes illæ retrahere possunt, iterum instant, cum omnia sint plena?

*Reuera difficillimum est, & fortè impossibile explicare*, ait Reuerendissimus D. Aresius, *negatâ penetratione, & vacuo.*

Sed non est: quia in infinito sat magna laxitas est, ut omnes illæ partes possint recipi. maxima enim pars difficultatis nascitur ex

Epicuræa imaginatione, quæ loci capacitatem, vt continuum, ex atomis finitis conteximus. Fuganda igitur ante omnia hæc cogitatio est, & infiniti anguli, ac infinita loculamenta in vnoquoque loco disponenda sunt, quæ partium locati compressionibus consistari & ampliùs capere valeant, licet laxo & raro aliquo locato omnia etiã plena sint.

Cùm tamen aër pedalis intra spatium dimidij pedis se contrahit, singularum partium extensiones ex parte spatij breuiores sunt; & hinc est, vt in spatium imaginarium duplo angustius recondi valeant. Spatium enim imaginarium non secundum mensuram multitudinis partium substantiæ, aut quantitatis aptitudinalis, quæ in eo continentur, sed secundum mensuram spatij realis, à nobis fingitur. spatium verò reale nihil aliud esse, quàm localem extensionem, discere possumus vel ex hoc vnico Poëtæ ingeniosi versu :

*Dum spatium victor victi consideras hostis.*

Ouid.  
Met. 3.

de Cadmo enim loquitur, longitudinem & extensionem interfecti à se serpente considerante.

Quia igitur eadem substantiæ & quantitatis aptitudinalis partes varium reale spatium & extensionem habere possunt, idè sine additione aut detractiõne, in maius spatium imaginarium expandi, aut intra minus comprimi valent: quod in sententiâ Epicuri, si ne vacuo, aut penetratione, proculdubiò, explicari non potest, potest verò & debet in doctrinâ Aristotelis & Mathematicorum: & possibilitas ista certò ( apud me equidem) delitescit in tenebrosâ illâ infinitudine partium loci & locati proportionalium.

Sed etiam si, inquirunt, partes loci infinitæ sint, partes tamen locati, etiam rarissimi, similem infinitudinem habent; ergo quolibet corpore rarissimo ita opplebitur locus, vt nullas præterea partes valeat comprehendere. Sed solutio ex iam dictis est in promptu.

Itaque respondeo negando consequentiam: nam locatum non commensuratur loco secundum multitudinem partium substantiæ, aut quantitatis aptitudinalis ( potest enim continens esse densius, aut rarius contento ) sed secundum extensionem actualem. vnde à quocumque corpore siue denso, siue raro, modò par sit localis extensio, locus eodem modo totus repletur. Si igitur partes longè plures quàm in eo loco continentur, ad mensuram extensionis eius redigi possint, omnes intra ipsum recondi poterunt. Sic glans plumbea tota intrat formam cui liquatum plumbum infunditur, etiam si numero partium substantiæ longissimè excedat aërem,

aërem, qui implet etiam totam illam formæ cauitatem; idè tantum, quia actualis extensio plumbi, & aëris formæ inclusi par est.

Sed in corpore raro continuo partes proximæ & immediatæ sunt, quomodo igitur propiores per condensationem fieri possunt? inelamant.

Respondeat antiquus & eruditus Saxo. *Partes condensando mo-* Lib 4. q. 13  
*mentur versus inuicem. & hoc intelligendum est de partibus mediatis:* Physic.  
*partes enim quæ sunt immediatæ, non possunt esse propinquo-*  
*res, & per consequens non possunt moueri ad inuicem. Quod tamen fortasse fal-*  
sum est, nisi molli explicatione ad verum deducas. Nam quælibet pars reuera loco se mouet, & alteri, etiam immediatæ, magis proximat. Quomodo? qui fieri potest? succlamantes audio. Sed audite etiam ipsi, & in antrum hoc Trophonij, aut arcana Sibyllina me sequimini, si placet. In exemplum autem aspiciamus aquam, vel aërem, versus fundum vasis, hiberno frigore se retrahentem. Aqua illa ante condensationem tangebatur immediatè fundum sui vasis, & tamen omnes eius partes, à summâ superficie vsque ad fundum, congelatione singulas addensante (id enim iam suppono; etsi glaciem aquâ fluente nihilo densiorem non pauci credant) magis fundo appropinquant, & subsidunt deorsum. Ratio satis manifesta est: quia quælibet pars profunditatis duabus medietatibus constat, quarum vna vicinior est, altera remotior à fundo. quandoquidem igitur omnis pars distans à fundo, versus ipsum se retrahat, quælibet necessariò se retrahet; quia quælibet ab eo distat, gratiâ partis illius quæ longius quàm altera, à fundo sursum recedit. An ergo etiam ea pars quæ proxima fundo est, inquit, se retrahit, & deorsum subsidit? Respondeo, Etiam, subsidit. nam nulla omnino pars est, quæ per se primò proxima sit: vnde quælibet pars particulam fundo altiore versus ipsum detrahit per condensationem.

Sed nullum est, iterùm inquires, inter fundi & aquæ superficiem interuallum vacans, quò aqua fundo proximans se recipere possit, nisi penetret fundum. Respondeo, Nullum sanè ibi spatium vacare, sed plenum aquâ rariore, non tamen plenissimum esse. vnde per condensationem aliquid adhuc intra idem spatium potest compingi, si partes quæ premuntur inadæquatè recedant, & partem loci iis concedant, à quibus premuntur.

Itaque licet recessus partium versus fundum, finem extrinsecum habeat, videlicet fundi superficiem; tamen finem intrinsecum, vt sic dicam, nullum habet, quia pars proxima & attingua

fundo intra se in infinitum se recipere & addensare potest; cum in spatio proximo fundo vasis, quod pars illa aquæ occupat, sint infinita receptacula, in quæ particulas suas infinitas proportionales recipere valet. nam quodlibet spatiolum, infinities infinitarum partium, sine mutuâ compenetracione, est capax, modò illæ (quod possunt) ad modulum extensionis actualis eius se restringant & accommodent. nisi enim hoc esset, locus plenus aëre, non posset, expulso etiam inde aëre, corpore alio densiori repleri: quia corpus densius sub pari dimensione plures partes intra locum infercir, quæ spatium ibi nullum inuenire possent, si locus ille ita aëre repletus fuisset, vt nihil præterea posset per condensationem recipere.

Dices (scio) te perinde atque *folia Sibyllæ* hæc intelligere. Sed iam in antecessum, arcana Sibyllina esse prædixi, in quibus non omnes tam acutè cernere possunt, & omnium pessime Epicurèi, qui oculos atomis plenos habent. Hæc verò Peripatetici eodem oculo, quo continui ac spatij infinitudinem, aspiciunt: nam intra infinitarum partium perplexitates omnia hæc miracula implicita delitescunt.

Quod verò diximus de aquâ versus fundum vasis se retrahente, possumus parti cuilibet respectu proximæ compartis eiusdem continui applicare. nam versus eam se intra seipsam contrahere potest, etiam si compars illa, instar fundi vasis, immobilis permaneret; multò magis quando ipsa etiam vnà condensatur, & parti proximæ loco inadæquatè decedit. In rarefactione autem quælibet pars, etiam proxima & immediata, longiùs se euoluit, gratiâ aliarum partium remotiorû (quibus vnaquæque pars semper constat;) vt proinde necesse non sit abrumpere proximæ compartis vnionem aut contactum. Nulla enim pars aquæ est per se primò contigua fundo vasis; vnde quælibet per rarefactionem ab eo sursum recedere potest, gratiâ partium quibus fundum non immediatè contingit, & vnà tamen seruire contactum. In spatio enim illo abyssus quædam infinita, sine intrinseco fundo est (etsi ipsa extrinsecus ad fundum vasis terminetur) in quam infinitæ partes, per condensationem demergi possunt, & infinitæ per rarefactionem semper & sine fine extrahii.

Sed numerus partium non augetur, iterùm inquit, quomodo extensio incrementum accipere potest, cum singulæ partes citra replicationē, vnicam habeant extensionē, siue præsentiam localem?

Respon-

Respondeo, per solam partium infinitudinem iterum hoc posse extricari. ad hunc quippe finem, & alios plurimos ista infinitudo fuit omnino necessaria.

Itaque quia partes in aëre pedali infinitæ sunt, potest locus amplissimus tantumdem ex eo cumulo accipere, quantum ad se replendum fuerit necesse. Illa verò repletio fit dando partibus præsentiam localem alterius rationis, quàm habuerant antè. hæc enim præsentia magis explicat & elongat à se omnes partes, quæ per aliquam intermediam distabant. Nec periculum est, ne partes hanc tandem extensionem destituant; quia infinitæ sunt, & sine fine aliæ & aliæ sumi & evolui possunt.

Si hæc iterum inuoluta, & tenebrosa Epicuræi clament (quod, sine dubio, facient) Regio Psaltæ simul acclament: *Deus meus illumina tenebras meas.* Solus enim ille infinitus est, qui claræ rei infinitæ infundere debet & potest cognitionem.

Similiter per condensationem infinitæ partes quantitatis intra spatium angustius, per brevior extensionem compelli possunt, quia in quantalibet extensione partes extensionis etiam infinitæ sunt, quibus infinitæ illæ partes quantitatis indui possint: vbi enim infinitudo est non potest vestis esse nimis brevis. Qui hæc non credit, negare etiam sustinebit, à quolibet puncto maioris circuli, lineam posse ad centrum duci quæ transeat per aliud perpetuò punctum circuli minoris concentrici, id est, Mathematicis, imò sensui communi, vt Capite VII. demonstrauimus, ridiculus esse. Hæc enim eiusdem fere generis sunt. nam qui facit multas partes in circulo minori inuenerit ad omnes lineas rectas imaginarias circuli maioris transmittendas ad commune centrum, facile etiam in extensione minori reperiet, quo omnes partes substantiæ & quantitatis, quæ antè maius spatium occupabant, per condensationem possit induere.

Quod etiam argumento velocitatis in motu locali ostendi potest. nam velocitas est quædam veluti partium successuarum compressio, simillima quantitatis permanentis condensationi.

In velocitate, inquam, partes quæ in motu tardiori laxius (nullis tamen pausis interiectis, vt Capite XV. ostendimus) sibi succedunt, pressius ita sequuntur & agmen densant, vt tamen se in eodem tempore non penetrent; alias enim non partes successuæ, sed coëxistentes essent, & cum per diuersas partes spatij moueant, necessario, vt Capite XV. differebamus, mobile replicarent. Si igitur in-

tur intelligi potest, quomodo continuus motus tardioris fluxus possit accelerari, nec impossibilis erit aliquis intellectus, quo quantitas continua rarior comprimī valeat & densari sine penetratione.

Si denique intellectu concipi valet, quod oculis ipsis capimus: quā nempe ratione vniuersæ & singulæ partes maximi obiecti, imò totius hemisphærij cælestis, in minimo papyri spatioso, per vitri conuexi beneficium, extra mutuum situm depingantur: ac insuper quomodo eadem omnium partium continua pictura, prout vitrum magnæ aut parvæ conuexitatis fuerit, nunc ampliatur, & quodammodo rarefcit, nunc restringatur, & quasi condensetur, profectò intelligentiâ consequi poterimus, quā viâ exeundum sit ex hoc condensationis & rarefactionis labyrintho. Picturæ enim illius contractio & dilatatio est verissima cōdensationis & rarefactionis imago.

Postremò tamen, si, quia res ista in apertam lucem extrahi ingenio humano non potest, pertinax in dissensu perseueres, fac sanè per Scoti, Marsilij, aut etiam Epicuri (immisâ videlicet inter partes corporis rari aliquā vacuitate, vel potius admisâ partium densi aliquantâ penetratione) vel per aliam quamcumque viam, quantitatē rarefcere & condensari; nihil hoc continui ex partibus infinitis compositionem dissoluit, sed vnicum tantum, quod hinc sumimus contra Epicurum, argumentum inutile efficiet. facilis verò est vnius iactura, vbi tot alia viribus maiora supersunt.

## C A P V T X L V I I.

*Argumentum nonum, quo ex replicatione Angeli, aut animæ rationalis Epicurum tueri conantur: sed incastrum.*

**M**Agnum etiam in hoc argumento suæ opinionis præsidium ponunt. Animæ rationalis per corpus suum, aut Angeli per spatium diuisibile replicati omnes præsentis locales indiuisibiles sunt; igitur tam corpus, quàm spatium ex meris indiuisibilibus punctis concretum est: nam præsentis intercissæ nō sunt, sed continuæ; aliàs enim anima & Angelus replicati, semper in locis punctualibus discontinuis essent, & anima tantum puncta, non partes ipsas materis informaret.

Sed antecedens quod pro tam certo assumunt, falsum est. Aduerte igitur, Angelum, cum vnicum spatij punctum verum, aut imaginarium occupat, alterius rationis induere præsentiam, vti theologorum



gorum doctissimi docent, ab eâ, quâ per spatium diuisibile replicatur. Illa enim similis est substantiæ Angelicæ, id est, in partes integrales indiuisibilis, hæc naturam induit continui per quod expanditur, & diuidi potest sine fine.

Sed impossibile est, clamant, vt res indiuisibilis aliam præsentiam habeat, quàm punctualem, aut in punctuales saltem vltimò diuisibilem.

Sic videtur iis, qui nil nisi puncta somniant, aliter verò D. Augustino, D. Thomæ, Scoto, & columinibus illis Theologorum olim hætenus visum.

Sed præsentia Angeli, inquiunt, est eius accidens, debet autem accidens suo subiecto conformari.

Respondeo, si velint, accidens oportere tam indiuisibile esse quàm subiectum, assumunt omnino falsum. nam potest accidens intensiue saltem diuisibile esse, subiecto prorsus indiuisibili: talis enim est scientia in intellectu Angelico, aut humano. Addo, faciliè ab omnibus etiam intelligi, quomodo accidens intensiue in infinitum diuisibile recipi possit in subiectum indiuisibile: igitur non tam difficile & intricatum videri debet, si accidens extensiue etiam in infinitum diuisibile à subiecto indiuisibili possit capi; præsertim vbi fere omnes, qui intensionem per additionem partis qualitatis ad partem fieri existimant, easdem partes ex intensiuis transire posse in extensiuas, doceant, si ex eodem spatio in quo se intendunt, per spatium diuisibile euoluantur. cur enim eo casu subiectum indiuisibile, per replicationem saltem non poterit suas partes sequi, & partium extensiuarum fieri iam subiectum, quod antea erat intensiuarum? fallor enim, aut hæc eos fallit imaginatio.

Angelum considerant sub indiuisibili præsentia, in centro, exempli causâ, sphaeræ replicationis suæ. Deinde, si sequatur immediatè pars spatij in infinitum diuisibilis, imaginantur sub præsentia diuisibili per eam partem spatij extensâ, indiuisibilem Angeli substantiam non posse consistere, ideoque præsentiam istam diuisibilem per modum pontis, vt sic dicam, pendere sine subiecto, donec tandem in sequenti aliquo puncto spatij in præsentiam aliam indiuisibilem terminetur, cui iterum supponatur indiuisibilis substantia Angeli.

Sed vara est imaginatio. non enim sub duobus tantum extremis punctis, ac veluti pontis istius vtriusque fulcris, sed sub toto ponte, & torâ vsquequaque præsentia diuisibili intermediâ An-

Z

gelus

gelus sine fine est replicatus, vniuersamque præsentiam sustentat. nec tantum in punctis partis illius intermediæ (imò apud me puncta in totâ quantitate realia nulla sunt) sed in particulis diuisibilibus illius partis ita, ac tam dense, vt sic dicam, replicatus est, vt præsentiam totam in infinitum diuisibilem valeat sustinere.

Verum, sumatur semel, inquit, Angelus in spherâ suâ sic replicatus, nonne vbicumque hoc fiet, deprehendetur sub præsentia vnicâ indiuisibili?

Respondeo, non posse semel sumi, id est, sub præsentia indiuisibili; quia tale iam genus præsentia sustentat, cuius omnis pars est diuisibilis sine fine. Si tamen in continuo præter partes sint indiuisibilia realia, præsentia ista Angelica terminos suos indiuisibiles ijs respondentes habebit, sub quibus etiam substantia Angeli erit. atque ita semel sub eâ præsentia sumi poterit; ita tamen vt *sub illo puncto præsentia esse non possit*, vt acutè vidit Murcia, *quin simul sit in spatio diuisibili per præsentiam diuisibilem: quia sicut punctum naturaliter non potest separari à lineâ, ita neque punctum indiuisibile præsentia à præsentia diuisibili. Alio tamen modo, inquit, potest Angelus esse in solo puncto per quamdam præsentiam indiuisibilem, tamen naturâ suâ completam.*

Lib. 6. d. 1.  
quest. ult.  
Physic.

Itaque vt finiam: etiamsi dêmus puncta realia interpungentia spatij partes, non tamen in ijs solis est Angelus, aut anima rationalis, sed etiam in substantia partium per præsentiam in infinitum diuisibilem; quemadmodum ferè exiistentia rei successiuè indiuisibilis, tota simul partibus temporis præterlabentibus coëxistit. nec etiam vnio animæ ad puncta solùm materiæ, sed ad partes etiam diuisibiles proximè terminatur, & ab ijs contrahit infinitam diuisibilitatem. Nec nouum, aut mirum est, rem sine fine diuiduam respicere alterum extremum indiuisibile. sic enim vnio hypostatica, humanitati Christi Domini coëxtensâ, ex aduerso respicit indiuisibile Verbum: sic omnes gradus intensiui conceptûs intellectualis respiciunt idem indiuisibile obiectum: sic denique omnes partes præsentia localis extensiua respiciunt eandem animam rationalem, aut Angelum replicatum, etiam tamquam subiectum.

Si negas, accredemus tibi, vbi explicaueris nobis in sententiâ nostrâ contradictionis implicantiâ. Nec tamen ideirò etiam desinemus infinitatem partium continui propugnare; quia res ista tam misella non est, vt tota redierit ad hanc resticulam.

## CAPVT XLVIII.

*Argumentum decimum : Tempus esse perpetuum momentorum agmen, ex quo continuum permanens etiam ex meris punctis concinnant : vtrumque falsò.*

**S**ed restim iam totam nobis torquent, & Aristoteli, vti putant, manifestum suspendium.

Tempus & motus, inquiunt, ex puris putis momentis & *μῆ-  
μεν* componuntur, igitur ex meris etiam punctis coalescit perma-  
nens continuum. Nec abnuo sanè consequentiam.

Probant verò antecedens, quia in tempore nihil existere potest nisi præsens. præteritum enim desiit, futurum nondum est. præ-  
sens verò nil nisi momentum, quod indivisibile est, nec partem ha-  
bet priorem & posteriorem. Eleganter, & ex disciplinâ Stoicorum  
Seneca: *Præsens tempus brevissimum est, adeò ut quibusdam nullum* De Brevit.  
vii. c. 10.  
*videatur. In cursu enim semper est, fluit, & precipitatur: antè desi-  
zit, quàm venis.*

Desinere tamen reuerà antè non potest, inquiunt, sed à fu-  
turo per præsens trajici debet in præteritum. Itaque omnes eius  
partes per has præsens angustias transire debent: nihil verò antè  
oculos nostros præterlabi videmus, nisi momentum; igitur om-  
nes temporis partes pura momenta sunt, quæ agmine quodam &  
perpetuâ catenâ per præsens in præteritum fluunt. Quis vñquam  
fluminis lapsum contemplatus, non statim istâ tam concinnâ si-  
militudine non abripiatur in consensum?

Sed audiamus etiam magnum Augustinum. *Ipsa una hora, in-  
gnit, fugitiuis particulis agitur. Quidquid eius auolauit, præteritum* Lib. 11.  
c. 15. Cod-  
fess.  
*est; quidquid eius restat, futurum. Si quid intelligitur temporis, quod  
in nullas iam, vel in minutissimas momentorum partes diuidi possit,  
id solum est, quod præsens dicitur: quod tamen ita raptim à futuro in  
præteritum transuolat, ut nullâ morâ extendatur. nam si exten-  
ditur, diuiditur in præteritum & futurum: præsens autem nullum ha-  
bet spatium.*

Videtur igitur existimare, momentum momento immediatum  
esse, & continenti agmine omnia de futuro per præsens in præteri-  
tum transcurrere. Et profectò videtur non esse difficile intellectu,  
quomodo indivisibile successuum proximè additum indivisibili

In 1. d. 1.  
q. 9. du. 10.

extensionem successiuam facere valeat, si vnumquodque momentum præsens circumcissum existat sine præteriti & futuri temporis vtriusque existentia. Vnde rectè aduertit olim subtilis Scotus, *magis evidens & manifestum esse, quòd indiuisibilia permanentia non faciant maius, quam de indiuisibilibus sibi inuicem succedentibus.*

Hoc verò ideò accidit, quia imaginatio nostra nimis inhæret similitudini fluminis, credimusque satis simpliciter Poëtæ:

Quid,

*Ipsa quoque assiduo labuntur tempora motu,  
Non secus ac flumen. —*

quasi, inquam, similitudo hæc recta decurreret, quæ tamen utroque pede turpiter claudicat. Non enim, ut vnda superuenit vndam in illo fluminis fluxu; ita momentum vnum proximè alterum trudit, & tempus futurum impellit præsens in præteritum: nec vllà ratione putandum est, momentum aliquod præsens extra præteritum & futurum existere; in quo cardine omnis error & allucinatio mihi videtur versari. Et si enim in hanc ego, & omnes imaginationem pronissimè delabamur, ratione tamen retinendi & corrigendi sumus, nisi causam Aristotelis & publicam prodere, ac omnia perdere velimus. Nam si momentum medium inter præteritum & futurum tempus ita fluat, ut extra existencias eorum cadat, cum iis extensionem successiuam facit, & indiuisibile successiuum diuisibili additum, ipsam extensius & maius efficit. Hinc de indiuisibili permanente idem philosophandum erit: nempe punctum continuans partes spatij, eas coextendere, & extra situm earum eminere. nam momento temporis, punctum spatij pertransitur: quod momentum, si defuncto præterito, & nondum nato futuro inter vtrumque existit, planè etiam arguit, punctum spatij quod intra ipsum peragrat, extra partes vtriusque spatij prominere, quæ tempore præterito & futuro, ante & post illud instans pertranseuntur. Si autem indiuisibile extra diuisibile prominet, & ei coextenditur, nihil est causæ, cur etiam non possit immediatum esse alteri indiuisibili, & ei ita coextendi ut faciat maius.

Itaque, iterum inculco, corrigendus, aut interpretandus publicus loquendi & imaginandi modus, quo (ut palpabili, in re tam reconditâ, similitudine utamur) dicere & fingere solemus, momentum esse instar freti inter duo maria: ac veluti mare mediterraneum, exempli gratiâ, per freti Herculei fauces in Oceanum se exonerat; ita tempus futurum per momenti præsentis angustias, in præteritum

teritum transfundi. Vtrumque enim in rigore falsum est: tam scilicet momentum inter futurum & præteritum, medium interesse, quàm futurum per præsens in præteritum elabi. Tempus quippe non propriè labitur, sed perpetuò nascitur, & illicò à tergo denascitur, nec transfertur de loco in locum, imò nec de tempore quidem vno imaginario in aliud tempus imaginarium. Quia verò mobile quod motu suo efficit, labitur & locum mutat, idcirco similem lapsum tribuimus tempori.

Si verò momentum præsens nullum est, quod etiam instantaneè inter tempus futurum & præteritum duret, nullus est vsus interfuendi momenta realia tempori, vt Capite xxxviii. docebamus, vbi omnia indiuisibilia ex fluente continuo, siue tempore expunximus.

Quomodo igitur, aut quando tempus existit? inelamant. Nam Sorus, Toletus, aliique plures in hoc se consolantur, quòd tempus per instans reale præsens saltem existat (nam quomodo per partes, quæ aut præteritæ sunt, aut futuræ, existere possit, non vident): nos verò iam instantia realia expungimus, id est, nihil omnino reliqui facimus, in quo possit miscella & macra illa temporis existentia vtcumque sustentari.

Non infiteor, olim etiam mihi istæ allucitæ ante oculos volitabant, quas iam abegi, & meam allucinationem rideo. Similis etiam caligo Gregorio Ariminensi oborta olim fecit, vt affirmaret, im- In 1. d. 2.  
plicare manifestam contradictionem, vllum motum, aut ens suc- q. 4. 2. 3.  
cessiuum, quale est tempus, in rerum naturâ existere: vnde cum ceteris Nominalibus suis censet, motum nihil posse esse distinctum à mobili & spatio. *Si motus, inquit, esset aliqua huiusmodi res* (successiua, & distincta à mobili) *sequeretur quòd esset aliqua res extrinsecam constituta ex partibus, quarum nulla est, vel esse potest in rerum naturâ: & sic aliqua vera res esset constituta ex impossibilibus; quam absurditatem non concederet aliquis sanamentis.*

Verùm cum Aristotele, D. Thomâ, Scoto, & communi longè verius, imò certum, existimo, motum distinctum à mobili, & alias res successiuas, quarum duratio vocatur tempus, posse etiam naturaliter existere.

Nam inprimis potest sine difficultate intelligi, quomodo productio alicuius rei sit successiua, si partes actionis & termini priores expectent posteriores, & hæc illis ita accumulentur, vt simul permanent. Sic enim Sole manè paullatim ascendente, partes luminis in

opposito pariete successiue intenduntur & accumuluntur. Et licet res eiusmodi absolute successiua non sit, videtur tamen posse etiam facile comprehendere, fieri posse, ut lumen prius productum, simul cum productione posterioris ( per inductionem successiuam opacitatis, vel alia de causa ) desinat, nec pars posterior vnumquam assequatur & deprehendat priorem: quo casu illud ens propriam successionem habebit.

Item, licet motus localis nihil esset reale mobili intrinsece superadditum; negari tamen nequit, quin mobile continue, & sine interiectis moris, aliam & aliam cum partibus spatij (quidquid illa sit) coexistentiam habere possit: cur igitur Deus, ad legem fluentium quocumque modo istarum coexistentiarum, non possit sic actionem suam attemperare, ut lumen, aut albedinem pari passu cum coexistentijs istis fluentem producat, id est, ut simul cum partibus posterioris successiuam productione, priorem partem destruat, & evanescere perpetuo à tergo faciat? Si verò hoc faciat, lumen, aut albedo illa talem successionem adipiscetur, qualem iam motui locali à mobili distincto, & tempori quod est duratio eius, donamus. Sed quando tale ens successiuum ( iterum inquam ) existit? Respondeo, in nullo instanti, sed in tempore vero, vel imaginario.

Verum, inimaginabile est, inquiunt, ut aliquid existat, nisi certo instanti valeat de eo verè dici, Hoc iam existit.

Respondeo, hanc imaginationem esse quæ eos ludificat, & me olim ludos fecit.

Nota igitur, quod sicuti presentia localis alicuius rei non necessario in vnicum punctum spatij permanentis cadit, sed in partem spatij diuisibilem cadere potest ( sic enim homo naturaliter in loco diuisibili, non in puncto existit, ) ita existentia rei non necessario intra momentum indiuisibile spatij successiuui collecta esse debeat, sed per partem diuisibilem successiuam extendi & dispergi possit. Cur enim pars hominis parti spatij permanentis, & totus toti respondere valeat, non verò pars existentiae parti spatij successiuui, & tota toti similiter possit? Itaque falsum omnino est ( nec vnumquam hic Aristoteles scrupulum inuenit: ) id quod extra causas suas ponitur, debere in instans aliquod temporis, totum simul incidere, sed potest particulatim ita produci, ut nulla eius pars in instans, sed omnes in tempus diuisibile cadant, cui secundum successionem coextendantur. Quæ enim contradictio hic se implicat & permiscet? Hinc ergo ambulatio, quæ Louanium Bruxellâ hesternodie

die rediui, nec tota, nec partim vllō instanti temporis comprehensa fuit, sed intra tempus quatuor horarum quas insumpsi, fluxit.

Sed debuit, aiunt, heri fuisse verum, Ambulatio nunc est; saltem secundū aliquam partem.

Resp. Si *nunc* instans significet, falluntur, & perunt principium: hoc enim est, quod pernegamus. Et gemellum est huic: si vinum est in vase, debet totum, vel saltem pars eius aliqua tota contracta esse in puncto vasis. Si verò *nunc* tempus admodum breue quod in vicino tempore imaginario fluit, significet, verum est: aliqua enim particula ambulationis in eo fiebat, & ei commensurabatur, sed illa mensura non fuit indiuisibilis.

Quā viā igitur, iterū instant, ambulatio ista in præteritum transuolauit?

Resp. Metaphoræ istæ rhetoricæ Philosophicæ veritatem sapè obnubilant. Itaque in vero rigore non transuolauit. ridiculum enim est, imaginari totam quatuor horarum ambulationem, per primum instans præsens quo incepit ita fluxisse in præteritum, quemadmodum mediterraneum per angustias freti Herculei, vt antè dicebam, in Oceanum influit. aliàs enim ambulatio, quæ ab horâ primâ pomeridianâ ad quartam durauit, in quatuor horas alias antemeridianas retrocedere, & veluti aqua ex vno alueo in alterum transfundi debuisset. Itaque ambulatio ista nostra de tempore vno in aliud per fretum instantis præsentis non transfluxit, sed quatuor horis pomeridianis fluxit, id est, facta est successiue per actionem quæ aliquâ analogiâ imitatur aquæ fluxum. pars enim eius in vnâ parte temporis producta est, & tota in toto. vnde tempore illo finito etiam finem accepit, & effluxisse eius nihil est aliud, quàm existentiam totam amittisse. Et hinc, opinor, vides, vt euanescat quæstio quam inexplicabilem multi dicunt: quomodo tempus futurum fiat præteritum, nisi per instans aliquod, præsens fiat. nam tales à metaphorâ & vniuersali modo loquendi seducti, opinantur tempus futurum in præteritum per instans præsens, veluti motu locali, oportere trajici: quod longissimè aberrat à vero.\*

Sed vt rem totam magis in apertum protrahamus, contemplare mecum aquæ motum per suum alueum decurrentis: & vnum aquæ palmum accipiamus, qui singulos fundi palmos motu suo metitur, & successiue contingit.

Palmus iste aquæ, postquam primus fundi fluminis palmum transiit, quia aqua est ens permanens, ad secundū fundi palmum,

& ter-

& tertium, & ita deinceps defluit; motus verò (& eadem ratio est de tempore ei intrinseco) quo per longitudinem primi palmi transiit, ultra primum palium non durat, nec cum aqua ad secundum palium effluit, sed in exitu primi palmi expirat torus. Aqua etiam per primum palium fluendo, partes in eo proportionales infinitas transiit, & ita quidem, ut principium aquei palmi, aliam & aliam perpetuò palmi alvei partem tetigerit, nec villo instanti duas vllibi simul infederit.

Cum verò ad singulas palmi alvei particulas, nouam præsentiam localem habeat, sequitur, præsentias infinitas successiue productas & illico statim à tergo (ut sic dicam) corruptas fuisse, quando ad finem illius palmi peruenit. Vnde etiam tempus, siue durationem præsentis illis, aut etiam earum productionibus intrinsecam, totidem, id est, infinitis particulis proportionalibus constare oportet. In hoc verò discrimen aliquod est, quòd partes infinitæ palmi alvei permanentes sint, & simul inter se colligatæ coexistant, partes autem præsentiarum successiuarum, siue motus nullibi se expectent, sed vnà nascente, altera denascentur, & inuicem succedunt. & hinc nuper dicebamus, nullà verà & physicà vnione integrali, quæ vtrumque extremum instar fibulæ mordicè apprehendat, inter se posse colligari. talis enim vnionis extremà videntur coexistentiam vtriusque exigere.

Quia deinde vnaquæque palmi pars in particulas alias sine fine diuisibilis est, idcirco etiam præsentia quælibet illis respondentes, & quibus ipsæ transeunt, particulas successiuas infinitas habent, nec vlla magis indiuisibilis esse potest secundum successionem, quàm pars palmi talis secundum extensionem permanentem.

Sed statim ecce emicat noua difficultas: quomodo singulæ illæ successiuæ præsentia indiuisibiles non sint, cum vniri, defectu coexistentiæ, ut vna ex infinitis componatur, non possint. Erunt igitur instar acerui infinitarum ~~particularum~~ atomorum, aut atomorum sine vnione integrali fluentium. vnde tota iam ecce continui ex partibus sine fine diuisibilibus, quam tam sedulò & diu consuimus, textura videtur dissolui. Si enim motus & tempus ex atomis fluentibus texuntur, necesse est, magnitudinem ex atomis permanentibus etiam contexi. Quis non putet nos, ut imperitos, aut infelices gladiatores, vltimà hac tandem manu succumbere? Et profectò terruit me hoc argumentum aliquando: sed iam planè contemno.

Nam



Nam ex eo, quod nullæ duæ præsentiaæ successiuæ coëxistant, solum conficitur, eas non habere vnionem aliquam Physicam, distinctam ab extremis, quæ extremum vtrumque intrinsecè afficiat, sed loco eius immediatam, & nullâ quiete interpolatam successiōnem, ac veluti contactum quemdam, vt sic dicam, successiuum, pro verâ continuitate (quæ erat impossibilis) accepisse. vnde ista successiuorum talis qualis vnio, similis est vnioni integrali quam Nominales interponunt partibus magnitudinis: putant enim non esse modum aliquem realem, reapse distinctum ab extremis: neque hætenus quisquam ad compositionem continui Peripatetici ex partibus infinitis, putauit necessariam vnionem partium distinctam realiter aut modaliter ab extremis. Nec inde euincitur, præsentiam vllam successiuam esse indiuisibilem. nam nulla fit in instanti, sed omnis omnino super partem diuisibilem spatij fuit, & ei suo modo coëxtenditur. vnde sume præsentiam quamcumque voles, nullam in toto agmine reperies, quæ solum per instans duret, sed omnis partes priores & posteriores duratione habet, quibus mobile partem priorem spatij primò & deinde posteriorem transiuit. nam cum in qualibet parte spatij tales particulae, priores & posteriores inueniantur, nullam etiam partem motus quâ pars spatij peragatur, est reperire, quæ parte successiuâ priori & posteriori careat.

Hæcne etiam capis? inquietis. Ex assuetudine, inquam, videor mihi manu pæne tangere, & cernere oculis: assuefcas & tu, facere tantumdem & forte ampliùs potes. In hoc verò imaginatio aliorum, & mea olim ludificabatur, quod præsentiam aliquam mobilis ad spatium conabamur intra indiuisibile temporis instans comprehendere; cum tamen nulla talis esse possit, quandoquidem in tempore instans reale nullum sit: & licet esset, tamen illud extra partes temporis vtrumque, vt satis antè docuimus, extare non potest: vnde consequenter, neque talis præsentia instantanea, extra præsentias quas mobile in partibus temporis vtrumque proximis habet, obtineri seorsim posset, sed eodem modo præsentis præteriti & futuri temporis, intricanda esset, quo instans partibus temporibus (quas in sententiâ aliorum copulat) ne extra eas in medium procurrat, implicare oportet. vnde profectò eiusmodi præsentia inutilis foret; quia mobile intra partes temporis per præsentiam illam fluentem, & in infinitum successiuè diuisibilem, satis locari potest. Igitur quamcumque præsentiam arripueris (iam

Aa antè.

antè dixi) semper successiue diuisibilis erit, & talis, vt mobile per eam, partem spatij diuisibilem pertransierit.

Dicet fortasse quispiam pertunctorie aut conuiuenti oculo hæc adspiciens: Igitur præsentia quas perpetuo acquirit mobile dum est in motu, necessario alterius rationis sunt ab eâ quam habet & retinet in quiete.

Respondeo negando consequentiam: nam præsentia sub quâ palmus aquæ quiescit, est etiam sine fine, secundum diuisionem subiecti sui & spatij diuisibilis, nec aliter à præsentia fluëte distinguitur, quàm quod partes easdem retineat, & tempori præterlabenti sine earum fluxu exponat; cum tamen præsentia quæ in tempore per motum acquiritur, similes partes secundum temporis successionem ita expandat, vt pars vna cum parte primâ temporis, & altera cum secundâ, fluxu planè simillimo fluat. Quando tamen res indiuisibilis per spatium diuisibile successiue sine replicatione mouetur (si hoc potest) fortasse per præsentias transit diuersæ rationis ab eâ quàm in vnico puncto quiescendo habet, vt nuper dicebamus, quia hæc omnino indiuisibilis, illæ omnes ex parte saltem spatij sunt diuisibiles.

Denique, vt filum hoc abscindam, si tibi id nimis perplexum videtur (mihi sanè non, & multa sunt quæ me quandoque longè difficilius irretiunt) nega cum Gregorio Ariminensi, posse produci à Deo reale ens verè successiuum, & motum localem ac tempus explicata per nudas coëxistentias successiuas mobilis ad diuersas spatij partes. Iam enim, facile est imaginari, mobile per spatium, exempli gratiâ, vnus palmi prouectum, coëxistentias (quæ nihil sunt à mobili & spatio distinctum) infinitas successiue habuisse, si partes in spatio sunt infinitæ. nam veluti retrocedendo versus initium palmi, partes proportionales minores & minores sunt sine fine; ita coëxistentiæ mobilis ad eas numerari possunt breuiores & breuiores in infinitum.

Quia tamen difficillima est imaginatio, quâ ratione mobile transierit valeat per spatium sine aliquod superaddito, dic, si luber, cum veteri & acuto Ludouico Coronello, motum localem non esse ens successiuum, sed esse *accidens mobili impressum intensibile & remissibile, quod, cum intentum est, vocare solemus impetum*. Video tamen remoras in istâ via plures, quàm ego dicam.

Hoc etiam ferè effugerat. Immerito valde Chrysippum & Stoicos à Plutarcho densos, qui dicerent tempus esse simile aquæ, quæ

quæ manû stringitur, & ita vtrîmque eliditur, vt nihil in medio pugno permaneat. reuerà enim tempus totum in præteritum & futurum repellitur, præsens verò aut nihil est, aut certè nulla temporis est pars. Sed ecce tamen, abeuntem etiam interrogatione istâ retrahes. Nullâne igitur est actio instantanea, inquires, si instans præsens reale nullum sit?

Quidam negant vllam esse: ego non ausim.

Itaque generatio substantialis, illuminatio, actus voluntatis & intellectûs possint sanè elici in instanti: sed in nullum tamen instans reale cadunt; sed indiuisibiliter ac inadæquatè in partem temporis; eo modo, quo Angelus in parte spatij realis non replicatus existere potest, etiamsi in toto spatio nullum reale punctum sit.

Ergo, inquires, nihil etiam verat, esse aliquod reale instans præsens, partem nouissimam præteriti temporis cum primâ futuri copulans, & inter vtramque interfluens.

Respondeo negando consequentiam: Tale enim instans vtramque partem simul intrinsecè afficere deberet: quod tamen non potest, quia quando futuri temporis quæcumque pars fluit, nulla omnino præteriti superstes manet, quæ ei per instans iungi & adhibulari possit. Actio verò instantanea, vt, exempli causâ, illuminatio non fungitur officio copulandi inter se partes temporis, nec vllò modo in partem vllam præteriti temporis cadit, sed solum principio futuri temporis inferitur; ita tamen vt nulli parti eius toti adæquetur & respondeat: aliàs enim non tota simul, sed successiue, & pars post partem fieret. Vidit hoc olim ante me doctus Buridanus. *Mutationem esse instantaneam, inquit, est fieri in nullo toto* Lib. 1. q. 19.  
*tempore.* Quæ doctrina planè cohæret cum iis quæ hæcenus de Anim.  
indiuisibilibus, & totâ hac materiâ disseruimus, & vnicam viam esse existimo, quâ sententiæ Aristotelis & veritati firmiter succurri possit.

## CAPVT XLIX.

*Syluula alia argumentorum, quibus Aristotelem conantur  
obruere: sed nequidquam.*

**F**vlmine, etsi casto, hæcenus, grandine iam tantum pugnant,  
quæ ictu ipso dissilit. *Postus aquæ aqualiter fortis, aquâ plenus,* In 2. d. 1.  
hieme q. 1.

*hieme frangetur in omnes suas partes*, inquit Ioannes Maior: igitur partes vltimæ continui sunt indiuisibiles.

Respondeo, casum moraliter esse impossibile; quia vna pars poculi semper est ceteris imbecillior, aut certè gelu acrius vnā partem quàm alteram premit. illac igitur poculum rumpetur, non vniuersim in omnes suas partes.

*Sed detur corpus vitreum, instat iterum, super quod directè cadat graue infinita grauitatis, frangetur denno in omnes suas partes; quia nulla satia resistere potest.*

Respondeo, Nec casum istum euenire posse; quia nullum est in mundo corpus infinitæ grauitatis. Sed cadat tamen in vitrum lapidis molaris, inquires. Respondeo, Nisi Angelus, aut Deus speciali curâ lapsum illum dirigat, in vnā aliquam vitri partem pondus lapidis valdius incumbet, & illac frangere instituet. Verum, dirigat Deus, & omnes partes vitri æqualiter vrgeat lapis. Respondeo, In nullam partem frangendum vitrum (vti nec poculum, si omnes partes æquè firmas æquale vndique gelu mordeat,) aut certè causa prima (& nōne alibi centies, in simili causæ secundæ indifferentiā, ad eam recurri solet?) determinare & signare partem debet, quàm frangi oporteat.

Alij magis Metaphysicè: In omni composito, inquiunt, debet aliquid esse condistinctum ab aggregato omnium vnionum; hoc autem est indiuisibile: si enim vnionem inter suas partes includeret, non esset condistinctum ab omnibus vnionibus. Respondeo, Peti principium, & supponi nullam aliam compositionem continui, præter Epicuræam, à Deo posse fieri. Aio itaque falsum assumi. nam in composito, cuius omnes partes adhuc compositæ sunt, est quidem aliquid distinctum, sed non condistinctum ab omnibus vnionibus. quælibet enim talis pars, quia compositionem, idè etiam vnionem aliquam inter partes suas inuoluit; nam compositio nil aliud, quàm partium vnio est. Contradictionem ergo in tali compositione aliā viā ostendere oportet: quod hætenus, quidquid conati, nemo homo facere potuit.

Eiusdem commatis & monetæ est etiam istud. Tollat Deus vnīuersas vniones à continuo, relictis scorsim partibus (nam potest Deus, inquiunt, seruare modificata destructis modis,) partes illæ necessariò erunt indiuisibiles.

Respondeo, Hoc esse similis frontis & formæ. Tollat Deus omnes vniones ab homine, relictò tamē viuo & incolumi homine, &c.

Nam

Nam omnis pars continui est continua, & tam composita integraliter ex partibus vnitis, quàm homo Physicè. Potest igitur Deus tollere fortasse omnes modos à modificatis condistinctos, saluis modificatis (vt quamlibet vnionem integram ab extremis quæ inter se coniungit, saluis illis extremis) sed tollere à modificatis quorum substantiam modi illi ingrediuntur, est palàm impossibile. Quia igitur intra substantiam vnusculiusque partis continui aliqua vnio integralis inuoluitur, manifestum est, non posse substantiam talis partis incolumem permanere, destructà omni omnino vnione. Non quia continuum nihil aliud contineat, quàm puras putas vniones sine aliis extremis (vt ipsi etiam in nos iactant;) sed quia nulla pars est sine vnione, etiam si aliud præter eam habeat. Imò verò valdè mihi probabilis hîc est sententia Ochami, Gregorij, & passim Nominalium, vnionem partium continui non esse modum realem, distinctum ex naturâ rei ab extremis, sed extrema, positis certis dispositionibus, immediatè omnino inter se coherere. Nam sicuti Deus non nisi talium dispositionum occasione vnionem distinctam à partibus, in sententiâ ferè iam communi, conseruat; ita permanentibus, & exigentibus iisdem dispositionibus (quales sunt durities, viscositas, &c.) potest immediatè partes inter se continuas retinere: quemadmodum etiam contiguas, & veluti firmissimo vinculo colligatas retinet in periculo vacui. Vnde patet, tantum abesse, vt omnia sint vnionum modi ex quibus continuum coalescit, vt etiam ne vnica quidem talis vnio in toto continuo sit. Hinc etiam irritus redditur alterius teli iactus.

In omni composito, inquit, debet aliquid esse, quod per se primò terminet vnionem. Sit enim ita fortasse, de vnione quæ est modus distinctus ab extremis; nulla tamè eiusmodi necessitas est, si extrema proximè coherant sine modo vnionis: nam veluti duo corpora proximè se tangere possunt, etiam si consistant partibus proportionalibus infinitis; ita etiam integraliter proximè vniri. Si tamen admittenda esset vnio distincta ab extremis, dicere oportet, in nullam partem per se primò recipi, nec ad vllam per se primò terminari. Quod fortasse maius mirum non est, quàm nullam partem esse, quæ alteri per se primò proxima sit: diuidi enim quælibet in duas alias particulas potest, quarum vna vicinior quàm altera sit.

Aut certè, si talis vnio concipi mente facilè nequit, magnum omnino argumentum est (quod paullò antè censebam) non esse

modum aliquem à partē rei diuersum ab extremis, Vel denique, singulæ vniones in particulā aliquā diuisibili ( vt puta, in minimo naturali, vt vocant) per se primò collocanda foret: & quia ubique minimum aliquod naturale incipit, idcirco vniones eiusmodi sine fine multiplicare oportet, licet in qualibet quantitate minima naturalia condistincta certo numero sint comprehensa.

Denique quidquid sit, incertissima hæc & nuperrimæ inuentionis, de puris istis vnionum modis, doctrina, sat vniū habere nequit ad sententiā Aristotelis, tot firmissimis rationum & experimētorum fulcris nixam & stantem, euertendam.

## CAPVT L.

*Miraculis denique quibusdā pueros & naturæ imperitos ab Aristotele auertunt, viros & mirabilem Dei & naturæ conscios non possunt.*

Lib. vii  
Korin. ii  
10. m.

**C**Um machinæ omnes ad elidendam veritatem frustrā fuerunt, risu tandem & admiratione volunt eludere. Narrat enim Plutarchus olim, *Θυλλόμειρον ἐν ταῖς ἡγετεαῖς Ἀριστοτέλει* & *μὴ γίνωσθαι*, celebratum in scholis ( Epicureorum ) *crus* Arcefilai cum risu fuisse, qui fortē dixerat, crus in mare proiectum & putrefactum, eousque posse rarefieri & aquæ marinæ permisceri, vt non solum in eo classis Antigoni posset nauigare, sed etiam mille ducenta naues Xerxis, & trecenta Græcorum triremes nauale prælium inire.

Imò Chrysippus affirmare veritus non est, *cyathum, aut etiam guttam vini, quæ mare Aegæum incidisset, posse hactenus extendi, vt totum mediterraneum vsque ad oceanum, nec tantum secundum superficiem, sed etiam totam quaquaersus profunditatem posset penetrare.*

Nempe quia ex infinitudine partium proportionalium continui consequens existimabat, vt quælibet particula posset in infinitum rarefcere. Si enim quantitas vnus palmi, sine antecedenti partium penetratione, sine interiecto inter partes vacuo, aut sine vllâ partium replicatione, locum duplo maiorem potest occupare, quod autē etiam ostendimus, eadem ratio ad locum triplo, quadruplo, & deinceps sine fine maiorem, si non virtute naturali, saltem diuinâ, poterit ampliare.

Erra-

Errauit tamen Arceſilaus, errauit Chryſippus, ſi cruiſis, aut gut-  
 tæ vini quantitatem, crediderint per tam vaſti maris amplitudi-  
 nem naturaliter potuiſſe diſtendi. Veriſſimè enim Theologiæ An-  
 gelus: *Quod dicunt de rarefactione corporis in infinitum, propter* D. Thom.  
*hoc, quod corpus est in infinitum diuiſibile, vanum eſt: non enim cor-* I. P. q. 68.  
*pus naturale* (inaniens tale, & formam ſuam retinens) *in infini-* 2.2.  
*tum diuiditur* (credit enim dari, etiam in inanimatis homogenijs,  
 minimum aliquod naturale) *aut rareſcit, ſed uſque ad certum ter-*  
*minum.* Quin tamen diuinã virtute ultra hunc terminum extendi,  
 & ſine fine, rarefactio poſſit, non dubitauit. Nam & ex hac par-  
 tium infinitudine, ingenij humani culmen D. Auguſtinus colligit,  
*ſuper illud ſublime calum* (quod liquidum eſſe exiſtimat): *poſſe* Lib. 2. c. 4.  
*eſſe aquas, per illas minutias, per quas etiam ſuper hoc ſpatium aeris* Genef.  
*eſſe poterunt.* Ipſi quippe, ac ſubtiliſſimã ratione perſuadent, nat-  
 lum eſſe quamlibet exiguum corpusculum in quo diuſio finiatur, ſed  
 infinite omnia diuidi: quia omnis pars corporis corpus eſt, & omne cor-  
 pus habere neceſſe eſt dimidium quantitatis ſue. ac per hoc, ſi poſſet  
 aqua, ſicut videmus, ad tantas guttarum minutias peruenire, ut ſu-  
 per iſtum aerem vaporaliſſe feratur, qui natura leuior eſt aquis: cur  
 non poſſit & ſuper illud leuiſſe calum minutioribus guttis & leuioribus  
 immanare vaporibus?

En vt aquam ultra nubium tenuitatem, in infinitum propmo-  
 dum rareſci poſſe perſuaſum habuit, vt ſupra liquidum etiam  
 (vti credidit) & altiſſimum firmamentum vapor propriã leuitate  
 ſcandere & conſiſtere valuerit. Si vterius nihilominus rarefactio  
 iſta tendatur, ultra meſuram diſpoſitionis neceſſariæ ad retinen-  
 dam formam aquæ in materiã, tandem perueniet, & aquam cor-  
 rumperet. Deus tamen materiã illã ſine formã, aut cum ipſã  
 contra naturam conſeruata, poſſet ſine fine rarefacere. Quod  
 etiam exemplo tarditatis in motu poſſumus declarare. Tarditas  
 enim in ſucceſſibus eſt quedam partium laxitas, ſimiliſſima tarditati  
 in permanentibus.

Tarditas autem motus ſine fine relaxari, & mobile remorari in  
 infinitum poſſet, etiam ſi continue moueatur, quod ſic poſſumus  
 demonſtrare.

Pone gnõmonem ſeu indicem horologii, ad conuexum uſque  
 cæli primi mobilis extendi: infima pars eius, vt nunc, totam tabu-  
 lam & numeros omnes horologii pererrabit ſpatio 24. horarum,  
 ſummã vero pars immanẽ illum cæli circuitum percurrat eodem  
 tempo-

tempore. Fac iam primum mobile à Deo in distantiam à terrâ duplo maiorem sursum attolli, & indicem horologij eò etiam vsque protendi; ita tamen, vt primum mobile non celerius moueatur, quàm cum esset in spatio quo iam est, duplo videlicet terræ viciniori: absoluet igitur iam circuitum suum duplo maiorem horis 48. & index horologij eodem tempore, id est, duplo tardius quàm nunc, tabulam horariam circuibit. Fac deinde adhuc duplo altius primum mobile à Deo eleuari, nec tamen velocius quàm nunc moueri: ecce iterum index eousque extensus, 96. solum horis circuitum eundem perficiet. & ita porro si altius & altius sine fine primum mobile euclatur, permanente semper eadem velocitate motus, index in infinitum tardius tardiusque per superficiem tabulæ horariæ continuò incedet. Cur enim vllò vnquam tempore quiescat, cum supremam eius cuspidem primum mobile tam rapido motu circumducatur?

Sed nimisquàm mirabilissima sunt ista, inquiunt, & quis tam fatuus, aut simplex, vt credat?

Talia sunt pleraque opera Dei, nec millesimam eorum profunditatis partem acie penetramus, vbi nos maximè lynceos reputamus. Credibilia sunt tamen à mentibus eruditis & benè compositis, quæ cogitant infinitudinem potentiae & sapientiae Opificis.

Et profectò nemo vnquam veteris, aut nostræ memoriæ Mathematicorum rem istam in incerto posuit: & ecce Princeps eorum Archimedes, qui inuentà machinà Charistio pancratico, Regi Hieroni exclamauit, *ὅς μοι τῆς γῆς, καὶ τοῦ τὰς γῆς, da mihi vbi consistam, & terram mouebo*, quot annorum, putatis, continuo motu, ad altitudinē vnus pedis centro se pondus istud emoturum sperauit? Streuinus noster nuper demonstrauit, constituendo totum terræ pondus esse 2 | 400 | 000 | 000 | 000 | 000 | 000 | 000 | 000. librarum, ab homine qui singulis horis quater millies manubrium Charistij reuolueret, iugi decem continuorum annorum motu,

terram <sup>10112</sup>  
1400000000000000000000 vnus pedis suâ sede emotum

Lib. 3.  
prop. 10.  
Praxis  
itauc.

iri. Et quamuis, ait, quantitas ista nec cerni nec notari possit, potentia tamen (machinæ) infinita nobis ita demonstratur & animo concipitur, quæ multis annorum sæculis continuata motum oculis quoque notabilem produceret.

Si igitur mobile multis sæculis per spatium vnus, aut dimidij pedis



pedis continuò moueri possit, quis neget partes in spatio tam angusto infinitas esse, & motum quo mobile per eas incedit, sine fine languescere ac retardari posse? Si enim finitis punctis spatium illud pedale stratum esset, totidem temporis momentis continuato motu, id est, breuissimo tempore, necessariò abfolueretur. Motus verò continuus negari non potest, quia manus continuò manubrium machinæ versat, nec est caussa, cur vno tempore potius moueat, & alio cesset.

Veluti autem ex tarditate motus infinità rarefactionem posse sine fine procedere ostenditur, ita ex velocitate motus, quæ etiam in infinitum incrementum potest (cur enim Deus cælestes sphaeras ampliores & ampliores sine fine creare nequeat, quæ omnes 24. horarum spatio reuoluantur?) ostendere possumus, condensationem, si ad virtutem diuinam comparemus, nullum habere finem. Nec aduersus ista (vti neque contra diuisionem vnius grani milij, aut arenulæ in infinitum, & id genus cetera) vllum validum argumenti genus ostendere, sed nudare solum risu dentem possunt, aut iacere in nos, vice teli, suam admirationem: in quâ paria cum ipsis facimus, & ad hæc; aliaque plura diuini Opificis opera frontem cum silentio, sine risu, asseueramus, itamusque etiam nos maximâ defixi admiratione.

## PARÆNESIS AD PHILOSOPHOS.

**I**Taque licet tenebræ reliquæ hîc sint, nec in fundum vsque possumus despicere, cogitate, ô Philosophi, cum aliis multis id isti rei esse commune. *Cuncta res difficiles, non potest eas homo explicare sermone.* Et: *Quomodo ignoras qua sit via spiritus, & quâ ratione compingantur ossa in ventre prægnantis; sic nescis opera Dei, qui fabricator est omnium.* Eccle. i.  
Ibid. i. i.

Dum oculos, inquam, per naturam circumferimus, quid, quæso, est quod non per caliginem adspicimus? Magneticas virtutes, & occultas medicamentorum vires, & infinita alia nil attinet recensere: ecce lumen, colores, & ipsa ista quæ nobilissimo & maximè penetrabili oculorum sensu haurire dicimur, quàm parum comprehendimus! Vbi altissimè acies nostra penetrat, in summâ tamen cute hæret. Quenam enim colorum, aut ipsius lucis funditus natura sit, reuerà ignoramus.

Iam in vobis ipsis, quàm admiranda naturæ arcana Deus occu-

B b

luit!

luit! Quis volubiliū nostrarum cogitationum, quos ipsi facimus nobis, enarrabit flexus? quis officinæ cerebri, & tot ibi fabricatarum imaginationum veram anatomiam dabit? quis animæ nostræ dicet, quid ipsa in sensuum externorum ludat organis? Verè quidam dixit, humanam animam fabro ærario simillimam esse, qui clausâ vndique & tenebrosâ officinâ incudem suam tundens, nec satis gnarus quid agat, exerto è fenestellâ fuliginoso capite, à prætereuntibus sciscitatur, in quânam regione verletur, & quid ibi agitet. Nam reuerâ miscella anima, sui suarumque functionum ignara, ab analogiâ quadam & malè expressâ similitudine rerum quas foris circumspicit, tenuem & nebulosam tantum aliquam sui cognitionem emendicat. Cur igitur qui alibi tam nocturnæ, hîc aquilæ esse, & tam acutum in re obscurissimâ cernere poscimus? Sufficiat alibi nobis, ex effectu causam conclusisse, etsi hanc in se minimè inspicere valeamus. sic Deum, tam abditum & inuisibilem, ex creaturarum conditione & regimine colligimus: sic marini ætûs causam in lunâ esse coniectamus, licet qualis ac quænam sit illa, nescire omnes fateamur. Sit igitur etiam nobis satis, admirabilem illam ex partibus sine fine diuisibilibus continui compositionem, tot experimentis & indicijis quæ toto hoc libello sparsimus, deprehensam esse, etsi comprehendere non valeamus. Quid mirum? omnium intellectuum angustissimus humanus est, & infinitudine illâ partium obrui potest, capere eam non potest.

Et de compositionis istius fide quid tricatur, & delicias facit Epicurus? Dicat, si potest, quomodo poma concrecant in arboribus, quomodo caseus in fscellis, butyrum in alueolis: qualibus mercibus *omnes libros suos repleuit*, ut ait D. Hieronymus. Numquam nobis, inquam, satis edicet, quâ ratione concrectiones istæ fiant: quâ viâ casei, operâ chyli animalium, ad coagulum illud veniant, quomodo butyrum agitatione & calore lactis concrecat, & tamen ignis minimo afflûtu mox colliquescat. Ecce, quibus in rebus infestum & penetrabile illud eius retundatur acumen.

Nuper etiam vir eruditus & prudens mihi suggererat, Deum in hac compositione continui voluisse aliquod infinitatis suæ vestigium esse, quo mundi sapientes in sui respectum attraheret & admirationem. *Et reuerâ*, inquit D. Augustinus, *hæc est utilis ac oculorum operum Dei, ne propterea vilescant, ne comprehensa mira esse desinant*. Et tam multa eiusmodi in totâ naturâ rerum, opera esse censet, ut Iuliano animosè rescribat: *Nisi sermonis longitudine nollem*

Lib. 2. ad-  
uers. Iovin.

Lib. 6. c. 3.  
contra Iul.

lem fatigare Lectorem, iam te mille rerum generibus, quarum incomprehensibilis est ratio, contra vsitatas naturæ vias, quasi per deserta opaca obruerem.

Per tenebras etiam istas naturæ præparat Deus mentes sapientum huius sæculi (qui contumacissimè ad Christum, D. Hierony- In Iom-  
mo teste, attrahi solent) vt obedientius Fidei caliginem intrent, c. 3.  
qui per eam, inter humanas etiam disciplinas ambulassem memine-  
runt. Verè enim de disciplinis istis M. Tullius: *Omnis cognitio mul- Lib. 4.  
tis est obstructa difficultatibus, eaq; est & in ipsis rebus obscuritas, & Acad.*  
*in iudicijs nostris infirmitas, vt non sine causâ & doctissimi, & anti-*  
*quissimi inuenire se posse, quod cuperent, diffisi sint.* Hinc liquet,  
quanti, in hac rerum omnium obscuritate, antecedentium vesti-  
gia & auctoritatem oporteat æstimare. certè in nocte securius am-  
bulat, qui viâ publicâ, & in turbâ peritorum graditur, quàm qui  
solus semitas, aut inter paucos lusciosos quærit.

Quanti porrò auctores Plato, Aristoteles, Zeno, id est, trium prin-  
cipum Græciæ scholarum Principes, nil attinet dicere, & Græcia  
tota, imò terrarum Orbis iam & olim perstrept eorum laudibus.  
Græcos, vt fauoris nimios, aut suspectos omittamus; de Aristotele,  
quid ais Plini? *Aristoteles vir est, inquit, immensa subtilitatis.* Et Lib. 18.  
Auerroës: *Aristoteles est humani ingenij finis.* Alius tamen etiam c. 34.  
Græcus iste (Philoponus est) euexit: *Aristoteles humanum inge-*  
*nium excessit.*

Et sane in veteribus Scholasticis nostris legere memini, assumi  
oportere hanc à nobis mensuram, vbi periclitari volumus, an pro-  
positio aliqua diuinæ Fidei superet verticem humani intellectus:  
*Aristoteles istud Fidei dogma non intellexit; igitur excedis naturale*  
*lumen humana mentis.* Adduntque, ingenium illud in antecessum  
à Deo Ecclesiæ Catholicæ præparatum, ac veluti faculam accen-  
sam, quæ paullisper tenebras molliret, vt nox nostra promptius &  
facilius diuinum Fidei lumen exciperet.

Hic tamen humani ingenij apex, sententiæ suæ & communis  
tam securus fuit, vt alicubi dicat: *ὁ γεωμετρικὸς ἀνελὲν τὰς ἀτόμους* Lib. 3 c. 6.  
*γεωμετρίας, non esse difficile destruere lineas indivisibiles:* sic enim  
*puncta,* quæ alij partes linearum faciebant, appellat. Et alibi ait,  
Democriticos istos *ὡς τὰ μέγιστα καὶ τὰ μικροτάτα, res maximas Ma-* Lib. 1. c. 5.  
*thematicorum mouere, & euertere.* id est, *genus illud disciplinarum,* Lib.  
*quod adfert argumēta, nisi fallor* (D. Augustinus loquitur) *certissima;* Lib. de  
*quibus quod fueris inuentum atque confectum, non nisi impudentem* Quant.  
*anim. c. 15;*  
*habeat*

*habeat dubitationem, quantum homini talia vestigare permiffum est.*

In Sophist. Si verum etiam istud diuini Platonis: Τὸ ὁμολογεῖσθαι ὅτι βελ-  
πύων, κειώπες ἢ τὸ ὄντα χειρότων, quod à melioribus conceditur,  
maiorē vim auctoris atemq; habere, quàm quod à deterioribus: quis  
dubitet, ab Academicis, Peripateticis, Stoicis, vinci Epicurum,

Γραμμαδοδιδασκαλίδω, ἀναγωγῶν ζῶντων,

*Grammatices doctorem, dissolutissimum mortalium,*

vt olim in eum cecinit Timon? quis dubitet, tot SS. Patrum, &  
Scholasticorum auctoritate opprimi Ioannem VVicleffum, Ioan-  
nem Hufsum, & Hieronymum Pragensē?

Denique tantorum ingeniorum in re difficillimā, & omnibus  
quibus nunc telis aut pluribus olim oppugnatā, consensus tantam  
veri similitudinem & argumentum habet, vt possim hīc, quod in  
re dissimili S. Bernardus: *Quomodo potuit hoc persuaderi generi hu-*  
*mano, vniuerso Orbi terrarum? Et tamen tam facile, tam potenter per-*  
*suasum est, vt mihi credibile faciat credentium multitudo.* In hac et-  
iam multitudine aui & maiores nostri Louanienſes, quos censere  
vniuersos nihil opus: pro omnibus eruditus & nobilis Philosophus  
Ioannes Beuerus potest loqui. *Certissimum est, inquit, magnitudinem*  
*quālibet in infinitum diuidi posse: quia omnis magnitudo est continua.*

Serm. 3.  
Virg. Na-  
tuit.

Lib. 3. c. 4.  
Phyc.

Ecce, vt non simplici, sed maximā id affirmit certitudine. &  
profectō tantam facere videntur vniuersim argumenta, quibus fa-  
tis, nisi fallor, dissecimus Epicuri atomos & πανταρμίας. Nisi enim  
magnitudo in infinitum diuidi possit, oculis pæne ipsis cerno,  
nullum motum localem futurum, nisi inconditum & deformem,  
inanitatibus deinde, penetrationibus, replicationibus corporum,  
ceterisque à quibus tantopere natura abhorret, perturbandam &  
confundendam Vniuersi harmoniam.

Vnde perfectionis diuini huius operis interfuit, talem ab Opifi-  
ce continui compositionem eligi, quā hīc incommodis iretur  
obuiam, id est, ex partibus sine fine diuisibilibus, modò tamen  
nullam implicet contradictionem: quam nemo hactenus osten-  
dit, & (licet vates non sim) ausum asserere, olim ostender nemo.

Itaque redite in maiorum vestrorum disciplinam & Philoso-  
phiam, ô Louanienſes. neque infinitudo illa partium vos obstupe-  
faciat. cogitate enim Opificem magis infinitum, & inter tot natu-  
ræ mirabilia, miserrimum argumenti genus esse, Admirationem.

# INDEX CAPITVM.

**C**AP. I. Leucippus auctor partium indiuisibilium continui. Celebrauit deinde eas multis libris editis Epicurus. pag. 1.

CAP. II. Pythagoras, Plato, Zeno Citiens, falsò Epicureis in compositione continui ex atomis, adiuncti. Macrobius etiam, & Psellus iis abstracti. De Plutarcho res dubia. 2.

CAP. III. Subtiliores, inter eos qui continuum ex atomis struxerunt, ex infinitis potius quam finitis composuisse. Epicurum tamen & Empedoclem finitas maluisse. 9.

CAP. IV. Sententiam Epicuri iam obsoletam instaurauit Ioannes VVicleffus. Damna erroris in Philosophiâ à Concilio Constantiensi. Auctoritas sessionis 15. in quam censura illa incidit, adstructa. 11.

CAP. V. Non falsò tantum, sed imperitissimè D. Augustinum à VVicleffo in suam & Epicuri sententiam trahi. D. Basilium etiam, & SS. Patres passim in Mathematicorum & Aristotelis sensu fuisse. 19.

CAP. VI. Admirabilis maximorum omnium totius humani generis ingeniorum consensus in infinitudine partium continui. 22.

CAP. VII. Quale ingenium Epicuri, & eorum qui *παλαιά* atomorum reppererunt. 25.

CAP. VIII. Argumentum primum Geometricum, quo demonstratur, magnitudinem non componi vltimò ex solis punctis finitis: Non à quouis puncto circumferentia recta duci poterit ad centrum. 29.

CAP. IX. Argumentum secundum Geometricum idem demonstrans: Tot erunt in Diametro puncta, quot in toto semicirculo. 36.

# INDEX CAPITVM.

- CAP. X. *Argumentum tertium Geometricum idem demonstrans.* 37.
- CAP. XI. *Argumentum quartum Geometricum, quo Aristoteles idem demonstrat.* 40.
- CAP. XII. *Argumentum idem aliter, ac magis dilucidè propositum.* 43.
- CAP. XIII. *Argumentum quintum Geometricum: Circulum nullum ex punctis Epicuri fieri posse.* 46.
- CAP. XIV. *Argumentum sextum Geometricum: Luna integram vndique terræ globum, sol nihil omnino eius illuminabit, nisi fallitur Epicurus.* 50.
- CAP. XV. *Argumentum septimum Geometricum: Solem à nobis tantum videndum certis quibusdam interuallis, non in omni puncto sui circuli.* 54.
- CAP. XVI. *Argumentum primum Physicum: Equus Adrastæ, si Epicuro credimus, numquam cursu testudinem affequetur.* 56.
- CAP. XVII. *Vana fuga eorum, qui mobile acceleratione motus censent replicari.* 58.
- CAP. XVIII. *Fuga aliorum occlusa, qui in motu quolibet tardiore moras & pausas interseminant.* 62.
- CAP. XIX. *Argumentum secundum Physicum: Puer ferreos rotæ radios minimo nisu incuruabit.* 67.
- CAP. XX. *Argumentum tertium Physicum: Trochæus acri flagello in orbem actus, longissimo tamen tempore quiescet.* 69.
- CAP. XXI. *Argumentum quartum Physicum: Umbra gnomonis horologii solaris non prouietur in partem plani directè auersam à sole.* 70.
- CAP. XXII. *Argumentum quintum Physicum: Oculi rem pupillæ suæ maiorem simul distinctè non videbit.* 71.

CAP.

- CAP. XXIII. Argumentum sextum Physicum : Fluvius nullus poterit navigari. 73.
- CAP. XXIV. Argumentum septimum Physicum : Pleraque, aut omnia ædificia corruerent. 74.
- CAP. XXV. Argumentum octauum Physicum : Continuum contexi ex indiuisibilibus sine vacuo interiecto non potest. 76.
- CAP. XXVI. Argumentum nouum Physicum : Sine vacuo, vel partium penetratione, aut replicatione propriam condensationem corporum expedire non possunt Epicuræi. 80.
- CAP. XXVII. Frustrà euadere tentant, negando quidquam, nisi vulgari condensatione, posse naturaliter condensari. 81.
- CAP. XXVIII. Alij cum Veteribus per vacuitates fistulosas fugam moliuntur: quam tamen non est difficile obstruere. 84.
- CAP. XXIX. Sed neque per penetrationem partium quantitatis effugere possunt. 88.
- CAP. XXX. Nec condensatio explicari potest per diminutionem replicationis, quâ singula puncta replicata esse aiunt in corpore raro. 95.
- CAP. XXXI. Frustrà quidam conati inter Aristotelem & Epicurum medij incedere, negando vllas esse in continuo partes, aut asserendo infinitas, sed indiuisibiles. 97.
- CAP. XXXII. Verius, nulla in continuo reperiri positiua indiuisibilia præter partes in infinitum diuiduas. 99.
- CAP. XXXIII. Argumenta quibus indiuisibilia, tam continuantia, quàm terminantia, quantitati videntur inferi. 108.
- CAP. XXXIV. Ex globi, cylindri, planorum contactu, puncta, lineas, superficies positiuas corporeæ quantitati perperam affui. 111.

# INDEX CAPITVM.

- CAP. XXXV.** *Ad explicandam actionem vniformiter dif-  
formem, non esse necessaria indiuisibilia terminantia, aut  
copulantia in medio, per quod actio se extendit.* 119.
- CAP. XXXVI.** *Color qui in superficiebus corporum opa-  
corum dicitur conspici, aut lumen ab iis reflecti, nihil eos  
qui superficies reales fabricantur, adiuuant.* 125.
- CAP. XXXVII.** *Propter Vbi Angeli, aut anime rationa-  
lis indiuisibile, non sunt insuenda magnitudini positiua in-  
diuisibilia. Sine indiuisibili etiam termino motus, vel soni,  
retineri & explicari potest Physica efficientia gratia in Sa-  
cramentis.* 131.
- CAP. XXXVIII.** *Tempus etiam ex partibus in infini-  
tum diuisibilibus, sine vlla positiuorum instantium mixtura  
componi.* 137.
- CAP. XXXIX.** *Argumentum primum Geometricum, quo  
Aristotelem oppugnare potest Epicurus.* 141.
- CAP. XL.** *Argumentum alterum Geometricum, ex praece-  
dentis solutione natum, quod Epicurus in Aristotelem iterum  
arripere potest.* 144.
- CAP. XLI.** *Argumentum tertium Geometricum, quo  
superficies calorum contiguas Peripateticis obiciunt Epi-  
curei.* 148.
- CAP. XLII.** *Argumentum quartum, quo ostendere co-  
nantur, quantitatem ex infinitis partibus proportionalibus  
confutam, nullis finibus posse contineri: sed conantur  
tantum.* 150.
- CAP. XLIII.** *Argumentum quintum, quo Zeno motum  
localem compulsus est negare.* 153.
- CAP. XLIV.** *Argumentum sextum: Ex tractu globi super  
planum, aut cuiusuis rei indiuisibilis motu colligunt, magni-  
tudinem ex solis indiuisibilibus compositam esse: sed nitun-  
tur frustra.* 157.

CAP.



# INDEX CAPITVM.

- CAP. XLV.** *Argumentum septimum, quo perperam credunt, in sententiâ Aristotelis, sphaeram aëtiuitatis nullum finem habituram esse.* 163.
- CAP. XLVI.** *Argumentum octauum, quo contendunt, sine vacuo, penetratione, aut replicatione, condensationem ab Aristotele explicari non posse.* 166.
- CAP. XLVII.** *Argumentum nonum, quo ex replicatione Angeli, aut animæ rationalis Epicurum tueri conantur: sed incaſum.* 176.
- CAP. XLVIII.** *Argumentum decimum: Tempus esse perpetuum momentorum agmen, ex quo continuum permanens etiam ex meris punctis concinnant: vtrumque falsò.* 179.
- CAP. XLIX.** *Siluuula alia argumentorum, quibus Aristotelem conantur obruere: sed nequidquam.* 187.
- CAP. L.** *Miraculis denique quibusdam pueros & naturæ imperitos ab Aristotele auertunt, viros & mirabilium Dei & naturæ conscios non possunt.* 190.
- Paranesis ad Philosophos.* 193.

## FINIS.



## A P P R O B A T I O.

**C**YRIOSA Veri indagine filum Fromondus extendit, cuius ope infinitudinem partium in continui Labyrintho tutò incurras & excurras. Act. Louanij 2. Oct. 1630.

*Mart. Lunacenius S. Theol. L. &  
Prof. Ordin. Apostolicus ac Re-  
gius Librorum Censor.*

## S V M M A P R I V I L E G I I.

**P**HILIPPVS IV. Hispaniarum & Indiarum Rex Catholicus, ac Potentissimus Belgarum Princeps, diplomate suo fanciuit, nequis *Liberti Fromondi S. Th. Doctoris & in Academiâ Louanienfi Professoris Labyrinthum, siue de Compositione continui Librum*, præter Balthafaris Moreti voluntatem vlllo modo intra sexennium imprimat, aut alibi terrarum impressum in Germaniæ Inferioris ditiones importet, venalémve habeat. Qui secùs faxit, confiscatione librorum, & aliâ graui pœnâ mulctabitur, vtì latiùs patet in litteris datis Bruxellæ vi. Februarij M. DC. xxxi.

Signat.

*Steenhuysen.*